




5.9.304

XII

HABER

1910



PHILOSOPHIA
VETUS ET NOVA
AD USUM SCHOLÆ

Accommodata ,
IN REGIA BURGUNDIA
Olim Pertractata ,
A JOH. BAPT. DU HAMEL.
TOMVS SECUNDVS.

Qui Philosophiam Moralem
complectitur.

Editio Vltima multò emendatior & auctior, cum
Figuris æneis & ligneis.



AMSTÆLODAMI,
Apud Huguetanos.

MDCCIV.





COMMENTARII

In decem Libros

ETHICORUM

ARISTOTELIS.

P R Æ F A T I O.



PHILOSOPHIAM Rationalem, seu Logicam, quam veteres Rationalis Philosophiæ nomine complexi sunt Moralis excipit: illa mentis, hæc voluntatis actiones dirigit ac perficit: illa quid verum sit, quid falsum, quid consentiens, quid repugnans judicat; hæc quæ sit honestè vivendi ratio, quid justum, quid iniquum, nos docet, ac mores præceptis, & ratione format. Nam ut ars illa veri & falsi disceptatrix, quæ Logica dicitur, initium à natura, summum à doctrina & usu accipit: sic honesti justique disciplina, quam Ethicam dicimus, à natura quidem est inchoata, quæ primos velut impetus ad virtutem dedit; sed nisi mores subinde exco-

lantur, & doctrina perficiantur, ea virtutum semina, aut igniculi animis nostris congeniti, malis moribus, & pravis opinionibus ita restinguuntur, ut vix interluceat naturæ lumen.

Itaque præter naturalem illam, & mentibus nostris innatam, alia quoque nobis est necessaria Moralis Philosophia, quæ doctrina & consuetudine comparetur; quæ difficultates innumerabiles usu & præceptis amoveat, varios quibus imbuimur errores corrigat, morbis, demum animi medeatur. *Neque enim, ut ait Tullius, id probari potest, ut sibi mederi animus non possit cum ipse medicinam corporis invenerit.* Quanquam illud meritò demiratur, quid causæ sit, cur cum constemus animo & corpore, corporis curandi, tuendique causa quaestita sit ars, atque ejus utilitas deorum immortalium inventioni consecrata; animi autem medicina nec tam culta posteaquam cognita est.

Etsi verò non dubitamus, quin omnis vitæ instituendæ ratio a Christiana religione sit repetenda, quæ una omnes animi morbos detegit & curat: tamen id Theologis explicandum relinquimus, ne partes nostras omittamus, alienas demum occupemus. Quare legem illam animis nostris incisam, quæ naturalis dicitur, potissimum hoc loco consulimus, atque ex ea conclusiones ratione duce eruimus; quæq; a Philosophis tradita sunt, aut controversa, pertractanda suscipimus.

Cum tamen lumen illud naturale peccati originalis labe & prava consuetudine plurimum fuerit imminutum: & pene ob-

scu-

scuratum, non ab ipsis tantummodò Philosophis, sed multò maximè a Christiana religione, & sacris Libris veræ sapientiæ præcepta sunt repetenda. Nam verbum Dei, ut ejus providentia, ad omnes æquè pertinet; magnis juxta & parvulis est utile. Philosophi per paucis utilia scripsere: tametsi innumerabiles libros de moribus instituendis ediderunt. *Faciendi plures libros nullus est finis, inquit Ecclesiastes, frequensque meditatio carnis afflictio est: finem loquendi pariter audiamus, Deum time, & mandata ejus observa: hoc est enim omnis homo.* Hæc videlicet summa est omnium quæ a verè sapientibus scripta sunt.

Quocirca id nobis in hac editione maximè fuit propositum, ut morum scientiam non solùm ex Philosophorum libris, sed etiam ex sacris Authoribus, quantum instituti nostri ratio pateretur, depromptam traderemus: sic tamen ut meminerimus nos Philosophiam, non Theologiam tractandam suscepisse. Sed illud semper viros graves & pios malè habuit, quòd plerique Philosophi nulla ferè præcepta morum tradant, dum quæstiones alias ex aliis & plerumque inutiles nectunt. Nulla ferè ex iis quæstionibus, quæ exercendis adolescentum ingeniis utiles nobis videntur, quæque in scholis tradi solent, a nobis est prætermissa: sed præcepta moribus instituendis accommodata ex sacris & profanis Scriptoribus desumpta suis quæque locis sic inseruimus, ut seriam utilitatem aliqua delectatio perfunderet, ut varietas ipsa sententiarum Lectorū animos illiceret & fas-

studium quod huic generi studiorum plerumque adhærescit, penitus abstergeret. Docere magis, quàm delectare volumus, sed minuenda erat rerum asperitas.

Philosophia, inquit Tullius, *nos primùm ad Dei cultum, deinde ad jus hominum, tum ad modestiam, magnitudinemque animi erudit.* Quid igitur Deo, quid nobis ipsis, quid aliis debeamus, quantum id saltem lumine naturali nobis potest innotescere, explicandum, nec otiosis quæstionibus, nec magni ad formandos mores momenti contenti esse debemus. Sed priusquam hoc ipsum agamus, perpauca de natura Philosophiæ Moralis dicenda sunt antè breviter.

DISPUTATIO PROOEMIALIS.

De natura Philosophiæ Moralis.

Circa naturam Philosophiæ Moralis tria potissimum quæri solent: primò, quod sit illius objectum. 2. quod illius genus. 3. quotuplex ea sit: Cumque magna ex parte hæc sint explicata in Philosophiæ ipsius limine, & in extrema Logicæ disputatione, majore brevitæte ea decurremus, ne cum fastidio jam sæpius dicta repetere videamur.

QUÆSTIO PRIMA.

Quod nos Moralem disciplinam hoc Græci *Ἠθικὴ* vocant, a voce Græca *ἦθος* quæ mores propriè significat. Quam Fabius existimat sermonem Romanum

num carere nomine, quod vocem illam Græcam exprimat *nam rei naturam spectantem, non tam, inquit, mores significari videntur, quam morum quadam proprietas, affectum videlicet lenitas quadam & mitigatio: ut patet* hos affectus concitatos intellectu suo complectitur. Moribus tamen omnes habitus mentis contineri putat: non quidem eos qui sunt merè theoretici, quique ab Aristotele Dianoetici, seu intellectuales nominantur: sed qui ad actionem tendunt, & ad appetitum pertinent, ii propriè mores dicuntur.

Ex quibus liquet mores hoc loco sumi pro affectibus, vel a natura congenitis, vel consuetudine acquisitis. Qui quidem affectus a Philosophia Morali spectantur, quatenus a ratione regi & ad honestum flecti possunt. Non enim mores vel natura sola constant, ut quidam crediderunt; vel divina tantummodo forte contingunt, ut voluit Plato; sed consuetudine & disciplina plurimum adjuvantur. Virtutem inchoat natura, consuetudo aut doctrina promover. Nam si quæ manu fiunt, atque eorum etiam contemptissima egent Doctoribus, an virtutem ipsam, tantum quia nati sumus, habebimus?

Ac de notione quidem, & utilitate Philosophiæ Moralis nunc diximus: nunc quod sit illius objectum paulò accuratiùs excutiendum. Atque ut nos ad usitatum in Scholis ordinem referamus, sit

Unica Conclusio.

Objectum Moralis Philosophiæ sunt actiones humanæ, ut ad honestatem dirigendæ.

Probatur Conclusio. Illud est objectum alicujus disciplinæ integrum & adæquatum, cui conditiones omnes ad objectum requisitæ omnino conveniunt: sed actio humana ut ad honestatem conformanda, omnibus est prædita conditionibus, quæ objecto scientiæ alicujus inesse debent. Primò enim tantum patet, quantum Moralis disciplina.

2. Quæ tractantur in Ethica ad eam referuntur, vel ut partes, vel ut proprietates, vel demum ut principia. 3. Ab omnibus aliis disciplinis Ethica distinguitur, quod circa actiones morales, quæ scilicet ad honestum ratione dirigi possunt, ea versetur; ac de moribus instituendis præcepta & regulas tradat. Ergo objectum Ethices sunt actiones morales, quatenus scilicet ad rectum vel honestum formari & dirigi possunt.

Confirm. Objectum formale disciplinæ practicæ est forma ipsa quæ juxta illius disciplinæ præscripta producitur, ut objectum formale Rhetorices est ornatus orationis: sed rectitudo moralis est forma ipsa, quam hæc scientia in actus voluntatis conatur inducere: ergo rectitudo moralis est objectum formale hujus disciplinæ.

Diluantur objecta.

Opp. I. In practicis disciplinis idem est obje-

objectum & finis : sed beatitudo est finis Moralis Philosophiæ, & ad eam referuntur omnia quæ traduntur in hac scientia: ergo beatitudo est etiam objectum Moralis Philosophiæ.

Resp. dist. maj. Idem est objectum & finis intrinsecus, ac proximus disciplinæ practicæ, C. idem est objectum & finis cum remotus, tum externus scientiæ practicæ, N. Beatitudo verò est scientiæ Moralis, ut omnium disciplinarum finis externus & ultimus, non ipsis intrinsecus & proprius: est enim actionum humanarum conformatio ipsius Ethices finis proprius & intrinsecus: neque hunc finem consequimur nisi si mus bene morati.

Opp. 2. Objectum disciplinæ practicæ est opus ipsum, non operatio: ut objectum architecturæ est ædificium, non ædificatio: sed Moralis scientia est practica, ut postea dicemus: ergo objectum illius non sunt actiones honestæ, sed ipsa opera, in quibus honestas elucescit.

Resp. dist. maj. Objectum disciplinæ practicæ quæ circa opus sensibile versatur, quales sunt architectura: fabrilis, & artes pene omnes, est opus ipsum, non operatio C. in disciplinis quæ circa res sensibiles non occupantur, cujusmodi sunt Logica & Moralis; objectum est opus ipsum, non operatio, N. Hæ quippe scientiæ circa actiones animi spirituales, & per se expetendas versantur. Contra res se habent in plerisque artibus, quæ in opus aliquod tendunt: in his enim quid fiat, non quo animo id fiat, attendimus: sed in mo-

ralibus magis spectatur quo quisque animo, quave intentione agat, quàm quid efficiat.

Opp. 3. Moralis ipsa Theologia in humanis actibus ut ad honestatem dirigendis versatur; mores format, morbos animi detegit, & sanandi rationem præscribit: ergo actus humani ut ad honestatem dirigendi non sunt proprium Philosophiæ Moralis objectum: præsertim cum instituendæ vitæ ratio & morum præcepta è Sacris Literis, & SS. Patrum cœlesti doctrina tutius repetantur, quàm ab Ethnicis Philosophis, qui neque inflicta naturæ humanæ vulnera, nec malorum originem & fontem, neque eorum curationem cognoverunt.

R. dist. maj. Theologia moralis circa actus humanos ad honestatem supernaturalem formandos ex principiis divino lumine revelatis occupatur, C. circa mores instituendos ex honestatis naturalis præscripto, & ex principiis lumine naturali notis, N. Itaque morum institutio ad Theologiam & Philosophiam pertinet: sed utraque iisdem non utitur principiis, nec circa idem objectum formale versatur. Philosophus enim Moralis ex principiis agendi a natura congenitis conclusiones eruit: Religio Christiana, aut Moralis Theologia non solum ea principia juris naturalis in magna hominum parte fere deleta restituit: sed quid faciendum nobis sit, quid eligendum, ex divina auctoritate præscribit; nec humanam duntaxat felicitatem, sed æternam divino adjutorio acquirendam pollicetur, & ad eam nos ducit.

Quamquam id ultro concedimus veræ sapien-

sapientiae praecepta magis ex sacris Authoribus, quam ex Philosophis desumi oportere. Nam *ille est sapiens*, ut ait S. Bernardus, *cui Deus sapit*. Sed Deus, inquit Regum sapientissimus, *dat sapientiam*, & *ex ore ejus prudentia*, & *scientia*. Prov. 2. Neque ii sunt doctorum mores habendi, qui *relinquunt iter rectum*, & *ambulant per vias tenebrosas*. ibid.

Et iis colligitur quis sit finis Ethices, optima nempe morum institutio: eam praeceptorum quae in hac scientia traduntur cognitio efficit. Subjectum verò illius non est aliud quam intellectus, in quo disciplinae omnes dianoeticae, aut ratiocinatrices versantur: tametsi enim haec disciplina voluntatem regit, non alibi tamen quam in mente, seu in ipso intellectu inesse potest, uti nec scientiae omnes, aut artes quae alias facultates perficiunt, aut regunt.

Q U A E S T I O . II.

Quod sit genus Philosophiae Moralis.

CUM Moralis Philosophia sit habitus intellectualis, palam est eam nec Intelligentiam esse principiorum, nec Sapientiam, neque artem propriè dictam, cum activa sit, non effectiva: quare in hoc omnis quaestio vertitur. Prudentia sit, an Scientia, an utriusque nomen & rationem sibi jure vindicet. Sit igitur

Prima Conclusio.

Ethica est scientia propriè dicta.

Probari potest Conclusio iisdem rationibus, quibus ostensum fuit Logicam esse scientiam. Primò quod ex certis & inconcussis principiis certas & indubitatas conclusiones eruat. Nihil enim est in scientiis aut certius, aut evidentius, quàm reddendum esse unicuique quod suum est; parentes coli oportere; Deo ut conditori nostro, cui nos nostraque omnia debemus, parendum esse, & alia pene innumera, ex quibus certæ conclusiones eruuntur. Ergo Philosophia Moralis est scientia etiã propriè dicta, qualem Aristoteles in Analyticis definitione sua complexus est, habitus nempe demonstratione acquisitus.

Confirm. Omnis syllogismus, ut Aristoteles docet in Analyticis, aut est demonstrativus, aut topicus, aut sophisticus: atque omnis habitus discursivus & per syllogismum acquisitus, ad triplex hoc genus referri potest: sed Ethica non est habitus sophisticus, nec merè topicus: cum ex principiis certis & necessariis constet: ergo restat ut sit vera & propriè dicta scientia, seu habitus demonstrativus.

Secunda Conclusio

Philosophia Moralis, Prudentia quoque dici potest.

Probat. Conclusio. Prudentia definitur ab Aristotele habitus vera cum ratione activus circa ea quæ sunt homini bona vel mala. Sed Philosophia Moralis est habitus vera cum ratione activus: nam actus voluntatis regit; quæ sequi debeamus, quæ fugienda

da præcipit ; atque eò potius tendit , ut nos bonos , quàm ut doctos aut peritos efficiat . Ergo Ethica non solum scientia , sed & prudentia meritò dici potest . Unde & Politica , quæ est pars Moralis Philosophiæ non ab Aristotele modò , sed & vulgò civilis Prudentia nominatur .

Confirm. Actio ad prudentiam , ut effectio ad artem propriè pertinet ; illa est voluntatis , & per se expetenda , quæque agentem simpliciter bonum efficit : effectio est operatio artificiosa , quæque ab ingenio , seu ab intellectu potius , quàm a voluntate profiscitur : unde ad aliud referri solet , neque per se , ut actio honesta , expetitur ; atque ex effectione homo non simpliciter bonus , sed secundum quid dicitur , ut bonus architectus , aut pictor . Sed Moralis Philosophia circa voluntatis actiones versatur , in quibus magis intentio , quàm industria , & quo animo quis agat , quàm quid efficiat , spectamus . Unde ut docet Aristoteles , (6. *Eth. c. 6.*) in actione qui consultò & de industria peccat , magis est in vitio , quàm qui inconsultò , & non ex animo offendit : contra atque in artibus evenit . Ergo omnes conditiones quæ ad prudentiam requiruntur , in Moralem Philosophiam cadunt , quæ actus voluntatis regit & format . Hinc Aristoteles loco citato , *circa actionem* , inquit , & *agibilia versatur prudentia ; circa factionem verò & factibilia ars* .

Confirm. iterum. Ut Logica simul est ars & scientia ; ac Theologia , scientia quoque est & sapientia : sic nihil obstat quominus Ethica scientia simul & prudentia dici possit .

possit. Scientia quidem est, quatenus veras habet demonstrationes, ut vitium esse fugiendum, quia malum: Est itidem prudentia, quatenus est ratio honestè vivendi, ac prudentiæ proprium est bona eligere, mala fugere. Hinc Sapiens Prov. 9. *Scientia Sanctorum ea est prudentia*, qua scilicet rectum a pravo secernunt.

Hinc etiam veteres Philosophi Ethicam interdum artem definire. Nam latiore significatu artem dicimus habitum mentis, qui juxta directrices quasdam regulas operatur; cumque præcepta sequitur, quæ habitus ipse præscribit, aut facit ut ars mendi, ut Logica ipsa, tum ars simul est & scientia. Itaque Moralis disciplina cum actus humanos regat & disponat, hoc sensu ars dici utcunque posset. Cum autem sit activa, non factiva, ars propriè dici non debet: sed magis prudentia, quòd ea in bonis eligendis & malis fugiendis versetur. Hinc Plutarchus (*Lib. de virtut. moral.*) duorum genera distinguit, unum earum quæ sunt per se, ut cælum, sidera, terra; & circa eas versari sapientiam, seu scientiam docet: aliæ verò ad nos referuntur, ut bonum & malum, jucundum & molestum, quæ ad prudentiam propriè pertinent.

Solvuntur objectiones.

Opp. 1. Habitus seu virtutes intellectuales inter se distinguuntur: sed scientia & prudentia sunt habitus intellectuales: ergo ii sunt inter se diversi, nec Moralis potest esse simul & scientia & prudentia.

Resp.

Resp. Dist. maj. Virtutes intellectuales sunt distincti habitus officio, C. essentia, N. Unde ut Logica & Medicina scientiæ sunt & artes, sic Moralis erit scientia simul & prudentia. Nam scientia practica ars quoque, vel prudentia dici potest, ut effectiva est, vel activa. Fatemur tamen eundem habitum non esse scientiam speculatricem & prudentiam: cum illa in cognitione sui objecti conquiescat, non item prudentia.

Instant. Objectum scientiæ est necessarium & immutabile, objectum verò prudentiæ est contingens & liberum, idque pendet a nobis: ergo idem habitus non potest esse & scientia & prudentia.

Resp. Dist. ant. Objectum scientiæ est necessarium necessitate essentiae, C. necessitate existentiae, N. cum enim unus Deus necessario existat, si necessitas essentiae, seu propositionis ad objectum scientiæ non sufficeret, sola Theologia scientiæ nomen sibi vindicaret. Quare ut scientiæ, sic prudentiæ, aut Moralis disciplinæ objectum est necessarium, nec pendet a nobis, nisi fortè quoad existentiam. Sic vitium esse fugiendum, propositio est æternæ veritatis: tamen si pendet a nobis divina gratia adjutis, ut vitium fugiamus, virtutem sequamur.

Opp. 2. Illi sunt diversi habitus, quorum principia actus, objecta ipsa sunt diversa: sed Moralis & Prudentiæ primum diversa sunt principia: illius enim principia sunt universalia, ex quibus conclusiones universas erunt; prudentia verò deliberat & præcipit quid agendum sit, hic & nunc; atque ex intentione finis, quasi ex principio singulari

gulari conclusionem elicit. Hinc sæpe accidit ut qui à Morali Philosophia sunt optimè instructi, imprudenter vivant, temerè agant, & turpe honesto anteponant. 2. Objectum utriusque est diversum: utraque enim circa actiones humanas versatur: sed illas, ut dictum est, Moralis universim prudentia particulatim & certis circumstantiis circumscriptas considerat. 3. Actus Moralis Philosophiæ est scire; actus prudentiæ est bene judicare, aut præcipere, idque ex recta finis intentione, quæ principii locum obtinet: ad eam quoque pertinet eligere, aut concludere quid sit faciendum, quid fugiendum. Postremò pravi affectus prudentiam corrumpunt; sed Moralem Philosophiam non vitia, non animi perturbationes, sed sola duntaxat ignorantia rerum agendarum eam destruit; ergo omnino diversa est a prudentia.

Resp. Duplicem esse prudentiam unam generalem, quæ quid faciendum sit, præcipit & judicat, cujusmodi est Ethica, quæ, ut diximus, est habitus vera cum ratione activus in his quæ sunt homini bona vel mala, alteram esse particularem, quæ conclusiones a generali prudentia deductas ad usum applicat. Eaque est virtus quæ voluntatem circa res eligendas, aut fugiendas dirigit, cum res & tempora id exigunt. Itaque una ab altera non aliter ferè distinguitur, quàm Logica docens & utens, aut Medicina generalis, quæ structuram corporis, partium usus, morbos, seu læsas functiones, medicaminum vires, curandi ratio-

tionem docet, & pars illa artis medendi, quæ his utitur præceptis, cum res & occasio postulant. Sic in omni ferè arte, præceptorum cognitio ab usu & peritia ipsa, si minus natura & essentia, certè officio distinguitur.

Itaque ad argumentum responderi potest, *distinguendo majorem*, ubi principia, actus & objecta sunt diversa, ibi sunt & diversi habitus, si principia unius non ducantur ex principiis alterius, aut si objectum unius non contineatur in alterius objecto, aut si actus denique unius non subordinentur actibus alterius, C. fecus, N. sic prudentiæ particularis præcepta sunt conclusiones ex generali, seu ex Morali Philosophia deductæ; objectum illius, objecto Ethices concluditur; actus denique prudentiæ particularis a generali prudentia reguntur.

Instant. Plerumque evenit, ut qui sunt optimè a Philosophia Morali instructi, sint in rebus agendis maximè imprudentes: ergo Moralis Philosophia prudentia dici non potest, præsertim cum hæc in bonis tantum & bene moratis inveniatur; Moralis autem Philosophia probis æquè & improbis communis sit, & sub eo nomine maxima in plerisque vitia latuerint.

Resp. dist. consequens. Philosophia Moralis non est prudentia specialis, C. generalis, N. Etsi enim, ut optimè Philosophus in 1. Ethicorum admonet, non eò tendit Moralis scientia ut nos doctos, sed ut bonos efficiat: tamen parum est optima quæque aut docere, aut præcipere, nisi & vivere
ut

ut præcipitur, studeamus. Hoc utique præstat prudentia specialis quæ est virtus cum aliis connexa, quæque in multis reperitur qui Moralem Philosophiam non didicerunt. In his enim potest esse vera prudentia, tum ex multis experimentis, aut observationibus, tum etiam ex principiis lumine naturali notis collecta; tum maximè ex divino auxilio. *Sapientia autem est viro prudentia.* Prov. 10. Nam vera sapientia quæ ex Deo est, hominem efficit verè prudentem. Aliud quippe est rem ut bonam judicare, aliud eam amplecti: illud cognitionem tantum, hoc amorem præterea & propensionem quandam postulat. Per generalem prudentiam in re tanquam bona acquiescimus; per prudentiam verò particularem in rem ipsam nitimur: illa est tantum in mente, hæc ad affectum usque & voluntatem diffunditur. Id enim quod prius, majusque est, ut boni viri simus, voluntate maximè constat, *quam*, ut optime Quintilianus, *qui vera fide induerit, facile easdem quæ virtutem docent, artes accipiet.*

Urgens: Omnis disciplina practica magis exemplis docetur, quàm præceptis, ut percurrenti omnes artes planum fiet: sed Moralis Philosophia non docetur exemplis: cum persæpe doctiores quique non sint meliores. Quod in aliis tamen scientiis semper, verum est, ut meliores, iidem sint peritiores: ergo Moralis, nec scientia est practica nec prudentia.

Resp. 1. Negari posse majorem. Qui enim aut medendi artem, aut militarem, aut politicam docent, exemplis præire non possunt, cum

cum ea non sint obvia, aut facilia; nec doctissimus quisque Medicus, idem sit optimus medendi artifex. Hoc utique verum est duntaxat in iis disciplinis quæ in sola contemplatione conquiescunt: ut, Astronomus hoc est melior, quò doctior.

Resp. 2. Eos qui disciplinam practicam tradunt, ut Moralem, præire exemplis aut alienis, aut suis, C. præire suis exemplis, N. neque enim necesse est ut qui præcepta administrandi rempublicam tradunt, iidem in administratione reipublicæ versati fuerint.

Ex iis facile colligitur quid sit Moralis disciplina, nimirum *ars honeste vivendi*, aut sit malis, *scientia practica quæ circa actiones humanas ut ad honestatem dirigendas occupatur*.

Est enim Ethice scientia practica, quæ objectum suum, nempe rectitudinem morum, seu ordinem in actibus humanis non considerat solum, sed facit, quæque ex principiis practicis ad agendum progreditur. Potest etiam definiri, *prudentia quæ in formandis moribus versatur*.

Q U Æ S T I O III.

De Philosophiæ Moralis divisione, & idoneo illius auditore.

Variæ Moralis divisiones vulgo circunferuntur. Ea quippe, ut Logica, vel est naturalis, vel acquisita; quæ rursus aut usu, aut doctrina comparatur. Dividi quoque potest in docentem & utentem: illa præcepta & regulas vivendi tradit; hæc
ad

ad usum eadem præcepta adhibet, idque efficit beneficio prudentiæ particularis quæ difficultates omnes, quæ in agendo occurrunt, quæque ex circumstantiis oriuntur, circumspicit & amolitur.

Sed usitata magis & instituto nostro aptior est Moralis divisio in generalem, seu communem, & specialem: illa mores hominum ad felicitatem adipiscendam format, optimis præceptis imbuunt, quæ omnibus sunt communia, & ad bene vivendum necessaria; eaque propriè est Ethicæ, quam tradere instituimus, quamque non privatus modò, sed etiam qui familiæ aut reipublicæ curam habet, docendus est.

Ethicæ generali tres subjiciuntur species, Monastica, Oeconomica, & Politica. Nam hominem spectare licet, vel quatenus sui unius curam gerit, & est singularis, tumque Monastica, aut potius Ethica generalis eum regit; vel præterea is esse potest, ad quem familiæ cura, aut etiam administratio reipub. pertineat: ut ei domus cura incumbit, ab Oeconomica instruitur, Politica verò eum instituit, qui aliis præest, cuique legum condendarum, aut tuendarum munus creditum est. Prima propriæ uniuscujusque, secundâ familiæ, tertiâ reipublicæ saluti consulit.

Prima in doctrinæ ordine est Monastica, potius Ethica: non enim video quid Ethicæ adjiciat Monastica. Hanc excipit Oeconomica, quæ familiam spectat, quæque mariti in conjugem, parentum in natos, domini in servos mutua officia præscribit. Postrema est Politica, quæ dignitate & autho.

authoritate est prima : nam eò tendit ut omnes bene & feliciter vivant. Cum enim homo aliorum ope & auxilio indigeat, tum in iis quæ ad vitam sunt necessaria, tum ut commodè vivat : in his quæ ad vitam degendam sunt omnino necessaria, à familia adjuvatur ; a civitate verò, vel a rep. id habet ut commodè & tutò vitam possit ducere.

Quæ contra hanc Moralis Philosophiæ divisionem opponi solent, facile dissolves, si adverteris aliud esse officium hominis, ut est privatus, aliud ut civis est, aut pars societatis : hinc diversa considerandi ratio distinctas quoque scientias efficit. Cum itaque

Opp. Monasticam & Oeconomicam esse partes Politicæ & ad eam referri, nec familiam specie differre a civitate : ergo nihil necessum est Oeconomicam a Monastica, aut Monasticam a Politica distinguere.

Resp. Monasticam & Oeconomicam partes esse Politicæ, & ad eam referri per accidens, C. per se, N. idque fere ut diximus in prolegomenis Logicæ, definitionem & divisionem referri ad argumentationem, ut partes illius sunt per accidens, quæ nimirum solæ possunt consistere : non ut sunt partes quæ pro se & essentialiter ad eam referuntur, uti caput est pars corporis. Aliud est enim esse virum bonum, aliud bonum civem. Fateor tamen ad Politicam id pertinere, ut cives sint bonis moribus informati, quod ipsa præcipit Ethica.

Ac de vulgari quidem Moralis Philosophiæ

phiæ divisione diximus : quanquam quæ dicitur Monastica , cum Ethica ipsa ab Aristotele meritò confunditur . Hanc verò potissimum nunc exponendam ingredimur , quæ reliquas ut subjectas sibi species quodammodo complectitur . Nam in ea præcipuè explicanda operam suam posuit Philosophus in duobus libris magnorum Moraliū , tum in septem ad Endemum , tum denique in decem Ethicorum libris quos ad Nicomachum filium conscripsit , ut librum omittam de virtutibus : Oeconomica verò duobus , Politicam octo libris complexus est .

Nos utique Moralem universim tradituri , decem Ethicorum libros quàm poterimus dilucidè & breviter explanare conabimur , nec multum ab eo quem sibi proposuit ordine Philosophus , recedemus . Is enim in primo libro de felicitate , vel de summo bono dispositionem instituit , quam decimo tamen libro absolvit ; in secundo de virtute in universum disputat ; in tertio de principiis actionum humanarum disserit ; in iis qui sequuntur virtutes singillatim expendit . Nos iisdem penè vestigiis insistentes , Moralem Philosophiam in tres tractatus partiemur . Primus erit de summo hominis bono ; Secundus de principiis actuum humanorum tum congenitis tum acquisitis ; Tertius de moribus seu actibus humanis & affectibus animi futurus est ; ac de his omnibus sic agere conabimur , ut per pauca ex his quæ aliquid utilitatis sunt habitura , omittamus .

Jam id necessarium minimè arbitramur ,
ut

ut multa de auditore hujus Philosophiæ differamus. Quod enim Aristoteles tradidit, juvenes minus esse idoneos civilis scientiæ auditores, quòd actionum quæ in hac vita versantur imperiti, & plerumque libidinum æstu abrepti, vitæ instituendæ præcepta negligant: id fortè verum est de civili scientia, aut Politica, quæ maturum hominem & expertum postulat: non de Ethica ipsa, quæ molli & flexibili ætati est utilissima; tum ut mores ad honestatem conformet, tum ut morbos animi sanet, & perturbationibus, quæ in ea ætate majores habent impetus, modum adhibeat. Qui enim, an expectandum erit, dum vitia & pravi habitus adoleverint, & altas radices egerint, ut optimis præceptis imbuantur? Hinc Aristoteles ipse quasi se corrigens, hæc subjicit: *nihil autem refert, an ætate sit juvenis, an moribus. Non est autem, inquit culpa in ætate, sed in eo quod pravis affectibus serviat.* Unde & incontinentes, quique libidinibus suis serviunt, eadem ratione ductus minus esse huic disciplinæ idoneos docet: non quod ii maximè non egeant optimis vitæ præceptis, sed quòd ii minus dociles sint; ac mens rebus etiam pulcherri-
 mis vacare nisi omnibus vitiis libera vix possit. *Nihil est enim, ut scitè Fabius, tam occupatum, tam multiforme, tot ac tam variis affectibus concisum atque laceratum, quàm mala mens.* Sed tamen cum in Christiana potissimum Religione, timore Domini, & divinæ gratiæ auxilio vel prava indoles flecti & ad meliorem frugem perducì solet; cumque Salomon ipse celestis sapientiæ se præcepta

cepta scribere testetur, *ut detur*, inquit, *parvulis astutia*, iis scilicet qui facile in errorem inducuntur, *adolescenti scientia & intellectus*, neminem cujuscunque sit ætatis, etiam si non sit optimis imbutus moribus, ab hujus disciplinæ studio arcendum putamus. Nam & boni progressus facere, ac perfici; perversi verò emendari possunt.

Proverbium est, inquit Sapiens Prov. 22. *Adolescens juxta viam suam etiam cum senuerit, non recedet ab ea*. Et quidem a pueritia ea sunt spargenda semina quæ metere volumus.

Hinc illud Eccli. 30. *Qui diligit filium, instanter erudit: & illud, Curva cervicem ejus in juventute, ne forte induret, & non credat tibi*. Ibid. Nisi enim in tempore erudieris & correxeris, in malo fiet obduratus, & inflexibilis. Sed de auditore hujus disciplinæ satis; nunc illius tractationem ingrediamur.

TRACTATUS PRIMUS.

De summo Bono.

DE summo hominis Bono nobis ante omnia agendum est, tum de mediis ad eum finem acquirendum & tuendum dicemus. Sed quis sit ille bonorum omnium finis, scire non possumus, nisi quid bonum sit, quid finis explicatam antè fuerit. Primum igitur nobis de bono & malo universim, tum de fine; tandem de summo bono, seu de felicitate dicendum videtur.

DISPUTATIO PRIMA.

De bono & malo in universum.

Bonum quidem spectari potest vel absolute & secundum se, vel ut ad nos refertur. Illud tantum patet, quantum ens ipsum, atque illius tractationem Metaphysica sibi vindicat. Sed contemplatio boni ut ad nos refertur, aut perfectio est hominis, ad Moralem scientiam propriè pertinet. Quocirca nobis imprimis videtur inquirendum, 1. quid sit bonum, 2. quotuplex sit, 3. in quo posita sit natura mali 4. utrum in id quò malum ferri voluntas possit.

Q U Æ S T I O P R I M A.

Quid sit bonum.

Veteres Philosophos laudat Aristoteles quòd bonum dixerint esse id quod omnia appetunt. Quod quidem non ita est intelligendum, ut nullum sit bonum quod ab omnibus non appetatur, aut quod idem bonum omnia expetant: id enim manifestè falsum est: nisi fortè boni nomine summum bonum intelligas, ad quod omnia referuntur. Res enim unaquæq; ea ratione est bona, quòd sit participatio quædam summi illius boni, quod rerum omnium principium est & finis nihil quippe in rebus creatis est boni, quòd a summo bono non profluat, & in illud quodammodo non redeat; sicque universale bonum ab omnibus quodammodo expetitur.

B Hæc

Hæc cum vera sint, minus tamen videntur ad mentem Aristotelis accommodata, cum eodem in loco doceat, ex bonis quæ expetuntur, alia esse aliis amabiliora: quod utique de summo bono dici non potest. Itaque sic pervulgata illa boni descriptio videtur intelligenda, quod nihil expetatur, nisi idem habeat rationem, aut speciem boni.

Appetitus porro est quædam propensio qua res quæque nititur in suum bonum, aut in suam perfectionem. Nam ideo res unaquæque est expetibilis, quia alteri convenit, adeo ut bonum definiri possit *id quod est conveniens*. Idcirco autem bonum rei alteri convenit, quia illam perficit: quamobrem essentia ipsius boni, aut bonitatis ratio vel essentia in eo posita est, quod rem cui dicitur bona aut conveniens, perficiat. Atque ut bonum absolutum in perfectione absoluta, vel in ipsa integritate consistit: ita bonitas relativa, qualem hoc loco quaerimus, in eo posita est, quod sit alterius rei perfectio: & quidem ob eam maximè rationem bonum est natura sua appetendum, quia perficit: nam cuncta appetunt suam perfectionem.

Appetitus itaque, ut mox diximus, nihil est nisi rei cuiusque propensio in suum bonum: nam res quæque suam sibi velut jure naturali debitam perfectionem expetit. Actio ipsa, aut nifus in bonum, ut amor sanitatis, aut voluptatis, appetitus elicitus dici solet: sed vis aut facultas nobis ingenta, quæ hunc actum elicit, innatus appetitus nominatur: hinc triplex vulgò statuitur.

Na-

Naturalis, sentiens, & rationalis. Primus rebus omnibus infusus vulgò creditur. Sic nihil est in scholis usitatius, quàm gravia naturali appetitu, seu inclinatione quadam deorsum ferri, levia sursum. Quanquam fateor id intellectu arduum videri, qui fieri possit ut res sensus & cognitionis expertes aliquid expetant: aut inclinatione aliqua donentur. Quod enim respondere solent, ut appetitum, sic cognitionem iis rebus inesse, sed improprie, aut analogicè dictam, hoc utique nihil est, cùm nulla omnino in lapidè fingi cognitio possit.

Sunt itaque in rebus cognitionis & sensus expertibus certæ motuum leges ab Authore naturæ constitutæ, quæ propensiones quædam a natura congenitæ dici possunt: ut quod motus omnis rectam lineam affectat. Sed cavendum nobis est ne rebus ipsis appetitus quosdam, aut inclinationes tribuamus, cum occultiores rerum qualitates quærantur: hoc est enim, ut alibi diximus, rerum maximè disjunctarum attributa confundere; quæque ad res cognitionis compotes pertinent, ut amicitia, iræ, voluptatis motus, rebus quæ sunt omnis cognitionis expertes, tribuere. Sed de his plura suo loco.

Quare ut appetitum naturalem in nobis, imò & in brutis agnoscimus, qui scilicet omnem cognitionem distinctam præcurrit; sic quædam ad bonum ipsum inclinatio nobis congenita & naturalis dici potest: est enim ab Authore naturæ impressa. Hinc bonum aliquod nobis convenire non ratione tantum, aut cognitione per sensus accepta,

sed sensu quodam intimo percipimus.

Quæ igitur instinctu naturæ, & velut impetu agimus, hæc ad naturalem appetitum pertinent; quæ sensuum cognitionem sequitur inclinatio, ut magna pars affectuum animi, hæc ad sentientem pertinet appetitum: sed quæ mentis cognitionem consequitur propensio, appetitus rationalis, seu voluntas nominatur.

Qui à natura est appetitus, in id quod sibi conveniens est, fertur, neque à suo fine aberrat unquam: est quippe impressio ab Authore naturæ profecta: sed appetitus & sentiens & rationalis persæpè a scopo defleunt, & speciem boni, nō bonum ipsum, aut ensu fallente, aut mente ipsa in errorē inducitur, aut pravo libertatis usu consecretantur.

Q U Æ S T I O I I.

De Boni divisione.

AC de boni quidem natura hætenus, nunc varias illius visiones summatim decurramus. Prima & summa boni divisio est in bonum per essentiam, & bonum per participationem: hujus divisionis Philosophus in magnorum Moralium initio meminit. Illud uni Deo convenit, Christo ipso testante. *Nemo, inquit, bonus nisi solus Deus.* Quidquid verò est in rebus creatis boni, id valde angustum est, & participatum, seu aliunde acceptum. Illud est universale bonum, & illimitatum, quod omnes expetimus, quod confusa saltem cognitione attingimus, cum unum alteri præponimus. Cum enim

enim unum præ altero eligimus, id quod nobis melius videtur, anteponimus ei quod deterius judicamus: melius porro dicitur quod optimo vicinius. Habemus igitur notitiam quandam summi boni animis nostris impressam. Nam ut pulchrè Augustinus, *non diceremus illud alio melius, cū verè judicamus, nisi impressa esset nobis ipsius boni notio, secundam quā & probaremus aliquid, & aliud alii præponeremus.*

Bonum participatum aliud est naturale, quod naturæ alicui convenit, ut sanitas animali, aliud morale, quod regulis morum est consentaneum: hæ porro sunt duæ, recta ratio; & lex æterna, de quibus postea.

Bonum morale, quod scilicet naturæ rationali secundum rectam rationem operanti convenit, ut alias omittam divisiones, in honestum, utile & jucundum vulgò dividitur. Honestum idem est quod rectum, quod vi sua & per se est expetendum, ut virtus, Bonum utile illud est, quod non ratione sui, sed propter aliud expetimus, ut potio amara propter sanitatē sumitur. Jucundum deniq; id dicimus, non id modò quod sentientem appetitū voluptate quadam perfundit, quodq; sæpius hominis malum quàm bonum illius dicendum est: sed id omne quod molestiam aufert vel ægritudinem; quodque ad animum pertinet, etiamsi ad corpus nullo modo referatur, ut cognitio rerum pulcherrimarum.

Quare duo solent circa hanc boni divisionem, in disceptationem venire: primum, an id solum quod est rectum & honestum, bonum dici possit, ut visum est Stoicis; Peripateticis contra defendentibus, id quod utile est, aut jucundū inter bona numerari. Al-

terum quod etiam inter Veteres multum fuit controversum, an aliquid quod honestum non est, idem utile dicendum sit. Quod utraque hæc quæstio dirimatur; sit.

Prima Conclusio.

Non id solum bonum est, quod est honestum: sed jucundum etiam & utile in bonis sunt numeranda.

Probari posset conclusio contra Stoicos variis argumentis, quæ M. Tullius lib. quarto de finibus fuse prosequitur. Unum duntaxat aut alterum ut in re manifesta afferemus. Quæ natura appetimus, ut nostri conservationem, integritatem partium, sanitatem, vacuitatem dolorum, delectationem ipsam; hæc, inquam, in bonis numerantur, licet ea dici honesta non possint: ergo non id solum bonum dicendum est quod est honestum, sed multa sunt præterea in bonis habenda. Hinc merito Cicero irridet Stoicos quod quæ bona dicimus, iis præposita, quia contrariis sunt anteponenda, non bona; non expetenda, sed sumenda appellarent. Hoc quippe nihil est aliud quam verba mutare, de opinionibus nihil detrahere, & id sentire quod omnes penè Philosophi, qui quod rectum est & honestum, cæteris quidem bonis anteponunt: sed in bonis etiam jucundum & utile ducunt. Quid enim interest divitias, opes, valetudinem bona dicas, an præposita?

Confirm. Dolor quoddam malum est, & naturæ contrarium: ergo voluptas ipsa, quam ad conservationem corporis Auctor naturæ, aut corpori, aut animo inferuit, quod-

quoddam est bonum: nam ut dolor mali, ita delectatio boni characterem & notā gerit: Quodd si in homine nihil esset perficiendum, nisi sola ratio, illius una perfectio aut bonum in virtute poneretur: rationis enim perfectio est virtus. Ac si nihil in eo esset quàm corpus, non alia forent ejus bona, quàm valetudo, voluptas, vacuitas doloris, & alia hujus generis. Sed cum is constet corpore & animo, summa quidem illius perfectio est, honestè vivere: verùm ne corpus quidem ita est deferendum, ut in bonis non ducenda sint quæ ad naturæ conservationem pertinent: ut quæ illi ad-versantur, in malis numerantur: nam gravitate membrorum & cruciatu dolorum si quis quem levet, magnam profectò is gratiam initurus est, quodd dolorem inter mala censeamus: adeo ut non id solum quodd turpe est, sed etiam id omne quodd est naturæ contrarium, ut malum habeatur. Hanc rationem Aristoteles & M. Tullius loco citato fusius persequuntur.

Probatur 2. conclusio. In hoc boni natura consistit, ut appetitum ad sui persecutionem moveat: sed voluptas, eaque potissimum, quæ est animi propria, quæque ad cognitionem maximè pertinet, appetitum movet & allicit: ergo voluptas aut delectatio ratione sui bona dici potest. Quamvis voluptas corporea sæpius sit rejicienda propter ea quæ sunt cum ipsa voluptate conjuncta. Ut in melle venenato non dulcedo mellis, sed venenum admixtum respuitur. Non dissimili ratione non voluptas ipsa per se, sed vel actio cui conjuncta est, aut res ex qua

percipitur , aut damnum quod ex re vel actione emergit , ut quid mali fugiendum est . At si nulla lege , aut consuetudine , aut honestate prohibetur , tum nihil erit causæ cur in bonis delectatio non habeatur . Sic nemo est qui dolorem expetat , si omnem honesti , aut utilis rationem ei ademeris .

Quò autem iis quæ a Stoicis contra opponuntur , respondeas , meminisse oportet eos cum Aristotele & aliis Philosophis re consentire , verbis discrepare : nam Philosophi quæ secundum naturam sunt bona , appellant , ut valere , non dolere ; quæ autem contra sunt , mala : *Cur igitur , inquit Cicero , cum de re conveniat , non malimus iustitiam loqui ? aut doceat Zeno paratiorem me ad contemnendam pecuniam fore , si illam in rebus prepositis , quam si in bonis duxero ; fortioremque in patiendo dolore , si eum asperum & difficilem perpassu , & contra naturam esse , quam si malum dixero .*

Diluuntur objecta .

Opp. 1. Voluptates obstatæ prudentiæ , pleasque esse noxias & turpes . Hinc meritò Seneca laudationem voluptatis esse perniciosam docet : *quia honesta præcepta intra latent ; quod corrumpit , apparet .*

Resp. Voluptates prohibitas , quæque plus mali secum afferunt , quam habeant boni , rectè vituperari : quòd actiones quibus sunt conjunctæ , quæque prudentiæ & temperantiæ adversantur , sint vitiosæ . Sic turpitudine , aut infamia quæ iis actionibus adhærescit , voluptatem ipsam , ut venenum mellis dulcedinem , inficit . Hinc Aristote-

stoteles voluptatem non per se, sed ex accidenti propter actionem cui conjuncta est, malam esse & fugiendam tradit. Cum autem vulgus non facile possit distinguere inter illud quod ex se, & illud quod ex accidenti bonum est, aut malum; optimè Seneca colligit laudationem voluptatis esse perniciosam; ac meritò voluptates quæ cum malis actionibus cohærent, ut malas & fugiendas damnamus. Nam sapiens abstinere debet ab iis voluptatibus quæ cum malis actionibus sunt conjunctæ; quasque mala adeo gravia consequuntur: ut mel venenatum omnino est rejiciendum.

Opp. 2. Stoici. Bonum omne est laudabile: id verò solum est honestum: ergo omne bonum est honestum.

Resp. Neg. maj. Nam præter virtutes quæ solæ sunt laudabiles, alia sunt multa quæ in bonis haberi debent, ut sanitas, gloria, divitiæ, amici, voluptas ipsa, quæ, si credimus Epicureis, omne bonum saltem comitatur: Quod enim ei sit bonum quoddam, jam ex his quæ diximus, confectum arbitramur.

Quod autem in omni bono reperiatur, non Epicurus modò, sed ipse etiam Aristoteles innuere videtur l. 2. Ethic. ubi tria bonorum genera distinguit, honestum, utile, jucundum: quibus opponit, turpe, inutile, molestum. Id verò subjicit, quòd circa hæc omnia vir bonus rectè agit, malus autem peccat, & maxime circa voluptatem; voluptas quippè est communis omnibus animantibus, estque eorum quæ cadunt in electionem assidua comes. Ubi voluptatem non ut speciem

boni ab aliis distinctam, sed ut communem boni affectionem considerat, quæ aliis omnibus admiscetur: nam delectatio cum rei cujusque, quam expetimus, electione conjuncta est. Unde ab Epicuro primum accommodatum vocitatur, quod cujusque animalis salutis velut fundamentum subjiciatur; quod ea nobis sit congenita, atque eorum quæ ad salutem animalis sunt comparata, sit antiquissima. Hinc negat Torquatus apud Tullium, *opus esse ratione, aut disputatione, quamobrem voluptas expetenda, fugiendus dolor sit. Sentiri hoc, ut calere ignem, nivem esse albam, dulce mel; quorum nihil oportere exquisitis rationibus confirmare, satis esse admonere.*

Sed inquires. Si voluptas, ut docet Aristoteles, sit eorum omnium quæ eligimus, individua comes; si nihil expetimus, nisi quia jucundum est, aut gratum: bonum & jucundum erunt synonyma, ac præposita erit boni in honestum, utile & jucundum divisio.

Resp. 1. Hanc divisionem non esse totius in partes: sed ejusdem rei in diversas rationes: alia quippe est honesti, alia jucundæ ratio: tamen si persæpe idem est jucundum, honestum & utile.

Resp. 2. Nos Epicureis ita non indulgere, ut putemus honestum non esse bonum, aut appetitum ad se non invitare, nisi quia jucundum est: nam licet honestum jucunditate maliquam habeat adjunctam, tamen vi sua & per se expetitur. Id tale est ut detracta omni utilitate sine ullis præmiis, fructibusque per se ipsum possit jure laudari.

Ne-

Neque enim id verum est quod Epicurei contendunt, honestum ad popularem laudem referri, atque id solum esse honestum, quod est populari fama gloriosum, quodque voluptatem habet conjunctam: nam ut pulchrè Tullius, *non ob eam causam illud dicitur honestum, quia laudatur à multis; sed quia tale sit, ut si ignorent id homines, vel si obmutuissent, pulchritudine sua tamen esset, specisque laudabile.*

Verùm hinc alia oritur quæstio multum & diu inter Veteres agitata, an utile quiddam esse possit, quod idem non sit honestum. Id enim negabunt Philosophi omnes præter eos qui emolumentis omnia, aut voluptate metiebantur: Stoici imprimis qui id solum bonum esse quod honestum est, pertendebant. Imo Peripatetici quibus quod honestum est, ita summum bonum esse videbatur, ut omnia ex altera parte collocata vix minimi momenti instar haberent, quippe utilitatem nunquam posse cum honestate contendere, crediderunt. Sit itaque.

Secunda Conclusio.

Quidquid honestum est, idem est utile; quicquam, nisi idem honestum.

Hanc conclusionem Cicero toto libro tertio de Officiis, multis probat argumentis quæ huc ferè recidunt. Quod utilitas quæ cum honestate non est conjuncta, non sit vera, aut germana, sed fucata utilitas, quæ fons est omnis injustitiæ; natura autem non quod fictum est, sed quod est verum, appetit, ut cibum non pictum, sed verum. Hinc meritò Socrates execrari solitus erat

eos qui primùm hæc natura cohærentia opinione distraxissent .

Major propositio multis à Cicerone rationibus illustratur, quas sūmatim attingemus.

1. Nihil magis est contra naturam, quàm turpitudine: recta enim & constantia natura desiderat, aspernaturque contraria; nihilque est tam secundum naturam, quàm vera utilitas: ergo in eadem re utilitas, & turpitudine esse non possunt .

2. Hinc omnis injustitia oritur; quòd error hominum quod utile videtur ab honesto fecernat. Hinc enim scæ, hinc venena, hinc falsa testamenta nascuntur. Emolumenta quippe rerum fallacibus judiciis vident; pœnam, non dico legum, quas sepe perrumpunt, sed ipsius turpitudinis, quæ acerbissima est, non vident. Ex quo quidem rectè concludimus falsam esse utilitatem, quæ tanto detrimento comparatur, quanta est mentis sibi bene consciæ & tranquillæ jactura. Possunt-ne, inquit Cicero, cuiquam esse utiles angores, sollicitudines, diurni & nocturni metus? Quid, an parva jactura est, quòd is qui utilitatem, cui turpitudine adjuncta est, honestati anteponat, viri boni & justii nomen amittat? Quid est quod afferre tantum utilitas ista quæ dicitur, possit quantum auferre, si boni viri nomen eripuerit, justitiamque detraxerit? Quod quidem argumentum longè validius erit, si rem omnem ad fidem Christianam revocaveris: nulla enim utilitas pensare jacturam potest, quam turpitudine affert aut injustitia, quæ felicitatem nobis eripit, cælesti gratia nos exuit, & æternis pœnis addicit.

Hoc

Hoc ipsum sacrae Literae passim intonant. *Quid prodest homini si totum mundum lucratur, animae vero suae detrimentum patiatur.* Et Sapiens Prov. 10. *Nihil proderunt thesauri impietatis; siue quoddam injuste sint quaesiti, siue quoddam iis abutamur, & ad impietatem ducant. Justitia vero liberabit à morte.* Et c. 11. *non inveniet fraudulentus lucrum.* Qui enim amoris justitiae anteponit quaestum, is lucrum luteum quaerit, quod ubi contrectatur, manus inquinat.

3. Nihil magis contra naturam est, quam fucata & falsa utilitas, quae ab honestate separatur. Hinc pulchre hanc formulam Tullius constituit; detrudere aliquid alteri, & hominem hominis incommodo suum augere commodum, magis est contra naturam, quam mors, quam paupertas, quam dolor. Nam tollit convictum humanum, & societatem. Si enim sic erimus affecti, ut propter suum quisque emolumentum spoliaret aut violet alterum, dirumpi necesse est eam quae maxime est secundum naturam, humani generis societatem. Ut si unumquodque membrum sensum hunc haberet, ut posse putaret se valere, si proximi membri valetudinem ad se traduxisset, debilitari & interire corpus necesse esset.

In eandem sententiam plura apud Salomonem videri possunt; ut illud Prov. 16. *Melius est parum cum justitia, quam multi fructus cum iniquitate.* & c. 21. *Qui congregat thesauros lingua mendacii, vanus & excors est, & impingetur ad laqueos mortis.* Item illud c. 23. *Noli laborare ut dixeris: sed prudentiae tuae pone modum.* Atque ut optime in hunc locum advertit

Au-

Author inter recentiores nobilis: Qui bonis quærendis anxie incumbunt, etiam cum innocentiae & tranquillitatis dispendio, multum laboris sumunt, & frustra. Quid enim cum dives factus fueris, præ aliis consequeris, nisi maiorem sollicitudinem, anxium animum, maiorem domi tumultum; ac demum aliis laboraveris, non tibi?

Soluntur objectiones.

Opp. 1. Sæpè dubitatio accidit utrum honestum utili sit anteponendum: ergo utile aliquid esse potest, quod non est honestum.

Resp. dist. ant. Sæpè dubitamus, an quod videtur utile, sit honesto præponendum, C. an quod verè est utile, sit honestati præferendum, N. Etenim ut pulchrè Tullius, *non modò pluri putare quod utile videatur, quàm quod honestum, sed hæc etiam comparare, & in his dubitare turpissimum est.* Tametsi incidunt sæpè causæ, cum repugnare utilitas honestati videatur, ut advertendum sit repugnet ne planè, an possit cum honestate conjungi.

Contra inquit. Utile turpitudini non repugnat: ergo simul conjungi possunt.

R. Dist. ant. Utile non repugnat ei quod turpe est, ratione sui, & præcisè quatenus utile est; C. propter damnum quod est turpitudini adjunctum, N. nam ubi turpitudinis est, ibi utilitas esse non potest:

Opp. 2. Utile est quod ad finem, eumque bonum confert: sed multa sunt hujus generis quæ vitæ sustentandæ, aut corporis salutis serviunt, licet minus honesta videantur:

tur: ergo nihil obstat quominus aliquid utile habeatur, licet idem non sit honestum.

Resp. Illud utile dici non oportere, quod in se habet plus mali, quàm commodi: cujus generis sunt ea quæ honestati repugnant, quæque plena sunt dedecoris ac turpitudinis: nam honestate dirigenda est utilitas. Atque ii pervertunt fundamenta naturæ, qui utilitatem ab honestate sejungunt. *Omnes enim, ut ait Tullius, expetimus utilitatem, ab eaque rapimur. Sed quia nusquam possumus nisi in laude, decore, honestate utilia reperire, propterea illa prima & summa habemus, utilitatis nomen non tam splendidum quàm necessarium ducimus, ac tanta est vis honesti, ut speciem utilitatis obscurer.* Potest igitur aliquid videri utile, licet sit inhonestum: sed utile erit tantummodo secundum quid, ut ajunt, non simpliciter. Illa itaque servanda est regula quam idem Author proponit: *aut illud quod utile videtur, turpe ne sit: aut si turpe est, ne videatur esse utile.* Quamobrem honestum & utile non tam re, aut natura, quàm ratione, aut cogitatione inter se discrepant.

Sed inquires. Nonne igitur sapiens, si fame ipse conficiatur, abstulerit cibum alteri homini ad nullam rem utili? *Minimè verò, respondet Cicero: non enim mihi est vita mea utilior, quàm animi talis affectio, neminem ut violam commodi mei gratia.* Superiùs monuerat concessum esse non repugnante natura, sibi ut quisque malit, quod ad vitæ usum pertinet, quàm alteri acquirere. *Sed illud, inquit, natura non patitur, ut aliorum spoliis nostras facultates, copias, opes augeamus. Nam unum debet esse omnibus propositum, ut eadem sit*
utili-

utilitas uniuscujusque & universorum : quam se ad se quisque rapiat , dissolvitur omnis humana societas .

Postremo , *inquiunt* , actus honestus idem sæpè est jucundus : ergo & utilis esse potest .

Resp. Neg. conseq. Nam ut actus sit jucundus , sufficit ut præsens delectatio vincat præsentem dolorem : quod sæpè accidit : sed ut aliquid sit revera utile , necesse est ut majus sit emolumentum , quàm damnum : quod nunquam evenit , ubi aliquid est honesto contrarium .

Q U Æ S T I O I I I .

In quo posita sit natura mali ?

Circa malum duo nobis quærenda sunt , in quo posita sit illius natura , deinde an malum , quàm malum appeti possit . Ac de primo quidem magna est inter Philosophos contentio : cum alii omnem mali rationem in privatione , aut defectu perfectionis debitæ constituent ; alii duplex mali genus saltem moralis soleant distinguere , omissionis videlicet , & commissionis . Illud præceptis divinis affirmantibus adversatur , ut ommissio cultus divini : ac nemini dubium est quin in privatione debitæ perfectionis consistat : sed rationem illius mali quod præceptis negantibus repugnat , ut homicidii , aut furti , in respectu quodam , vel relatione ad legem præcipientem sic positam esse contendunt , ut semper adjunctam habeat privationem . Non quod malum sit
ens

ens quoddam absolutum , ut Pythagoræi & Manichæi somniarunt : sed est quid respectivum duntaxat : est enim actio humana cum æterna lege , cui adversatur , comparata . Quæ quidem opinio sua probabilitate non caret , dummodo relatio illa ens quoddam a fundamento distinctum non ponatur . Cùm autem opposita sententia , (si tamen huic verè opponitur) & communior sit , & verisimilior , ab ea non recedemus . Sit igitur .

Prima Conclusio .

Malitia , seu malum formaliter non est aliud quàm privatio .

Probari solet hæc conclusio . 1. auctoritate SS. PP. ut S. Dionysii l. de divinis nominibus c. 4. *Malum*, inquit, *imbecillitas*, *infirmetas*, *privatio est*, & *merum nihil*. S. Augustinus cum multis in locis . tum l. 2. de Civit. Dei , *nemo querat causam effectricem malæ voluntatis : non enim est efficiens , sed deficiens ; quia nec illa effectio est , sed defectio : causas porro defectionum istarum , cum efficientes non sint , sed deficientes , velle invenire , tale est ac si quispiam velit videre tenebras , & audire silentium* . Ex quo quidem loco hæc ratio conficitur .

1. Si malum esset quid reale , aut positivum , Deum haberet authorem , qui omnis entis est prima effectrix causa : sed illud absurdum est , & impium , Deo ut causæ effectrici malum referre acceptum . Nam Deus malum ut opus suum amaret *quia nihil odit eorum quæ fecit* , ex Sap. c. 11. & tamen ,
ut

ut eodem in libro scriptum est, *odio sunt Deo impius & impietas ejus* : Ergo malum non est quid reale, sed privatio tantum; nec habet ullam causam efficientem, sed deficientem, atque, ut loquitur S. Dionysius, aberrantem à scopo.

2. Bonum in perfectione consistit : ergo malum in defectu, aut privatione debitæ perfectionis positum est : nam oppositorum oppositæ sunt rationes. Itaque ut bonum ex integra causa, ut vulgò dicitur, sic malum ex minimo defectu oritur : atque ut malum naturale nihil est nisi defectus perfectionis naturalis ; & malum artificiale privatio est rectitudinis artificiosæ; ita malum morale est defectus, aut absentia rectitudinis moralis, aut bonitatis debitæ, ex quacunque causa oriatur.

Confirmatur. In hoc præcisè consistit ratio malitiæ, quo intellecto statim actio mala intelligitur: sed intellecta privatione rectitudinis debitæ, statim actio mala concipitur. Nam si quid reale & positivum concipiamus, id rationem boni est habiturum, cum bonum & ens convertantur: adeo ut bonum in ipsa integritate positum videatur: ergo actio quæque tantum est mali habitura, quantum ab integritate aut perfectione debita recedet: ut si desit ei aut legitimum objectum, aut finis idoneus, aut circumstantia debita.

Solvuntur objectiones.

Multa solent opponere, quæ facilius dissolves, si adverteris privationem, aut potius,

tius, ut loquuntur, carentiam perfectionis interdum esse in ipsa voluntate, ut in peccatis quæ dicuntur omissionis: tum enim malitia est in voluntate, non in actione, quæ nulla est: siquidem ommissio est absentia actionis debitæ. Sed ubi peccatum committitur, tum malum vel est accidentarium, tumque privatio est in ipsa actione, ut in actu intemperantiæ est moderationis defectus: vel actio est intrinsecè & essentialiter mala, ut mendacium, ut odium Dei, tumque defectus primum est in voluntate malè affecta, deinde in ipsa actione generatim sumpta, nimirum in ratione odii, non quatenus talis est. Nam ut est actio humana, ea potest bene & malè fieri: sed ut talis est actio, nunquam potest bene fieri. His intellectis, quæ objici solent, videamus.

Opp. 1. Privatio non suscipit magis & minus: ergo si malum formaliter sumptum nihil sit nisi privatio, ex duobus vitiis quæ eidem virtuti opponuntur, unum non erit altero majus. Imo nec mala different inter se: adeo ut nec avaritia sit prodigalitate deterius, neque una ab altera discrepet: cum utraque sit ejusdem formæ privatio.

Resp. 1. Neg. suppositum: nam vitia virtuti opposita non sunt eadem privatio: nec eodem modo virtutem destruunt: ut varia mortis genera distinguimus, quæ non uno modo vitam perimunt.

Resp. 2. Neg. conseq. Prodigus enim peccat committendo, quod facultates suas temerè profundat; avarus omittendo, quod nihil aut parum largiatur. Prodigalitas excessu, avaritia defectu peccat. Privatio itaque boni-

nitatis est in actione prodigi, eadem est in voluntate ipsa avari. Neque in utroque vitio idem est recessus a virtute: peccat enim avarus retinendo, quando non decet, peccat prodigus dando, cum non decet. Est etiam una privatio major altera, quatenus subiectum est minus dispositum ad formam excipiendam: ut lignum viride minus est dispositum ad formam ignis.

Instant. Si malitia nihil est præter privationem rectitudinis debitæ, nihil erit discriminis inter malum commissionis & omissionis: cum utrobique sit ejusdem formæ, aut perfectionis privatio.

Resp. Neg. ant. Discrimen verò à nobis jam allatum est, quòd in peccato commissionis sit privatio rectitudinis, quæ debetur ipsi facultati, seu voluntati.

Contra, *inquiunt*, Malum omne committitur: est etiam contrarium bono, & prohibetur præcepto negativo: Sed quidquid committitur, est aliquid positivum: contraria itè sunt positiva; ac demum quod præcepto negativo prohibetur, ut furtum & malitia furti, est itidem quid reale & positivum.

Resp. Hos cavillos facile dissolvì, si malum actum, seu, ut ajunt, malum sumptum materialiter ab ipsa malitia distinguamus. Nam actus malus committitur, non malitia ipsa: & quod prohibetur, est aliquid positivum, ut furtum ratione actus, seu subiecti, non ratione ipsius formæ, seu malitiæ, quæ propriè non est contraria præcepto, sed rectitudini morali: quæ cum dicuntur contraria, latiore significato contrarietas accipitur.

Opp. 2. Bonitas actionis est relatio conformitatis, aut similitudinis cum recta ratione: ergo illius malitia erit itidem relatio, ut loquuntur, difformitatis: sed utraque est realis, ut similitudo & dissimilitudo: ergo malum formaliter est aliquid reale, & non solum mera privatio.

Resp. Neg. min. Nam fundamentum hujus relationis est tantum defectus, aut privatio: quia reipsa relatio non erit quiddam positivum. Neque eadem est ratio dissimilitudinis, cujus fundamentum, puta nigredo in pariete est quiddam reale. Sic falsitas non est vera & realis relatio, sed privatio conformitatis aut similitudinis cum objecto.

Instant. Quod habet causam realem, est quid reale: sed malitia habet causam realem, nempe voluntatem: ergo malitia est quid positivum & reale, non mera privatio.

Resp. dist. maj. Quod habet causam realem efficientem est quid reale, C. quod habet causam deficientem tantum, N. sic mors & cæcitas causam habent realem, sed deficientem.

Opp. 3. Privatio est absentia formæ in subjecto apto ad eam recipiendam: sed quidam sunt actus qui nullam possunt rectitudinem excipere, ut actus odii Dei aut idololatriæ: ergo malitia in iis actibus non est tantum privatio, sed aut mera negatio, aut quid positivum.

Resp. Malitiam illorum actuum esse privationem rectitudinis debitæ tum in ipsa voluntate, quæ propriè dicitur bona aut mala;

la; cum in actu ipso generatim sumpto, qui rectus esse debet. In tali vero actu est carentia rectitudinis, non sola privatio; bonus quippe is esse nequit. Exemplum talpæ adhibet S. Thomas, qui ut vulgò creditur, privatur visu, non ut est tale animal, neque enim videre debet: sed ut est animal, quod generatim visum exigit. Quare ut cæcitas talpæ, sic odio Dei privatio rectitudinis tribuitur.

Itaque odium Dei formaliter sumptum non est capax rectitudinis moralis: sed ut est odium, seu actus quidam voluntatis, & genericè spectatur, est capax alicujus rectitudinis.

Contra inquires. Non dissimili ratione lapis genericè sumptus erit capax visus: nempe ut est corpus; sicque cæcitas erit in lapide: quod omnino est absurdum.

Resp. Longè disparem esse rationem: Lapis enim ut corpus non exigit visum, odium autem genericè sumptum exigit rectitudinem moralem.

Imò, inquires. Ut corpus genericè spectatum est indifferens ut sit vivens, aut vitæ expers; animal ut sit rationale vel irrationale; sic odium genericè sumptum nec bonitatem, nec malitiam exigit: sed ad utramque est planè indifferens: ergo actus non exigit rectitudinem.

Resp. Neg. consequ. Nam ut oculus visu potest donari & eo privari, tametsi eum naturaliter postulat: sic actus genericè sumptus & bonus esse potest & malus, quamvis rectitudinem ipsam exigit. Et quidem si Metaphysicè res ipsa consideretur, est odium
pla-

planè indifferens, ut bonum sit, vel malum : tum enim præcisè ut genus, quod a suis differentiis abstrahit, consideratur. At si moraliter spectetur, ut a ratione proficiscitur, & subest imperio voluntatis, tum non est indifferens ut bonum sit, aut malum.

Instant. Si malitia nihil est nisi privatio, qui Deum non amat cum debet, minus peccat, quàm qui eum odio habet : cum in utroque sit privatio amoris divini, seu rectitudinis debitæ.

Resp. Neg. ant. Ratio jam a nobis allata est: tum quia privationes sunt diversæ juxta diversos modos quibus forma destruitur; tum quia odium Dei est peccatum commissionis, quod & actu voluntatem ipsam omnino pervertit, & à rectitudine ipsa longissimè recedit.

Q U Æ S T I O IV.

Utrum malum quàm malum appeti possit.

Asferunt Nominales voluntatem nostram in malum præcisè quàm malum est, ferri posse, idque appetere prosecutionis motu, vel amoris; ac bonum vicissim ut bonum odio haberi posse. Reliqui omnes Philosophi id negant: sit utique

Unica Conclusio.

Non potest voluntas malum quàm malum expetere: nec bonum odire.

Probari potest conclusio autoritate & ratione; autoritate SS. PP. ut S. Dionysii qui

qui loco jam citato docet malum esse præter voluntatem, præter intentionem; S. Gregorii Nysseni qui l. de opificio hominis hæc habet: *nemo, inquit, in vitia proruit, nisi inescatur specie aliqua bonitatis*. Sic Augustinus l. 2. *ne ipse igitur Catilina amavit facinora sua, sed utique aliud cujus causa illa faciebat*.

Aristoteles idem passim docet: ac præsertim cum definit bonum id quod est appetibile, manifestum facit, malum quia malum appeti non posse. Hinc l. 8. Ethic. c. 2. *Non omne, inquit, amatur, sed tantum amabile, illud autem est vel honestum, vel jucundum, vel utile*. Ex quibus hoc firmissimum erui potest argumentum.

1. Nulla facultas extra suum objectum, ex quo suam desumit speciem, ferri potest; sic visus nihil nisi visibile, aut lumine perfusum; auditus nihil nisi idem sonorum potest attingere: sed objectum appetitus est appetibile, seu bonum: ergo nullus appetitus, aut intellectualis, seu voluntas, aut sentiens, malum quia malum potest appetere, aut bonum quia bonum odisse.

Confirm. Ut objectum intellectus est verum, sic objectum voluntatis est bonum: quodque est in ipso intellectu assensus & dissensus, seu affirmatio & negatio, hoc ipsum est in voluntate persecutio & fuga, amor vel odium: sed intellectus assentiri non potest falso, ut falso & cognito: ergo nec voluntas malum amplecti. Mens quidem potest falsum percipere, aut intelligere: nam simplex perceptio assensum omnem prævertit: sed voluntas nulla est actio, quæ

quæ prosecutionem & fugam præveniat . Unde eam bonum velle, & nolle malum dicimus : cum mens verum & falsum intelligat aut cognoscat . Quod quidem est advertendum, ne voluntas & intellectus malè inter se conferantur . Nam omnis quidem mentis functio, aut cognitio, aut intellectio nominatur, non item omnis voluntatis actio est velle : cum & velit bonum, & nolit malum; in illud feratur, hoc refugiat .

His intellectis facilius multas adversariorum cavillationes effugiemus . Sed & illud quoque advertendum, malum sumi posse vel materialiter , ut ajunt pro actione ipsa quæ malitiam habet adjunctam : cujus generis sunt voluptates sensuum : tumque appeti potest quatenus jucundum videtur , aut utile, ac speciem induit boni : ut falso persæpè assentimur , quòd veri habeat similitudinem . At si malum præcisè ut malum est , spectetur , nullo modo id appeti potest , uti nec falso assentiri possumus , quia falsum est ; nec bonum respicere : cum ea ratione sit appetibile & perficiens .

Ex quibus multa solvi possunt argumenta , & ea potissimum , quæ ex autoritate Sacrae Scripturae & Sanctorum Patrum depromuntur , quibus effici videtur malum appeti posse : ut illud Geneseos 8. *quod preni sunt sensus hominis ab adolescentia in malum* ; hoc est, in voluptates quæ sensus movent . Sic locus ille Job. 14. intelligendus est de iis qui quasi de industria recesserunt à Deo : nempe ut libidinibus suis servirent . Non dissimili ratione explicari

debet Aug. loco citato, cum sic loquitur : *Quæso, Domine, quid me in furto delectaverit?* & alia id genus plurima, in quibus non lucri utilitas, sed ostentatio libertatis aut industriæ, aut aliqua delectatio, vel species boni quæritur.

Illud denique observandum est, malum nos interdum appetere non nobis, sed aliis: quo quidem modo S. Bernardus docet dæmones appetere malum ut malum. His quidem explicatis, quæ contra opponi solent, facillimè dissolventur.

Diluuntur objecta.

Opp. 1. Sunt quædam peccata quæ dicuntur ex pura malitia: ergo in iis malum quod malum appetitur.

Resp. Neg. conseq. Sic enim dici solent peccata quæ neque ex infirmitate, neque ex ignorantia fiunt. Non quod malum quod malum voluntas prosequatur: sed quia nullus in iis est excusationi locus, & ex magna oriuntur perversitate.

Opp. 2. Desperati appetunt non esse, & Deum oderunt damnati: ergo malum quod malum prosequuntur: siquidem non esse, non potest habere rationem boni, nec Deus habet rationem mali.

Resp. Neg. conf. Nam qui appetunt non esse, finem calamitatum quærunt ut quoddam bonum, & damnati sibi Deum ut crudelem exhibent.

Opp. 3. Voluntas est libera circa bonum & malum: ergo potest amare malum, & odisse bonum.

Resp.

Resp. dist. ant. Voluntas est libera libertate contradictionis, ut bonum amet vel non amet, C. libertate contrarietatis, ut bonum amore prosequatur, aut oderit; malum itidem amet vel oderit, N.

Instant. Si voluntas non potest odisse bonum, & amare malum, nunquam liberum erit idem objectum amare, & odio habere. Nam semper objectum illi exhibetur ut bonum, aut malum: si ut bonum exhibeatur, illud odio habere non poterit; neque id amare, si mali habeat rationem.

Ref. Neg. ant. Potest enim idem objectum certa ratione spectatum boni habere rationem: cum ex alia velut parte consideratum habeat rationem mali. Sic interdum quod jucundum est, cum honesto pugnat, & quod utile videtur, cum eo quod est honestum componitur. Sed si quid habeat tantum rationem boni, illud odisse non possumus; uti nec amare, si id nihil præter mali rationem habere videatur.

Instant. Quod liberum est libertate contradictionis, potest odisse & non odisse, amare & non amare. Sed voluntas est libera circa malum libertate contradictionis: ergo illud amare potest & non amare, odio habere, & non habere.

Resp. dist. maj. Quod liberum est libertate contradictionis adæquata, id potest amare & non amare, odisse, & non odisse, C. libertate inadæquata, N. voluntas autem circa malum ita est libera, ut id odio prosequi possit, & non odio habere; sed non est ita libera, ut amare id queat & non amare.

Opp. 2. Minus bonum cum meliore comparatum habet rationem mali : sed possumus minus bonum etiam cognitum meliori antepondere : ergo malum ut malum possumus eligere.

Resp. dist. min. Possumus minus bonum etiam cognitum meliori antepondere, ut boni habet rationem, C. ut minus est altero, N. nam semper aliqua ratione ducimur ut deterius meliori præferamus. Atque ut fortè quod eligimus nullam habeat re ipsa boni rationem, opinione tamen nostra speciem habet bonitatis. Deinde ut voluntas possit minus bonum majori antepondere, non idcirco malum ut malum amare potest : quia intra objectum specificativum voluntatis non continetur.

Opp. 3. Voluntas sequi potest iudicium intellectus : sed intellectus saltem adversari iudicat malum quàm malum amari posse, ergo nihil obstat quominus voluntas in id feratur ut malum est.

Resp. dist. maj. Voluntas sequitur iudicium practicum intellectus, C. speculativum duntaxat, N. Ac licèt Nominales secundum theoriam iudicent malum quàm malum expeti posse : tamen si ipsos consulant, & quid in seipsis agatur, diligentius advertant, profectò intelligent nunquam se malum nisi e mentita specie boni vestitum, & obscurè cognitum expetere. Quod si quis voluntatem suam pro ratione omni afferat, id illi bonum & excellens videbitur. Tam altè enim propensio ad bonum nobis impressa est, ut eam exuere non possimus. Hinc pulchrè Seneca: (1.4. de benef.) *Nequitia fructus*

Etus concupiscitur, ipsa verò odio, pudorique est: nec quisquam tantùm descivit à lege naturali, & hominem exiit, ut gratis, velit esse malus.

Instant. Intellectus potest cognoscere falsum ut falsum: ergo voluntas amare potest malum quàm malum.

Resp. Neg. conseq. Nam falsum est intelligibile, malum ut malum nullo modo est amabile. Atque ut intellectus assentiri falso ut falso non potest: sic voluntas malum ut malum nequit expetere.

D I S P U T A T I O II.

De fine.

CUM summum hominis bonum sit illius finis ultimus, postquam de bono universim egimus, instituti nostri postulat, ut de fine quoque in universum differamus: sic enim facilior erit ipsius felicitatis tractatio. Circa finem tria nobis hoc loco sunt explicanda. 1. Quid sit & quotuplex. 2. Quomodo omnia agant propter finem. 3. Quæ ad finem ultimum spectant, erunt excutienda.

Q U Æ S T I O I.

Quid sit finis, & quotuplex.

FINIS rectè definitur ab Aristotele, (2. *Physic.*) *id cujus gratia fit aliquid.* Sic medicinæ finis est sanitas; atque id omne propter quod effectrix causa operatur, idem finis habet rationem.

C 3

Quo-

Quocirca finem existere, quæ sunt omnia, apertè demonstrant: nam sublato fine omnis actio tollitur, ac cessant omnia. Quid enim causæ erit cur una actio fiat potius quàm altera, si finem, aut agenti intentionem sustuleris?

Cum autem id finis vocitetur, quod per se expetitur, idque aut bonum sit, aut certè boni speciem induat, meritò hìc quæritur an bonum & finis ita sint reciproca, ut omne quod bonum est, idem finis habeat rationem, ac vicissim.

Unica Conclusio.

Bonum & finis non convertuntur.

Prob. conclusio. Quod tantùm utile est ad finem, aut quod tanquam medium ad finem ducit, id bonum est: sed illud non est finis, cum propter se non expetatur: ergo non omne bonum est finis.

Confir. Multa sunt actu bona, quæ actu non expetimus: imò Deus ipse, qui est summum bonum, aliquando ut finis non expetitur: cum peccans ab eo deflectat, & in eum non tendat: ergo quod actu est bonum, non semper actu est finis.

Quamquam non inficiamur, omne quod bonum est, posse expeti ut finem: sed tamen non semper actu id appetimus. Sicque Aristoteles intelligi debet, cum bonum & finem unum & idem esse tradit. Nam bonum, ut ajunt, materialiter sumptum & finis idem sunt; quodque est bonum, id potest habere rationem finis: sed utriusque boni & finis non eadem est ratio, neque id

om-

omne quod actu est bonum , idem ut finis expetitur .

Opp. Bonum utile propter se appetitur , nempe propter suam bonitatem ; sic pecunia , quia indigentiam tollit ; pharmacum , quia vim habet sanandi , expeti solet : ergo bonum utile habet rationem finis , aut rei per se expetibilis .

Resp. dist. ant. Bonum utile propter bonitatem suam relativam appetitur , quia ducit ad finem , C. propter bonitatem absolutam , N. Sic pecunia potest habere rationem finis , ut in avaro : tumque non amplius ut bonum utile , sed ut jucundum spectatur : quod scilicet cupiditatem repleat . Sed quando sola pecunia spectatur utilitas , tum nec finis est , nec bonitatem habet absolutam : quia per se non expetitur .

Contra inquis. Bonum utile omnem suam bonitatem a fine repetit : ergo nullam habet sibi propriam bonitatem .

Resp. neg. ant. Nam aut pharmaco , aut pecuniæ sua est bonitas , sed relativa ad finem . Quod si enim nulla pharmaco vis insit propria , frustra unum præ alio eligitur .

Finis divisio .

Nunc quotuplex sit finis , breviter explicandum . Atque ut eas quæ ad institutum nostrum non pertinent , divisiones omittamus , prima & maximè usitata est , quam alibi attulimus , in finem *cujus gratia* , & finem *cui* : ille etiam finis *qui* solet vocitari , est enim id quod per se expetitur : ut sanitas est finis *qui* , medicinæ . Finis *cui*

est persona ipsa in cuius commodum cedit id quod quæritur; ipsum verò commodum, quod nobis vel aliis volumus, est finis *cujus gratia*.

Finis iterum est duplex objectivus nempe & formalis. Ille nihil est aliud nisi res ipsa quam consequi volumus, ut pecunia est finis objectivus avari; illius rei fruitio est finis formalis, ut possessio pecuniæ: hunc finem *quo* vulgò appellant: est quippè actio ipsa, qua fine expetito fruimur.

3. Finis alius est operis seu Physicus, alius operantis, seu Moralis: aut quod eodem recidit, finis vel est artis, vel artificis; ille est in quem actio ipsa, aut opus, aut habitus naturæ suæ vi nititur: sic edificium artis ædificatricis, sanitas medicinæ est finis proprius & intrinsecus. Sed finis quem ex arbitrio suo homo vel artifex sibi proponit, ut lucrum, aut hominum existimatio, aut aliud quiddam simile, est finis hominis vel artificis, qui externus quoque dici potest.

Uterque rursus in varias species diduci potest, ut in primarium, quem per se & primò nobis proponimus; & secundarium, quem secundo velut loco spectamus: Verum his & aliis quæ omnibus sunt obvia prætermittis.

4. Finis præcipua divisio est in ultimum & intermedium, seu interjectum: ille est ad quem aliqua sic ordinantur, ut ipse ulterius non referatur; quippè vel est ultimus simpliciter, ut felicitas quæ est omnium finis; nam alii omnes ad eum finem referuntur: vel ultimus secundum quid,

quid , is nempe , qui in suo genere est ultimus : ut sanitas est medicinæ finis ultimus ; tametsi in alio genere ulteriùs referri possit.

Finis intermedius ita per se expetitur , ut ad alium finem referatur : unde cum mediis , ut loquuntur , comparatus , finis dicitur : sed cum nobiliore fine collatus , boni tantùm utilis , aut medii interjecti habet rationem . Sic sanitas , honor , bona mens , virtus ipsa , bona sunt & perfecta : sed ea tamen ad felicitatem tendunt : quam idcirco Aristoteles non inter res quæ sunt laudabiles : cujus generis sunt res præclare gestæ , & virtutes ipsæ ; sed inter honorabiles , seu inter veneratione dignas constituit : his quippè majus quiddam quàm laus debetur , honor videlicet & observantia .

Q U Æ S T I O II.

Utrum & quomodo omnia agant propter finem .

REs omnes in triplici sunt genere constitutæ ; quædam omnis sensus & cognitionis sunt expertes ; aliæ non sensu modo , sed & mente præditæ sunt ; aliæ demum sensu donantur , sed mente & ratione destituuntur . De singulis agendum , ac discutiendum nobis est quo illæ modo propter finem operantur .

ARTICULUS PRIMUS.

Quomodo res & mentis compotes, & quæ omnis sensus sunt expertes, agant propter finem.

Primùm quidem nemini dubium est, quin homo & agens omne dianoeticum propter finem operetur, idque modo perfectissimo: cum homo finem cognoscat suum, nec solum bonitate illius, aut jucunditate quadam alliciatur, sed etiam finem ut finis est, atque, ut loquuntur, formaliter animo complectatur; quæ illius consecutioni media, ac velut instrumenta aptari debeant, quæ ratio aut proportio inter media & finem occurrat, omnino perspiciat, ac demum quæ finis adeptioni utilia sunt, eligat & præscribat, seque ad agendum omnino determinet. Quamobrem illud negare non possumus quin homo & omne agens mente præditum finem sibi ad agendum præstituat; in eum quidquid agit, dirigat, & perfectissimo modo propter finem operetur.

Ne illud quidem inficiari quis poterit, res omnes sensus expertes in finem præstitutum ab Authore naturæ, ut sagittam in scopum a sagittario dirigi, non temerè & fortuito agere. Quod melioris notæ Philosophi contra Empedoclem & Epicurum variis argumentis demonstrarunt. Cum autem hæc disquisitio sit alterius loci, illud duntaxat adnotare sufficiat, quod fusiùs Aristoteles contra Empedoclem prosequitur,

tur, naturam semper eodem modo, eoque
quàm optimo & constantissimo operari; suo
semper itinere progredi, artificiosè & ra-
tione cuncta efficere; nihil temerè moliri;
contra quæ casu fiunt, nec constanter, nec
bene, nec ratione & artificio, sed confusè
omnia & temerè eveniunt.

Quamobrem vis illa, quæ tam artificiosè cuncta efficit & regit, cujus solertiam nulla ars, nulla manus, nemo opifex consequi potest imitando, non est expers rationis atque ordinis; sed in finem quæque suum ordinat & dirigit. Nam meliora sunt quæ natura, quàm illa quæ arte perficiuntur: Ars verò nihil efficit sine ratione & temerè: ergo multò minùs natura expers est rationis, nec citra finem quidquam operatur. Nisi fortè, ut loquitur Balbus apud Tullium, *Archimedem putes plus valuisse in imitandis Sphæræ conversionibus, quàm naturam in efficiendis.*

- Ac nihil minùs probabile dici potuit ,
quàm quod fomniavit Epicurus concursu
atomorum fortuitò & casu quodam ea quæ
videmus effici . Nam si carens mente na-
tura , & concursus atomorum tantùm va-
luit , ut hæc efficeret , meritò quærimus
cum Lactantio , cur facere cœlum potue-
rit , domum non potuerit ? Non igitur , ut
optimè concludit , *tanta rerum magnitudo ,
tanta dispositio , tanta in servandis ordinibus , in
temporibus constantia , aut olim potuit sine pro-
vido artifice oriri , aut constare tot sæculis sine
incola potenti , aut in perpetuum gubernari sine
perito rectore*

Illud denique est extra omnem dubita-

tionem positum, res cognitionis expertes potius agi & dirigi in finem, quàm agere propter finem; cum finis vim suam exerat quatenus cognoscitur, aut apprehenditur. Itaque ut finis domus construendæ, aut horologii certus est & definitus, non in domo ipsa, aut in horologio, sed in artifice: sic plantarum ortus & incrementa, structura animalium: naturæ opera non temerè, sed ob certos fines a summo artifice perficiuntur. Naturæ enim administratio nihil habet in se quod reprehendi possit nec intelligi potest, nec perfici citra divinum & admirabili vi præditum artificem, ut loquitur Lactantius, *consilio utitur ad incipiendum, ratione ad dispendendum, arte ad efficiendum, virtute ad consummandum, potestate ad regendum & continendum*. Sed non idcirco fingere cogimur in rebus ipsis appetitum, aut inclinationem quandam ad suos fines consequendos. Nam ejusmodi inclinatio, aut propensio cognitionem quandam consequitur quæ à rebus ipsis abest, sed in Rectore & Authore universi, ut in summo artifice reperitur. Cum itaque

Opp. Illud propter finem non operatur, quod nec cognoscit finem, nec eum experit: sed res sensus & cognitionis expertes finem suum non cognoscunt, nec appetunt, cum omnis appetitus cognitionem aliquam consequatur: ergo res naturales non agunt propter finem.

Responderi solet dist. maj. Illud non agit propter finem formaliter, quod finem non percipit, C. illud non agit propter finem materialiter, seu propter id quod est finis, N.

Simi-

Simili ratione contendunt res appetitu naturali, non sensitivo ferri in finem. Sic, inquirunt, gravia in centrum, mundi naturali propensione nituntur. Verum

Responsio faciliior erit, & ad sensum communem magis accomodata, si dixerimus res naturales non agere proprie, sed agi & dirigi in finem ab Authore naturæ præstitutum, ut docet S. Thomas. Nec necesse est appetitionem naturalem, aut inclinationem rebus tribuere, nisi fortè metaphoricam, & ad vulgi captum accommodatam. Quare ejusmodi voces, quibus nulla res certa & distincta subjicitur, quātum fieri potest, è Philosophia pellendæ, sunt, quod nihil sint plerumque præter ignorantia nostræ perfugia, ut suis locis ostendemus.

A R T I C U L U S I I.

Quomodo bestiae agant propter finem.

His itaque explicatis, videamus quomodo bestiae agant propter finem an cognoscant finem, ut finem, quod est agere propter finem formaliter: an nulla habeant cognitionem finis, ut finis est, sed rem duntaxat, quæ finis est, utcunque percipiant. Si igitur de belluis,

Unica Conclusio.

Bestiae videntur agere propter finem etiā formaliter, sed imperfectè admodum.

Probatur Conclusio. Bestiae nituntur in finem, ut sibi bonum, & per se expetibilem, & me-

& media, quæ perducunt ad finem, ut consecutioni finis utilia assumunt: atqui hoc est agere propter finem formaliter. Cum tamen imperfectè admodum cognoscant proportionem quæ est inter media & finem neque sese ad agendum determinent, sed quodam naturæ impetu; non ratione ipsa ferantur: nonnisi admodum imperfectè propter finem formaliter operantur.

Confirm. Canis leporem insequitur, ut præda sua fruatur: nec probabile est in ipso cursu de lepore eum non cogitare, aut vi propositi finis non moveri. Sic hirundo paleas & lutum colligit, ut nidum extruat. Ergo bestię in finem feruntur sub ratione finis, quatenus per se est expetibilis, & media usurpant, ut conducunt ad finem; & aliquo modo bona sunt, hoc est, ut sunt media formaliter. Hæ quidem non liberè agunt, sed ea tamen sumunt ex finis intentione. Hirundo v. g. non cognoscit utilitatem aquæ, aut luti ad nidum conficiendum sed aquam tamen, aut lutum tam operosè non colligit, nisi ut nidum conficiat.

Confirm. iterum. Illud negare non possumus, quin omni animantium generi, ut ait Tullius, à natura tributum sit, ut se, vitam, corpusque tueatur, declinetque ea quæ nocitura videantur, omnia quæ sint ad vivendum necessaria inquirat & paret, ut pastum, ut latibula, ut alia ejusdem generis. Cum igitur hic finis sit ab Authore naturæ & certa providentiæ lege omni animali constitutus, ut sui conservatio-
nī, & generis propagationi omnino incum-
bat, quæ ad eum finem ducunt, cognoscat

scat necesse est. Hinc ingenita est bestiis omnibus eorum quæ vitæ tuendæ sunt necessaria, cognitio; utilia a noxiis aptè distinguunt; hæc fugiunt, illa prosequuntur. Quæ quidem vix intelligi possunt, nisi finem, ut finem, & media ratione mediorum utcunque cognoscant.

Diluuntur objectiones.

Opp. I. Agere propter finem formaliter, est cognoscere proportionem mediorum cum fine: sed hoc est proprium hominis, qui unum cum alio comparat, & unius rei ad alteram ordinem percipit: ergo solus homo agit propter finem formaliter, non item cætera animalia.

Resp. dist. min. Proprium est hominis conferre unum cum altero, & singulas rationes unius ad alterum perfectè expendere, C. imperfectè tantum cognoscere, quod unum ad aliud referatur. N. Nam ut bestiæ per vim æstimatricem, ut ajunt, seu instinctum naturalem cognoscunt res sibi convenientes, aut noxias: sic quibus mediis finem suum assequantur, imperfectè cognoscunt.

Instant. Ordo seu proportio mediorum ad finem non est quid sensibile: ergo nullo modo a belluis cognosci potest.

Resp. dist. ant. Ordo ipse aut proportio in abstracto non est quid sensibile, C. res ipsæ ut fini utiles, atque in concreto spectatæ, N. Itaque bestiæ nec rerum convenientiam, neque earum utilitatem, vel ordinem ad finem percipiunt: sed ut res ipsas quæ sibi
con-

Opp. 2. Quod si bestiae non modò percipiant finem & media sed etiam ea ut finem & media cognoscant : nihil ferè relinquitur homini quo bestiis antecellat, nisi fortè quoddà majori facilitate & præstantiore modo propter finem operetur. Imò & liberum arbitrium, seu facultatem agendi cum ratione bestiis ipsis largiamur necesse est. Nam bona a malis discriminant, & rebus ritè perpensis omnino cum ratione agunt. Sed illud omnino absurdum esse alibi ostendimus : ergo ne illud quidem verum est : bestias propter finem formaliter operari, præsertim cùm medio loco sint inter hominem & res sensus expertes constitutæ. Quare ut res merè naturales nullo modo agunt propter finem, ne materialiter quidem, sed omnino aguntur ; & homo formaliter agit propter finem ; bestiae agunt quidem finis alicujus gratia, sed materialiter, ut ajunt, non formaliter : cognoscunt enim id quod finis est, sed non in ratione finis.

Resp. Magnum semper hominem inter & belluas esse discrimen : quod homo suum sibi finem præstituat, & ex variis quæ ad eum perducunt rationibus, seu mediis, quod vult eligat, sese ad agendum moveat & determinet, non item bestiae, quæ in præstitutum a natura finem impetu, non consilio feruntur. Cum autem non ii modò qui aliter sentiunt, sed etiam qui Cartesianum sequuntur, id nobis soleant obtrudere, metuendum esse ne si bestiis cognitionem finis & mediorum tribuamus, libertatem quoque & rationem iis largiamur ; non erit alienum, præcipua hominis & bestia-

bestiarum tum in cognoscendo, tum in agendo discrimina paulò explicatiùs colligere.

Itaque cæteræ animantes impetu, ut dictum est, feruntur; nec sunt sui juris, sed ab objectis rapiuntur, omniaque ad corpus referunt. Quæ sunt ejusdem generis, eodem planè modo operantur. Nam has videmus simili modo & moliri cubilia, & nidos texere, & educare foetus: quòd angustam valde & contractam sortitæ sint naturam, & perpaucas imagines acceperint. Nunquam apes quæ tam aptè cellulas effingunt hexagonas, alterius eas figuræ effingent. Sed homo omnia ferè ex nutu voluntatis agit; innumerabiles propè artes excogitat; ipse sese corrigit, actiones suas examinat, & in se variè reflectitur: quæ concepit mente, eadem sermone exprimit. In bestiis nulla sunt signa ex instituto: sed si quæ sunt, ea fuerunt a natura impressa. Quamobrem inter hominem & belluam, ut præclare M. Tullius hoc maximè interest, *quòd illa tantùm, quantum sensu movetur, ad id solum quod adest, quodque præsens est, se accommodat, paululum admodum, sentiens præteritum aut futurum: homo autem qui rationis est particeps, per quam consequentia cernit, principia & causas rerum videt, earumque progressus, & quasi antecessiones non ignorat, similitudines comparat, rebusque præsentibus adjungit atque annectit futuras; facile totius vitæ cursum videt, ad eamque degendam præparat res necessarias.* Sed de discrimine hominis & belluarum plurima dicemus, cum de natura animæ rationalis agemus.

Inst. Nullo sensu, nec interiore quidem media ut media cognosci possunt.

Quod

Quod enim interiores sensus movere potest, idem externos afficiat necesse est: Sed ille ordo mediorum ad finem nullo sensu exteriore percipitur.

Resp. dist. maj. Quod sensum movet interiorem, id sensum externum quoque afficit, aut per se, aut per aliud, C. per se, N. Itaque cum videt hirundo paleas, statim vis imaginatrix excitatur, aut colore, aut flexibilitate paleæ ad illius perceptionem, ut utilis nido conficiendo, idque ab instinctu congenito, qui ut explicari vix possit, negari tamen non potest. Neque idcirco ulla hæc ratiocinatio intervenit: sed naturæ tantum impetus ab Autore ipsius naturæ profectus.

Contra inquit. Belluæ finem ut finem, hoc est per se expetibilem non cognoscunt neque adeo media ut media, vel utilia percipiunt. Quod enim est per se expetibile, negationem includit, quod ad ulteriorem finem non referatur: Sed negatio à belluis intelligi non potest.

Resp. Negationem a belluis percipi non posse ratione sui, ut est negatio, C. ratione sui subjecti aut fundamenti, N. nam bonitas finis aut mediorum a bellua percipitur, & id quod est bonum ab ea cognoscitur & expetitur: nec magni interest, quod ejusmodi negatio in ratione finis includatur. Non enim in seipsa, sed in alio, seu in fundamento, idque imperfectè cognoscitur: & tamen bestię finem formaliter percipiunt, ut negationis illius fundamentum includit.

Jam circa finem ultimum duo quæri solent, quis sit rerum omnium, & hominis præsertim, finis ultimus, deinde an plures sibi quisque possit fines ultimos proponere. Sit igitur

Prima Conclusio.

Non hominis modò, sed etiam rerum omnium Deus est finis ultimus.

Prob. conclusio: Est enim Deus ut ait ipse in Apocalypsi, *principium & finis*: atque ut Sapiens loquitur Proverb. 16. *omnia propter seipsum operatus est Dominus*: neque alium sibi finem potuit præstituire: cum solus Deus sit summum bonum, atque in eo ut essentia, sic bonitatis insit plenitudo. Ut ens, sic bonus est per essentiam: reliqua participatione & imitatione illius sunt bona.

Deinde ordo agentium, inquit S. Thomas, sic ordini finium respondet, ut quò agens est præstantius, hoc finem nobiliorem sibi præstituat: ut Rex sibi finem proponit magis universalem, quàm dux aut centurio. Sed Deus est prima rerum effectrix causa: ergo idem est rerum omnium finis ultimus. Est enim, ut diximus, primum principium, unde omnia fluxere: est igitur finis ultimus in quem refluunt universa. Ut primum principium, omnia ex se emittit; ut finis ultimus, omnia ad se reflectit.

Hinc pulchrè Aug. l. de moribus Eccl. *Bonorum*, inquit, *summa Deus nobis est*. Neque infra remanendum nobis est, neque ultra quaerendum; alterum enim periculosum, alterum nullum est. Hunc ordinem perturbat præ-

præposterus amor sui : nam seipsum ut Deum constituit , ad se omnia ut ad finem ultimum refert .

Sed inquires . Si Deus est finis ultimus rerum omnium , & præsertim hominis , quid causæ est cur homo ab eo fine sæpius deflectat , ac plerumque de illo ne cogitet quidem ? Cur in rebus creatis summum bonum constituit ? Cur expleri nunquam potest , cum finis ultimus appetitum satiare debeat & possit .

Resp. Ut materiæ , seu corporibus , sic animis nostris motus , aut propensiones quasdam imprimi a summo naturæ opifice . Atque ut omnis motus materiæ in rectam lineam tendit , nisi alterius corporis occursum aliò deflectatur : (tum enim in circularem lineam degenerat , ut suo loco dicemus) sic omnis voluntatis nostræ naturalis inclinatio recta quidem est , eaque in veritatis ipsius , aut bonitatis possessionem nititur : sed hanc plerumque aliò inflectimus , atque ad certa objecta voluntatis arbitrio convertimus . Sistere quidem eam omnino non possumus : sed vaga illa , & indefinita ad bonum ipsum , seu ad Deum , ut ad finem ultimum propensio certis objectis malè terminatur ; idque ex perverso libertatis usu proficiscitur . Illud tamen liquet , voluntatem nostram instinctu quodam naturæ in Deum , ut in finem ultimum niti : tametsi in rebus creatis sæpius hæreat , quibus occupari quidem , at expleri non potest . Hinc illius irrequieta motio , & inconstantia , quod cum boni infiniti sit capax , illius adeo appetitum ac velut sitim quandam

dam res creatæ accendere magis possint ,
quàm restringere , aut explere .

Itaque Deus est finis omnium actionum
humanarum , si physicè spectentur : nam
omnes a Deo proficiscuntur , qui omnia in
omnibus operatur : At si illæ actiones
moraliter , atque ut a libero hominis ar-
bitrio , dimanant , considerentur , non om-
nes ad Deum referuntur : quia homo persæ-
pe in seipso , aut in alia creatura sistit .

Secunda Conclusio .

Non possumus plures fines ultimos & to-
tales simul nobis proponere .

Probatur Conclusio . Finis ultimus dicitur ,
ad quem alii fines referuntur , cum ad alium
is non referatur , qui appetitum animi om-
nino explet , & summum illius est bonum :
atqui si plures nobis ultimos & adæquatos
proponimus , unus ad alium referri non po-
terit , nec solus explere animi appetitum ;
nec summum erit bonum , cum præter eum
aliquid expetatur : ergo finis ultimus unus
tantum , non multiplex esse potest .

Confirm. Quilibet ex his finibus esset finis
ultimus ex hypothesi , & non esset ul-
timus ; cum præter eum quiddam aliud
esset expetendum , neque omnia ad eum
referrentur .

Quod autem opponi in contrarium potest
facile dissolves si adverteris plures fines ul-
timos partiales , ut loquuntur , & inadæ-
quatos interdum nobis esse propositos , non
totales & integros , nisi fortè diversis tem-
poribus . Sed de his nulla est controversia .

Sic

Cum autem ea vel sit ex omni parte perfecta, qualem post hanc vitam nos adepturos speramus; vel imperfecta, quam pro naturæ conditione in hac nos consequi posse Philosophi crediderunt: de hac primùm dicendum est, tum de felicitate quam sacra docet Religio, quæ immortalis est, & bonos post hujus vitæ decursum manet. paulò uberiùs agendum erit.

Q U Æ S T I O P R I M A.

De Beatitudine Philosophica.

S Ummum bonum, inquit Tullius, si ignoretur, vivendi rationem ignorari necesse est: ex quo tantus error consequitur, ut quem in portum se recipiant, scire non possint. Cognitis autem rerum finibus, cum intelligitur quid sit & bonorum extremum, & malorum, inventa vitæ via est, conformatioque omnium officiorum. Hæc cum ita sint, incredibilis tamen est Philosophorum hac de re dissensio: cum S. Augustinus ex Varrone referat 288. opiniones de felicitate inter se discrepantes numerari posse: adeo verū est id quod docet Seneca, vivere omnes beate velle, sed ad pervidendum quid sit, quod beatam vitam efficiat, caligare. Ex quibus tamen Senecæ verbis id colligere possumus, non tam Philosophos de ipsa felicitate inter se, quàm de mediis, ut loquuntur, seu de causis ipsius felicitatis dissentire. Quæ sit enim felicitatis ratio, quæ conditiones, inter se planè conveniunt: sed quæ felicitatem maximè efficiant: & in quo ea posita sit, magna contentione pugnant.

Phil. Burg. Tom. II.

D Cum

Cum autem tria sunt bonorum genera, fortunæ, corporis & animi: plerique è vulgo felicitatem in divitiis aut honoribus ponunt, sed ex Philosophis perpauci sunt, qui hæc fortunæ bona tanti faciant, ut sine iis felicitatem non posse consistere arbitrentur; nulli verò sunt qui in iis rebus summum bonum constituent: cum hæc fortunæ dona ornare quidem & adjuvare vitam beatam possint, non eam efficere. Unde Aristoteles id utique cum felicitate convenire decernit, ut quis opibus, amicis & liberis floreat: sed felicitatis summam in contemplatione & virtute ponit.

Aristippus & Cyrenaici in voluptate corporis summum bonum constituunt. Quæ opinio Epicuro etiam tribuitur, tum a Cicerone (*I. de finib.*) tum a multis ex SS. Patribus. Quanquam Torquatus apud Ciceronem, Seneca, Maximus Tyrius, & nonnulli etiam ex SS. Patribus contendunt Epicurum non corporis voluptatem, sed delectationem animi mentis tranquillitatem, & doloris vacuitatem extremum bonorum posuisse.

Zeno & Stoici omnes virtutem se sola esse contentam, & unam in bonis numerari, cætera non bona esse, sed propter virtutem expeti crediderunt. Plato sapientiam cum delectatione conjunxit. Aristoteles sapientiæ quoque & virtuti primas defert: sed negat tamen eum esse felicem qui in maximis doloribus calamitatibusque versetur, nisi ut ait, *quis velit thesm, paradoxumque defendere*. Quare virtutis usum cum vitæ perfectæ prosperitate conjunxit. Jam
ita

Itaque singulas Philosophorum opiniones breviter excutiamus.

Prima Conclusio.

Summum bonum neque in bonis fortunæ, neque in voluptate corporis consistit.

Ac primum quidem, nihil necesse est pluribus verbis demonstrare felicitatem non in fortunæ bonis, non in voluptate corporis esse positam; cum ea bona non sint in nostra potestate; cum meliores nos non efficiant, sed bonis & malis sint æquè communia: cum nobis invitis eripi possint. cum denique appetitum animi non satient, fluxa sint, & caduca: ut alias omittam rationes quæ passim occurrunt. Hinc eleganter Seneca l. de brevit. vitæ; *Quantum caliginis mentibus humanis obicit magna felicitas!* & infra. *Ipsæ voluptates eorum trepidæ, & variis terroribus inquietæ sunt, subitque cum maximè exultantes sollicita cogitatio.* Hæc quandiu? Itaque Cicero (Epist. 52.) non immeritò hæc ultima bonorum appellat, atque nos ad majora quædam natos esse contendit. Hinc pulchrè Augustinus nos admonet, *quod si adsint bona temporalia non in eis beata vita ponenda est: sed subdita esse debent, non prælata; sequentia, non ducentia.* Et alibi, *loca offerunt quod amemus, tempora surripiunt quod amamus, & relinquunt in anima turbas phantasmatum, quibus in aliud atque aliud cupiditas incitetur; ita fit inquietus & ærumnosus animus, frustra tenere à quibus tenetur exoptans.* Mors ipsa obstat quominus horum bonorum

rum possessione sumus felices. *Morieris*, inquit Seneca (l. 2. de vera relig.) *non quia egrotas, sed quia vivis.*

Epicureorum rationes afferuntur & solvuntur.

TOrquatus quidem apud Tullium, voluptatem summum bonum, & dolorem summum esse malū hinc probare conatur ex Epicuro 1. Quod omne animal simul atque natum sit, voluptatem appetere eaque gaudere ut summo bono, doloremque aspernari videatur, ut summum malum, & quantum possit a se repellere.

2. Quod voluptas per se sit expetenda, dolor per se fugiendus. Voluptatis tamen nomine negat eam intelligi oportere, quæ suavitatem aliquam naturam ipsam movet, & cum jucunditate quadam percipitur sensibus; sed maximam illam quæ percipitur omni dolore detracto. Omne enim quo gaudemus, voluptas est: ut omne id quo offendimur, dolor. Itaque non placuit Epicuro medium esse quiddam inter dolorem & voluptatem. Quisquis enim sentit quemadmodum sit affectus, eum necesse est aut in voluptate esse, aut in dolore.

3. Constituamus, *inquit*, aliquem magnis, multis, perpetuis fruentem & animo & corpore voluptatibus, nullo dolore nec impediente, nec impendente: quem tandem hoc statu aut prestabiliorem, aut magis expetendum possumus dicere? Statue contra, aliquem confectum tantis animi corporisque doloribus, quanti in hominem maximi cadere possunt, nulla spe pro-

posita fore levius aliquando; nulla præterea nec præsentis, nec expectata voluptate: quid eo miserius dici aut fingi potest? Quod si vita doloribus referta maximè fugienda est, summum profectò malum est vivere cum dolore. Cui sententiæ consentaneum est, ultimū esse bonorum cum voluptate vivere.

4. Ut Medicorum scientiam non ipsius artis, sed bonæ valetudinis causa probamus, & gubernatoris ars, quia bene navigandi rationem habet, utilitate, non arte laudatur: sic sapientia quæ ars vivendi putanda est, non expeteretur, si nihil efficeret. Nunc expetitur, quod sit tanquam artifex conquirendæ & comparandæ voluptatis: nam ea præceptrice in tranquillitate vivi potest, omnium cupiditatum ardore restincto: atq; ipsius fortunæ nos modicè ferre docet injurias, & omnes monstrat vias quæ ad quietem & tranquillitatem ferunt. Quin etiam negat temperantiam propter se expetendam esse: sed quia pacem animis affert: cum in rebus aut expetendis, aut fugiendis rationem ut sequamur monet. Sic reliquas virtutes & vitia persequitur, ac negat illas laudari, aut hæc vituperari suo nomine: sed hæc rejici quia dolorem pariant, has optari quia voluptatem, quæ sola est quæ nos vocet ad se, & alliciat suapte natura.

Resp. His & aliis quæ afferri solent, non aliud effici quam voluptatem, aut potius delectationem animi ita esse cum summo bono conjunctam, ut ab eo divelli non possit. Hinc Cic. (*l. 5. de finib.*) *ista, inquit, animi tranquillitas ea ipsa est beata vita: quærimus autem non quæ sit, sed unde sit.* Quare si Epicurus

curus non aliud sensit quàm Democritus , & felicitatem in tranquillitate animi collocavit , non multùm a veritate videtur aberrasse . Cumque omnia delectationis causa fieri a nobis contendit , utcunque excusari potest . Nemo enim cum laborat ut aliquid consequatur , non cogitat de voluptate qua fruetur , ubi rem ipsam quam optat, adeptus fuerit. Omnis enim voluptas cupiditatem, hæc indigentiam consequitur atque in eo voluptas maximè posita est, ut indigentia detracta cupiditas ipsa expleatur . Sic voluptas non est comedisse , sed comedere . Quod utique non solùm in eo genere bonorum quæ jucunda dicimus , sed etiam in utilibus & honestis animadverti potest . Nam qui pauperiem fugit , & divitias quærit , dum lucrum colligit voluptate perfunditur ; eaque major est in iis parandis quæ sibi deesse arbitratur , & minus viget circa ea quæ jam parta sunt .

Non dissimili ratione qui dignitatem , honorem , scientiam adipiscitur , dum ea sibi parat , tum magna voluptate completur : sed postquam vel honoribus jam est assuetus , vel scientiam adeptus , tum nova cupiditate accenditur , ut nova itidem voluptate potiatur .

Quocirca non tam re , quàm verbis Epicurus a Peripateticis videtur dissentire . Quamvis enim voluptatis nomen sit hominibus belluisque commune , aliud tamen voluptatis genus est homini proprium, quod illius felicitatem efficit , aut comitatur . Quæcunque autem Epicuro ab aliis tribuatur de summo bono sententia , ipse palam pro-

profitetur, beatæ vitæ finem non alium esse quam sanitatem corporis, & tranquillitatem mentis. *Quidquid*, inquit *agimus*, eò *spectat*, ut *neque doleamus*, *neque perturbemur*. Unde, & Diogenes Laertius Epicuri sententiam malè cum Aristippi opinione confundi nos admonet. Ille enim bonorum finem constituit eam voluptatem, quæ in stabilitate & quiete consistit, in tranquillitate nimirum & indolentia; Aristippus verò finem posuit eam voluptatem quæ est in motu, qua sensus actu movetur. Hinc Seneca (*Epist.* 66.) Stoicæ Philosophiæ inter Latinos princeps, *apud Epicurum*, inquit, *duo bona sunt*, ex quibus illud summum beatumque componitur. *Ut corpus sine dolore sit*, *animus sine perturbatione*. Tranquillitatis autem nomine non intelligit Epicurus vitam otiosam & inertem. Quid enim, ut ait idem Seneca *otiosus verme*? Sed illi similem intelligit, quam Aristoteles ex rerum contemplatione percipi tradit; voluptates autem quæ in motu positæ sunt, ut alienas a summo bono rejicit Epicurus: atque ut eam calumniam repelleret, apologiam conscripsit.

Multa in hanc sententiam Gassendus colligit, ut Epicurum ab iis quæ ei falsò tribuuntur, vindicet, quasi eò devenisset insanix, ut virtutem non ob seipsam, sed propter corporis voluptatem colendam esse credidisset. Quod meritò Cicero (*De vita beata* c. 7.) ut Philosopho indignum refellit: *Quid necesse est*, inquit, *tanquam meretricem in matronarum cætum*, *sic voluptatem in virtutum cætum adducere*? Itaque voluptatis

nomine non moventem, sed stantem ab Epicuro intelligi constat, quæ scilicet in tranquillitate animi posita sit; non inertem & otiosam, sed quæ firma ratione efficitur, quæ emovere nihil eorum quæ mala dicuntur, possit; quæ omnem animi & corporis ægritudinem pellat. Nam illa ægritudo animi est velut generalis dolor, ex quo cæteri morbi habent, quod sint molesti, aut ingrati. Quare non corporis, sed animi dolor summum malum ex Epicuro dici solet; uti nec corporis, sed animi voluptas summum bonum futurum est. *Voluptas enim corporis, ait Seneca, (Epist. 59.) cum maximè delectat, extinguitur; iraque cito implet, & tædio est: post primum impetum marcescit; nec id unquam certum est, ejus in motu natura est.* Quæ autem contra Epicurum objicit Cicero, hæc adversus voluptatem corporis dicuntur, quæque est in motu; non solidam illā delectationem quæ a virtute divelli non potest, labefactant. Ac ne Stoici quidem hoc genus voluptatis abesse putant a sapiente, quem solum felicem volunt. *Hoc ergo, inquit Seneca, cogita hunc esse sapientis affectum, gaudii equalitatem. Talis est sapientis animus, qualis mundi status super lunam; semper illic serenum est. Habes ergo quare velis sapiens esse, quia nunquam sine gaudio est. Gaudium hoc non nascitur nisi ex virtutum conscientia.*

Stoicorum & Peripateticorum de felicitate sententia.

SToicos & Peripateticos unā conjungimus, quod verbis magis, quàm re discre-

ſcrepent. Utrique enim ſummum bonum in virtute, aut in actione virtutis conſtituunt; utriq; ſinem bonorum eſſe dicunt ſecundum naturam vivere, id eſt, inquit Cicero, *virtute adhibita frui primis à natura datis*. Hæc autem prima naturæ ſeu accommodata, ab ipſa voluptate negant duci oportere, ut credidit Epicurus: neque enim a primo animantium ortu petenda eſt origo ſummi boni; nec ſi animal ſimul atque natum eſt, gaudet voluptate, & eam appetit ut bonum, & fugit dolorem ut malum, idcirco voluptas ſummum bonum dicendum eſt. Præterea nō ut voluptatem expetat, natura movet infantē; ſed ut ſe integrum, ſalvumq; eſſe velit: antequam voluptas eum aut dolor attigerit, ſalutaria appetit, alpernaturque contraria. Sed ubi intelligentia acceſſerit, ac viderit rerum agendarū ordinem, tum illud ratione colliget ſummum eſſe hominis bonum, quod honeſtum eſt, & naturæ maximè convenit. Eſt enim illud extremū & maximè expetendum, convenienter naturæ vivere: ac beata vita virtute efficitur: cum id ſolum bonum ſit, quod honeſtum; id malum, quod turpe. Quidquid autem præter id quod honeſtū ſit expetendum eſſe dixeris, in bonisq; numeraveris, & honeſtum ipſum quaſi virtutis lumē exſtinxeris, & virtutē pene everteris. Sic ferè M. Cato apud Cic. *l. 2. de ſin.* ſuam & Stoicorum de ſummo bono ſententiā explicat.

Nec multum ab iis diſſentiunt Peripatetici & Academici, qui honeſtum eſſe ex bonis optimum, vi ſua & propter ſe expetendū & per ſe ipſum poſſe laudari, nec ad voluptatem referri arbitrātur; omnem quoq; na-

turam esse conservatricem sui, idque habere propositum quasi finem & extremum, se ut custodiat in quàm optimo sui generis statu. Ex quo intelligitur homini id esse in bonis ultimum, secundùm naturam vivere, seu vivere ex hominis natura undique perfecta, & nihil requirente. Ea enim vita expetitur, quæ sit animi corporisque expleta virtutibus. Illa autem sunt maximè quæ plurimum habent dignitatis, ita ut animi virtus corporis virtuti anteponatur: animique virtutes non voluntarias, cujus generis sunt docilitas, memoria, quæque uno ingenii nomine appellantur, vincant virtutes voluntariæ: nam in homine summa omnis animi est, & in animo rationis, ex qua virtus est, quæ rationis absolutio definitur. Sic utique M. Piso l. 4. de finibus,

In hoc autem Peripatetici a Stoicis dissentiunt, quòd præter honestum multa alia per se expeti, & ad summum bonum pertinere existiment. Sic valetudo, vires, vacuitas doloris propter se expetuntur. Quoniam enim natura suis omnibus expleri partibus vult, hunc statum corporis per se ipsum expetit, qui est maximè è natura, quæ tota perturbatur, si aut ægrum corpus est, aut dolet, aut caret viribus. Sic tantus est in omnibus cognitionis amor & scientiæ, ut nemo dubitare possit, quin ad eas res hominum natura nullo emolumento invitata rapiatur. Iam quis non moveatur & offensione turpitudinis & comprobatione honestatis? Ex quibus concluditur & virtutes omnes & honestum illud quod ex iis virtutibus exoritur, & in iis hæret, esse per se
ex-

expetenda, & ad felicitatem maximè pertinere. Non quòd virtus ad beatè vivendum se ipsa contenta sit, ut Stoici pertendunt: sed quia est in bonis omnibus optimum; Nam summum bonum cumulatur ex integritate corporis & ex mentis ratione perfecta. His explicatis, quid sentiendum sit, videamus. Sit igitur

Secunda Conclusio.

Felicitas neque in sola virtute, ut Stoicis videtur, neque in iis quæ virtuti adiungunt Peripatetici, posita est, nec demum in hac vita haberi perfecta potest.

Probatur Conclusio ex eo vel maximè, quòd docent Stoici virtutem sufficere ad bene beatèque vivendum. Hinc enim sequitur, eam non propter se, sed propter beatam vitam expeti; seu illam esse felicitatis causam, vel medium quo ad summum bonum perveniri potest, non felicitatem ipsam, aut hominis finem ultimum; virtute nos uti tanquam medio, non frui: cum tamen beatitudo sit fruitio summi boni. Hinc docet Arist.(1. *Eth.c.10.*) quòd virtutis præmium atque finis optimum quidpiam, divinumque & beatum esse oporteat. Ac tria subinde bonorum genera distinguit; quædam propter se, non propter aliud expetuntur, ut beatitudo; quædam alterius gratia, non propter se, ut divitiæ, quædam & propter se, & propter aliud, ut virtus. Plato eandem antè adhibuerat distinctionem, atque in exemplum eorum quæ propter se, &

propter aliud expetuntur, hæc attulerat, vi dere, valere, sapere, quod est virtute esse præditum.

Quare ut magnificè, sic minus accurate, Seneca (*l. de vita beata*), erras, inquit, cum interrogas quid sit illud propter quod virtutem petam: quæris enim aliquid supra summum. Interrogas quid petam ex virtute, ipsam. Nihil enim est melius, ipsa pretium sui est. Nos utique fatemur nihil esse melius virtute præter ipsam beatitudinem: sed negamus in sola virtute summum bonum esse positum.

Quod etiam Stoici negant, morbum, dolorem, egestatem esse mala, sed rejectanea, ut ajunt, quæ sapiens non fugit, sed discernit. Item quæ bona dicimus, ut bonam valetudinem, integritatem oculorum reliquorumque sensuum, præposita esse, non bona: id, inquam, a communi omnium sensu abhorret. Nihil est, inquit Zeno, malum nisi quod turpe & vitiosum est. Ad ineptias redis, ait Cicero 2. *Tusc.* Illud enim quod angebat, non eximis. Scio dolorem non esse nequitiam; desine me id docere, hoc doce, doleam, nec ne, nihil interesse. Illud itaque, & melius, & verius, omnia quæ natura aspernatur, in malis esse, quæ adsciscit, in bonis. Quæ si vera sunt, palam est nos felicitatem in hac vita consequi non posse: cum nos undique obsideant mala: ac bene nobiscum agatur, si quàm minimùm miseri simus: adeo ut felices nobis videamur, cum sortem nostram cum aliorum conditione comparemus. Abunde igitur, ait Plinius, (*L. Epist. 52.*) atque indulgenter fortuna decidit cum eo, qui jure dici non infelix potest.

Qua-

Quamobrem siue beatitudinem in vita undique perfecta, & in complexu omnium bonorum fortunæ, corporis & animi, quæ ad virtutis actiones exercenda sunt necessaria, statuamus cum Aristotele; siue cum Stoicis in sola virtute, ut felicitatem sic bonum omne collocemus, id omnino fatendum est, dum hanc vitam vivimus, felicitatem ipsam magis esse in voto quàm in re. *Nam si bonum est patria*, ut ait M. Piso apud Tullium, (L. 7.) *miserum est exilium*; *bonum valetudo*, *miserum morbus*: *bonum integritas corporis*, *miserum debilitas*. *Quæ si potest sapiens singula consolando levare*, *universa quomodo sustinebit?* *si enim idem cæcus*, *debilis*, *morbò gravissimo affectus*, *exul*, *orbis*, *egens*, *torqueatur equuleo*: *quem hunc appellas Zeno?* *beatum*, inquit, *etiam beatissimum*. Sic dicit incredibilia. Peripatetici probabiliora afferunt, cum in bonis numerant amicos, liberos, propinquos, divitias, honores; & in malis egestatem, orbitatem, dolorem. Sed si ea mala sunt, in quæ potest incidere sapiens, illud fateantur necesse est sapientem esse, non esse ad beatè vivendum satis.

Ac Stoicorum quidem minus ferenda est sententia, qui sapientem etiam in Phalariidis tauro felicem fore credidere. Unde inquit Augustinus (L. 5. de finib.) loquens de Stoicis, *in errorem absurdissimum lapsi sunt*, *ut cum asseverant etiam in Phalaridis tauro beatum esse sapientem*, *cogantur fateri vitam beatam aliquando esse fugiendam*: *exaggeratis enim malis corporis cedunt*, *atque in eorum molestiis gravissimis abscedendum ex hac vita esse dixerunt*.

O nimium superba jactantia! si beata vita est in cruciatibus corporis, cur in ea non manet sapiens ut fruatur? si autem misera est, quid obsecro te, nisi typhus impedit, ne fateatur? Nihil sanè dici potest verius, si à Christiano efferatur, quàm illud Latini Stoici, tota vita discendum est mori: Sed nihil absurdius ab Ethnico Philosopho excogitari potuit, qui nos totos perire cum morimur, opinabatur.

QUÆSTIO II.

Quod sit summum hominis bonum, sex de beatitudine objectiva.

EX iis quæ diximus illud efficitur, non aliud esse summum hominis bonum, quàm Deum ter maximum: nam felicitatis nomine, non Philosophi modò, sed imperitum etiam vulgus non aliud intelligit, quàm eum statum, quo nullus possit melior excogitari, quique sit constantior, quàm ut amitti queat: Id verò munus esse divinum Aristoteles ipse quasi naturæ voce, cui obfisti non potest, omnino convictus fateri cogitur. *Profectò, inquit, si aliud quoddam est hominibus à diis immortalibus datum, felicitatem datam esse par est credere, quia nihil est melius in rebus humanis.*

Quin etiam l. 10. Ethic. docet vitam beatam meliorem esse quàm hominis natura ferat. *Non enim, inquit, quia homo est ita vivet: sed quia divinum quiddam in eo est. Addit eam esse præmium quod Deus charissimis suis*

fuis largitur . Verùm ne à constituto ordine recedamus , sit

Prima Conclusio .

Ex principiis Aristotelis & ratione ipsa , non alibi quàm in Deo felicitas hominis est constituta .

Probatur Conclusio . Ex Aristotele , imò ex communi omnium sensu est in nobis summi boni ingenitus a natura appetitus , qui nec inutilis esse potest , nec expleri nisi ab ente infinito . Appetitus enim cujus natura principium est , quique velut ipsius naturæ humanæ visceribus est insitus , non ab imaginatione , aut libertate , aut ab arte aliqua profectus , is , inquam , inanis esse nequit . Beatitudinis autem appetitio tam altè est in nobis impressa , ut sit omnium affectuum fons & principium : satiari ea non potest nisi ab ente infinito , quod non ut faciendum a nobis , sed ut possidendum spectamus : neque id solum ut veritatis , sed etiam ut bonitatis fontem , atque adeo ut actu existens omnino expetimus .

Nam in hoc bonum a vero differt , quòd verum ad essentiam , bonum ad existentiam pertineat . Ut res vera esse concipiatur , satis est quòd sit objectum intellectus : sed ut sit bona , eadem existat necesse est . Quare summum bonum ita existit , ut non possit non existere , eumque summi boni desiderium nos tenet , semper esse , & bene esse expetimus . Nam , ut optimè Boetius , *extremum infelicitatis genus est , aliquando felicem fuisse .*

Cum

Cum itaque Deus hoc ardens felicitatis & æternitatis desiderium nobis inseruerit, quod inutile aut vanum esse non potest; nec verisimile sit mentem suo fine, sua perfectione fraudari: palam est extremum & summum hominis bonum; quod ipsa veritatis contemplatione & fruitione continetur, nos in hac vita assequi non posse, sed bonos hac mortali vita defunctos manere. Quantulumcunque enim est, quàm obscurum, quàm variis erroribus admistum, quod magno labore, & in maximo studio consequimur. Non frustra autem Deus tantam sciendi & veri cognoscendi cupiditatem in nobis accendit, ac rerum omnium capacem animum dedit, qui expleri tamen non potest, dum corporis vinculis illigatur. Ergo felices in hac vita esse non possumus: quod utique sola ratione ducti, & ipsius Aristotelis principiis innixi omnino demonstratum arbitramur.

Quare concludimus cum S. Augustino, quod nemo nisi beatus vivit ut vult, *nisi ed pervenerit, ubi mori, falli, offendi omnino non possit; eique sit certum ita semper futurum: nunc vero quis hominum potest ut vult vivere, quando ipsum vivere non est in nostra potestate? vivere enim vult, mori cogitur; quomodo igitur vivit ut vult, qui non vivit quandiu vult? Neque usquam alibi, quam in Deo ea bona occurrunt, quæ naturalis quodam appetitu expetimus, ut plenam & integram animi tranquillitatem, æternitatem ipsam, & in boni possessione constantiam, omnium quæ cum ratione sunt conjuncta desideriorum completionem.*

Secunda Conclusio .

Ex Platonis doctrina felicitas in Deo ipso posita est .

Hoc ipsum præter cæteros Philosophos disertissimè docuit Plato cum multis in locis , tum in Epinomi . *Præclara* , inquit , *spes est fore ut post mortem consequatur quis omnia , quorum desiderio accensus instituerit , transgeritque quàm optimè potuerit vitam .* Nec inauditum quiddam & novum se afferre proficitur , *sed quod omnes Barbari , inquit , & nos Græci agnovimus .* Tum hujus vitæ mala & calamitates exaggerat , nosque ab ortu nostro usque ad mortem malis ita conflictari tradit , ut vix circa mediam ætatem respirare aliquantulum liceat ; ac nemo nisi pueriliter sapiat , cum ad senectutem pervenerit , & præteritas molestias recogitat , rursus in vitam reverti optaverit . Ex quibus id colligit per paucos admodum in hac mortali vita felicitatem degustare ; ad eam tamen utcunque perveniri ; non artibus seu mechanicis & vitæ necessariis , seu ludicris , seu denique iis , quas auxiliatrices vocat ; cujus generis sunt militaris , & ars medendi ; sed iis virtutibus , quibus purgatur animus & ornatur , fitque Deo amicus ; & doctrinis speculativis , in quibus Arithmeticam potissimum numerat , quod mentem ad contemplationem promptam efficiat . Cæteras deinde scientias persequitur , ac tandem concludit , eum qui cuncta hæc percepit , sapientissimum nos appellare . *Quem* , inquit , *affirmo , cum diem suum obierit ,*

non

non amplius multorum sensuum, ut nunc, sed unius optimæ sortis participem fore.

2. Rem ipsam diligentius in Phædone exequitur, ubi Socrates in carcere constitutus de immortalitate animæ disputans, negat animum corporis vinculis constriatum, aut sapientem, aut felicem esse posse: *Arbitrari, inquit, oportet, si quis verè Philosophus sit, ut non alibi puram sapientiam posse assequi speret, quàm in futura post mortem vita.*

Plures in hanc rem affert rationes: 1. Quòd cum optamus aliquid intelligere, recedere oporteat a corpore, atque animo solo res ipsas contemplari. Quòd impedimento sit corpus, si quis eo utatur ad veritatis contemplationem; nosque, ut Poetæ ipsi canunt, nihil audire, nihil videre sincerum. Quòd morbi, cupiditates, libidines, metus, multiplices rerum imagines nos a veritatis contemplatione arceant, & animum conturbent. 2. Divinum veritatis lumen longè esse ab omni corporum societate secretum. Undè quòd longiùs animus a corpore, tum virtutum cultu, tum contemplationis exercitatione, remouetur; hoc clariùs & seipsum, & res incorporeas contuetur. 3. Rerum sensibilibus imaginibus mentis aciem obtundere, & tanquam nubes illius splendorem obscurare. Huc adde quòd animus in regendo corpore sit occupatus, & in varias actiones distractus: sed solutus a corporis vinculis ad res incorporeas totus convertitur. Quare felicitas in hac vita nemini potest perfecta contingere.

Hinc pulchrè Socrates (*in Phædone*) apud Pla-

Platonem; *grave, inquit, periculum fore putandum est, si qui: neglexerit animam. Si enim mors totius dissolutio esset, nimium improbi lucrarentur; cum & à corpore, & à sua pravitate liberarentur: nunc autem cum anima immortalis appareat, nulla superest malorum declinatio, nulla salus, nisi ut optima & prudentissima fiat.* In dialogo verò qui Gorgias inscribitur, pluribus verbis poenas improborum describit; & bonorum felicitatem. *Multis, inquit, peccatis refertam animam ad inferos descendere, extremum omnium malorum est.*

Ex his itaque conficitur Deum solum esse summum hominis bonum, seu, ut loquuntur, beatitudinem ejus objectivam: cum non aliud sit maximè expetibile, nisi id quod est per essentiam & universalissimum bonum, quodque omnia bona complectitur: Sed id unius Dei proprium est ut sit summum & universalissimum, & infinitè bonum, & per essentiam, non per participationem: ergo non in alio consistit beatitudo, quàm in Deo ipso.

Solvuntur objectiones.

Opp. I. Aristotelem l. I. Ethic. multis argumentis sententiam Platonis exagitare, quòd felicitatem constituerit in quodam universali bono, quod per se bonum, vel ideam boni nominavit. Ergo alia est Aristotelis, alia Platonis de summo bono sententia, nec uterque eam in Dei contemplatione collocat; nec demum ex Aristotelis doctrina Deus est beatitudo hominis objectiva.

Ref-

Respondet Javellus Aristotelem illius potissimum felicitatis, quam in hac vita consequi possumus, habuisse rationem: contra Plato vix a nobis quandiu hanc vitam vivimus, solidam felicitatem percipi constanter asseruit: quod beatitudo sit bonum sufficiens, perfectum; quod omnem indigentiam detrahit, & appetitum explet. Mens verò nostra tenui rerum divinarum & obscura cognitione, voluptate etiam non sincera & plena, sed cum anxietate conjuncta perfunditur. In eo tamen Plato & Aristoteles conveniunt, quod ambo felicitatem in rerum divinarum perfecta contemplatione, & virtutum actionibus posuerint. Quod autem Plato contemplationem Dei spectaculum per se boni & per se pulchri, identidem appellat; idque in Symposio, seu in convivio, pulchritudinis pelagus integrum, sincerum, purum, simplex, divinum, ideam boni nominat: hoc utique offendit Aristotelem, quasi non aliud Plato, quàm bonum transcendens & universale, ut ajunt, per prædicationem intelligeret: Cum tamen bonum per essentiam, cujus participatione cuncta bonitatem suam acceperunt, his nominibus designarit Plato. Unde vocis homonymia decepti Peripatetici cum Aristotele negant hujus boni cognitionem quicquam prodesse aut formandis moribus, aut reipublicæ administrandæ. Contra id necessarium omnino judicat Plato, ut cives fiant amici Deo, idque sine illius cognitione fieri posse negat. Hinc lib. 6. de Repub. & aliis passim in locis, quid per boni ideam intelligat apertè ostendit, cum

scripsit

reipublicæ administratorem cæcutire, & casu, non consilio operari docet, nisi primam boni formam perspexerit, omnium exemplar causamque bonorum.

Hinc meritò Sanctus Augustinus existimat Platonicos de summo bono meliùs sensisse, quàm reliquos Philosophos, (*l. 8. de Civ. Dei.*) inquit, *bi omnes illis Philosophis qui non dixerunt beatum esse hominem fruentem corpore, vel fruentem animo, sed fruentem Deo: non sicut corpore vel se ipso animus, aut sicut amico amicus, sed sicut luce oculus.* Nam ex Platone ut lumen corporum a sole proficiscitur, ita summum hominis bonum ab eo quod absolutè summum bonum est, & velut primum lumen & primum pulchrum, dimanat. Undè in Theæteto apertè docet summum animæ bonum esse Dei similitudinem.

Opp. 2. Illud est summum hominis bonum quod naturali instinctu expetimus; sed Dei fruitionem, aut possessionem appetitu naturali nemo desiderat: cùm naturæ viribus eam assequi non possimus: ergo Deus non est objectiva hominis felicitas.

Resp. Neg. min. Expleri enim appetitus a natura congenitus non potest, nisi Dei possessione: cum, ut docet S. Thomas, (*l. 3. contra gent. cap. 25.*) homo desideret naturaliter scire primam causam quasi ultimum finem: ac Plato ipse in Epinomi id tanquam certum statuit, naturæ instinctu nos felicitatem appetere, quam in omnibus actionibus nostris & vaticinamur & quærimus. *Quamvis autem homo naturaliter inclinetur in finem ultimum, non tamen potest naturaliter*

liter illum consequi, sed solum per gratiam: & hoc est propter eminentiam illius finis: ait S. Doctor scribens in L. Boetii de Trin. q. ultimā. Quamvis enim illud bonum naturæ viribus consequi non possimus, non idcirco minus naturalis est illius appetitus, saltem præeunte cognitione quasi natura impellente elicitus: ut qui aliquod beneficium petit, idque desiderat, si minus id obtinet, tamen quadam afficitur molestia: quanquam sibi debitum non esse probè intelligit. Et quidem S. Thomas l. 3. c. gentes cap. 50. probat ex naturali scientiæ appetitu, intellectualem creaturam sic Dei intuitum expetere, ut abstractiva cognitione non sit contenta; quod cognitio abstractiva sit imperfecta, quod ex cognitione effectuum desiderium incitetur ad cognoscendam causam. Contrarium tamen alibi videtur innuere; & sanè cum Dei ipsius existentia non omnibus sit cognita, instinctus ille aut desiderium Dei videndi omnibus æquè convenire nequit. Quod 1. 2. q. 5. artic. 8. clariùs explicat. Alio modo, inquit, possumus loqui de beatitudine secundum specialem rationem, quantum ad id in quo beatitudo consistit: & sic non omnes cognoscunt beatitudinem, qui nesciunt cui rei communis ratio beatitudinis conveniat, & per consequens, quantum ad hoc non omnes eam volunt.

Sed inquires: appetitus rei naturæ viribus impossibilis est tantum velleitas quædam, ut loquuntur, & desiderium inefficax: ergo si careamus eo quod obtinere non possumus, & ad cuius adeptionem non sumus a natura destinati, id non magis molestum nobis

nobis futurum est, quàm quod Angelorum natura, & vis intelligendi nobis non contigerit; nec privatio illa boni dicenda, sed negatio, quæ nobis molesta esse nec debet, nec potest.

Resp. Neg. ant. Ostensum quippè jam a nobis fuit, hominis appetitum satiari non posse nisi Dei possessione, & fruitione: est enim idem hominis principium, & finis ultimus; idem perficit, quod efficit. Quare si mens nostra a se haberet, quod esset, non alio egeret bono, quo frueretur: sed quia eum habemus authorem ut simus, ipsum quoque suavitatis largitorem habeamus necesse est, ut beati simus; *tale quippè bonum est Deus, ut nemini eum deserenti beneficit.* Aug. l. de nat. boni. Unde id vitium est naturæ intellectualis, quòd Deo non adhæreat, aut ab eo recedat. *Sicut cum vitium oculorum dicitur cæcitas, id ostenditur, quod ad naturam oculorum pertinet visus: ita cum vitium creaturæ Angelicæ (eadem est ratio de humana,) dicitur, quod non adhæreat Deo, hinc apertè declaratur ejus naturæ ut Deo adhæreat convenire* l. 12. de civitate Dei.

Utrum autem dari possit beatitudo illa naturalis, quæ in abstractiva cognitione consistit, hoc loco non inquirimus: id enim ad Theologos pertinet. Interim non negamus, quin Deo ita volente, ea dari posset: tumque tristitiam, aut animi ægritudinem quæ rebus ita ut sunt, constitutis, necessariò privationem visionis divinæ sequitur, Deus omnino prohiberet. Quod Deus id potuerit efficere, non dubitamus:
cum

cum beatitudo donum sit gratuitum , non debitum ; misericordiæ , non iustitiæ munus . Sed rebus ita ut sunt a Deo constitutis , id certum arbitramur , quod , ut passim docet S. Augustinus , (l. 12. de Civ. Dei .) *non est creaturæ rationalis vel intellectualis bonum , quo beata sit , nisi Deus .* Itaque quamvis non omnis beata possit esse creatura : neque enim hoc munus adipiscuntur aut capiunt feræ , ligna , saxa , & si quid ejusmodi est ; ea tamen quæ potest , non ex se ipsa potest , quia ex nihilo creata est ; sed ex illo à quo creata est . Hoc enim adeptæ beata est , quo amissa misera est . Hanc rationem affert S. Thomas : (l. 2. q. 1. art. 6.) *bonum , inquit , quod est ultimus finis , est bonum perfectum , complens boni appetitum : appetitus autem humanus , qui est voluntas , est boni universalis ; quodlibet autem bonum inbærens ipsi animæ est bonum participatum . Unde impossibile est , quòd aliquod eorum sit ultimus finis hominis .* Id verò impossibile judicamus moraliter loquendo , non absolute , atque ut ajunt , Metaphysicè . Et quidem ex S. Doctore naturalis ille & omnibus communis beatitudinis amor , non est tantummodo innatus , sed etiam elicitus , qui ex aliqua cognitione oritur , nec semper actu inest voluntati . Hinc passim docet , Deum movere voluntatem ad primum illius actum , seu ad amorem beatitudinis , qui bonus est physicè spectatus , sed neque meritorius dici potest , neque demeritorius : hoc enim proprium est amoris electivi , non ejus qui ab instinctu quodam naturali proficiscitur .

Opp. 3. Mens humana , quæ est finita , non potest

potest versari circa Deum, qui est infinitus: nulla enim est proportio rei finitæ cum infinita; nec sensus ullus circa omne sensibile, ut objectum suum versari potest; nedum intellectus summum intelligibile consequetur.

Resp. His & aliis quæ solent in Scholis ventilari, mentem humanam esse intrinsecè finitam, eam tamen esse facultatem universalem & extrinsecè infinitam, cujus objectum est omne intelligibile. Ac licet nulla sit certa & definita proportio, quæ entitatis vocitatur, Deum inter & intellectum nostrum, est tamen proportio, quædam habitudinis, qualis est inter facultatem & objectum. Ut Deus est intelligibilis, sic mens humana est intelligens: licet ratione suæ entitatis infinitè a Deo distet. Atque hæc habitudinis proportio in ipsa mentis nostræ natura fundatur, quod sit essentialiter intellectiva. Sensus quidem cum sit valdè limitatus, non omne sensibile potest percipere; visus colores, non sonos percipit: sed intellectus est facultas universalis, cujus objectum est omne intelligibile.

Sed inquiunt, facultas intrinsecè corporea, ut visus, versari non potest circa objectum intrinsecè spiritale: ergo nec facultas intrinsecè finita objectum infinitum potest attingere.

Resp. Neg. consequ. & paritatem. Nam sensus per suum organum coarctatur, & rem spiritalem assequi nequit: facultas verò spiritualis nullis terminis coercetur.

Contra inquit, facultas vitalis speciem suam habet ab objecto: ergo si objectum

illius sit infinitum, erit ea quoque infinita.

Resp. dist. antec. Facultas specificatur, ut ajunt, ab objecto, extrinsecè, C. intrinsecè, N. essentiam enim suam ex ordine ad objectum repetit: sed ex ipso non constat objecto.

Q U Æ S T I O III.

De Beatitudine formali.

Beatitudo formalis est possessio, seu fructio summi boni, quæ a Boetio definitur *status omnium bonorum aggregatione perfectus*; & a M. Tullio, *secretis malis omnibus cumulata bonorum possessio*. Jam ostendimus hunc statum in perfecta mentis nostræ cum Deo conjunctione positum esse. Cum enim status ille felicitatis sit ejusmodi, ut melior excogitari non possit, palam est eum non in agendi potentia, vel habitu, sed in perfectissima operatione consistere; quæ perpetua sit, constans, immutabilis, non interrupta, non mutationi obnoxia: cumque non corporis, sed animi vires Deum capere quodammodo, & possidere possint, illud quoque planum sit, summum bonum aut mentis, aut voluntatis, aut utriusque actione possideri.

Ne illud quidem dubium est, beatitudinem citra Dei visionem & amorem, aut citra ineffabilem delectationem intelligi non posse. Quod enim visio Dei intuitiva ad felicitatem pertineat, passim docent Scripturæ, ut Joan. 17. *Hæc est autem vita æterna ut cognoscant te solum verum Deum, & quem misisti*
Jesum

Iesum Christum. Tametsi plerique interpre-
tes hunc locum explicent *causaliter*, ut
ajunt, non *formaliter*: Id est, hæc sola est via
consequendi vitam æternam. Illud Apost. 1.
Cor. 13. *Videmus nunc per speculū & in ænigma-
te, tunc autem facie ad faciem*, clariùs id definit.

Quòd autem sine Dei amore, quo volun-
tas Deo ut bono immutabili adhærescit,
mens beata esse non possit, id ex eo liquet
quod testante Apostolo, *Charitas nunquam
excidat*. Hinc Augustinus Epist. 52. docet
nullum cæteris virtutibus nisi uni charita-
ti locum fore; *ubi inquit, nec prudenter discer-
nantur a bonis mala, quæ non erunt; nec fortiter
tolerentur adversa; quia ibi non erit, nisi quod
amemus, non etiam quod toleremus*. Cumque cæ-
teras virtutes est persecutus, ita concludit:
*una ibi virtus erit, nimirum Charitas, & id ip-
sum erit virtus præmiumque virtutis*.

Sed neque a beatitudine delectatio, &
mira suavitas abesse poterit: cum gaudium
Domini a Christo vocitetur. *Absit Domine*,
inquit S. Doctor, *à corde servi tui, ut quocun-
que gaudio gaudeam, beatum me putem. Ipsa
est beata vita gaudere ad te, de te, propter te;
ipsa est & non altera; qui autem aliam putant
esse, aliud sectantur, neque ipsum verum*.
Hinc Sapiens Proverb. 10. *Expectatio justi
letitia, quam scilicet justi consequentur*.
*Spes autem impiorum peribit: tum quia non
sunt vera bona quæ sperant, tum quia spes
illa, quam in rebus caducis collocant, eos
fallit. Hic enim est baculus arundineus,
cujus meminit Isaias cap. 36. cui si innixus
fuerit homo, intrabit in manum ejus, & perfo-
rabit eum*.

Hæc cum certa sint & inconcussa, tamen meritò quæritur in qua ex iis actionibus beatitudinis essentia consistat ; An in sola visione Dei clara & intuitiva , ut Thomistæ contendunt : an in solo amore, ut videtur Scoto ; an in sola delectatione, quæ opinio Aureolo tribuitur , an potius in visione & amore, ut vulgus Philosophorum existimat ; an fortè & delectatio quoque his sit adjicienda, ut placet S Bonaventuræ. Sit itaque

Prima Conclusio .

Visio Dei clara , & amor ad essentiam beatitudinis pertinent .

Probat. conclus. Illud est de rei essentia , si ne quo neque esse , neque concipi ullo modo potest : sed beatitudo nec consistere potest , nec intelligi, si visionem Dei aut amorem ei detrahas . Nam ut pulchrè S. Augustinus , (*l. de morib. Eccles.*) *neque ille dici potest beatus , qui non habet quod amat , qualecunque sit ; neque qui non amat quod habet , etsi optimum sit . Nam qui appetit quod adipisci non potest , cruciatur , & qui non appetit , quod appetendum est , aegrotat . Illud autem quod maximè appetimus , est clara & intuitiva Dei visio, ut jam ostendimus , & per amorem adhærere immutabili bono: Quod usque aded bonum est, inquit S. Augustinus, (*l. 12. de Civitate Dei c. 1.*) *ut sine illo creaturam intellectualem miseram esse necesse sit .**

Confirmat. Beatitudo formalis est summi boni possessio: id autem possidemus , cum ei conjungimur, tanquam objecto & fini :
quod

quod utique fit per cognitionem & amorem; per cognitionem ut summum verum, per amorem ut summum bonum id possideamus. Quod si alterum sustuleris, erit imperfecta, non integra summi boni possessio: ergo visio Dei & amor ad essentiam beatitudinis æquè pertinent.

Secunda Conclusio.

Delectatio etiam directam ad essentiam beatitudinis spectat, licet ea non sit actio quædam a visione Dei & amore distincta.

Probat. Conclus. Eadem planè ratione: quod nimirum beatitudo sine summa delectatione concipi non possit. Est enim felicitas finis & terminus omnium appetitionum; extra hunc finem acquiescere non possumus. Hinc illud pervulgatum Sancti Augustini in ipso Confessionum initio, *quia fecisti nos ad te, & inquietum est cor nostrum, donec requiescat in te: & lib. 13. Hoc tantum scio, quia malè mihi est præter te, non solum extra me, sed & in me ipso; & omnis mihi copia quæ Deus meus non est, egestas est.*

Quid autem quærimus nisi ut summi boni possessione hæc egestas detrahatur? Nec necesse est ut delectatio sit ab amore distincta; est enim amor fruitionis, non desiderii; nec fruitio sine voluptate intelligi potest.

Diluuntur objectiones.

Multa solent opponere, quæ faciliùs dissolves, si adverteris primò beatitudinem

esse possessionem Dei, non civilem, quasi mens beata jus & dominium haberet in Deum. sed vitalem & Physicam, quæ in conjunctione facultatis cum objecto & fine suo consistit.

2. Id quoque observandum, quodd felicitas inchoata & inadæquata in visione, vel amore separatim posita sit, non integra & adæquata.

Postremò id fatemur inter Deum & mentem nostram nullam esse proportionem certam & definitam, quæ vocari solet proportio entitatis, qualis est inter ea quæ sunt ejusdem generis: sed ea est proportio quæ dicitur habitudinis inter facultatem & objectum. Deus enim licet infinitus, tamen intra mentis objectum adæquatum, quod etiam specificativum dici solet, non intra objectum illius connaturale & attemperatum, cujusmodi est lux temperata respectu visus, continetur. Deus igitur videri potest ab intellectu, non comprehendì. His utique annotatis, quæ solent apponere, breviter perstringamus.

Opponitur 1. Beatitudo formalis est possessio summi boni: sed Deus ab homine possideri non potest. 1. Quia Deus non est in potestate hominis, nec subest ejus dominio. 2. Deus est infinitus, mens nostra finita; finiti autem ad infinitum nulla est proportio. 3. Longè minor est proportio inter mentem nostram & Deum, quàm inter oculum corporeum & Angelum: sed Angelus oculis corporeis conspici nequit: ergo multò minus Deus ab intellectu creato videri potest: unde & ab Apostolo invisibilis dicitur.

Resp.

Resp. Neg. min. Quæ autem probationis loco afferuntur, jam magna ex parte sunt soluta. Primùm enim felicitas formalis est Dei possessio, quatenus mens cum eo conjungitur, ut fine suo & objecto, C. est possessio civilis, quæ jus & dominium in rem ipsam includit, N. Quo quidem modo fate-mur Deum possideri non posse: Nec mens beata sic Deum possidet, ut avarus pecuniam: sed quia firmo & constanti amore ei adhærescit, eamque clarè intuetur, non comprehendit; hoc est, non tantùm cognoscit, quantùm cognosci potest.

Simili ratione, quòd ajunt nullam esse proportionem inter Deum & intellectum nostrum, in genere entis, C. in ratione ejus habitudinis quæ inter facultatem & objectum invenitur, N. est enim anima nostra imago Dei & illius capax.

Quæ quidem responsio adhiberi potest ad tertiam probationem. Longiùs enim distat mens nostra à Deo, quàm oculus corporeus ab Angelo, in genere entis, C. in ratione facultatis & objecti, N. Deus intra objectum intellectus, quod est omne intelligibile continetur. Angelus verò est extra objectum specificativum visus. Undè non solùm Deus, sed & Angelus est invisibilis oculo corporeo.

Opp. 2. Essentiam beatitudinis non in amore, neque in delectatione, sed in sola visione consistere. 1. Quia visio est prior amore, & id quod primùm in beatitudine concipitur. 2. Quia visio intuitiva est actio hominis præstantissima. Hinc Philippus Apostolus eam omnino sufficere persuasam.

habuit, cum dixit Christo Domino, *ostende nobis Patrem, & sufficit nobis*. Sic Psalter Regius, *ostende, inquit, faciem tuam, & salvi erimus*. Imò Christus Dominus, cum ait, *hæc est vita æterna ut cognoscant te solum verum Deum*; Vitam æternam in sola Dei visione constituere videtur.

Resp. dist. maj. Essentia beatitudinis in sola visione consistit, inadæquata, C. essentia beatitudinis adæquata & integra, N. sic integra hominis essentia non in sola anima, quæ est corpore præstantior, neque in solo corpore, quod prius est quàm anima, sed in utriusque partis conjunctione posita est. Interdum solius visionis mentio fit in Scripturis, quia visio clara & intuitiva summi boni cum illius amore necessario conjungitur.

Utra autem actio, aut facultas sit altera præstantior, visio, an amor; voluntas, an intellectus, magna contentione Thomistas inter & Scotistas controversitur. Neque id permagni est ad hujus quæstionis solutionem momenti: cum utraque facultas sit summi boni possidendi capax, mens scilicet & voluntas. Et quidem in hac vita charitas quæ ad voluntatem pertinet, præstantior est fide & omni cognitione, quam de Deo habere possimus; ac Deus perfectius a nobis amari potest, quam cognosci. Rem enim intelligimus; ut est in mente nostra, amatur ut est in seipsa. At Deus est præstantiore modo in seipso, quàm in intellectu nostro. Undè, ut optimè docet S. Thomas, cognitio rerum quæ sunt infra nos positæ, melior est amore, contra
atque

atque evenit in iis rebus quæ nobis sunt præstantiores: nam amore rerum inferiorum polluitur anima, sed rerum divinarum amor eam perficit: quod, ut docet Aristoteles, verum & falsum sint in intellectu. Unde res nobis subjectæ sunt nobiliori modo in mente nostra; sed bonum & malum sunt in rebus. Hinc S. Thomas identidem docet intellectum res ad se trahere, voluntatem verò a rebus ipsis trahi quodammodo & allici. Tametsi nonnulli malè hinc colligunt voluntatem nostram magis a Deo possideri per amorem, quàm eum possideat: illa enim tractio est metaphorica, neque ea ita accipienda quasi solus intellectus agat circa suum objectum: nam actio æquè saltem pertinet ad voluntatem, atque ad intellectum: sed utraque Deum attingit & possidet, mens ut summum verum, voluntas ut summum bonum.

Urgent. Si Deus possidetur per amorem: Ergo viatores iusti jam Deum possident, & sunt beati, nam teste Apostolo eadem in iis manet charitas, quæ nunquam excidit.

Resp. dist. ant. Quandiu sumus in via, Deum possidemus imperfectè, C. perfectè & quantum ratio beatitudinis postulat, N. amor enim vitæ est amor desiderii; amor patriæ est fruitionis: uterque in ratione charitatis convenit. Quare sancti in hac vita jam spe salvi facti sunt; sed nondum re, donec Deus evacuaverit quod est imperfectum: quod tum futurum est, cum Deum videbimus sicuti est: nunc enim cognoscimus tantum ex parte, tunc autem cognoscemus sicut

cognitus sum, ait Apostolus: tumque *charitas perfecta futura est, & replebitur in bonis anima nostra.*

Opp. 3. Cum duplex sit amor, unus qui dicitur, concupiscentiæ, qui ad nos; alter amicitiae, seu benevolentiae, qui ad alios refertur; neuter potest esse summi boni possessio: non amor concupiscentiæ qui sistit in nobis: neque etiam is qui dicitur amicitiae: nam objectum præsens nec efficit, nec supponit, sed ut vulgò loquuntur, a præsenti & futuro abstrahit. Ergo beatitudo formalis in amore non est posita: præfertim cum id proprium sit intellectus ut objectum sibi præsens sistat, aut efficiat, id verò nullo modo ad voluntatem pertineat.

Resp. Summi boni possessionem in perfectissimo amore positam esse: hic autem est amicitiae, cujus terminus primarius est Deus, ut summè bonus, atque ipsa beatitudo nostra. Est item amor fruitionis, non desiderii. Nam qui suam affecutus est perfectionem, meliore loco est, quàm qui illam prosequitur. Vinculum autem illud amoris est commune omnibus beatis: undè major est inter eos amicitia: ut in hac vita ea est optima, cujus vinculum est virtus ipsa. Quare beatus & se ipsum & reliquos in felicitate socios diligit, quòd ejusdem boni sint participes: se enim ut cives ejusdem civitatis, quæ in Scripturis Jerusalem nomine exprimi solet, perfectè diligunt. Quod autem ajunt, id unius esse intellectus, ut objectum sibi præsens efficiat, id verum est quantum ad repræsentationem objecti; sed voluntas affectu, seu amore, objecto suo adhæ-

adhærescit, eò quidem firmiùs, quò obiectum meliùs judicatur.

Instant. Si Deus suum beatis concurrsum ita subduceret, ut ad actum amoris non concurreret; tum beati forent citra amorem: nam Deum possiderent nec amarent: ergo felicitas in sola visione consistit.

Resp. Possessionem illam, & beatitudinem tum fore imperfectam & inadæquatam, non perfectam & integram; neque aded completa esset felicitatis essentia.

Contra, inquiunt. Beatorum animæ nondum perfecta fruuntur beatitudine, quàm post resurrectionem consequentur: cum perfecta & omni ex parte absoluta felicitas ad totum hominem pertineat: & tamen jam essentiali fruuntur beatitudine. Ergò a pari, licet aut amor, aut delectatio abesset a visione Dei, nihilò tamen minùs jam illius essentia completa esset & absoluta: cum amor, & delectatio visionem Dei claram consequantur, ut proprietates, non ut partes illius essentielles.

Resp. Neg. conseq. Dispar ratio in hoc posita est, quòd animus Deum sic possideat, ut societas corporis non requiratur, nisi ut ex animo in corpus redundet incorruptionis vigor, ut loquitur S. Augustinus: sed Deus non possidetur nisi per amorem, qui suo bono fruitur: aded ut sine delectatione summa neque esse, neque concipi possit beatorum amor. Non quòd necesse sit eam delectationem esse reflexam, & distinctam ab amore, aded ut sit delectatio de ipsa possessione: sed directa est, ut loquuntur, & amori fructivo essentialis. Corpus

verò Deum possidere non potest per aliquam actionem sibi propriam: nulla enim illius actio Deum potest attingere: sed in eo Deus ut in templo, miro quodam modo habitabit. Nec tamen quicquam de beatitudine animæ detrahitur, quòd suo corpori nondum reddatur: id enim expetit animus sine anxietate.

Opp. ult. Illud ad naturam felicitatis pertinet, ut non modò facultates animæ, sed etiam illius essentia Deum possideat, eoque impleatur: quemadmodum per gratiam Deus essentiam ipsius animæ novo modo inhabitat: est enim divinæ naturæ participatio quædam, juxta illud Petri Apostoli, *divinæ facti consortes nature*. Cum ergo beatitudo sit gratia consummata, non facultates modò animæ, sed multò magis illius naturæ Deo frui & satiari debet. Undè Henricus Gandavensis beatitudinem in il-lapso Dei in animam constituit: quo scilicet Deus sic beati essentiam penetrat, ut eam divinam quodammodo efficiat: ut ignis ferrum, lux aerem sic implet, ut ferrum ignitum, aer lucidus evadat.

Resp. Ista quidem magna probabilitate dici; sed nos hoc loco agimus de beatitudine, quatenus est activa Dei possessio, eaque visione, amore & delectatione omninò continetur. Interim non inficiamur ipsam animæ beatæ essentiam miro & ineffabili modo a præpotenti Deo, qui replet in bonis desiderium nostrum, perfici & expleri. Multas in hanc rem similitudines affert Sanctus Bernardus. *Quomodo*, inquit, *stilla aquæ modica multo infusa vino deficere à se tota*
vide-

videtur, dum & saporem vini induit, & colorem; & quomodo ferrum ignitum & candens igni simillimum fit, pristina, propriaque forma exutum; & quomodo solis luce perfusus aer in eandem transformatur luminis claritatem, adeo ut non tam illuminatus quàm ipsius lumen esse videatur. Verùm ista ipsi viderint Theologi, uti & alia multa quæ circa beatitudinem disputant: ad nostrum nos referamus institutum, ac de principiis actuum humanorum, quod secundo loco fuit propositum, differamus.

TRACTATUS SECUNDUS.

De principiis actuum humanorum.

OMnis Philosophia Moralis summi boni & actionis honestæ scientia continetur: Illud extremum bonorum, & finis humanæ vitæ ultimus; actio verò honesta est ratio, seu medium quo ad eum finem perveniri potest. Hoc utique loco, quæ sint nobis ingenita actuum humanorum principia, quæ acquisita explicare conabimur; tum actiones ipsas humanas quàm potessim distinctè exequemur.

Actionis humanæ, quæ Morali Philosophiæ est subjecta materies, principium a natura congenitum duplex est, voluntas & libertas: principia acquisita sunt virtutes & vitia. De singulis agendum. Primum itaq; de voluntate & voluntario. 2. de libertate & libero arbitrio: 3. de natura & distinctione habituum differendum. 4. de virtutibus & vitiis in universum, de iis sigillatim dicemus.

DISPUTATIO PRIMA.

De voluntate & voluntario.

ESt, inquit Cicero, animus in partes distributus duas, quarum altera est rationis particeps, altera expers: de parte rationali hoc potissimum loco agimus. Hujus duæ sunt facultates, una cognoscens, appetens altera: illa mens, aut intellectus, hæc voluntas nominatur. Utraque est actionum humanarum principium: neque una sine altera explicari potest. Primum igitur de voluntate; 2. quomodo intellectus voluntatem, ac vicissim voluntas moveat intellectum: quæ ad voluntarium & involuntarium pertinent, tandem excutiemus.

QUÆSTIO PRIMA.

De voluntate.

Facultates animæ principes & spirituales ad intellectum & voluntatem revocari possunt. Ac primum id quæritur, quomodo ab ipsa anima eæ vires distinguantur. Id enim magnam in ideis nostris confusionem parit, quod intellectum & voluntatem quasi duas res, ac velut ramos distinctos, & ab eodem trunco prodeunte concipiamus, cum idem sit animus qui intelligit & amat: tametsi has vires dividimus, ut earum functiones & munera facilius percipiantur. Sit igitur.

Pri.

Prima Conclusio.

Intellectus & voluntas non re, sed cogitatione tantum ab anima distinguuntur.

Prob. 1. Vix credibile est accidens quoddam ab animo distinctum intelligere, aut percipere, aut velle: neque enim ullius accidentis tanta vis esse potest, ut actionem immanentem, quæ principio suo inest, exerat: ea quippe est substantiæ notio, ut in se existat & operetur; neque id ulli accidenti convenit.

2. Si intellectus est facultas ab anima separata, quæ illius erit causa, nisi animi substantia? quæ si potest ex se fundere facultates, multò facilius actiones ipsas exeret. Nam anima est maximè actuosa, ac nihil obstat quominus per seipsam efficiat, quæ facultatibus tribuuntur: cum sit natura quædam, hoc est, principium motus & quietis.

Quodd respondet animam esse primum, atque, ut loquuntur, principium radicale suarum operationum, non proximum, id utique vim rationis allatæ non infringit. Esse enim principium radicale & remotum non aliud est quàm esse causam cur potentia aut facultates agant. Ergo si anima sit causa remota actionum, erit saltem causa proxima cur illæ facultates operentur: sicque per seipsam agit, dum facultates ad agendum applicat. Neque ulla fingi potest causa remota, quæ non sit causa ipsius causæ proximæ, aut per eam non operetur. Ac demum si facultates agunt nomine ipsius

ipſius animæ, & tanquam illius inſtrumenta, ut pertendunt Thomiſtæ, id ſemper verum erit animam immediatè agere: nam actio cauſæ principi tribuitur.

Satisfit objectionibus.

Opp. 1. Thomiſtæ, ibi eſſe diſtinctas potentias, ubi ſunt actus diverſi: ſed ſubſtantiæ actus eſt exiſtentia, ut actus facultatis eſt actio. Hi porro actus, exiſtentia nempe & actio inter ſe differunt: ergo & facultas, ſeu potentia operatrix eſt quid a ſubſtantia, vel eſſentia rei ſejunctum.

R. diſt. maj. Diverſæ ſunt potentiaë quibus reſpondent diverſi actus non ſubordinati, C. ſi actus illi ſint ſubordinati, N. At verò actio ſupponit exiſtentiam; ut actio voluntatis ab actione intellectus pendet: ergo nihil neceſſe eſt inter animum & ejus vires diſtinctionem realem comminiſci: cum diſtinctio virtualis omnino ſufficiat. Alioqui intellectum ipſum, & voluntatem in alias ſecabimus vires: ita ut alia ſit vis percipiendi, alia judicandi, aut ratiocinandi. Quod ſi lux corporea cum eadem ſit & ſimplex, tantum effectuum varietatem procreat, multò magis anima quæ ſpiritalis eſt & inſectilis, in plura officia vim ſuam impendet.

Opp. 2. Remeandem non poſſe ſimul eſſe in actu & in potentia reſpectu ejusdem. Sed quod agit, eſt in actu; id in quod res agit, eſt in potentia, cum recipiat tantum: ergo nulla ſubſtantia poteſt ſeiipſam agere; neque anima poteſt eſſe cauſa pro-

proxima suarum operationum; sed omnino necesse est ut per facultates a se distinctas operetur.

Responderi solet causam æquivocam, cuius generis est anima, vel substantia, cum agit in seipsam, simul esse in actu virtuali, quia virtute continet effectum, & in potentia formali: ut vinum inquit, est virtualiter calidum, & formaliter frigidum. Sed commodior responsio futura est, si dixerimus animam dum agit, esse in actu simpliciter, cum existat, & in potentia secundum quid respectu actionis. Neque id absurdum est rem aliquam simul esse in actu quatenus existit, & vi sua continet actionem; & in potentia, respectu perfectionis accidentariæ: cum actiones vitales in suo principio recipiantur, ut visio in vidente.

Instant. Nulla res est sua actio, ut anima non est sua intellectio: ergo nulla res vel substantia erit sua vis activa, seu potentia operatrix: ut anima non erit potentia visiva.

Resp. Quidquid sit de antecedente, de quo alibi, negari consequ. Actio quippe non est quid permanens, aut rei intrinsicum. Sed vis activa nihil est præter entitatem ipsius causæ, quatenus ordinem habet essentialem, ad id quod produci potest: ut intellectus est anima ipsa, ut essentialiter respicit intelligibile.

Quamobrem ut ad facultates animæ redeamus, mens seu intellectus rebus cognoscendis, voluntas agendis destinatur. Intellectus est velut animæ oculus, qui veritatis luce illustratus ostendit quid fugere, quid

quid sequi debeamus ; voluntas rationem sibi prælucentem subsequitur , & cæteras animi vires ad agendum applicat . Ille rerum formas , aut imagines ad se rapit ; hæc objecti bonitate successa quasi extra se profilit , ut fine & perfectione sua fruatur . Hinc veritas ad intellectum , bonitas ad voluntatem pertinet ; ille omnia circumspicit & explorat , hæc negotium agit , subjectas sibi potentias movet , quo illud bonum , cuius amore flagrat , consequi possit .

Atque ista quæ vulgò jactantur , facile intelligimus , si animus ipse rerum imagines depingat , cognoscat , agat , vel appetat : non item si intellectum & voluntatem ut res quasdam , aut accidentia physica concipiamus . Quomodo enim res tantas accidens quodcunque illud sit , moliri queat , nulla mentis agitatione complecti possumus . Itaque vis illa animi quæ ex re cognita tanquam bona vel mala afficitur & commoveatur , appetitus dici solet , aut voluntas . Nam ubi res cognoscitur , nec habet sibi adjunctam boni aut mali notam , neque ad nos refertur , tum intellectus , aut imaginatio sola operatur : sed ubi res aut commoda , aut noxia , & ad nos pertinere judicatur , tum appetitus consequitur , qui plerumque cum aliqua commotione conjungitur . Ut si quis audiat domum aliquando incendio esse consumptam , aut hominem esse occisum , is non multum eo nuntio afficietur : at si alius subjiciat , domum incensam , aut hominem interemptum ad eum pertinere , tum sanè is qui audit , rem suam agi intelligit , & magna afficitur tristitia .

QUÆ-

Q U Æ S T I O I I.

*Quomodo Mens & Voluntas sese mutuo ad
agendum determinent .*

CUm magnæ, & involutæ admodum quæstiones circa libertatem & actiones humanas ex mutua intellectus, & voluntatis connexionē pendeant, operæ pretium facturi sumus, si rem omnem paulò diligentius pertractemus. Ante omnia quæ vulgò recepta sunt in Scholis, tum quæ adjicienda nobis videbuntur, proponemus.

Ac primùm illud fateri necesse est, quòd si propriè & ad legem veritatis loqui volumus, nec intellectus voluntatem, nec vicissim voluntas intellectum moveat. Non enim sunt duę res, quæ tanquã duo globi impetum aliunde acceptum sibi invicem communicent. Sed idem est animus, qui ut rem nudè & simpliciter percipit, intellectus; ut in eam, tanquam in bonam & sibi commodam fertur, voluntas aut appetitus nominatur. Cum autem nihil appeti possit, aut amari, nisi idem sit cognitum: hinc fit ut voluntatem ab intellectu moveri aut potius determinari omnes Philosophi fateantur: adeo ut voluntas nihil agere, nihil moliri possit, nisi facem præferat intellectus. Unde amentes & infantes spontè quidem agunt, non ex voluntate: quod iis desit cognitio, aut rationis usus. Itaque non modò ad exercitiũ actus, hoc est, ad agendum vel non ad agendum, sed ad speciem actus mens voluntatem ita determinat.

minat, ut si rem voluntati proponat ut bonam, & citra ullius mali admissionem, voluntas non amare possit; si ut malum tantum, & nulla ex parte bonam, hanc voluntas, ut alibi diximus, omnino respuat. Cum enim cæca sit, seipsam regere non potest, sed intellectus lucem sequatur necesse est.

Ista quidem magna ex parte vera esse arbitror: sed vereor ne ratio quæ affertur, rem satis apertam involvat magis, quam explicet. Nam si voluntas vis est quædam ab intellectu distincta, frustra ille cæcam irradiat, aut surdam monet. Præterea, quomodo voluntas intellectum sibi consulentem audit, aut quomodo ea consentit; vel se ad agendum applicat, & subjectis viribus imperat? Non potest enim voluntas ab objecto moveri, aut allici, nisi illud præsens ipsi exhibeatur; hoc autem fieri nequit, nisi per imaginem ipsius objecti: sed voluntas est facultas omnis experta cognitionis: qui igitur fieri poterit ut objecti sui imaginem percipiat, aut unum præ alio eligat? nam lux cæco frustra porrigitur.

Resp. Vulgò solet, has vires in eodem animo insitas esse atque, ut ajunt, radicari; & tantam esse inter eas consensionem, aut sympathiam, ut una ab altera excitari, aut determinari possit, quamvis nihil ea percipiat: ferè ut oculi pedum incessum regunt, tametsi pedes nihil vident: solus, inquiunt, modus loquendi negotium nobis faceffit.

Verùm neque hæc consensio inter facultates, vel, ut loquuntur sympathia, neque id quod affertur exemplum, difficultatem

mi-

minuit, sed auget magis. Non enim oculus, sed anima ipsa vel imaginatio oculorum ministerio, pedes & totum corpus movet ac regit; atque illa sympathia inter rationem & voluntatem non efficit ut voluntas ab intellectu dirigatur. Quæri enim merito potest an voluntas intellectui reluctari queat? quod si non possit: jam utique voluntas non erit sui juris, non erit indifferens.

Quodd si mentis judicio repugnare possit voluntas, quomodo ea unum alteri anteponet? Nulla est enim rei incognitæ appetitio. Quodd si unum alteri præfert, certa aliqua ratione ducitur. Ergo necesse est ut ultimum rationis judicium voluntas sequatur: nisi fortè impetu ruat in id quod libet. Verùm quid libeat, dijudicare non potest, nisi mens velut facem præferat: ac nisi voluntas ultimi judicii sit sequax, impotens erit, irrationalis, & inconsulta. Sed neque potest id quod fuit a ratione præscriptum repudiare, aut illius decreta probare vel improbare: nihil enim perspicit, cæca est, neque adeo potest unum cum altero; quod proprium rationis munus est, componere.

Quod autem ajunt, solùm loquendi modum negotium nobis facessere, verum est, si ita usitatæ loquendi rationi serviamus, ut res ipsas inter se distingui, quæ diversis efferri solent nominibus, persuasum habeamus, & res nostro cogitandi modo, ut cogitationes ipsas usitatis vocibus omnino addicamus. Id enim omnem penè cogitationem nostram conturbat. Quo igitur rem, quæ suapte natura non est adeo impedita, quàm

quàm dilucidè fieri poterit, expediamus, ex iis quæ certa sunt & confessa, quæ videntur obscuriora eruamus.

Primum itaque idem est animus, qui immediatè & proximè vult & intelligit, quipque intellectus & voluntas dici solet.

Cum intellectus rem simpliciter percipit ut veram, tum suas tantum partes agit: sed ubi bonam percipit aut iudicat, statim appetitus aut voluntas commovetur: tum enim intra fines objecti voluntatis ea res continetur. Ergo idem est principium cognitionis & appetitus; quæque dicitur voluntatis functio, cum rationis actione ita cohæret, ut unum & idem sit utriusque principium, cogitatione non natura diversum.

Ex quo efficitur voluntatem minus propriè cæcam vocitari: nam idem est animus qui ut bonum intelligit & nobis conveniens aut malum ut noxium percipit, statim ad illius prosecutionem & hujus fugam se applicat, neque is cæcus dici debet, cum rem incognitam prosequi aut fugere non possit. Atque is error hinc oritur, quòd intellectum & voluntatem, ut res diversas concipiamus; ac voluntati attributa quæ simul esse non possunt, omnino tribuamus: quòd nimirum cæca sit, & intellectus tamen lumine irradietur; quòd experts rationis iudicia intellectus perpendat, unum alteri anteponat, & alia quæ supra attigimus.

Deinde si voluntas ad cognoscendum non est a natura comparata; non magis illi cæcitas, quàm auribus est tribuenda.

Postremo si voluntas ut facultas cæca,
 & ab

& ab intellectu diversa ponatur, explicari vix poterit unde actionis cujusque principium ducatur. Non enim intelligimus, nisi cum volumus: nam ut omnes fatentur, voluntas intellectum ad cognoscendum movet & determinat: sed neque voluntas quidquam aggreditur, quod non fuerit ab intellectu præmonstratum: unde ergo agendi initium ducetur? quanto facilius est eundem animum utriusque actionis principium, idque proximum concipere, quam se tot difficultatibus impedire?

Quòd si ita sit, illud quoque probabile videtur, voluntatem semper sequi ultimum intellectus judicium: alioqui voluntas temerè & inconsultò ageret, non ut potentia rationalis, quæque rationi indivulsè cohæret. Ponamus enim ultimum rationis judicium prudentiæ esse consentaneum, & voluntatem contra justitiam agere: tum sanè homo erit prudenter injustus: quod omnino absurdum videtur.

Deinde cum ultimo judicio, seu conclusionem intellectus voluntatis actio ita conjungitur, ut si animus quid sit bonum judicet, statim id voluntas expetat, uti jam ostendimus: si mens nutet & fluctuet, voluntas quoque nutabit, & eadem laborabit inconstantia: quòd idem judicium ab intellectu simul & voluntate proficiscatur: ergo voluntatis prosecutio aut fuga ultimo rationis judicio, quod practicum vocant, indivulsè cohæret, neque ab eo divelli potest.

Postremò nemo est qui rogatus cur aliquid agat, non statim respondeat, id
se

se agere, quia iudicat esse faciendum.

Cum itaque propositio cui assentimur, est universalis, iudicium dicitur practicum aut propositum: hinc nonnullos propositi tenaces dicimus. Cum id omnibus circumstantiis munitur, tum dicitur practice practicum. Idque est conclusio syllogismi; quem in omni actione formamus. Quamvis cum ex usu & promptè operamur, nulla fieri argumentatio videatur, sit tamen, ac tum maximè cum parata est & expedita. nullas enim temporis moras postulat: nec quidquam ferè moram nobis injicit, nisi sensuum infirmitas.

Quocirca ut intellectus, id quod verisimilius, ita quod melius sibi videtur, omnino approbat, idque voluntas sequitur. *Nam ut lancem, inquit Cicero, in libra ponderibus deprimi, sic animum perspicuis cedere necesse est*, nec potest objectam rem perspicuam non approbare. Est quippe animus instar bilancis indifferens, ut in utramvis partem propendeat: adeo ut in eam lancem, cui major species veri, tanquam pondus inhæserit, omnino deflectat. Sed non eò usque est indifferens, ut dimissa re magis perspicua, amplectatur minus perspicuam aut verisimilem; uti nec levius pondus attollet lancem graviore pondere depressam. Hinc enim omnis fluctuatio, aut dubitatio oritur, quod paria utrimque videantur rationum momenta. Atque ut si æquatis libræ ponderibus momentum quoddam modò uni, modò alteri lanci addas, aut detrahas, hanc utique vel illam lancem deprimes: sic iudicia nostra commutari necesse

cessè est, cum species boni commutantur? Sed voluntas iudicium intellectus semper subsequitur: ergo id semper amplectitur, quod intellectus melius iudicat; seu revera ita sit, seu speciem tantum & similitudinem boni præferat: hoc est, seu id melius sit quoad rem ipsam, atque, ut loquuntur, quoad objectum; seu ita nobis videatur. Idque maximè, quod minus bonum cum meliori comparatum rationem habeat mali: ergo illud ut detestius iudicatur, nec potest meliori anteponi.

Solvuntur objectiones.

Opp. 1. Si voluntas sequitur necessario ultimum rationis iudicium: ergo ea non sese determinat, sed omnino determinatur ab intellectu.

Resp. Voluntatem non sese determinare sine ratione; C. cum ratione, N. fit enim, ut diximus, in omni electione nostra syllogismus quidam, quem vocant practicum, cuius conclusionem voluntas sequitur. Unde amentes, aut infantes non agunt liberè, quia non possunt iudicare an præmissæ illius syllogismi sint veræ, vel falsæ.

Instant. Iudicium illud necessitatem antecedentem voluntati affert: ergo voluntas non erit libera.

R. Neg. ant. Nam iudicium illud est liberum; idque voluntas mutare potest, aut suspendere: ac necessitas, si quæ sit erit hypothetica, non absoluta, moralis non physica.

Opp. 2. Nos non semper sequi quæ videntur.

meliora : hinc illud Medæ apud Ovidium
communi sermone tritum .

Video meliora proboque

Deteriora sequor .

R. dist maj. Quæ probamus meliora cognitione speculativa & universali, ea semper non sequimur, C. quæ probamus meliora per cognitionem practicam, cum rem omnibus suis circumstantiis vestitam intuemur ea non sequimur . N. Quare propositis duobus bonis , aut duobus malis , illud bonum amplectitur voluntas , cujus specie magis permovetur animus ; id malum refugit , cujus species illi videtur horribilior . Nam minus bonum cum meliore comparatum , mali habet rationem . Hinc Plato in Protagora docet , *volentem ad malum ferri neminem , neque esse in hominis natura , ut velit ad ea quæ reputat mala , bonorum loco deflectere ; ac si eligere alterum ex duabus aliquando necesse sit , neminem esse , qui si eligere minus liceat , eligat majus .*

Sed , *inquires* , multa quæ judicamus mala , contra conscientiam sequimur ; nec quæ magis probamus , eadem amplectimur , quod bonum a nobis est judicatum , sæpè rejicimus .

Resp. His & aliis quæ afferri possunt , non aliud effici , quàm nos ad ea quæ sunt reipsa meliora , quæque ita sunt judicata , non attendere , eo potissimum quo agimus tempore : quodque ante est judicatum bonum , dimittimus : nam ex vero in visum bonum animus abripitur . Qui autem dicit se meliora probare , ac deteriora sequi , is mentitur , & pugnantiâ loquitur . Agit-
qui-

quidem præter conscientiam; quod se boni jacturam aliquam facere sentiat. Sed non id videtur tanti, ut voluptatem, aut libidinem, quæ eum transversum agit, aspernetur. Hæc igitur majoris boni speciem præ se fert, licet fucata sit & e mentita, non vera & germana boni species.

Opp. 3. Quod si voluntas id sequitur quod ratio melius judicat, nemo erit incontinens: fieri enim non poterit, ut qui de rebus rectè æstimat, non agat id quod est optimum.

Resp. Incontinentem scire quid factu sit optimum, habitu, C. actu, N. habet enim scientiam, sed ea non utitur; neque ad id quod scit, attendit animum. Ac si vitii turpitudinem utcunq; consideret, hanc scientiam vis libidinis ita obscurat, ut quod jucundum, aut bonum in vitio sibi fingit, quasi in luce constituat; quod boni est in virtute confusa tantum, & obscura cognitione, non seriò non attentè consideret. Hinc quæ eum possunt a malis actionibus detertere, ut futura tantum, aut dubia & incerta supplicia, velut perfunctoriè & eminus prospicit. Ac si ea tanquam certa & præsentia, & mox incurrenda cerneret, vix se in vitium præcipitem daret.

Sed *inquis*, si res ita se habeat, nemo peccabit nisi ex ignorantia; & ad virtutem erit bene compositus, cujus mens bene edocta fuerit; discutiendæ solummodo erunt ignorantiae tenebræ, omnes statim virtutes aderunt; omnis demum flexibilitas aut indifferètia erit in intellectu, nõ in voluntate atq; illo præeunte, hæc necessario subsequetur.

Resp. Illud esse omnium ore usurpatum, quod omnis peccator sit ignorans, atque, ut ait Scriptura, *errant omnes, qui operantur malum*; actu scilicet, non habitu. Nec tamen satis fuerit intellectum instituere: nam usu & exercitatione virtutes non minùs quàm præceptis comparantur. Quæ ex objectis impressiones, & ex appetitu sentiente oriuntur perturbationes fortius animum percellunt; confusæ quidem ex iis ductæ, sed penè cogentes rationes mentem aliò deflectunt. Nam animus objectorum impræssione, aut sensuum voluptate delinquit ad ea non attendit, quæ rationis lumē ostendit. Eadem demum est flexibilitas & indifferentia in voluntate, quæ in intellectu, neque una ab altera divellitur: cum idem sit animus qui vult & intelligit. Imo satis est verisimile nullam esse cognitionem, quæ non sit formaliter, ut loquuntur, aut virtualiter saltem affectio; nulla itidem affectio voluntatis, nullus amor qui non sit quædam experimentalis cognitio; ac neutra actio sine altera potest consistere; nullus adeo est necessitati locus: atque indifferentia seu iudicii, seu voluntatis, quandiu vivimus, tolli non potest. Frustra autem enitimur, ut voluntas suas mutet appetitiones, nisi in hoc laboremus, ut mens sua quoque mutet iudicia, ne fucata specie boni decipiatur, ne visum vero bono anteponat: id enim semper voluntas sequitur, cujus species animum validius percellit. Hæc paulò fusiùs exposuimus, quod permagni ad ea quæ dicturi sumus de libertate, sint momenti. Qua autem ratione voluntas subjectas sibi facultates moveat,

veat, aut ab iis moygator, idoneo loco dicetur.

QUÆSTIO III.

De voluntario.

Illud voluntarium dici solet, quod a voluntate proficiscitur: proprie autem & strictiore significato acceptum, definitur ab Aristotele lib. 3. Ethic. *Quod est à principio intrinseco cognoscente singula in quibus est actio*, hoc est a cognoscente singulas actionis circumstantias; finem videlicet, quæque ad finem ducunt. Unde bruta & infantes sponte quidem agunt, non voluntariè: nam iis deest perfecta finis cognitio.

Itaque voluntarii nomine, id proprie intelligimus, quod fit à principio intrinseco cum cognitione finis. Id enim ex inclinatione nostra & propensione fit, cujus principium in nobis est. In agente corporeo principium quidem dicitur naturale motus, quem juxta consuetum naturæ ordinem efficit. Sic dicimus motum lapidis deorsum esse naturalem, ut motum sursum esse violentum & præter illius inclinationem: quamvis fortè uterque motus extrinsecus lapidi adveniat. Belluæ in se sui motus habent principium, & seipsas movent quodammodo, quamvis ex perfecta finis cognitione non agant. Hinc spontè quidem, sed non voluntariè, nisi admodum improprie dicuntur operari: sed homo ex propria inclinatione & perfecta cognitione, hoc est, voluntariè agit.

Quod igitur fit aut præter inclinationem voluntatis, aut citra cognitionem, id voluntarium perimit, atque, ut loquuntur, id omnino est involuntarium. Unde ex Aristotele vis & ignorantia voluntarium tollunt, minuit metus, concupiscentia & delectatio augent potius, quàm minuunt. Quæ quidem si bene intelligantur, magnam lucem afferent iis quæ de humanis actionibus postea dicturi sumus.

Itaque involuntarium, coactum, & violentum promiscuè usurpari solent: tametsi propriè involuntarium cognitionem perfectam includat; ut coactum, saltem imperfectam, qualis est in brutis: Sed violentum citra omnem cognitionem esse potest. Sic motus lapidis sursum dicitur violentus, non coactus; percussio canis violenta est, & coacta, non involuntaria. Sed vitandæ confusionis causa, ad consuetam nos methodum referamus. Sit igitur

Prima Conclusio.

Violentia tollit omnino voluntarium.

Prob. conclusio. Id facimus inviti & præter inclinationem voluntatis, id penitus est involuntarium, atque, ut Græci loquuntur, ἀναγκαστικός: deest enim vox Latina: sed quod vi efficimus, id inviti agimus; ac motus ille est a principio extrinseco & renitente fit voluntate: ergo id nullo modo est voluntarium.

Cum autem vis quæ nobis infertur, aut Physica sit & cogens, aut Moralis: illa in actibus elicitis, qui scilicet a voluntate proximè

ximè & immediatè proficiscuntur, locum non habet: neque enim voluntas cogi potest, aut velle invita. Sed actus extrinseci, quique imperati dicuntur, non elicit, omnino cogi possunt. Sic terrores & supplicia vim moralem & impulsivam, non absolutam Martyribus afferebant.

Cum autem vim inferri posse dicimus actibus imperatis, sic intelligendum est, ut actus qui solent imperari a voluntate, cujus generis sunt maximè exteriores, cogi possint: ut cum quis in carcerem truditur: sed tum minimè a voluntate imperantur, cum invita ejus qui agit voluntate fiant. Quod quidem annotamus, ut cavillos qui contra rem adeo manifestam fieri possent, effugiamus. Actus itaque imperati materialiter, ut loquuntur, hoc est, qui solent imperari, vim pati possunt: non sunt enim imperati formaliter: neque voluntas eos imperat, tumque magis agimur, aut impellimur, quàm agamus.

Illud quidem concedimus, voluntatem cogi posse, ut ajunt, negativè, & prohiberi ne actum suum exerat: potest enim Deus illi denegare suum concursum. Sed negamus eam positivè cogi posse simpliciter, ut actum eliciat contra suam absolutam & efficacem inclinationem. Potest enim aliquid velle contra inclinationem conditionatam, & inefficacem: ut si quis velit suam latroni pecuniam dare: tum enim secundum quid cogitur voluntas. Sed contra inclinationem absolutam voluntas cogi simpliciter nequit: cum actus voluntatis, puta amoris, pendeat a principio intrinseco

& vitali; neque adeo potest a principio tantum extrinseco proficisci; cumque actus amoris sit ipsa absoluta & efficax voluntatis inclinatio.

Opp. 1. Interdum evenit ut qui alteri est infestus, & odio habituali eum prosequitur, actum amoris eliciat: ergo tum aget contra propriam inclinationem.

Resp. Tum habitum odii nullum habere effectum, neque ob stare quominus amor sit actus simpliciter voluntarius. Qui igitur hunc actum amoris elicit, is quidem agit contra propensionem habituales, non autem agit contra actualem voluntatis inclinationem:

Instant: Potest Deus actum amoris producere in voluntate, etiam contra illius inclinationem.

Resp. Actum amoris effici posse a Deo concurrente cum voluntate, non a Deo solo: nam de ratione actus vitalis est, ut immediate prodeat a suo principio: est enim id quo agens seipsum movet. Quare licet Deus possit qualitatem aliquam, ut gratiam, solus in voluntate producere, non item actum amoris, aut actionem vitalem, de cujus natura est, ut a principio intrinseco profluat.

Contra, *inquiunt*, sæpè id per gratiam Deus efficit, ut amemus quod antea odio prosequeremur.

Resp. Rem ita esse: sed tum id quod amamus, non est contra voluntatis inclinationem præsentem, licet contrarium sit præteritæ inclinationi.

Sed, *inquiunt*, non minus amor & odium simul esse possunt, quàm calor & frigus in aqua tepida.

Resp.

Resp. Disparem longè esse rationem . Siquidem calor & frigus sunt qualitates absolutæ , quæ pugnant inter se ratione gradus , non ratione naturæ , adeo ut calor intensus cum intenso frigore simul esse nequeat . Verùm amor efficax & odium itidem efficax inter se pugnant ratione naturæ , non aliter ac duo motus oppositi . Atque ut non possumus simul accedere , & recedere a termino : sic fieri non potest ut eandem rem simul amore & odio prosequamur , nisi fortè diverso respectu .

Secunda Conclusio .

Ignorantia tollit voluntarium , sed non omnis .

Prob. Simul & explicatur conclusio . Voluntarium id dicitur quod ex propensione voluntatis & cognitione proficitur : etgo si alterutrum ex his desit , aut voluntatis propensio , aut debita cognitio , nullus relinquitur voluntario locus : neque alia est ratio cur infantes & amentes voluntariè non agant , nisi quod iis desit rerum , quæ agendæ sunt cognitio .

Illud tamen constat , non omnem ignorantiam excusare a peccato , aut voluntarii rationem tollere . Nam ea potest spectari . ex parte illius qui ignorat : tumque vel invincibilis , quæ adhibita omni diligentia morali expelli non potest : sive ea sit juris , sive facti , eamque vacare a culpa nemini dubium esse potest , maxime si ea sit juris positivi ignorantia . Hinc Christus

Dominus Joan. 14. *Si opera non fecissem in eis, quæ nemo alius fecit, peccatum non haberent, nempe infidelitatis.* De jure naturali & primario major est difficultas, si ignorari invincibiliter possit: nam id videtur omni attendenti manifestum, parentes v. gr. coli oportere: adeo ut nulla penitus insuperabilis videatur.

Ignorantia vincibilis dicitur cum quis vel sibi causa est cur ignoret, vel non vult, ut par est, animum advertere.

2. Ex parte rei quæ ignoratur, alia est juris, ut si quis ignoret leges suæ civitatis: alia est facti. Item alia est cum errore conjuncta, quæ scilicet est falsa cognitio; ea-que dici solet prævæ dispositionis: alia est pura inscitia, seu mera cognitionis privatio. Ignorantia facti plerumque excusat, uti & mera inscitia, si non sit affectata, aut ex negligentia.

3. Ignorantia ratione ipsius actionis, dicitur antecedens, cum scilicet ita est illius quod efficitur causa, ut detracta ignorantia, actio non fieret: ut cum apud Ovidium Cephalus conjugem inter dumos latitantem occidit. Nec dubium est quin hujus generis ignorantia voluntarium penitus tollat. Hæc enim consensum omnem antecedit, & invitum omnino agimus quod ex ignorantia antecedente efficitur.

Opp. 1. Quæ fiunt ex ignorantia antecedente, iis non repugnat voluntas: ergo non sunt simpliciter involuntaria.

R. dist. ant. Iis non repugnat voluntas actu, propter cognitionis defectum, C. habitu, N. hinc dolor, aut tristitia subsequitur.

tur, quæ manifesto est argumento, id factum fuisse involuntariè, & invita voluntate.

Contra *inquires*, qui ex concupiscentia quid operatur, sæpè tristitia aut ægritudine angitur: & tamen voluntariè agit.

Resp. Longè disparem esse rationem: nam tristitia illa quæ subsequitur actionem ex concupiscentia factam, non actionem ipsam sed pœnam huic adjunctam respicit; neque illa actio voluntatis propensione adversa est, ut ea quæ ex ignorantia proficiscitur, quæque magis ad actionem ipsam quàm ad pœnas refertur.

Opp. 2. Metus qui est causa cur mercator merces projiciat in mare, non obstat, quominus illa projectio sit voluntaria: Ergo a pari, licèt ignorantia antecedens sit causa actionis, id minimè impedit, quominus actio ex ignorantia facta sit voluntaria.

R. Disparem esse rationem, quòd ignorantiam antecedit aliquid oppositum actioni quæ sit ex ignorantia, non item in metu. Ac licèt mercator multùm in id propendeat, ut suas sibi fervet merces, adeo ut illa projectio absolutè & in se spectata voluntatis inclinationi adversetur: tamen nullo modo ei adversatur, cum relativè, & in ordine ad vitæ conservationem, projectio mercium instar medii est necessaria, spectatur. Itaque est aliqua in voluntate repugnantia, sed inefficax & conditionata, non efficax, ut in iis quæ agimus ex ignorantia, quorum scilicet causa est ignorantia.

4. Ignorantia dicitur comitari actionem

cum ita est causa ejus quod fit, ut ea tamen sublata nihilominus id efficeretur : ut si quis inter venandum, inimicum loco feræ occiderit : tum enim actio illa neque est propriè voluntaria, cum omnis absit cognitio ; nec prorsus involuntaria, cum voluntas ipsa non reluctetur .

5. Denique ignorantia dicitur consequens, quæ explicitum, aut saltem implicitum voluntatis consensum includit : ut si quis doceri nolit, quo die futurum sit jejuniū, quò liberius peccet : hæc propriè est ignorantia affectata, quæ adeo non excusat, ut peccatum augeat ; eaque est omnino voluntaria, saltem in sua causa. Nam qui vult causam, is simul & ea quæ causam consequuntur, velle censendus est .

Sed, *inquies*, qui agit ex ignorantia consequente, is sine cognitione, atque adeo non voluntariè operatur : ergo ignorantia etiam consequens voluntarium tollit, aut saltem plurimum imminuit .

R. Diss. ant. Is agit sine cognitione, idque sua culpa, C. citra culpam, N. ignorat quippe, quia ipse sibi cur ignoret, causa est, vel scire, aut mentem advertere, ut par est, non curat. Fatendum tamen est ex ignorantia etiam supina & affectata voluntarium minui ratione cognitionis : sed augetur ratione propensionis : unde & peccata quæ ex illa ignorantia fiunt, iis videntur proxima quæ ex pura malitia nascuntur .

Tertia Conclusio.

Metus voluntarium minuit, non tollit .

Prob.

Prob. conclusio. Quæ fiunt ex metu, mixta sunt quodammodo ex voluntario & involuntario, ut docet Philosophus; secundum se, & universim spectata non sunt voluntaria: ut cum mercator jactat merces in mare: sed metu majoris mali quod meliori bono opponitur, fiunt voluntaria. Unde simpliciter & absolutè sunt voluntaria: nam singulis diligenter perpensis unum alteri anteponimus. Actus autem morales non universim, sed ut sunt singulares & determinati spectantur. Sunt igitur ea quæ ex metu agimus secundum quid, & sub conditione involuntaria. Nam qui naufragii metu res suas projicit, vellet quidem res suas servare, si naufragium non immineret. Is igitur absolutè vult res suas perdere, spectatis nimirum temporis & loci circumstantiis.

Confirm. Illud est absolutè voluntarium, quod fit a principio interno cognoscente singula in quibus est actio; Sed quod fit ex metu, idem fit a principio interno, nempe a consensu voluntatis, & ex prævia deliberatione, perpensis omnibus circumstantiis: ut liquet ex mercatore qui suas in mare merces projicit, ut vitæ suæ consulat: ergo quod fit ex metu, id simpliciter est voluntarium.

Solvantur objectiones.

Opp. I. Quæ ex metu facimus, eadem inviti & coacti agimus: undè & contractus ex metu facti sunt irriti; quodd metus causa sit externa, malum scilicet futuram.

Quodd

Quod igitur fit ex metu, id non est voluntarium: cum non sit a principio intrinseco, sed repugnante fiat voluntate.

Resp. dist. ant. Quæ agimus ex metu, ea inviti agimus secundum quid, & sub conditione, C. absolute & simpliciter, N. sublato quidem metu non fierent, sed majoris boni conservandi amor vincit repugnantiam, quæ ex minoris jactura oritur.

Contractus verò qui fiunt ex metu leges irritos declarant, quòd eos omnino voluntarios esse oporteat: cum iis maximè societas humana contineatur. Multi tamen existimant seposita lege civili, quæ obligationem potest tollere, quæque actus etiam liberè factos ob judicii infirmitatem sæpè irritos facit, eum qui metu aliquid promissit, obligari: quia consensus adfuit, non conditionalis, ut in errante, sed absolutus.

Non immeritò tamen solent inter metum gravem & levem distinguere: neque enim metus levis aut promissis liberat, aut peccatum omnino excusat, sed gravis, & qualis in constantem virum cadere potest: isque ex varia qui metuunt indole, gravis aut levis definiri debet. Gravis quidem est metus mortis, mutilationis, cruciatus, jacturæ bonorum. Istamen voluntarium omnino non tollit, ob gravius malum quod effugimus: ut cum metu cædis pecunia datur. Sed ejusmodi actus plerumque excusantur, cum ex gravi metu fiunt: quanto enim major est metus, tantò minor voluntario, & major est veniæ aut excusationi locus.

Quamobrem qui metu injustè incusso aliquid

quid promissit , is promissis stare nec jure naturæ , nec lege positiva tenetur: quòd promissio sit injusta ; ac licèt ea sit voluntaria , non est tamen omninò libera , sed vi extorta .

Opp. 2. Quæ fiunt ex metu , sunt secundùm se involuntaria , & ab iis abhorret qui agit , atque omnino sunt mala : Ergo sunt absolutè involuntaria non secundùm quid .

Resp. Neg. conseq. Nam actiones morales pensari debent ex ipsis circumstantiis , non secundùm se tantùm , & seorsum a circumstantiis spectari : Sic amputatio brachii ut vitæ consulatur , est quid involuntarium , & malum , ab eoque voluntas abhorret : sed cum relativè , atque ut vitæ consultum sit , spectatur , tum est simpliciter quid bonum , & voluntarium ; neque repugnat inclinationi voluntatis efficaci & absolutæ , sed tantùm inefficaci & conditionatæ illius propensione adversatur.

Instant. Quod fit ex metu , idem fit a principio extrinseco : ergo absolutè est involuntarium .

Resp. neg. ant. Id quippè fit a voluntate quæ actionem imperat : licèt motivum actionis sit quid extrinsecum , quod rationem voluntarii minuit , non tollit : Quod enim fit ex metu , ut amputatio brachii , secundùm se est malum : Sed comparatè , & suis instructum circumstantiis , bonum est : quatenus v. gr. vitæ conservandæ est utile.

Quarta Conclusio.

Concupiscentia, vel delectatio auget quodammodo voluntarium.

Explicatur & probatur conclusio. Voluntarium aut latiore significato sumitur, ut est in pueris quodammodo & in belluis, tumque id augetur ex concupiscentia, vel strictiore significatione accipitur, ut in nobis est cum cognitione conjunctum, idque interdum minuit concupiscentia: cujus nomine nunc intelligimus motum appetitus sentientis. Qui si voluntatis actum antecedit, id plerumque efficit ut voluntas in rem propositam vehementius propendeat, ob summam animi cum corpore societatem. Hinc Jacobus Apostolus; *Unusquisque tentatur à propria concupiscentia abstractus & illectus: cum concupiscentia conceperit, parit peccatum.* Quæ autem voluntatem consequitur appetitû sentientis motio, seu concupiscentia, hæc rei propositæ executionem adjuvat: quæ enim nos delectant magis, iis fortius incumbimus. Ergo concupiscentia tum antecedens, tum consequens auget voluntarium ex parte propensionis: licet antecedens id minuere soleat ex parte ipsius cognitionis. Nam licet is qui agit ex concupiscentia, objectum ipsum circa quod occupatur, attentius sæpè consideret: intellectus tamen minus attendat ad legem divinam, & ad ea quæ voluntatem a perversa actione avocare possunt. Sed absolutè concupiscentia antecedens, quæ omnem rationis usum non per-

ver-

vertit; voluntarium auget potius, quam minuit.

Confirm. Inter metum & concupiscentiam hoc intercedit discriminis, quod metus sit quodammodo ab externo principio; nimirum a malo imminente. Hinc durante metu manet quædam voluntatis repugnantia: contra atque evenit in concupiscentia, quæ voluntatis renitentiam non tollit, eaque est a principio intrinseco cum cognitione eorum in quibus est actio: ergo ea nec tollit, nec minuit voluntarium, sed auget potius. Hinc Aristoteles ineptam dicit esse excusationem hominis obtendentis se adulterium commisisse, quod coactus a libidine, vel a delectatione fuerit: admitti verò eam posse, cum quis officium deseruit gravioris incommodi causa. Nam concupiscentia circa bonum sensibile occupatur, quod auget voluntatis propensionem: metus contra, circa malum versatur; hinc minuit voluntarium.

Sed, *inquires*, concupiscentia minuit cognitionem: ergo minuit voluntarium.

Resp. Concupiscentiam minuere cognitionem veri boni, non fucati & eementiti, quod voluntas præ concupiscentia vero & legitimo anteponit. Quare concupiscentia auget simul & minuit quodammodo voluntarium, sed diverso respectu: auget propensionem voluntatis, minuit cognitionem.

Inst. Incontinens agit ex concupiscentia: sed agit contra voluntatis inclinationem: ergo concupiscentia voluntatis inclinationem non auget, sed minuit.

Resp.

Resp. Incontinentem, dum libidini obsequitur, contra voluntatem conditionalem, quæ velleitas dicitur & est inefficax, agere: sed is non agit contra voluntatem absolutam & efficacem.

Incontinens experitur quidem in agendo quandam voluntatis repugnantiam: sed ea non tam oritur ex ipsa actione, quàm ex effectu, qui pravam actionem consequitur præter agentis intentionem. Nam pœna displicet, non actio, quæ fit ex magna voluntatis propensione.

Fatemur tamen peccatum imminui, cum ex vehementi animi perturbatione oritur; non quod de ipsa inclinatione quid detrahat, sed quia cognitionem ipsam obducit; tantum enim de voluntario detrahitur, quantum minùs rationi relinquitur. Unde qui præ aliqua animi perturbatione prorsùs insaniunt, minùs voluntariè agunt. Sic motus indeliberati, qui vocari solent primò primi, ut cum ad primum iræ motum in vindictam prorumpimus, non sunt in nostra potestate, nec voluntarii habentur.

DISPUTATIO II.

De libertate & libero arbitrio.

Sequitur ut de libertate, & de libero hominis arbitrio dicamus. Ac primum de libertatis notione, nomine & divisione; tum de illius existentia, origine & subjecto; nec non de iis quæ libertati opponuntur, nobis agendum est:

postremò quæ sit illius natura, quæ definitio, exponemus.

QUÆSTIO I.

*De nomine, notione & divisione libertatis,
ac liberi arbitrii.*

TOt huic libertatis, aut liberi arbitrii voci subjunctæ sunt notiones, ut non aliundè forsan, quàm ex illius nominis ambiguitate, tam magnæ ortæ sint contentiones, quæ rem adeò planam & apertam involverunt. Ac Græcis quidem cum verborum copia non deesset, ii diversis rebus distinctas quoque voces aptarunt, quæ omnem homonymiam, quæque ex ambiguitate vocis oriuntur contentionem sustulerunt. Itaque primùm *λευθεραν* dixere illam libertatem, quæ servituti corporis opponitur; eamque Cicero definit potestatem vivendi ut velis. Atque ea notio statim subit animum, cum libertatis vocem usurpamus, ut immunitatem a servitute cogitemus. Undè cum Christus Dominus Judæis dixisset; tum eos *liberos fore, si veritas eos liberaret*, responderunt statim, *nemini servivimus unquam*: adeò ut libertas hoc modo accepta dominium alterius excludere videatur. Hinc S. August. *An ita sunt liberi, ut nec illum velint habere Dominum, qui dicit eis, Sine me nihil potestis facere.*

Quòd si tamen propriè loqui volumus, libertatis nomine non ea quæ ad ipsum corpus refertur, quæque servituti opponitur;

nitur : sed quæ animo infidet, quam *ἐφ' ἡμῶν*, seu id quod est in nostra potestate, quod etiam vocant *αὐτεξουσίαν*, seu plenam agendi facultatem, omnino intelligitur : aded ut libertas potestatem quandam, quæ ad multa pertinet, neque uni rei addicitur, significatione sua comprehendat.

Itaque libertas suo intellectu comprehendit solutionem ab omni impedimento quod nos determinet, aut ad certas res adstringat, & potestatem agendi quod iis rebus contrarium est, omnino detrahat. Sic liberi dicimur a vinculis, a servitute, ab odio, ab amore, a perturbationibus, a vitiis, a lege ipsa : cum ea possumus efficere quæ servitus, vincula, lex, aliqua vitia, aut perturbationes prohibebant.

Sic ubi ad aliquem vitæ statum, aut locum adstricti, aut determinati sumus, potestas nobis adimitur agendi ea quæ cum illo statu, aut loco esse non possunt : cumque illa determinatio vitari nequit, ea dicitur necessitas, siue sit absoluta, siue hypothetica, aut moralis. Quare libertas illam necessitatem, aut determinationem excludit, in iis ad quæ liberi & soluti sumus. Qui liber est a servitute, aut a morbo, aut ab aliqua perturbatione ; jam illi fit potestas ea efficiendi, quæ servitus, aut morbus, aut perturbatio prohibebant.

Illud verò liquet, necessitatem illam, agendi impotentiam, aut determinationem quæ a servitute, vinculis, morbis animi perturbationibus, imò & vitiis proficiscitur, eam quæ voluntati est essentialis, libertatem non evertere, ut inter omnes convenit :

nit : idque generalis & omnibus nota experientia constat.

Libertas itaque non solum servitutem , sed necessitatem quoque videtur excludere , & potestatem seu dominium in proprios actus intellectu suo complecti : quin etiam & latius patet libertas , quam liberum arbitrium . Hinc tripartita libertatis divisio a Magistro Sententiarum allata , & ab omnibus Theologis usurpata , nempe in libertatem a necessitate , quæ liberum arbitrium dicitur , a peccato , & a miseria . Prima omnibus , secunda iustis , tertia beatis convenit . Prima est naturæ , secunda gratiæ , tertia gloriæ .

Libertas naturæ duplex est , coactionis & necessitatis . Cum voluntas ita ad unum impellitur , ut ferri in oppositum non possit , tum libera non est . Sic bonum in universum necessitate quadam naturæ amamus , non liberè . Coactio seu violentia opponitur voluntario , necessitas libertati : omne liberum est voluntarium , sed omne voluntarium non est liberum .

Rursum necessitas est duplex , una quæ omnem voluntatis electionem antevertit , & antecedens nominatur : altera est consequens , quæ liberam electionem sequitur : quo quidem modo diximus alibi ea quæ sunt a Deo prævisa , esse necessariâ . Quare si Deus prævidit me liberè peccaturum , necesse est me liberè peccare : quæ necessitas nihil lædit libertatem , sed antecedens eam omnino destruit , ut postea probabimus .

Libera arbitrium id dicimus , quod ab omni coactione , & ab ea necessitate

quæ antecedens nominatur, & ab ea quæ est naturalis, solutum est. Liberum appellatur quatenus est sui-juris, immune a servitute, & prohiberi non potest. Idque ex voluntate proficiscitur, ad quam potestas illa & dominium tum in suos actus, tum in subjectas sibi facultates pertinet. Arbitrium vulgò dicitur judicium: quod de re dubia ferri solet: hinc ratio ipsa, seu facultas quæ judicat de rebus agendis, arbitrium appellatur, voce ab actione, seu a judicio ad vim judicantem, seu ad rationem translata.

Cum itaque ratio res ipsas examinat & secum deliberat, tum velut judex sedet, aut arbitra: sed postquam expensis rebus unam potius quàm alteram approbavit, tum in iis quæ ad theoriam pertinent, assentiri dicitur: sed in rebus agendis judicium illud ab Aristotele *πρᾶξις*, seu electio nominatur, eaque & consilium & propositum vocari solet. Cum ratio rem unam alteri anteposuit, tum voluntate, aut appetitu in eam fertur; unde & actio quæ consequitur, voluntaria nominatur: quare in ipsa electione, aut determinatione tum voluntatis, tum rationis liberum arbitrium maxime positum est: sed de iis mox pluribus.

Q U Æ S T I O II.

De existentia libertatis.

EX iis quæ diximus facile colligitur tum libertatis existentia, tum illius sedes & radix: sed ut *via* & *ratione* procedamus, sit

Uni-

Unica Conclusio.

Natura sumus liberi, atque in nobis existit liberum arbitrium.

Hæc conclusio tam est manifesta, & ipsius velut animæ testimonio comprobata, ut mirari subeat, quò fieri potuerit, ut rem cuius conscii sumus, quam in omni actione nostra experiimur, quamque præcepta, oburgationes, præmia, supplicia, & omnis vitæ ratio demonstrant, non Ethnici modò Philosophi, qui fatalem induxerunt necessitatem, sed nonnulli etiam ex iis qui se Christianos profitentur, negare ausi fuerint. Undè ut antiquiores hæreticos silentio præteream, Calvinus contra Pighium scribere non erubuit, *liberum arbitrium esse post primi hominis lapsum de solo titulo*. Et in eodem opere, *sed quid, inquit, si ex adverso excipiam quod verum est, vulneratam illam fuisse libertatem, imò confectam & extinctam*. Et l. 2. Instit. c. 2. *Itaque si quis vocis huius, liberi nimirum arbitrii, usum non prava intelligentia permittat, per me quidem non vexabitur ob eam rem: sed quia sine ingenti periculo non posse retineri censeo, magno contra Ecclesiæ bono futurum si aboleatur; neque ipse usurpare velim, & alios si me consulant, abstinere optarim*.

Probari posset conclusio innumeris tum Scripturæ, tum SS. PP. testimoniis, ut Ecclesiastici c. 15. *Deus ab initio constituit hominem, & reliquit eum in manu consilii*. Et Genes. 4. *Dixit Dominus ad Cain, Sub te erit appetitus tuus, & tu dominaberis illius*. Sed
in

in re tam perspicua loca aut rationes congerere omnino esset supervacaneum . Quis enim sensu intimo & propria experientia se liberè agere non agnoscit ? Cur supplicia malè agentibus decernuntur , si in eorum potestate non est , ut a sceleribus absterneant ? Quid est cur ab amentibus illatas injurias patienter feramus , non item quæ ab aliis inferuntur , nisi quod peccata iis tantùm qui liberè agunt , vitio aut laudi tribuamus .

Prob. 3. Ex discrimine quod hominem inter & belluas intercedere jam supra diximus . Nam cæteræ animantes impetu feruntur in objecta , a quibus rapiuntur , nec sunt sui juris , & omnia ad suum corpus referunt : Sed homo ex nutu voluntatis agit , ipse sese corrigit , actiones suas examinat , & in sese variè reflectitur . Nec spontaneo tantùm , aut naturali motu cietur ; sed & consultò & deliberatè agit , atque ad eum finem non uno quodam tramite contendit , sed huc atque illuc , & quòcunque nutus voluntatis duxerit , eò fertur .

Confirm. Mens nostra quodam naturæ impetu in verum & bonum nititur , quodque speciem habet boni aut veri , necessario ad se nos raperet , nisi in nobis ea vis esset qua assensum nostrum cohibere possemus . Secus naturæ quadam necessitate in varios errores laberemur , qui ipsi naturæ auctori referrentur accepti , cum eos effugere non liceret . Quare hanc Deus tribuit nobis libertatem , qua verum a falso , legitimum ab eementito & fucato bono secernimus .

Soluntur objectiones .

Opp. 1. Illud S. August. Homo malè utens libero arbitrio, & se perdidit & ipsum : nam ut ipse ait, illa est pœna peccati justissima, ut amittat unusquisque quo benè uti noluit.

Resp. dist. ant. Primus homo perdidit libertatem a peccato, C. libertatem à necessitate, seu naturalem, N. quam enim antè habuit facilitatem ad bonum, regnante concupiscentia, & excusso justitiæ jugo amisit. Hinc factus est liber justitiæ, & servus peccati. Sed tamen liberum arbitrium inclinatum tantùm fuit & debilitatum, non eversum penitus & amissum. Imò libertas essentialis nullo modo fuit imminuta, sed accidentaria duntaxat, ut postea dicemus. Hinc S. August. Libertas, inquit, perit per peccatum; sed illa quæ in paradiso fuit habendi plenam cum immortalitate justitiam: propter quod natura humana divina indiget gratia, dicente Domino, Si vos filius liberaverit, tunc verè liberi eritis. Unde & Apostolus; Cùm essetis, inquit, servi peccati, liberi fuistis justitiæ: ex quo ostenduntur etiam peccato minimè potuisse, nisi alia libertate servire. Liberi ergo à justitia non sunt nisi arbitrio voluntatis; liberi autem à peccato non sunt, nisi gratia Salvatoris. Atque ut uno verbo huic loco & aliis respondeam; homo peccando perdidit liberum arbitrium secundùm quid, summam nimirum benè agendi facilitatem; non simpliciter & absolutè, quasi natura liberi arbitrii destructa fuerit. Simili ratione illud pervaga-

tum S. Augustini dissolvi potest, hominem lapsum ex gravi necessitate peccare : Ex gravi, inquam, necessitate morali, quod ægrè peccati illecebris obsistat ; non ex necessitate Physica & ineluctabili.

Opp. 2. Ex Apostolo, *non est volentis, neque currentis, sed miserentis est Dei* : ergo nulla est in homine ad bonum saltem, libertas.

Respondet Sanctus Thomas, eum Apostoli locum non ita esse intelligendum, quasi homo velit, & non currat libero arbitrio : sed quia liberum arbitrium ad hoc non est sufficiens, nisi moveatur, & juvetur a Deo. Itaque distingui potest consequentia : homo non est liber ad bonum supernaturale sine Dei gratia, C. ad bonum ordinis naturalis, & ad actiones civiles, aut etiam ad benè agendum, cum divina gratia adjuvatur, N. Hinc S. Augustin. loco citato loquens de improbis. *Sed hæc*, inquit, *voluntas, quæ libera est in malis, quia delectatur malis, ideo libera in bonis non est, quia liberata non est.*

Opp. 3. Illud Apostoli Rom. 7 *Non quod volo bonum, hoc facio ; sed quod odi malum hoc ago* : sed qui id quod vult non facit, & quod non vult facit, is liber dici non potest : ergo nulla in homine manet libertas.

Responderi potest 1. eandem adhibendo distinctionem de libertate naturali, & ea quæ dicitur a peccato. 2. Id quoque intelligitur de primis concupiscentiæ motibus, qui non sunt in nostra potestate, neque

quæ nobis ut peccata imputantur . Undè subjicit Apostolus , *si quod nolo , hoc facio , jam non ego operor illud , sed quod habitat in me peccatum* , hoc est concupiscentia , quæ cum ex primo hominis peccato ortum duxerit , eaque sit causa & velut mater peccatorum in quæ incurrimus , ab Apostolo peccatum nominatur . Quare id subnectit Apostolus , *miser ego ! quis liberabit me de corpore mortis hujus* , id est a duro concupiscentiæ jugo ? & statim respondet ipse sibi , *gratia Dei per Jesum Christum* .

Opp. Voluntas necessariò sequitur ultimum mentis judicium : nam actio voluntatis est velut conclusio syllogismi operativi , ut loquitur Sanctus Thomas , eaque ex præmissis necessariò deducitur : ergo voluntas non est indifferens , aut libera , nec se ipsam determinat .

Resp. dist. antec. Voluntas sequitur necessariò judicium intellectus , necessitate consequenti & hypothetica , C. absoluta & antecedente , N. judicium enim intellectus voluntatis determinationem includit : cumque syllogismi practici conclusio sit contingens & singularis , nullo modo officit libertati .

Quæ ut meliùs intelligantur , & magnis quæ fieri solent difficultatibus occurri faciliùs possit , illud admonendum quod a doctissimo viro fuit observatum , omnes actiones nostras ex voluntatis affectionibus proficisci : nam ut ait Veritas ipsa , *Arbor bona fructus bonos facit* . Illa quidem arbor est ipsa voluntas , aut voluntatis propensio . Affectiones verò quæ in voluntate domi-

nantur , & ex quibus motus omnes animi prodeunt , non aliundè quàm a finis ipsius amore dimanant : non enim aliud voluntatem ad certos motus inflectit , nisi finis aliqujus , aut boni quo frui vult , amor , quicumque sit ille finis . Jam verò quædam sunt in quæ voluntas necessariò , non liberè fertur , quæque naturæ instinctu , non electione prosequitur ut amor vitæ , propriæ integritatis , tranquillitatis , amor denique sui ipsius , non quatenus a libero arbitrio proficiscitur , sed ut est naturalis quædam propensio .

Sed quidquid amat voluntas a se diversum , id amore contingenti & libero , non necessario & naturali prosequitur . Sic liberè Deum ut summum bonum eligimus & diligimus . Ex inclinatione quidem naturali , qua expleri appetitum suum animus desiderat , eò fertur ut alibi quàm in seipso summum bonum quærat , quia seipso satiari non potest : sed ea propensio aut amor naturalis ad nullius rei extra nos positæ amorem nos determinat ; nullus est quem formare non possit , & formatum non destruere . Quare amor cujusque finis , quem sibi proponit animus , est id ipsum quod primum eligit , quod cæteris anteponit , & ad quod se liberè determinat . Nec quicquam est in animo ab eo distinctum , aut independens , quod eum omnino determinet . Is utique finis nobis propositi amor voluntatem determinat , tum ut ea diligat , in quibus bonum illud amatum reperitur ; tum ut efugiat & aversetur quæ ei sunt opposita ;

tum

tum ut media feligat finis consecutioni utilia, aut necessaria, quæque ipsi videntur utiliora, reliquis anteponat. Manet verò ille amor finis in voluntate; donec ab alio validiore & opposito expellatur. Sed quantumvis sit potens ille aut finis, aut mediorum quibus hunc finem consequimur, amor, non ita voluntatem afficit aut determinat, ut contrarium formare non possit: alioqui ubi semel in voluntate primas teneret, nunquam is deleri posset. Quamvis longo habitu confirmatus vix deleri queat, tamen nullam is necessitatem imponit.

Ex quibus illud efficitur, sic libertatem esse voluntati intrinsecam, ut nihil eorum quæ voluntatem, eo quo diximus modo, ad agendum determinant, illius libertatem labefactent. Quòd enim ad suos motus vel ad actiones ex certis affectibus sit determinata; quòd affectus illi aliundè oriri nequeant, quàm ex finis alicujus dilectione; quòd ex eodem amore unum medium alteri præponat, cum dilecto fini magis idoneum judicatur, nisi alterius finis impressione alio inflectatur; quòd sine aliquo rei externæ amore esse non possit; nec facile ex uno in oppositum commeat; nec ferri possit in objectum, quod amabile non judicat; quòd iis maximè afficiatur, quæ naturalem amorem explere maximè possunt: hæc, cum in omni voluntatis actu occurrant, illius libertatem non imminuunt, nedum eam possunt destruere.

Q U Æ S T I O I V.

De subjecto & radice libertatis.

HIs explicatis non erit difficile ipsius libertatis sedem & fontem invenire. Sed res ipsa paulò ab altiori principio est repetenda.

Duo sunt, ut pulchrè magno vir ingenio prosequitur, quæ affectiones voluntatis nostræ maximè determinant, rationis lumen, & quidam voluptatis sensus; eò quippè se flectit animus, ubi major boni species elucet; atque id præfert alteri quod summo aut universali bono vicinius videtur. In iis quæ ad rerum theoriam & cognitionem pertinent, cum summa est evidentia, judicium suspendere non possumus. Nam clara & evidens perceptio ad se rapit quodammodo intellectum. Sed in rebus quas expetimus, judicium, ut ita dicam amoris circa bona quæ rationis rectè judicanti sunt perspecta, plerumque cohibemus; cum scilicet voluptatis sensus rationi ipsi repugnat, neque id nobis sapit, quod recta suadet ratio, id enim amarum plerumque nobis videtur, quod ratio ipsa suave esse discernit. Quod ubi fit, tum sanè deliberat animus utrum ex iis eligat, rationi an sensui obtemperet. Hinc sæpè rationi ipsi reluctamur, sensu voluptatis deliniti, quæ fortius animum percellit, quàm lux vel evidentissima. Hæc enim quanta quanta sit, nullam videtur libertati vim afferre; id unum efficit, ut quæ nobis proponit objecta

amo-

amore quodam rationali & electivo proficiscitur motionem, seu in bonum univ-
 sum impressionem, ad certum & definitum
 bonum voluntas determinet. Sed delecta-
 tionis sensus animum ipsum magis afficit, &
 efficacius impellit, vim adeò libertatis no-
 stræ quodam modo imminuit; rationem ip-
 sam alio distrahit, & in se mentis aciem
 atque attentionem pene omnem convertit;
 neque aliud ferè est huic morbo remedium
 (ut nihil de cœlesti gratia hoc loco di-
 cam) quàm ut ultimum illud amoris judi-
 cium quantum fieri potest cohibeamus, id-
 que tum maximè cum voluptate non omni-
 no perturbatur animus. Quod si enim ali-
 quantisper assensum illum sustineamus,
 dum a nobis quid facto opus sit diligenter
 perpensum fuerit, brevi fucus ille & emen-
 titæ boni species evanescet.

Sed ad rem ipsam veniamus, & quæ sit
 libertatis sedes, breviter excutiamus. Sit
 igitur

Prima Conclusio.

Libertas ad intellectum simul & volun-
 tatem ita pertinet, ut potiore jure videatur
 ad voluntatem spectare, & ei tanquam
 subjecto inesse.

Prob. 1. pars concl. Liberum arbitrium de-
 finitur a Magistro sententiarum, facultas
 voluntatis & rationis, & dicitur liberum
 arbitrium, quasi liberum judicium: ergo
 utriusque est facultatis.

Prob. 2. Liberum arbitrium est vis electi-

va: sed electio sic ad utramq; facultatem spectat, ut dubitet Aristoteles utri potius tribuenda sit quàm alteri, an sit intellectus appetitivus, an appetitus intellectivus. Nam in hoc potissimum videtur liberum arbitrium consistere, ut ex pluribus rebus quæ in deliberationem cadunt, sic unam eligat, ut eam possit aut non eligere, aut ei aliam antepone. Cum autem voluntas sequatur præeuntem intellectum, flexibilitas voluntatis & differentia in eligendo non aliundè oritur, quàm ex flexibilitate intellectus in judicando: hoc enim faciem præferente voluntas huc illuc convertitur, aut flectitur.

Pars itidem altera conclusionis ex dictis liquet: nam voluntas ut vis actiuosa, quæ sese & alias facultates movet ac determinat, atque ut dominium habens & potestatem concipitur: undè & libertas & electio præcipuo quodam jure illi attribuuntur. Quocirca cum ratio a nobis facti alicujus exigitur, & jactare libertatem nostram volumus, non aliud obtendere solemus, quàm voluntatem nostram: atque in pactis, fœderibus & contractibus voluntas nostra potissimum convenitur: quòd in ea maximè vigeat libertas.

Quamquam idem est animus qui judicat & eligit, nec vires illæ plusquam cogitatione aut officiis distinguuntur: adeo ut superflua videatur illa controversia, utrum voluntas, aut intellectus sit sedes libertatis: cum liber sit animus, aut homo ipse, non vis aliqua aut facultas: majoris tamen lucis gratia meritò inquiritur an mens libera sit, ut judicat rem esse faciendam; an potius ex

ani-

animi inclinatione, seu ex appetitu, aut voluntate libertas omnis sit repetenda.

Cum autem voluntas in homine sit rationalis, ac iudicium ipsum rationis citra voluntatis nutum non fiat; illud planum videtur liberum arbitrium sic utrique facultati inesse, ut fons & radix libertatis sit in intellectu, sed in actu voluntatis magis eluceat. Voluntas itaque est formaliter, ut ajunt, libera, dependenter tamen ab intellectu.

Sed, *inquiunt*, nihil necesse est multiplicare subiecta libertatis: ergo ea voluntati soli inerit.

Resp. Eundem esse animum qui ut iudicat & eligit, liber dicitur: unum adeo & idem est liberi arbitrii subiectum.

Contra, *inquiunt*, ut ratio se habet ad intellectum, sic liberum arbitrium ad voluntatem: sed eadem est facultas quæ intelligit & ratiocinatur; ergo eadem facultas vult & eligit, seu libera est; atque adeo libertas est in sola voluntate.

Resp. Nos nec ratiocinari, aut concludere sine voluntate; nec eligere aut liberè aliquid facere citra iudicium intellectus: secus, non ut homines, sed ut pueri aut mente capti agimus.

Instant. Si iudicium rationis liberum est, peccatum esse poterit, antequam sit voluntarium, & priusquam voluntatis nutus accesserit.

Resp. neg. ant. Iudicium quippè nullum sit citra voluntatis imperium, ut jam sæpè diximus.

Secunda Conclusio .

Libertas humana ex natura spiritali animi , & utriusque facultatis , intellectus videlicet & voluntatis amplitudine , ut ex fonte aut radice sua oritur .

Prob. Simul & explicatur conclusio ex divo Thoma , qui triplex formarum genus aptè distinguit. Primum eas complectitur , quæ penitus sunt in materia demersæ , quæque inclinationem habent (si qua in iis est inclinatio) admodum limitatam , & naturali duntaxat appetitu velut pondere feruntur ; neque in iis ullum est domini aut libertatis vestigium : ut in elementis , plantis , & iis quæ omnis sunt cognitionis expertia , videre est .

Aliæ sunt formæ non adeo materiæ immerse , quæque ut cognitionis , sic motus spontanei principia sunt. Hinc iudicio quodam , quamvis non libero , sed naturali feruntur : ut in bestiis cernimus , in quibus quædam est velut libertatis umbra. Verum ut earum cognitio angusta est admodum , sic in iis appetitus non seipsum regit , aut determinat .

Sed mens humana cum sit spiritalis , nec materiæ angustiis coerceatur , illius vires nulli sunt corporis organo addictæ : quare seipsam ad cognoscendum determinat , ubi ex confusa cognitione ad distinctam progreditur : cum vis organica , ut visus , ab impressione objecti , seu a specie visibili omnino determinetur . Mens enim in seipsam redit & reflectitur ; sua iudicia examinat ;

minat; seipsam colligit, & quasi intus revocat; cuncta penetrat, nec definitam habet aliquam regionem, cujus terminis septa teneatur: sensus verò sunt perangusti, hebetes, infirmi; neque in suos actus reflecti possunt.

Ex illa intellectus amplitudine oritur infinita propè voluntatis capacitas, quæ non nisi infinito bono satiari potest. Hinc nulli rei creatæ illigata amplecti quæque potest, vel respuere; nec solo naturæ instinctu, sed mentis judicio se regit, & ad id quod libitum est, sese applicat: hinc illius libertas; Nam ut docet Aristoteles. 1. Metaph. c. 2. *Liberum est quod est causa sui*: atque illud ex seipso agit, quod dominium habet & potestatem in suos actus.

Quamobrem prima libertatis radix est in natura animi spiritali. Hinc illius amplitudo & capacitas, tum in rebus cognoscendis, tum in expetendis. Ex illa cognitionis & judicii amplitudine fit ut appetitus nulli nisi universali bono addicatur, nulli subjiciatur, nihil necessitate agat. Unde homo unum præ alio eligit, consultò & deliberatè operatur; huc atque illuc, & quocunque imperium voluntatis duxerit, eò nititur.

Unum est quod homo necessitate quadam appetit, nempe bonum in universum, aut beatitudinem: Sed ex illa necessitate libertas ipsa oritur. Hinc enim fit, ut quodlibet bonum particulare amplecti voluntas liberè possit. Nam ex universalis boni appetitu a natura determinato inclinatio ad unumquodque bonum proficisci-

tur : sed ea est indefinita & libera . Nam quia homo necessariò beatus esse vult , quæ ad beatitudinem ducunt liberè potest eligere ; neque hanc haberet eligendi potestatem , nisi eam a natura propensionem accepisset ad bonum universum .

Ex quibus efficitur , nullam esse naturam quæ necessariò in bonum aliquod non propendeat : & quo illud est magis universale , hoc majoris libertatis est radix . Hinc Deus est liberrimus , quia est omnipotens ; nec cogi , nec vinci , nec timore ullo , aut aliis affectibus qui libertatem minuunt , percelli , nec falli potest , cum ignorantia libertati maximè obsit ; cumque is sit optimus , velle omne bonum potest . Primo homini in sua integritate constituto magna fuit libertas , post peccatum tamen integra mansit libertas à necessitate ; per gratiam reddita est libertas à peccato , & justitiæ faciendæ facultas ; Sed ignorantia & infirmitas seu concupiscentia non sunt omni ex parte sublatae ; hinc plena & ab omni miseria libertas , quam ignorantia tenebræ & motus concupiscentiæ rebelles multum infringunt , in hac vita esse non potest . Cum enim libertas in potestate & dominio quodam in actus nostros posita sit , quò major est servitus , hoc libertas est minor .

Quò autem hæc planiora fiant & facilio-
ra , non erit inutile eadem ex viri doctiss.
tractatu nondum edito paulò uberiùs expli-
care . Vim illam qua possumus amare aut
non amare bonum quodvis particulare &
determinatum , libertatem dicimus .

Duæ

Duæ sunt autem, ut diximus, causæ præcipuæ quæ voluntatem in bonum certum ac definitum inflectant; clara videlicet & evidens cognitio, ac confusus quidam voluptatis sensus. Cum enim voluntas jugi & non interrupta motione in bonum universum feratur, ubi boni illius splendor emicat, statim in illud voluntas nititur; cumque id tantum non esse comperit, ut animi capacitatem expleat, alterius boni desiderio agitari potest, & novi alicujus objecti fruitionem expetere, idq; priori bono antepondere. Nullius particularis boni extra nos positi invincibili amore illigatur.

Vim itaque illam animi quæ objectum amplecti potest & respuere, libertatem omnes vocant: eaque si primam naturæ institutionem spectemus, in omnibus hominibus, ut ratio ipsa æqualis occurrit. Sed quæ peccatum sunt subsecutæ ignorantia & concupiscentia, hæ non mediocriter eam vim omni naturæ spiritali congenitam debilitarunt, rationem ipsam adduxerunt, ac voluntatem corrumpere. Hinc quæ æqualis in omnibus hominibus fuisset libertas, in quibusdam major, in nonnullis minor apparet. Neque enim idem est in omnibus rationis lumen, neque animi in corpus potestas eadem. Variæ quoque hominum opiniones, consuetudines, temperamenta, varia corporis conformatio, spirituum motus & copia plurimū libertatem illam æquilibrii, & animi in corpus imperiū augere vel minuere possunt. Sed tamen cum adest objectum quod animum ad se allicit, homo qui ratione sua utitur, amorem suum

suum potest suspendere, & secum cogitare, an objectum quod proponitur, verum sit & genuinum bonum, aut certè cum illo consentiat, an fucatum duntaxat sit & spurium. Quod si omnino non possit suum amorem sustinere, tum instinctu quodam naturæ, non ratione agitur. Sic infans, aut is qui dormit, vim illam non habet cohibendi amorem aut motum animi in objectum: unde neuter tum liberè operatur. Quò ratio est debilior, hoc anima faciliùs abripitur ab objectis, & minimo momento huc illuc impellitur; tumque sensus maximè dominatur, qui statim judicat, & impetu quodam fertur. Sic ubi dormientis manum vel folium arboris tetigerit, quasi ex vulnere a serpente inflicto perterritus expergiscitur. Quò magis viget ratio, hoc minus licet voluptati corporis, & faciliùs vincitur; tum enim mens judicium suum non præcipitat, sed singula diligentius expendit.

Sic libertas eadem est in omnibus ut ratio, sed non ex æquo participatur ab omnibus. Multum enim valent educatio, literæ, civitatis mores, leges optimæ, ut nihil dicam de gratia divina, quæ mentem illustrat, & delectationes corporeas aut frangit, aut deprimat; ac menti ipsi pristinum in corpus jus & potestatem restituit. Objectorum impressiones, quæque in cerebro a falsis bonis inuruntur vestigia & mentem in diversa trahunt, ea libertatem imminuunt quidem, non extinguunt. Nemo enim ferè est qui vel communibus gratiæ præfidiis munitus, plerasque volu-

pta-

ptatum illecebras vitare non possit, præsertim si firmis & solidis rationibus animum præparet; si occasiones periculosas fugiat; si in rebus minoris momenti cupiditatibus non indulgere assuescat. Nam ut in Philosophiæ studio ii majores progressus faciunt; & rariùs in errores incidunt, qui assensum sustinent, nec judicium præcipient; sic in formandis moribus ii magis proficiunt, qui judicium illud prohibent, quod amor noster & vitæ ratio subsequitur. Hos utique voluptas non abripit, neque incautos opprimit; ex victoria reportata alacriores facti novum ineunt certamen, ut victis pudor incutitur: hinc fastidium & odium voluptatum: sic usu & exercitio libertas paulatim perficitur.

In iis libertas viget maximè, qui maximas voluptates semper vincere possunt & frangere: contra ea est maximè imperfecta & tenuis libertas quæ minutissimam voluptatem superare nequit, & parvo impetu in quodvis particulare bonum abripitur. Inter utramque libertatem infiniti sunt interjecti gradus: adeo ut vix duo homines circa eadem objecta sint æqualiter liberi; vix in iis æquale rationis lumen & æquo vegetum & firmum invenitur. Qui violentis jactantur perturbationibus animi, neque cum iis configunt, multò minus liberi videntur, quàm qui his fluctibus non ita vehementer agitantur, aut qui in iis frangendis sunt exercitati.

His itaque bene intellectis, de quibus omnes penè consentiunt, in quo sita sit libertatis natura, quæq; ei opponatur necessitas,

sitas, & aliæ quæ moveri solent controversiæ, facile, ut puto, si omnis contentionis æstus deferbuerit, dirimentur.

Q U Æ S T I O I V.

Quæ necessitas libertati opponatur.

QUæ de libertatis natura controverti, & magna contentione agitari solent hac quæstione continentur, quæ necessitas libertatem tollat. Certum est quidem nihil magis libertati adversari quam necessitatem coactionis, quæ ut voluntarium, sic libertatem perimit: quæque aliquid videntur habere coactionis, ut lex quæ timorem poenæ inducit: hæc, inquam, libertatem minuunt. Quæ autem voluntarii, eadem liberi rationem aut destruunt, aut infringunt. Unde ubi omnis abest cognitio, ibi nulla est libertas. Sic in pueris, amentibus & dormientibus cum nulla sit aut confusa admodum cognitio, nulla est aut tenuis admodum libertas, quatenus sese ad agendū utcunque determinant: sed illa, ut loquuntur, est Physica quædam libertas, non moralis, quæ laudi aut vitio attribui solet.

Omnis adeo difficultas de necessitate inclinationis superest: qualis est in nobis circa finem ultimum, nempe circa beatitudinem, quam non amare non possumus; aut qualis est in beatis circa Deum quem clarè intuentur: an necessitas illa libertati opponatur, ut nec nos beatitudinem, aut bonum in universum, nec beati Deum liberè ament, discutiendum nobis est. Sit igitur.

Pri-

Prima Conclusio.

Quæ pura necessitate naturalis inclinationis aguntur, hæc liberè non fiunt.

Prob. concl. 1. Liberum illud dicitur quod est in nostra potestate, cujus domini sumus, aut quod nostro subditur imperio: quod autè ex naturali inclinatione expetimus, id non est in potestate nostra, nec nostro subest imperio, sed naturæ ipsius, nec demum illud a nobis est, sed a Deo ipso proficiscitur. Quare id naturæ jus est, non nostrum: principium, id quidem est libertatis eamque antecedit, non illius ditioni subditur: ergo necessitas naturalis libertati arbitrii sic opponitur, ut quod necessariò volumus liberum dici non possit.

Confirm. 1. Ratione quam Sanctus Thomas affert 1. p. q. 82. art. 1. Ut intellectus necessariò & naturaliter primis principiis assentitur, sic voluntas necessariò ultimum finem expetit: quod enim est a natura, idem est determinatum & definitum, immobile, & fundamentum omnium quæ rei conveniunt. Nam natura cujusque rei est quod primum in ea concipitur, & unde omnis motus vel actio proficiscitur. Ergo amor beatitudinis, uti & cognitio principiorum a natura, non a libero hominis arbitrio repeti debet: atque ut conclusiones, quæ ex principiis eruuntur, ad rationem: sic quæ eligimus quæque in consultationem veniunt, ad liberum arbitrium pertinent.

Confirm. 2. Voluntas in iis quæ agit liberè, & agit ut voluntas, & domina suorum actuum: sed in iis quæ vult necessariò, & ex naturali inclinatione, ut natura tantum operatur: non quia vult, sed quia est; seu quia ex naturæ suæ conditione est ad unum determinata: ergo quæ necessariò, eadem non liberè volumus. Nam ut docet Sanctus Thomas 1. p. qu. 41. voluntas est principium eorum quæ possunt sic vel aliter esse, eorum autem quæ non possunt nisi sic esse, principium natura est.

Prob. 2. Libertas voluntatis opponitur servituti, & potestatem seu dominium in suos actus intellectu suo complectitur: sed voluntas quæ ad unum adstringitur, & determinatur: huic rei servit, non dominatur: unde Sanctus Thomas 1. p. q. 59. id solum habere liberum arbitrium docet, quod intellectu præditum est, & cognoscit rationem universalem boni: potest enim hinc judicare hoc vel illud esse bonum: ergo ubi est naturalis determinatio, aut necessitas, ibi non est libertas: non enim propriè tum agimus, sed agimur, ut ipse explicat qu. 60. art. 1.

Secunda Conclusio.

Indifferentia contradictionis vel exercitii est de ratione libertatis.

Priusquam hanc probare conclusionem ingrediamur, notare operæ prætium fuerit; 1. indifferentiam aliam esse contradictionis, vel exercitii, qua possumus agere,
vel

vel non agere; aliam contrarietatis, aut specificationis, qua possumus hunc vel illum actum exercere: illa enim Physica dicitur, hæc plerumque moralis, qua possumus bene aut malè agere.

2. Indifferentia alia est passiva, cum eadem res multa potest excipere, ut materia plures formas: alia est activa, qua effectrix causa plures effectus potest producere.

Ex iis prob. Concl. Necessitatem libertati repugnare ostendimus: sed ubi nulla est necessitas, ibi est indifferentia saltem exercitii: ergo indifferentia exercitii est de ratione libertatis.

2. Id liberum dicitur quod est in nostra potestate: sed nihil est in nostra potestate, quod est definitum, aut determinatum, quodque non possumus non agere. Nam ut docet S. Aug. l. de spiritu & litera c. 31. *Illud est in hominis potestate, quod si vult, facit, si non vult, non facit*: hincque concludit, *cum potestas datur, non imponi necessitatem*.

Confir. Ex eodem sancto Doctore, qui in libro de grat. & liber. arbitr. eandem indifferentiam probat ex eo loco Ecclesiastici quem supra attulimus, ubi dicitur, *quod Deus ab initio fecit hominem, & reliquit eum in manu consilii sui*, tum ex iis verbis quæ subjicit sacer textus, *Apponet tibi ignem & aquam: ad quodcunque volueris, extende manum tuam. In conspectu hominis vita & mors: quodcunque placuerit, dabitur ei*. Tum ex cap. 7. epist. ad Corinth. ubi ait Apostolus, *qui autem statuit in corde suo*.

suo non habens necessitatem, potestatem autem habens suæ voluntatis, &c. Ubi manifestè omni necessitate exclusa, indifferentia liberi arbitrii constituitur.

Confirm. iterum. Non alibi magis elucet vis & natura liberi arbitrii, quàm ubi aliquid præcipitur, aut suadetur, aut in consultationem venit: ut in iisdem locis docet S. Augustinus, maximè in capite 31. de spir. & lit. ubi libertatem in potestate constituit, cum voluntas aut velle potest, aut efficere: idque ex communi hominum sensu probat, qui cum aliquid suadent, *solent dicere: quod habes in potestate, quare non hoc facis, ut hoc malo careas?* Sed nullus est locus aut præcepto, aut consilio, ubi nulla est indifferentia; nemo deliberat an velit esse beatus; nec præcipitur diabolo ut bene faciat: ergo libertas intelligi non potest, citra indifferentiam.

Prob. concl. Libertas, ut sæpè diximus, in quadam potestate consistit: sed ea potestas non in eo tantùm sita est, ut possimus agere: Sic enim omnis causa effectrix esset libera, cum ea possit agere: ergo potestas illa quæ ad naturam libertatis pertinet, in eo posita est, ut possit agere & non agere. Quæ sanè major est quàm si ad alterutrum voluntas esset determinata. Hinc. S. Aug. l. 22. contra Faustum, docet, *motu animi libero voluntatem uti, cum inevitabili necessitate non premitur.* Ac subinde negat in Deo esse peccandi & non peccandi liberum arbitriũ, quia peccare non potest ubi manifestè necessitatem libertati opponit, non coactionis tantùm, sed eam qua res aliter esse non potest.

Con-

Confirm. Nam si voluntas circa objectum aliquod sibi propositum ita sit affecta, ut illud non amare non possit, detracta omni indifferentia, non liberè, sed necessariò in illud feretur objectum. uti res ex omni parte visibilis & colorata, ab oculis, si aperti sunt, necessariò conspicitur; non item si res ipsa ex parte duntaxat visibilis subjiciatur oculis. Non dissimili ratione, ut docet S. Thomas, cum aliquid voluntati proponitur undequaque bonum, in id voluntas necessariò nititur, neque oppositum velle potest; circa illa tantùm bona est libera & indifferens, in quibus non omni-modi boni, aut expetibilis ratio elucescit: nec ullum ferè a nobis cognoscitur bonum, in quo utrum amandum id sit a nobis, necne, non sit aliquis dubitandi locus. Quin etiam cum Deus summè sit amabilis, tamen & sensuum impressiones, & perturbationum æstus, confusæ quidem, sed validæ ob depravatam naturæ propensionem nobis rationes videntur, quæ ab eo quod unicè bonum est, nos retrahant: cumque Deum diligimus, nos nostra uti libertate manifestè experimur.

Confirm. iterum. Actus voluntatis iudicium liberum subsequitur, ut eo modo tendat in objectum, quo sibi a facultate cognoscente proponitur: est enim voluntas ultimi iudicii sequax, & omnis libertatis radix est in intellectu. Atqui iudicium non est liberum, cùm nulla est in objecto indifferentia; tum enim iudicium omnino est indeterminatum: ergo quæ ad libertatem exigitur indifferentia, eadem in objecto esse

esse debet, quod libertati ita dominari non debet, ut eam ad se necessario rapiat: ut evenit in amore boni universi, cui voluntas ut objecto integro & adæquato subicitur.

Colligitur ex iis, indifferentiam, quæ ad rationem libertatis pertinet; activam esse, non passivam. Hæc quippe magis est servitus quàm potestas; neque in Deo reperitur. Quod igitur voluntatem constituit formaliter, ut ajunt, liberam, non est actio ipsius libertatis, quatenus est vitalis, & in voluntate ut in suo principio excipitur: sed est voluntas ipsa ut liberè agens, & potestatem habens tum in suos actus quos elicit, tum in eos qui ad subjectas facultates pertinent.

Tertia Conclusio.

Indifferentia contrarietatis, aut moralis ad bene vel malè agendum, non est de ratione libertatis.

Prob. concl. Tum quia sufficit indifferentia contradictionis seu exercitii, ut voluntas sit domina suorum actuum: tum quia hæc indifferentia ad bonum & malum in Deo & in beatis non reperitur. Est enim nostræ libertatis defectus, non essentia; nec malè agimus nisi cum intellectus malè judicat. Error autem vel ignorantia non est de essentia libertatis; uti nec de rationis ipsius natura est ut malè concludat: & utriusque est imperfectio quædam, quod cum animus ad verum & bonum tendat, ab utroque tamen possit de-
desle-

deflectere. Non itaq; vera est potestas, quod peccare, aut falli, aut mentiri possimus. Imo Deus & beati hoc sunt liberiores, quod major est eorum cognitio. Quod enim plura noverunt bona, eò plura liberè velle possunt.

Non dissimili ratione manet libertas non solum in perversis hominibus, sed etiam in damnatis. Est enim liberum arbitrium facultas naturalis quæ amitti non potest. Quod autem id subinde negare videatur S. August. ut cum in lib. de spir. & lit. docet ex Apostolo, *ubi est spiritus Domini, ibi esse libertatem*. Si ergo, inquit, *servi sunt peccati, quid se jactant de libero arbitrio*: & infra, postquam fateri visus est in malis hominibus manere liberum arbitrium, quasi seipsum corrigens subjicit. *Quamquam, inquit, non est libera voluntas: à quo enim quisque devictus, huius servus addictus est; & omnis qui facit peccatum, servus est peccati*. Ista, inquam, quæ identidem innuit Augustinus, minime sunt intelligenda de libertate naturali, quæ dicitur a necessitate, quæque malis juxta & bonis convenit: sed de libertate a peccato, de qua loquitur Apostolus, *nunc autem liberati à peccato, servi autem facti justitiæ*. Quæ contra conclusiones nostras objici solent, proxima quæstione dissolventur.

Q U Æ S T I O V.

Quid sit libertas.

Nunc reliqua quæ ad naturam libertatis pertinent, exequamur, tum quæ contra sententiam nostram afferri solent, dissolvemus. Ac primùm ex iis quæ sunt explicata id efficitur, liberum arbitrium circa media, quæ ducunt ad finem, non circa finem ultimum, aut ea quæ nobis cum fine videntur indivulsè conjuncta, propriè versari. Nemo enim deliberat, aut eligit sanitatem, aut vitam, aut ea sine quibus beati esse non possumus, uti nec quis deliberat de fine ultimo in quem naturæ impulsu tendimus. Sic prima principia sunt naturaliter nota, eaque intelligimus, non de iis judicamus, aut ratiocinamur, sed secundùm ea de omnibus judicamus. Non dissimili quidem ratione finem ultimum, aut bonum in universum volumus quidem, idque non voluntatis arbitrio, sed quadam naturæ necessitate. Atque ut vis illa quæ conclusiones ex principiis eruit, ratio dici solet: ita vis aut facultas qua eligimus ea quæ ad finem videntur conferre, quaque animus sese movet aut determinat ad agendum, liberum arbitrium nominatur.

Quamobrem liberum arbitrium rectè definitur a sancto Thoma, *vis*, seu *facultas electiva*. Nam illius usus in electione consistit, ac sublata electione omnis actus libertatis tollitur. Cum enim voluntas ita

in

in objectum propositum determinatè fertur ut eo relicto in aliud flecti non possit , aut saltem quoad circumstántias id non sit aliquo modo indeterminatum , tum nullus relinquitur libero arbitrio locus .

2. Definiri etiam potest. libertas *vis sui ipsius determinatrix* . Cum enim vel a natura , vel a causa extrinseca ad agendum voluntas omnino determinatur , tum libertate sua non utitur , etsi hoc loco non excusatio an illa indifferentia sit ejusmodi ut Physicam Dei prædeterminationem pati non possit : Id enim est alterius loci . Interim illud certum est , non tantum coactionis necessitatem , sed etiam naturalis inclinationis , per quam voluntas ad unum determinatur , libertati repugnare : sic amor beatitudinis a natura insitus minimè liber est ; neque in genere amoris censetur ; nec demum voluntas ad eum se movet , aut determinat , sed ab Authore naturæ ad hunc amorè movetur . Major fortè est difficultas de amore beatorum , ad quem voluntas beatificatur determinatur , ut se quoque determinet .

3. Vulgò definitur per indifferentiam , *facultas qua positis omnibus ad agendum prærequisitis possumus agere , vel non agere* . Quàm definitionem veram esse ex iis quæ diximus , apertè colligitur . Nam liberum arbitrium citra aliquam indifferentiam intelligi non potest . Quamquam fortè quæ a sancto Thoma allata est , magis naturam liberi arbitrii explicare videatur : nam facultas omnis definiri debet per suum objectum , ex quo suam speciem desumit : quod utique objectum in hac definitione non satis exprimitur . 66157

Quodd autem sanctus Thomas addit, liberum arbitrium esse vim electivam servato ordine finis, non satis aptè nonnulli hinc colligere videntur, nullum esse libertatis usum, cum a recto & præstituto ordine ad finem recedimus. Fatemur enim defectum esse libertatis nostræ, quod ea abuti possumus, & a recto finis ordine deflectere: sed tamen id negari non potest, nos liberè agerè cum peccamus, & constitutum ordinem mediorum ad finem conturbamus. Itaque hæc verba addit sanctus Thomas, ut innuat nos media non eligere nisi ob finem aliquem, quem nobis præstituimus, aut qui a natura est præscriptus; uti nec concludimus aut ratiocinamur nisi ex certis principiis; libertatem verò, & electionem circa media, seu circa media, seu circa res quæ ad finem ducunt, versari, ut rationem circa conclusiones quæ ex principiis eruuntur. Hæc enim est constans sancti Thomæ doctrina circa libertatis naturam, in qua omnino acquiescendum putamus.

Diluuntur objectiones.

Quo infinitis propè, quæ ex SS. Augustino, Bernardo, Anselmo & aliis objici solent, testimoniis occurramus, notandum est;

1. Sæpè voluntarium cum libero confundi, & voluntatem cum libertate, cum liberum omne sit voluntarium, sed non vicissim. Sic non rarò quod libenter agimus, id liberè nos, hoc est, spontè, & voluntariò facere dicimur.

2. Ne-

2. Necessitas naturalis non tam libertati, quam libertatis usui opponitur: nam ex propensione naturali ad omne bonum nascitur libertas ad unumquodque bonum sigillatim sumptum. Sed quod necessario volumus necessitate vel naturali, vel antecedente, id non liberè, quanquam libenter volumus; neque enim libertas cum libentia, ut ita dicam, est confundenda. Omnis voluntas non est libera, sicut non omnis actio intellectus est ratiocinatio. Quæ a natura sunt præscripta, de iis nec ratiocinamur, nec consultamus: bruta spontè agunt, non liberè; quia necessario, & citra deliberationem.

3. Indifferentia, si vocem tantummodo spectes, nihil est positivum, sed negatio tantum determinationis. At si rem ipsam, & vim illius vocis consideres, tum est aliquid reale & positivum: est enim vis sese determinandi, quæ adhuc manet cum agimus, licet non sit amplius indeterminatio illa negativa. Ut enim visio non tollit vim ipsam videndi, sed magis eam perficit: sic actio ipsa non destruit vim illam sui determinatricem, quam libertatis nomine intelligimus. Unde qui agit, necessario agit, ex hypothesi quòd agat: sed cum hanc necessitatem sibi liberè imponat, ea nec libertati nec indifferentiæ activæ obest. Non quod aliquis simul agere possit & non agere, ut loquuntur, in sensu composito: nam actus & negatio actus simul coniungi non possunt: sed qui actu operatur, habet potentiam agendi & non agendi, ut vulgo ajunt, in sensu diviso. Quæ utique adnotamus ut quæ afferri solent cavilla-

tiones, facilius elidantur. His itaque constitutis ad ea quæ objici solent, veniamus.

Opp. 1. Illud esse liberum, quod est in nostra potestate, seu quod adest cum volumus. Sed nihil est magis in potestate nostra, quam actus quilibet voluntatis nostræ. Hinc S. Augustinus l. 3. de liber. arbitrio, *non enim, inquit, possumus aliquid sentire esse in potestate nostra, nisi quod, cum volumus, facimus*, quapropter nihil tam in nostra est potestate, quam ipsa voluntas, hoc est, actus voluntatis, quem veteres omnes nomine voluntatis donabant. Nam volitionis nomen a Scholasticis postea inductum fuit. Hanc autem rationem adhibuit S. Augustinus, ut respondeat argumento quod ex persona Evodii sibi objecerat; *Quod si præsciis est peccatum esse hominem, necesse est ut peccet si autem necesse est, non ergo est in peccando voluntatis arbitrium, sed potius inevitabilis & fixa necessitas*. Respondet, inquam, S. Augustinus peccatum esse liberum, quia est in nostra potestate, & fit quia volumus: adeo ut fieri non possit ut velimus aliquid, & non sit liberum. *Quamobrem*; inquit, *quamvis præsciat Deus nostras voluntates futuras, non ex eo tamen conficitur, ut non voluntate aliquid velimus*. Quæ responsio minime esset ferenda, nisi ut certum statueret actum omnem voluntatis esse liberum, idque essentialiter. Hinc concludit, *voluntas igitur nostra nec voluntas esset nisi esset in nostra potestate: porro quia est in potestate, libera est*.

Resp. 1. S. Augustinum hoc in loco & alibi passim

passim liberum cum voluntario, & libertatem cum libentia confundere: nam omne quod volumus liberè, hoc libenter volumus, non coactè, non inviti: estque in omni actu voluntatis libertas a necessitate coactionis, non a necessitate naturalis inclinationis, quæ libertati quidem ipsi non tam adversatur, quàm usui libertatis, ut sæpè diximus. Nulla enim est voluntas quæ non habeat aliquam sibi adjunctam necessitatem ad aliquod bonum: unde nulla est voluntas libera respectu omnium objectorum. Sed ex necessitate illa naturali libertas omnis oritur: quanquàm inclinatio ipsa naturalis libera non est: ut omnis ratiocinatio ex principiis naturaliter notis oritur, de quibus tamen non ratiocinamur.

Resp. 2. Illud esse liberum & in nostra potestate quod facimus præcisè quia volumus, C. quod facimus ex naturæ nostræ conditione, aut quia sumus, N. hinc amor beatitudinis a voluntate quidem proficiscitur, non quia vult, aut voluntas est, sed quia est; ut acutè explicat Caietanus idque superius fuit explanatum. Nam voluntas est quædam natura: unde & in ea est aliqua naturalis inclinatio, sed non sola: cum præter eam sit electio libera: nec omnis actus liber dici potest, nisi libertatem cum libentia confundimus, ut cum dicit S. Augustinus, *præceptum libere facere, qui libenter*.

Eodem modo intelligendus est S. Bernardus lib. de grat. & lib. arbit. *ubi consensus*; inquit, *ibi voluntas: porro ubi voluntas; ibi libertas*; & hoc est, quod puto dici liberum

arbitrium : ipsam enim voluntatem , quia impossibile est de se ipsa sibi non obedire , etiam impossibile est sua privari libertate . Ubi videtur in ea esse sententia , omnem actum voluntatis esse essentialiter liberum : ut actus imperati sunt liberi per participationem . Nam lego liberè , quia volo : si autem quærat aliquis quare voluntas mea est libera , idem faciet quærenti quare circulus sit rotundus . Sed liberum cum voluntario confundit .

Opp. 2. Beatitudinem necessariò expetimus , & beati Deum necessariò amant : sed nos liberè beati esse volumus , & beati liberè Deum amant , ut multis in locis docent SS. Augustinus & Thomas : ergo necessitas etiam naturalis libertati non opponitur . Minor probatur ex celebri S. Aug. loco in Enchiridio c. 105. *neque enim , inquit , culpanda est voluntas , aut voluntas non est , aut libera dicenda non est , qua beati sic esse volumus , ut esse miseri non solum nolimus , sed nequaquam prorsus velle possimus : sicut ergo nunc etiam anima nostra nolle infelicitatem , ita nunc nolle iniquitatem semper habitura est .*

Resp. neg. min. Et ad locum S. Aug. idem adhibere possumus responsum , quod identidem attulimus , liberum ab eo intelligi quod fit libenter , & est immune a coactione , cujus adeo principium in nobis est . Præterquam etiam dici potest liberam esse voluntatem in beatis , non præcisè quatenus Deo arctissimo amoris vinculo adhærescunt , sed quod multa possit bona eligere , & Deo liberè obediant . *Prima ergo libertas voluntatis erat , posse non peccare ; novissima erit ,*

erit, multo major, non posse peccare. Prima immortalitas erat, posse non mori; novissima erit multo major, non posse mori. l. de cor. & gr. c. 12. Sed ut alia est libertas Dei, alia hominis; sic alia est libertas hominis viatoris, alia beati: illa cum mutabilitate est conjuncta, hæc non item: de vocibus pugna est, de re ipsa omnes ferè conveniunt. Beatis SS. Patres libertatem tribuunt, sed aliam a libertate viatorum. Et certè non possunt beati vel Angeli quidpiam operari, quod veritas ipsa aut justitia non imperet. Sed satis fuerit ut indifferentia eorum salva sit & incolumis, quòd actiones illæ in seipsis sint indifferentes, nulla vi, nulla necessitate intrinseca voluntas eorum, sed amore & charitate ad agendum impellatur. Itaque libertas Angelis & beatis concedenda, sed nostræ dissimilis & Deo simillima: in iis semper est vis electiva, & sui ipsius determinatrix.

Resp. 2. Nos liberè beatitudinem expetere libertate exercitii & contradictionis, C. libertate contrarietatis, aut specificationis, N. Nam possumus amare & non amare beatitudinem; de ea cogitare & non cogitare: sed non possumus eam amare & odisse, seu non sumus indifferentes ut contrarios actus circa beatitudinem incommuni exerceamus.

Tamet si inficiari non possumus, quin amor beatitudinis, aut boni universi in omni actione nostra dominetur. Hæc enim est jugis impressio ab Authore naturæ profecta, quam libertas nostra variè determinat.

Instant. Liber ex Aristotele est sui causa, aut suorum actuum dominus: sed nihil est magis sui causa, quàm amor ultimi finis: cum is propter se ametur, & cætera propter ipsum: ergo amor finis ultimi est liberrimus.

R. Dist. maj. Liber est sui causa, id est ad agendum sese applicat aut determinat, C. est sui causa, & necessario determinatur, N. Itaque amor finis ultimi est quidem in nobis, & a nobis elicitur: at fortè voluntas illius actus propriè non est domina, cum non possit cum non elicere, nec illius subfit arbitrio.

Opp. 3. Libertas est magna hominis perfectio. Sed potentia ad non agendum nulla est perfectio, imo est omnino inutilis: ut in nobis nulla est potentia ad non volandum: ergo libertas non posita est in illa indifferentia, quæ potentiam non agendi includit.

R. dist. min. Potentia non agendi non est aliqua perfectio, si non sit conjuncta cum potentia agendi, & omnino est inutilis, si non sit itidem conjuncta cum dominio in proprios actus, C. si eadem sit realiter potentia agendi & non agendi, & si juncta sit cum aliquo dominio, N. Qui enim agit cum potestate & dominio, huic potentia ad non agendum est necessaria: sic enim agit ut possit ab agendo abstinere. Tametsi fateor nullam potestatem in non agendo esse positam: cumque per facultatem, aut potentiam ab agendo abstinemus, id utique fit agendo, & utendo ea potentia, sed fatendum quoq; est potestatem agendi, aut non agendi; hoc vel illud operandi, in idea aut

con.

conceptu liberi arbitrii omnino includi.

Opp. 4. Deus est liberrimus, sed non est indifferens, ne in iis quidem quæ extrinsecus operatur: nam ab æterno est determinatus ad agendum: ac decretum quo statuit mundum condere, nunquam fuit indifferens: cum Deus mutari non possit, & decretum illud sit Deus ipse.

R. neg. min. Nam Deus liberrimè creaturas omnes produxit, & tuetur; ac potuit eas non creare, potest itidem non conservare: licet ab æterno ad condendum hoc universum sese determinaverit: sed cum maxima indifferentia, ac nulla necessitate impulsus id decrevit. Neque idcirco mutari potuit Deus, nisi extrinsecè, ut ajunt, & connotativè. Decretum verò illud est intrinsecè & actu Deus ipse; atque adeo secundum entitatem suam est quid necessarium: sed ratione termini, aut connotati est omnino indifferens.

Contra, *inquiunt*, Decretum illud est intrinsecè liberum: sed non est indifferens intrinsecè: ergo aliud est liberum aliud indifferens.

R. dist. maj. Decretum Dei est liberum intrinsecè, & relativè sumptum, quatenus connotat creatura, C. secundum entitatem absolutè sumptam est liberum intrinsecè, N. Qua verò ratione est intrinsecè liberum, eadem ratione est indifferens, ut ordinem includit ad creaturas, quas potuit non connotare.

Opp. 5 In Christo summam fuisse libertatem: sed nulla in eo fuit indifferentia, nec ratione mortis, quam subiit, quæ a Patre æterno præscripta est, & cui non

H 5 pate-

parere non potuit; nec circa præcepta legi naturæ, ut circa Dei & proximi amorem: cum fuerit impeccabilis, neque hanc legem citra peccatum violare potuisset: ergo libertas citra indifferentiam esse potest, nedum illius natura in ipsa indifferentia consistit.

Resp. Christum & liberrimum & indifferentem fuisse, tum in morte subeunda: (nam ut ipse ait, *poteſtatem habeo ponendi animam*; & ut Propheta longè ante prædixerat, *oblatus eſt, quia ipſe voluit*) tum in naturæ præceptis adimplendis: cum his obediendo meruerit. Nam quæ Christo fuit adimplendi præcepta necessitas, ea fuit consequens, quæ consensum voluntatis includebat, non antecedens ea fuit. Accedit illud quoque, quod moriendi accepit a Patre imperium conditionatum, id fuisse, ex acceptatione Christi dependens, non absolutum: neque id tamen ita fuit ex conditione suspensum, ut a voluntate Christi repudiari potuerit.

Deinde quod aliquem reddit impeccabilem, id non continuò obſtat quominus mereri possit, & liberè agat. Christus peccare non potuit, nec præceptum Patris violare. Sed liberrimè id ipsum agebat, non instinctu quodam naturæ, aut vi delectationis invincibilis, ut in beatis accidit: sed electione ipsa & ratione. Delectatio qualis est in beatis, amorem illius rei quæ delectationem efficit, naturaliter præit, & nullum, ut multis videtur, libertati locum relinquit. Sed lux ipsa rationis quanta quanta sit, dummodo seorsum & separata a de-

le-

lectatione præveniente amorem spectetur, libertati non obest. Cum itaque Christus Dominus sensu illo delectationis præveniente, quique rationi duntaxat debilitatæ est necessarius, non egeret; is adeo liberrimè & electionis amore præceptum moriendi adimplevit.

Postremò etsi maxime cum delectatione Christus naturæ præcepta impleret, tamen delectatio illa amorem Dei aut non præveniebat, aut non æquabat. Cum enim id sit, vix ullus est aut merito, aut libertati locus, atque is amor est merè naturalis, non rationalis, non electivus. Delectatio enim ut pulchrè vir doctissimus vel est legitimi amoris præmium, ut in beatis; vel si amorem antecedit, id sit, ut concupiscentiæ motus indeliberatos frangat. Cum itaque in Christo Domino nullus fuerit concupiscentiæ sensus, nullæ illecebræ; sensus ille voluptatis prævenientis aut nullus fuit, aut longè minorem ipso amore fuisse fatendum est. Isque jugi & non interrupto sacrificio, quod Deo Patri liberè obtulit, & suam & Ecclesiæ gloriam promeruit.

Hæc ferè sunt quæ in secunda editione hujus operis circa libertatem Christi diximus. Quæ enim inserta sunt ex vulgata Philosophorum schola, Christi libertatem & indifferentiam non tam circa naturæ præcepta, quàm circa circumstantias, & motiva extitisse, id majorem explicationem postulat: tametsi hæc questio propriè ad Theologos pertinet, & inviti ad eam accedimus: sed cum in Scholis Philo-

sophicis acerrime agitari soleat, dabunt hanc veniam Theologi si paulò diutius in ea explicanda immoremur. Cum autem hoc argumentum non copiosè modò, sed eruditè admodum tractaverit vir omni doctrina excellens Ludovicus Thomassinus L. V. de Incarnatione Verbi, perpauca ex eo, sed quæ magnam huic difficillimæ quæstioni lucem afferant, decerpemus.

Ac primùm quidem Christi Domini libertatem omnes Theologi constantissimè tuentur; sed non eandem ei indifferentiam tribuunt. Sunt enim qui nullum Patris præceptum de morte obeunda Christo impositum putant. Alii mortem quidem speciali mandato præceptam volunt: sed circumstantias multiplices ejus potestati permissas arbitrantur, ut suam in iis experiretur libertatem; alii expectatum ejus consensum putant: in primo Incarnationis momento, antequam Pater quicquam ei imperaret; alii aliter philosophantur: cum tamen in his non subtiles argutias, sed Scripturæ & Patrum autoritatem & traditionem consultas oportuerit.

Et quidem Scripturæ ubique Christi obedientiam, & Patris mandatum ingeminant. *In capite Libri scriptum est de me, ut facerem voluntatem tuam, Deus meus, volui. Et Christus ipse; à me ipso facio nihil. Item Veni non ut facerem voluntatem meam, sed voluntatem ejus qui misit me Patris.*

Et quidem vix ullæ circumstantiæ relictae sunt humanitati, quæ a Verbo ipso & Patre non fuerint præscriptæ, nec quicquam poterat seorsum a Verbo operari

aut

aut moliri voluntas humana; penes eam obsequii partes fuerunt, neque a Deo regi, agique gravabatur. Quæ circumstantiæ essent ad Dei gloriam propagandam aptiores ignorare non potuit, nec præ charitate summa, qua flagrabat, eas non complecti.

Quæ ergo, *inquies*, relicta est Christi humanæ voluntati indifferentia, si vel minimæ circumstantiæ ei præscriptæ fuerint?

Resp. Indifferentiam peccandi, & non peccandi longè a Christo fuisse. Non poterat enim honestiora minùs honestis non anteferre. Verùm hanc necessitatem, si quæ erat, sibi imposuerat ipse Christus, neque adeo indifferentiæ contraria fuit.

Deinde, quod caput rei est, circa actiones, & omnes circumstantias in seipsis spectatas indifferens fuit humana Christi voluntas per se, & ad eas nulla vi, nulla antecedente aut intrinseca necessitate, sed sola in Patrem charitate ferebatur.

Postremò indifferentia illa a Verbo ipso profecta fuit, qua liberè voluit carnem induere & crucem subire. Christus præcepto quidem tenebatur, sed quod sibi ipse sanxerat: nam carnem, & carnis mortem summa libertatis indifferentia assumpsit.

Id præter cæteros disertè explicat Aug. lib. 4. de Trin. c. 13. ubi docet quòd Christus carnem, seu vitam non deseruit invitus, sed quia voluit, quando voluit, quomodo voluit. Quippè Dei verbo ad unitatem commixtus est homo. Hinc ait, potestatem habeo ponendi eam, & potestatem habeo iterum sumendi eam. Nemo tollit eam à me, sed ego pono eam à me, &c. neque enim jure cujusquam potestatis exutus est.

est carne, sed ipse se exuit. Nam qui posset non mori si nollet, proculdubio quia voluit mortuus est. Id ipsum Anselmus l. 2. cur Deus homo, c. 10. probat, Christum hominem potuisse mori, potuisse non mori, quia ut Deus, ita omnipotens erat: & c. 16. Cum quaeritur utrum idem Deus homo potuerit servare vitam suam, ut nunquam moreretur; dubitandum non est, quia semper habuit potestatem servandi, quamvis nequiverit velle servare, ut nunquam moreretur: & quoniam hoc à seipso habuit, ut scilicet velle non posset, non necessitate, sed libera potestate animam suam posuit. Sic indifferentiam cum præcepto moriendi conciliat. Nam ut ipse ait, Non magis factus est homo ad hoc ut moreretur, quam ut vellet mori. Sic præceptum moriendi indifferentiam non perimit: est enim illa indifferentia prior quodammodo præcepto, & consensus Verbi æternus immutabilitate sua nihil libertati aut indifferentiæ obest, postquam factus est homo. Eam esse mentem Anselmi testatur Petavius Tom. 3. p. 534. Quomodo ergo, inquit Anselmus, voluntas Dei nulla necessitate facit aliquid, sed sua potestate, & voluntas illius fuit voluntas Dei; nulla necessitate mortuus est, sed sola sua potestate. Exemplum affert ejus qui proposuit spontè aliquid se facturum, & postea perficit; is fanè non necessario, sed liberè efficit, quia liberè proposuit.

Sed, inquiunt, tam latè patet meritum Christi, quàm libertas, aut indifferentia, quæ nulla fuit in iis quæ præscripta sunt à Patre.

Respo.

Resp. Indifferentiam ubique reperiri eo quo exposuimus modo : neque enim præceptum huic exitiale fuit . Et sanè si nulla fuit libertas in substantia actionum , sed tantum in delectu circumstantiarum : ergo operum substantia expers erit meriti : quo nihil dici potest absurdius. Sed ne illud quidem dubium est, & mortem, & mortis circumstantias ab æterno esse definitas a Patre, qui, ut ait Apostolus, *proprio Filio suo non perpercit, sed pro omnibus tradidit eum.*

Verum, *inquiunt*, meritum omne Christi hinc pendet, quod liberè fuerit indifferens & omnis necessitatis expers, si minùs quoad substantiam operum, saltem quoad circumstantias. Nemo enim in iis meretur, quæ non potest non agere, Christus Patris præcepta detrectare non poterat, quia peccare non poterat. Quæ igitur tot meritum radix?

Resp. Vir doctiss. L. V. c. 16. & seq. duo esse meriti comparandi genera, unum naturæ mutabilis, quæ sibi permissa, imò & adjuncta ut bonum velle possit, suo nutu ad bonum se agit, alterum est, cum voluntas justitiæ inseparabiliter affixa omnem peccandi possibilitatem excludit, eò magis laude, aut merito digna; quò ex majori justitia & charitate agit : prius est naturæ mutabilis, alterum immutabilis. Sic Deus promeretur, non a Superiore mercedem, sed a subditis honorem; promeretur non sibi profutura, sed aliis.

Hæc utique merendi ratio ad Christum pertinet, quatenus ejus humanitas per se mutabilis immutabili Verbo conjuncta est.

Sic

Sic corporis immortalitas quam morte emit : prius illi debebatur , ut peccati experti , & Deo . Ut homo illam habuit indifferentiam , qua potuit rebus a Patre imperatis abstinere , si ipse in seipso , & res in seipsis spectentur : sed hæc indifferentia charitati & obedientiæ ita erat addicta , ut a peccandi potestate omnino esset aliena : longè adeò a viatorum cæterorum indifferentia diversa fuit . Nam flexibilis in utramque partem libertatis usus in utentis cedit commodum , non in aliorum emolumentum .

Itaque inclinabilis fuit obedientia voluntatis Christi paternis legibus , & per hanc nobis meruit salutem , quòd in iis rebus fuerit , ad quas per se spectatas erat prorsus indifferens ; & maxime quia Verbi passio fuit . Sibi etiam promeruit resurrectionem , regiam in omnes creaturas authoritatem , confessum ad paternam dexteram ob Verbi maiestatem , quia Verbum quas ante Incarnationem habuit prærogativas , easdem in carne illibatas retinet . *Cum in forma Dei esset ; non rapinam arbitratus est esse se æqualem Deo , sed exinanivit semetipsum , formam servi accipiens* . Mortem igitur subijt nulla cogente necessitate , nulla peregrina præceptione , sed Patris mandato , id est , sua sponte . Hinc meruit , aut si malis , dignus fuit ut Deus illum exaltaret .

Nec defuit consensus humanæ voluntatis liber & indifferens ad hæc per se spectata , imò & meritorius . Sed illa indifferentia indeclinabili obedientiæ non officiebat ; nam aliter servus Domino , aliter filius obsequi-

sequitur Patri : hinc servo merces, filio hæreditas addicitur. Servus ambigue, & voluntate in utrumque flexibili, filius amabili quadam necessitate obsequitur. Christus promeruit gloriam, ut filius hæreditatem, non ut mercedem servus; meruit ut indubius, ut securus. Consultare an Domino obtemperet, servi est fidei ancipitis; filius non deliberat an patri morem gerat, sed sua sponte, & quasi naturæ impetu ipse impellitur : nec humana Christi voluntas inter obedientiam & contumaciam dubia consultabat sed tota in obedientiam propendebat, ad res tamen & actiones per se indifferentes.

Hæc utique Hugo Victorinus paucis complectitur q. 150. in Epist. ad Rom. ubi quærit an Christus obediendo Deo Patri aliquid promeruerit. *Mereri*, inquit, *gemina* habet significationem. Dicitur enim *mereri*, cum per bonum opus efficitur dignus aliquo, quo prius non erat dignus; secundum quam significationem videtur nobis quod nec secundum divinitatem, nec secundum humanitatem Christus aliquid meruit, etiam in ipsa morte. Dicitur etiam aliquis *mereri*, cum bonum aliquod facit quod sit dignum remuneratione: secundum quod Deus dicitur etiam *mereri*, cum beneficia præstat pro quibus tenemur eum in æternum laudare: & Christus secundum humanitatem in sua passione meruit nobis introitum vitæ æternæ: prius quidem nobis multa meruit: sed sola passio non solum pretiosa, sed etiam pretium mundi fuit. Guillelmus Paris. par. 1. de universo par. 3; c. 21. *Necessitas obedientiæ voluntaria non contradicit libertati.*

Idem

Idem docet Magister sentent. l. 3. dist. 18. & S. Bonaventura in eadem dist. q. 2. *Ad illud quod opponitur, quoddam potentia determinata ad unum non facit opus de genere laudabilem, dicendum quoddam determinatio ad unum potest esse dupliciter, videlicet per necessitatem naturæ, & per confirmationem gratiæ. Si fit per necessitatem naturæ, tunc tollit arbitrii libertatem, ac per hoc tollit dignitatem meriti. Si autem fit determinatio per confirmationem gratiæ, cum talis confirmatio simul stet cum libera voluntate, sic non tollit ab ipso opere bonitatem meriti, cum sit voluntarium, ac per hoc nec qualitatem meriti. In Christo autem fuit liberum arbitrium determinatum ad unum, non per necessitatem naturæ, sed per confirmationem gratiæ. Verum id intelligendum est de eo meriti genere, quo Deus laudem cultumque nostrum merito suo deposcit; quo beatæ mentes tanta nobis bona a Deo impetrant (non enim Deus minus exaudit vota magis amantium;) quo recens initiatorum iustitia æternam mercedem flagitat. Quamquam & voluntas Christi sic ad unum erat determinata, ut per se esset indifferens ad operationes in se spectatas, & ex solius obedientiæ virtute, aut summa charitate ad eas determinaretur. Et ideo, inquit idem Doctor, sicuti potuit esse in statu viatoris simul & comprehensoris, sic habuit gratiam ad comprehendendum, & gratiam ad merendum.*

Unde Vasquesius in 3. p. disp. 74. c. 2. multos citat doctores, & præcipue ex familia Thomistarum, qui censent Christum Dominum ea ipsa dilectione meruisse qua Deum

Deum diligebat ; ac complures alios, qui per opera præcepti verè meruisse affirmant , & inter eos S. Thomam & S. Bonaventuram.

Longè alia est ratio meræ creaturæ: nam libertas omnis qua mereri potest, in eo posita est , ut peccare possit & non peccare . Nam quæ impeccabilis natura est , non creata est, sed increata . Meritum igitur & libertas in meris creaturis ex boni & mali ancipiti potestate profluit . Hinc Bernardus l. de gratia & lib. arbit. *Peccavit autem, quia liberum ei fuit : nec aliundè profectò liberum, nisi ex voluntate liberi arbitrii, de qua utique inerat ei possibilitas peccandi . Nec tamen fuit culpa dantis, sed abutentis, qui ipsam videlicet facultatem convertit ad usum peccandi, quam acceperat ad gloriam.*

Hieronymus explicans hæc verba Isaïæ, *Si volueritis & audieritis me, bona terræ comedetis*, hæc habet: *Liberum*, inquit, *servat arbitrium, ut in utramque partem, non ex præjudicio Dei, sed ex meritis singulorum, vel pœna, vel præmium sit.* Idem scribens in Epist. S. Pauli ad Philemonem . *Qui asserunt ita hominem debuisse fieri, ut malum recipere non posset, hoc dicunt, talis debuit fieri, qui necessitate bonus esset, non voluntate.* Et Aug. cum alibi passim, tum de Agone Christiano c. 9. *Et liberum voluntatis arbitrium dedit. Non enim esset optimus, si Dei præceptis necessitate, non voluntate serviret.* Nam errare non posse aut summæ naturæ est, aut infimæ & brutæ, ut pecorum, non mediæ & rationalis.

Itaque non alia est hominis etiam post lap-

lapsam libertas, aut meriti, & demeriti radix, quàm ad bonum & malum indifferentia. Quanquam longè alia est in Angelo & homine, alia in homine stante, alia in lapso, & diversi utriusque gradus. Cum ingenua mutabilitate peccavit Angelus, cum eadem mutabilitate & tentatoris astutia pugnavit homo; cum cupiditatis pruritu certandum nobis est; & iniquior esset nobis certandi lex, nisi validioribus auxiliis juvaremur. Tum pugna mollior, sed leviora auxilia; nunc robustior gratia, sed hostis validior.

Quocirca ut præclare concludit vir doctiss. ex quo ea collegimus testimonia, quæ indifferentiam in humana Christi voluntate sic ostendunt, ut impeccabilis tamen fuerit, & libertatem nostram ad bonum & malum versatilem demonstrant: pugnat natura rationalis cum insita mutabilitate, cum inolita cupiditate, cum irruentium dolorum acerbitate, & tot malis quatientibus agitata stabilitatem assequitur. Cum solis dolorum acerbitatibus pugnavit Christus, & hinc merita sibi nova cumulavit, quibus non sibi, sed nobis bonæ voluntatis incommutabilitatem quæreret. Diversa, ut sæpè diximus, est hominis ratio, illi enim pugnandum est, ut eam stabilitatem mereatur. Hinc pulchrè Ambrosius enarratione de arbore interdicta. *Sed utique, inquiet calumniator, Deus non debuit hominem permittere ut peccaret. Sed stulti hoc dicunt, non considerantes quia Deus statum non fecit lapideam, aut ligneam, sed hominem perfectum condidit, & suæ mentis arbi-*

arbitrum, ut intelligeret quid boni appeteret, & quid mali contemneret. Superius idem quod statim omnibus occurrit, sibi objecerat. Si sciebat eum posse peccare, quare non revocavit eum à peccato? Respondetur, quia non victorem, nec eum qui non legitime certaverit, non decet coronari. Sed longiores sumus, quàm volumus.

Opp. 6. Indifferentia omnis est cum aliqua deliberatione conjuncta: sed ex mille actionibus vis una in deliberationem venit: nam tironis est, non periti artificis inter operandum deliberare: ac sæpè nullus est locus consultationi. Hinc non satis aptè Aristoteles definit electionem appetitum consultativum: cum enim mens deliberat, impedita est, non expedita. Homo temperans non consultat utrum abstinere debeat: a libidinibus: nec Christus unquam deliberavit an Patri obediret: ergo ut deliberatio, sic indifferentia ad rationem libertatis non pertinet.

Resp. Formalem & ratiocinio evolutam deliberationem ad libertatem non requiri; sed virtuales sufficere: cum nimirum res est ejusmodi, ut eam facere & non facere possimus. Non enim homo semper fluctuat, aut pendet animi: sed judicium simplex sæpè voluntas sequitur. Dummodo non sit ita ad unum determinata, ut actum suum non possit suspendere, liberè agit, & cum indifferentia: de cujus ratione non est inconstantia, sed independentia quædam ab objecto. Quanquam vix quicquam molimur, quod prius aliqua ratione ducti facendum non judicemus.

At-

Atque ut in iis quæ ex longa assuetudine operamur, vix ullus ratiociniis sit locus, non idcirco tamen omnis argumentatio abest. Ubi expedita est & parata, nullam temporis moram postulat; nullo quippe obice retardatur. Incredibilis est enim mentis celeritas, qua unum ex alio colligit, nec quicquam ferè aliud nisi sensuum infirmitas ei moram injicit. Quare non continuo omnis deliberatio, aut ratiocinatio abest ab actionibus nostris, quod summa cum celeritate fiant Ordo notionum vel idearum, & delectus cogitationum, dum mens eas in ordinem digerit, alias feligit, alias repudiat; illas excitat, has inhibet, vix citra ratiocinium effici possunt: & tamen ista omnia actiones nostras anteverunt.

Opp. Aliud est liberum, aliud deliberans, ut S. Bonaventura scitè distinguit in 2. sententiarum, dist. 25. *Liberum*, inquit, *arbitrium considerari potest dupliciter, aut secundum quod liberum, aut secundum quod deliberans; si loquamur de ipso secundum quod liberum, sic concedo quod potest esse non solum respectu contingentis, sed etiam necessarii: sicut patet in Deo, & in Christo, & in Angelis & in hominibus beatis. Cum enim duplex sit necessitas, videlicet coactionis & immutabilitatis; necessitas coactionis repugnat libertati arbitrii, necessitas verò immutabilitatis non repugnat: pro eo quod liberum arbitrium dicitur liberum; non quia sic velit hoc, ut velle possit oppositum, sed quia omne quod vult, appetit ad sui ipsius imperium: quia sic vult aliquid ut velit se velle illud: & ideo in actu volendi seipsum movet, & sibi dominatur.*

ergo

ergo libero necessitas non opponitur.

Resp. Liberum arbitrium sumi a Sancto Bonaventura inadæquatè, ut loquuntur, pro voluntario, quodque est immune a coactione. Fatemur etiam necessitatem immutabilitatis, si sit consequens, quæque includat actum ipsius voluntatis, qualis est necessitas ex præscientia divina, & qualis in Christo fuit, non obesse libertati: cum necessitas antecedens omnino libertati ad-versetur. Non enim alia ratione SS. PP. & August. imprimis, Philosophorum fatalem necessitatem impugnarunt, quàm quòd libertatem nostram perimeret. Sic Astrologorum vanitatem hinc solent refellere, quòd antecedentem & libertati contrariam necessitatem inducant.

Duo enim sunt, quæ libertatem omnino perimunt: necessitas nimirum antecedens; quæque voluntatem ante determinat, quàm aliquid velit, aut actum amoris eliciat; eaque libertatem destruit: sive ex certa causarum connexionione, aut factorum dispositione; sive ex fiderum aspectibus ducatur. Qui enim hanc fatalem induxere necessitatem, iidem fere animum nostrum in censu corporum posuerunt, quasi pulsu alieno moveretur. Adversus Philosophos, qui hanc necessitatem invexere, Patres omnes essentialem hominis libertatem, & potentiam sui determinatricem asseruerunt: adèd ut voluntatem nihil extrinsecum determinare possit necessariò; sed amor ipse quem format, sit determinationis omnis principium, maximè cum res aliqua propter se expetitur.

Alte-

Alterum quod liberum arbitrium, seu vim electivam omnino evertit, est naturalis necessitas. Ut qui mores omnino ad temperamentum referunt, adeo ut homo ad iram vel lætitiā tam sit a natura determinatus, quā leo, aut canis, ii liberum arbitrium destruant. Quasi alios actus voluntas exercere non posset, quā naturales: cujus generis est amor felicitatis, qui est prima voluntatis determinatio; necessaria quidem, si minus necessitate antecedente, saltem naturali, quæque cum libero arbitrio, seu vi electiva esse non potest. Non ut fortè non sit antecedens, cum nulla extrinsecus adveniens impulsio hunc naturalem vitæ, tranquillitatis, aut felicitatis amorem præveniat: certè est omnino naturalis, nec nostro subest arbitrio. Quare libertati nobis essentiali, quæque destrui non potest, omnino contraria est necessitas, aut determinatio antecedens: sed libero arbitrio, seu vi electivæ: propriè repugnat tum necessitas antecedens, tum naturalis. Hinc plerisque ex veteribus, etiam Scholasticis, ut Scoto & aliis, visum est, Patrem æternum libere Verbum producere: libertatem enim cum voluntate rationali identidem confuderunt: quatenus necessitati antecedenti & extrinsecæ oppositur. Sed cum vox liberi arbitrii ad voluntatem pertineat, quatenus sic agit, ut possit non agere; & sese determinat ad alios actus, quā ad naturales & necessarios, & eligit libere; Deus nec se libere amat, nec Verbum libere generat, sed libere vult & decernit quæ ad creaturas pertinent, cum potuerit ea non decernere.

Quare voluntas non ad eos tantum affectus, qui sunt naturales, est illigata, sed infinitos propè alios exerit & format, quos potest non exercere. Atque in hoc dominio aut potestate vis libertatis & liberi arbitrii maximè posita est: quod non aliundè sit determinata, antequam agat, sed actus ipse amoris eam determinet. Undè nullus est necessitati antecedenti locus.

In quo utique ratio liberi arbitrii propriè consistit, quod SS. PP. adversus Philosophos & Hæreticos confirmarunt, quod alioqui nullus esset laudi aut vitio, præmio aut pœnæ locus. Imò voluntas creata nec iusta esset, nec iniusta: cum enim per essentiam aut bona, aut iusta dici non possit, per actiones tantum, quas liberè elicit, & potest non exercere, iustitiam aliquam adipisci potest. Neque etiam id visum est SS. PP. ad libertatem sufficere necessitatem à coactione: nunquam enim vel Hæretici, vel Philosophi hanc necessitatem negaverunt: cum id omnibus sit manifestum, voluntatem velle aliquid non posse invitam, & coactam. Ita ferè vir doctissimus in dissertatione nondum edita.

Opp. ultimò. Si libertatis natura in indifferentia contradictionis posita est, aut certè cum ea necessariò conjuncta, hinc sequitur majorem fore libertatem, quò major erit indifferentia. Sic igitur, qui ex concupiscentia & magna delectatione ager, minùs peccabit, quòd minùs liberè & indifferèter: cum libido aut concupiscentia instar ponderis nos peccare compellat. Simili ratione qui ex habitu peccat, is minùs liberè & cum

minori indifferentia peccat . Avarus qui multum & diu deliberat an actum liberalitatis exerceat, liberius aget, quam homo liberalis qui promptè & citra deliberationem, atque ex habitu operatur . Sic non erit libertas, ubi est ignorantia & infirmitas . Non enim consultamus nisi propter ignorantiam; consilium non mutamus, nisi ob levitatem & inconstantiam animi; nec verisimile est sublata tum ignorantia, tum infirmitate libertatem auferri .

Postremò si libertas in æquilibrio & indifferentia posita sit, minùs liberè agent scelerati, quia ex minori indifferentia; minùs peccabit intemperans, qui non deliberat, quam incontinens, quem recta ratio & libido in partes diversas trahunt .

Resp. Indifferentiam ad rationem libertatis sic pertinere, ut non sit tota illius essentia . Duo sunt enim in libero arbitrio, voluntas & iudicium . Quæ ex habitu & delectatione agimus, ea non minuunt libertatem ex parte voluntarii . Voluntas enim magis in ea inclinatur, quo maiore delectatione agit, aut magis ex usu, exercitio & habitu operatur . Sed ex parte iudicii & electionis duo sunt quæ libertatem imminuunt: aut nimis confusa cognitio, qualis est in pueris, qui spontè agunt, sed non liberè, saltem libertate morali: (nam in iis est Physica libertas, qua ad multa sese movent & applicant,) aut tam perfecta cognitio, ut nihil libero arbitrio relinquatur, ut in beatis accidit, qui Deum clarè cognitum non amare non possunt . Undè ad

usum

usum libertatis medius quidam cognitionis status requiritur.

Quamquam in beatis non tam clara Dei visio, quàm invincibilis illa delectatio qua omnes animæ vires implentur, nullum electioni locum relinquit. Cognitionis enim quantumvis perfecta in objecta ipsa nos non rapit, nosque nobismetipsis permittit. Sed delectatio animam intimè afficit, eam modificat, cumque maxima est, ut in beatis, amorem objecti a quo illa profluit voluptas, naturaliter & necessario procreat. Idque maximè cum lumen rationis cum ea delectatione conjungitur: tum enim est invincibilis.

Quare habitus cum boni, tum vitiosi, delectatio, concupiscentia, imò gratia ipsa indifferentiam æquilibrii possunt utcunque imminuere, non indifferentiam electionis, aut dominii, aut vim sui ipsius determinatricem: nisi fortè nullus sit rationi locus.

Sic habitus honesti, & gratia ipsa, ut necessitatem quandam Moralem, non Physicam afferant, non idcirco indifferentiam voluntatis tollunt, si ea ratione dominii spectetur. Et quidem cum indifferentia ratione sui defectus spectatur, quod nimirum voluntas peccare possit, non dubium est quin boni habitus eam quodammodo imminuant: cum ii peccati odium & aversionem procreent. At si finis ipse spectetur, propter quem illa indifferentia homini concessa est, tum libertatem hominis adeò non minuunt ut magis eam perficiant: data enim illi fuit ut virtutem colat: ac

boni habitus concupiscentiæ pondus imminuunt.

Non dissimilis est ratio pravorum habituum, & ipsius concupiscentiæ. Non enim necessitatem Physicam, & antecedentem voluntati imponunt. Atque ut æquilibrii indifferentiam imminuant, non utique indifferentiam electionis, aut ipsum quod habet voluntas dominium, tollunt. Nisi fortè tantus sit perturbationum æstus, tam effrenis concupiscentia, ut ratio penè omnis extinguatur: tam enim penè exstinguitur vis illa sui determinatrix. Nam delectationis sensus voluntatem eò flectit, undè voluptas ipsa proficiscitur: tum enim anima se felicem putat, cum voluptate perfunditur: & naturali quodam instinctu fertur in objectum quod nos felices efficere arbitramur. Sed tamen vix illud usu venit ut adeò vehemens sit illa delectatio, ut suspendere iudicium & rationem ipsam audire non liceat: nec essentialis libertas unquam exstinguitur.

Ex iis colligitur libertatem a peccato, aut a iustitia, aut potestatem cum altera ex his conjunctam augeri vel minui, imò perfici aut destrui posse. Sed ejusmodi libertates, aut necessitates sunt accidentariæ libertati essentiali: undè sese invicem & destruere possunt & frangere. Sed eadem semper manet libertas, idem liberum arbitrium.

DISPUTATIO III.

De Habitibus.

His explicatis quæ ad voluntatem & libertatem visa sunt pertinere, ad eunda est habituum, qui sunt principia actuum humanorum acquisita, tractatio. Ac primum de notione, existentia & divisione habituum: 2. de natura, tum de eorum causis agendum videtur: postremò quæ sint eorum proprietates, quàm diligentissimè poterimus, exequemur.

QUÆSTIO I.

De notione, existentia & divisione habituum.

Habitus nomine intelligimus primam qualitatis speciem, quæ facultatem ad agendum per se & immediatè juvat, quæque facilitas nominatur. Non enim eas qualitates inertes & otiosas nunc tractamus, quæ nihil agunt, nihil moluntur, cujus generis sunt pulchritudo, sanitas, morbus: tametsi inter habitus solent numerari. Sed eas qualitates hoc loco persequimur, quæ facultati succrescunt, quæque ad agendum destinantur. Ac meritò quærimus an ejusmodi qualitates adventitiæ existant; an quælibet affectio licet constans & fixa, vel animi, vel corporis, quæ habitus nomine designari solet, non sit quiddam reale, quodd facultati succrescat, sed impedimentorum quædam duntaxat remotio: adeò

ut operatio ruptis obicibus sit facilis & expedita : quod utique usu & exercitatione perficitur, non adventitiæ qualitatis beneficio. Sit itaque

Unica Conclusio.

Dantur habitus naturales, iique non sunt positi in sola impedimentorum remotione.

Probatur concl. Firma illa facilitas, quæ usu & exercitio acquiritur, est quiddam physicum & reale, quod facultatem ad agendum expeditam & promptam efficit : ergo non in sola impedimentorum remotione habitus natura consistit. Sed, ut ait S. Augustinus, *est affectio quædam animi, vel corporis longo tempore perseverans.*

Confir. Artes omnes, disciplinæ, virtutes, quæ tantis studiis ac laboribus comparantur, quæque altis radicibus infixæ ægrè divelluntur, sunt aliquid reale; eæque ornamentum quoddam, & quasi lumen animæ afferunt; ac verisimile non est nihil eas esse præter obices ipsos, aut velut repagula re-yulsa. Ac nescio an de usu quodam irrationali, quo v. gr. manus in scribendo decurrit, id dici possit. Sed quando ars ipsa hunc usum antecedit : ut cum longa exercitatione ex tempore dicendi facultatem sumus consecuti; cumque animus in tam multiplex officium diducitur, ut inventioni, dispositioni, elocutioni, ordini rerum, verborumque, adhibita vocis, pronunciationis, gestus observatione sufficiat; res tanta, tamque mirabilis non sola organorum dispositione, neque

neque eorum quæ obſtant, amolitione (quas duas res multum juvare concedimus :) ſed arte maxima, & habitu, & dexteritate continetur.

Habitu diviſo.

HAbitus alii ſunt ſupernaturales, qui ſcilicet vires naturæ excedunt; alii naturales: illi dicuntur infuſi, quod à Deo in nobis infundantur, ut fides, ſpes, & charitas: de quibus agere noſtri non eſt inſtituti. Id unum advertere debemus, hos habitus non facilitatem modò ad agendum, ſed etiam poſſe, ut ajunt, ſimpliciter, tribuere: adeo ut potentiis, ſeu facultatibus ſimiles videantur. Nam facultas naturalis ex ſe omninò eſt incapax actum ſupernaturalem exerendi. Hincque dari habitus infuſos manifeſtè demonſtratur. Nam ut ait Apoſtolus Rom. 9. *Charitas diffuſa eſt in cordibus noſtris per Spiritum ſanctum, qui datus eſt nobis.* Hanc verò juſtificationis inhærerere docet Concil. Trident. ſeſſ. 6. c. 7. Undè, inquit, *in ipſa juſtificatione, cum remiſſione peccatorum hac ſimul infuſa accipit homo per Jeſum Chriſtum cui inſeritur, fidem, ſpem, & charitatem.* Undè & 1. Joa. 3. gratia Dei ſemen, non fluxum videlicet, ſed permanens nominatur. *Semen ipſus*, inquit, *in eo manet*; tum ſubdit: *& in hoc ſcimus quoniam manet in nobis de ſpiritu quem dedit nobis*: hoc eſt, aliquid de ſpiritu, nempe ejus emanatio quædam permanens. Hæc leviter attingimus, ne dubium ulli eſſe poſſit, quin habitus infuſi & ſuperna-

turales animis nostris insint, ut qualitates, ut affectiones longo tempore perseverantes, & velut characteres quidam mentibus nostris impressi; juxtà illud Apost. Ephes. i. *Signati Spiritu promissionis sancto*, Signaculum enim illud, aut character est quid constans, non fluxum & momentaneum. Verùm ista viderint Theologi, nos ad nostrum redeamus institutum.

2. *Habitus naturales* vel sunt a nobis congeniti, vel studio acquisiti: illi inclinationes, aut propensiones naturæ dicuntur, quatenus ad appetitum pertinent, atque omnes affectus ex iis tanquam principiis ducuntur. Hujusmodi propensiones ab Authore naturæ imprimuntur: cujus generis sunt amor boni in universum; amor suæ integritatis, conservationis, & omnium quæ ad perfectionem, aut felicitatem nostram videntur conferre: ut scientiæ & delectationis, & eorum quæ ab omnibus expetuntur. Sunt enim impressiones quæ a Deo jugiter manant, & in eum tendunt. Atque eam ferè in animis varietatem & pulchritudinem, quam diversæ motuum leges in corporibus, efficiunt: eo tamen cum discrimine, quòd motuum leges certæ sint & constantes, neque a fine suo deflectant: naturales verò & congenitas propensiones ad nos plerumque deflectimus, dum in nobis tanquam in ultimo fine sistimus, idque ex pravo libertatis nostræ usu, non ex ipsa propensione naturali proficiscitur.

3. Sunt aliæ propensiones quæ corporis temperamentum consequuntur, & quæ maximè ex textura cerebri & spirituum natu-

ra pendent, ut suo loco ostendemus. Quò v. gr. fibræ cerebri sunt tenuiores, & spiritus subtiliores, eò rerū imagines altius imprimuntur: undè vis imaginatrix fortior, & plerumque major inconstantia. Hinc mores adeò diversos sexuum, ætatum, nationum varietas efficit.

4. Sunt etiam habitus quidam congeniti, qui ad cognitionem pertinent, de quibus jam sæpè egimus: intellectus nimirum principiorum, & synderesis; ille ad rerum contemplationem, hæc ad agendum spectat. Nam lux illa in qua principiorum veritatem contuemur, insita nobis est a natura: cumque mentem nostram ad cognitionem quæ demonstrari non possunt, omninò determinet, habitus vocitatur. Hunc verò habitum acquiri quodammodo per sensum docet S. Th. in 3. dist. 23. *Quantum*, inquit, *ad distinctionem principiorum, non quantum ad lumen, quo principia cognoscuntur*. Nam si terminos sensuum ministerio addiscimus, non ipsam veritatem, quæ tam manifestè in iis principiis lucet, a sensibus mutuamur.

5. Habitus autem acquisitus vel ad vim cognoscentem, vel ad appetentem pertinet; ille vel ad verum semper inclinat, isque est quintuplex, ut in Logica diximus; vel ad errorem; vel partim ad veritatem, partim ad falsitatem nos ducit, tumque opinio nominatur. Simili ratione habitus qui in appetitu insunt, vel semper ad bonum, ut virtutes; vel semper ad malum, ut vitia, nos impellunt: vix autem medius inter bonum & malum habitus invenitur.

QUÆSTIO II.

Quid sit habitus?

IN quo posita sit habitus natura , magna contentione certatur : definiri solet *qualitas facultati adventitia , qua facilius operatur* . Sed cum qualitatis nomen latissimè pateat , & id omne quod rem talem denominat , aut afficit , aut determinat , hoc nomine vulgò donetur , vaga quædam & confusa notio huic voci subest , quæ rem ipsam plerumque involvit magis quàm explicat . Præterquam si habitus instar luminis , aut coloris concipiatur , intellectu arduum est , quomodo is produci , extinguì , augeri , vel minui possit ; nec satis liquet cui illa qualitas usui esse possit , aut cui subiecto insideat , ac multæ subindè emergunt difficultates , quæ dissolvi vix ulla ratione possunt .

Quare nonnulli ut ex iis sese expediant angustiis , habitus nihil esse præter remotionem impedimentorum putant . Sed jam ostendimus obices quidem amoveri , cum habitus , scientia nimirum , aut virtus acquiritur : sed quiddam præterea , idque reale & physicum , quodcunque illud sit , usu & exercitatione comparari . Id verò si dixerimus esse qualitatem quandam , nihilò fortè erimus doctiores : vox enim illa vaga & indefinita nihil lucis affert propositæ quæstioni . Quid igitur , an modalis erit entitas , firma & constans , quæ certò quodam modo nos afficit , Id utique videtur pro-

probabilius, quàm absolutam quandam entitatem comminisci, quæ qualitas nominetur, quæque nos ad agendum determinet: sed quandiu in iis vocibus adeò indefinitis sistimus, nullam rei ideam distinctam formamus.

Itaque propiùs ad rem ipsam videntur accedere, qui habitus, intellectuales potissimum, nihil esse putant præter rerum imagines, seu ab objectis impressas, seu a mente ipsa, cum percipit, expressas, quæque in memoria asservatæ; ubi opus est, sese offerunt. Sic ex repetitis actibus manent quædam impressiones in voluntate, tanquam actuum termini, quibus ipsa ad agendum promptior efficitur. Hæc sanè magna probabilitate dicuntur, neque ut falsa omninò rejicimus: at rem ipsam faciliiori & compendiosiore via explicari posse multi arbitrantur. Sit itaque

Prima Conclusio.

Habitus intellectuales satis commodè per impressa cerebro vestigia, & expeditos spirituum animalium motus, impedimentorum denique remotionem explicantur: sic tamen ut affectiones quædam in mente humana ex repetitis actibus procreatas non inficiemur.

Probari potest & illustrari conclusio, 1. ex iis quæ in Logica diximus, quædam ab objectis per exteriorum sensuum organa in cerebro imprimi vestigia, quibus certæ itidem idææ, aut mentis perceptiones ita sunt illigatæ, ut junctim semper & simul sese

offerant. Cumque illa vestigia, quæ phantasmata dici solent, facilius & distinctius imprimuntur, notiones quoque mentis aut distinctiores sunt, aut magis expeditæ. Ex actibus verò sæpius repetitis illæ velut imagines melius delineantur, spiritus in eas facilius incurrunt; viam sibi apertio-rem muniunt. Hinc celeris & expedita cogitatio, quæ habitus nomine censetur.

Confirm. Cum trita cerebri vestigia, aut vi morbi, aut diuturnitate temporis expunguntur, ita se habet intellectus, ac si rem ipsam nullo modo didicisset: ergo signum est habitum scientiæ non minùs ad imaginationem ipsam, quàm ad intellectum pertinere. Quæ enim causa potuit ex subjecto spiritali, cui nihil est contrarium, qualitatem itidem spiritatem expellere? Nec tamen negaverim mentem humanam, quatenus naturali lumine & appetitu naturali instructa est variè modificari, & affici, atque illæ affectiones acquisitæ habitus spiritales dici possunt.

Confirm. 2. Habitus acquiritur, ubi quæ in subjecto erat oppositio, & velut rigiditas repetitis actibus superatur: ut cum pueri literas formare incipiunt, & mille modis linguam inflectunt: idque in omni corporis facilitate acquisita cernere est. At fortè non tanta est in ipso intellectu difficultas; neque enim per partes perficitur. Atque ut artifex non artis, sed organi v. g. citharæ vitio artem suam non prodit: ita intellectus plerumque paratus est ad intelligendum, nihil ferè ei deest præter organum bene instructum. Undè si hebes, aut

tar-

tardus habeatur, id tantum fit organi, aut imaginis vitio : cum res incorporea, vix fieri acutior, aut mobilior possit. Sed cum vestigia cerebro impressa confusa sunt, & perturbata; cum spiritus per illa non satis trita vestigia minus expeditè discurrent; cum faciliè deleri possunt; tum habitus aut nullus est, aut faciliè expungitur. Contra evenit, ubi vestigia, in cerebro sunt inconfusa, ex repetitis actibus altè impressa; cumque spiritus per ea, fere ut aqua per tubulos quos sibi aptavit, liberè discurrent.

Prob. 2. Eadem penè videtur ratio habituum, quæ memoriæ : cum habitus ipsi, aut memoria contineantur, & imaginum congerie, aut ex ea pendeant maximè : sed memoria in parte animæ sentiente magis quàm in parte intellectu inest. Nam ubi abolita est, & vestigia cerebri deleta, nullæ in ipso intellectu remanent species : neque enim necesse est ad congenitas, aut alias ex rebus corporeis exsculptas imagines confugere : cum mens aut in æternæ veritatis luce res intelligibiles intueri possit, ut videtur S. August. vel ex naturæ lege aut Dei voluntate nostræ perceptiones : aut ideæ certis cerebri vestigiis sint addictæ, vel certè illa vestigia sunt quædam velut instrumenta quibus mens utitur, maximè cum res corporeas intelligit : nam cerebrum sic inter mentem & reliquum corpus sequestri munus obit, ut per id, reliquum corpus in mentem & vicissim mens in totum corpus agat. Hoc enim interjecto & cogitationes mentis a corpore, & motus corporis a mente modificantur ; unde & sensus
om-

omnes in capite sunt collocati. Illa autem necessitudo inter mentis cogitationes, & cerebri aut spirituum impressiones non ab alia, quam a prima causa fuit instituta. Nam effectus generalis causa quoque generalis quærenda est. Si quis roget, ait vir eruditus, cur lapis projectus sit, causa peculiaris est afferenda: at quærenti cur lapis projectus motum suum continuet, causa quædam generalis est afferenda. Illa inter mentis cogitationes, & vestigia cerebri necessitudo effectus est generalis. Unde quærenti cur positis certis corporum motibus certæ oriantur perceptiones, non alia afferri causa potest quàm certa naturæ lex, aut constans Dei voluntas.

Secunda Conclusio.

Nihil necesse est in voluntate, aut in appetitu sentiente novas qualitates, seu habitus ab ipsa voluntate distinctos comminisci.

Prob. Concl. Voluntas non est vis ab intellectu distincta, neque appetitus est facultas ab imaginatione sejuncta: ergo si nulli sint in ipso intellectu habitus acquisiti, nihil nos cogit novas in voluntate vel appetitu qualitates tanquam distinctas entitates comminisci.

Confr. Ejusmodi qualitates videntur penitus inutiles, cum voluntas a cognitione ipsa, aut a judicio intellectus ut a conditione quadam determinetur; ac si quæ sit difficultas superanda, ea potissimum in organis posita est. Atque ut ex repetitis
acti-

actibus quædam sit affectio, aut propensio in voluntate, quæ inclinationes ab Authore naturæ impressas determinet, illa tamen affectio aut inclinatio, aut pondus non est quiddam ab anima aut voluntate distinctum, nisi fortè modificatio quædam.

Confirm. Idcirco in appetitu irrationali nullus vulgo habitus reponitur, quod satis ab objecto aut a cognitione, aut aliis ex causis determinetur: quantumvis negare non possimus quin bruta usu & industria magna acquirant ad certas res faciendas facilitatem: ergo nihil est causæ cur habitus in voluntate ipsa, tanquam distinctas qualitates statuamus: cum ab intellectu & usu satis sit determinata; neque illa facilitas aliud quiddam sit nisi usus & exercitatio, aut certè affectio quædam usu comparata.

Satisfit objectionibus.

Quæ contra opponi possunt, facilius dissolves, si adverteris 1. habitus intellectuales dici, quod mentis imperio subjaceant. Nam spiritus in cerebro huc illuc fluctuant atque eorum motu phantasia, ut torrente quodam abripitur: ut inter somniandum evenit, & quandoque etiam cum vigilamus, ac vis imaginatrix sibi permittitur. Sed cum aliquid cum attentione est agendum: ut cum oratio aliqua est recitanda ex ordine, mens ipsa imaginationem intra præscriptos fines coercet: tum enim non solum invenit quod dicat, sed id expendit:

dit: & quod invenerit, prudenter collocat: cumque phantasia evagatur, mens eam ad officium revocat.

Unde habitus illi intellectuales dicuntur quoddam a mente regantur: non aliter ac memoria, quæ nihil ferè est præter habitum, ad intellectum pertinet: cum species ab ea reposcat intellectus, & illius jussu sese offerant, eo quidem ordine quo opus est. Nam mens eas seligit, quibus indiget; reliquas quæ turmatim irrumpunt, abigit. Cum autem in rei ipsius memoriam, cujus obliti eramus, deducimur, idque fit ratiocinatione quadam, & quasi gradatim, atque ex mentis ipsius imperio, tum reminiscentiâ dicitur, quæ homini propria est, ac ne vix quidem ab intellectuali habitu potest separari. Et certè eadem est utriusque ratio, & unum ex altero facilè explicatur. Unde ut in bestiis reminiscentiâ nulla est, ita nec habitus propriè dictus. Nam eæ quidem meminerunt, cum phantasmata eo ferè ordine, quo subierunt, connexa solent recurrere: at se meminisse nec percipiunt, nec quæ sibi opus sunt, rejectis aliis eligunt, nec quærunt abdita, aut inventa recognoscunt.

2. Habitus nomine eam facilitatem intelligimus de rebus jam ante perceptis cogitandi, aut iterum eas efficiendi, quas effecimus. Illa facilitas cogitandi præcipuè in vestigiis cerebro impressis, quibus certæ addictæ sunt perceptiones, constituitur. Nam ut rami identidem inflexi, faciliùs in easdem partes flectuntur: ita ferè cerebri fibrillæ spirituum agitatione,

aut

aut objectorum impulsu certo modo affectæ, easdem impressiones facilius excipiunt. Unde rerum omnium non eadem facilitate recordamur : sed quæ per sensus subiere, altiores plagas solent cerebro insigere ; & quod sæpius rei imaginem oculis hausimus, hoc tenaciùs cerebro inhæret. Sic habitus corporei acquiruntur, cum ex imaginibus rerum conceptis spiritus in cerebro copiosi in certas corporis partes diriguntur, quæ magna celeritate in nervos & musculos feruntur : idque tanta facilitate, ut vix concipere animo possimus, qua celeritate in unius vocis pronunciatione tot muscoli in diversas partes moveantur, hoc utique usus efficit, dum spiritus sæpius commeantes viam sibi expeditam aperiunt. His itaque explicatis.

Opp. 1. Si habitus nihil sunt præter trita in cerebro vestigia, aut spirituum in certas partes ex usu & assuetudine commeatus, nulli erunt habitus intellectuales : sed omnes ad corpus ipsum referentur : sic nulla erit scientia, aut prudentia, nulla virtus in anima : quæ omnino videntur absurda.

R. neg. ant. Habitus enim intellectuales ii dicuntur, quibus mens utitur, quique ejus subduntur imperio, quales in homine, non item in brutis esse ostendimus. Ac præterea motus illi spirituum certas perceptiones habent adjunctas : adeo ut ex habitu mens faciliùs & distinctiùs percipiat. Utrum verò in anima ipsa species quædam, aut impressiones ex perceptionibus remaneant, non est hujus loci diligentius

tiùs inquirere : sed cum eæ vix intelligi vel explicari possint; neque ullo experimento, vel ratione demonstrari, expunctis speciebus in cerebro, aut in parte sentiente, species quasdam in mente esse superstites; id videtur rationi magis consentaneum, habituum naturam ex iis quæ novimus, quàm ex abditis, nec satis perspectis speciebus, vel impressis, vel expressis repetere. Tametsi non negamus quin possint in mente nostra quædam affectiones, aut species remanere: sed si eas adhibeamus species ut naturam habituum explicemus, metuendum nobis est ne rem satis perspicuam per incerta quædam & obscura tentemus explanare.

Urgent. Species illæ aut in cerebro, aut in mente ipsa impressæ habitus esse non possunt, cum habitus ex repetitis actibus generentur: illa verò impressa cerebro vestigia cogitationes nostras anteverunt Deinde habitus ad potentiam pertinet, quam juvat, & ad agendum determinat: species verò illæ ab objectis fluunt, & ad ea pertinent. Unde species expressæ quas cogitando exprimimus, quæque in intellectu sunt superstites, magis habitus dici debent, quàm obscura cerebro inusta vestigia, aut species menti infixæ,

Resp. Non sola vestigia cerebri, sed ea trita & ex repetitis actibus inculcata, habitus vocari: cum intellectum ad cogitandum excitent, & objecta ipsa cum facultate jungant, & sistant. Habitus nomine intelligimus quid fixum & constans, firmam nimirum facilitatem, quæ vix alibi inveniri potest, quàm in ipso vis imagina-

tri-

trici organo. Si quid autem menti ipsi imprimitur, id fortè non est imago rei corporeæ: sed res ipsa spiritalis, ut numerorum dimensionumque rationes, & leges innumerabiles, *quarum*, inquit August. *nullam corporis sensus impressit, quia nec ipsæ coloratæ sunt, aut sonant, aut olent, aut gustatæ, aut contrectatæ sunt. Nec imagines earum rerum reconditæ sunt in memoria, sed res ipsæ, cum eas nos intellexisse meminimus. Nam ipsa cogitatio, ut idem explicat lib. 12. de Trin. transiens per disciplinas, quibus eruditur animus, memoriæ commendatur, ut sit quò redire possit, quæ cogitur inde transire: quamvis si ad memoriam cogitatio non rediret, atque quod commendaverat, non inveniret, id inquit, inveniret, ubi primum invenerat: in illa scilicet incorporea veritate, unde rursus quasi descriptum in memoria figeretur. Ac videtur ille quandam in mente memoriam rerum intelligibilium, ut affectionum nostrarum & cogitationum reponere: ubi non tam rerum imagines, quàm res ipsæ reconduntur. Verùm hoc loco habitus ex rerum corporearum cognitione acquisitos persequimur, eosque in substantia cerebri potissimum vigere contendimus, & cum memoria penè confundimus. Unde nihil æquè vel augetur cura, vel negligentia intercidit. Memoria autem de qua nunc loquimur, posita est in quadam necessitudine cogitationis, & motus qui fit in cerebro: adeo ut motu illo renovato, cogitatio quoque rei renovetur, & vicissim.*

Opp. 2. Habitus infusi sunt qualitates absolutæ quæ in mente ipsa hærent: ergo
& ha-

& habitus acquisiti erunt itidem qualitates exercitatione & studio comparatæ.

R. N. consequentiam & paritatem. Non enim habitus infusi per actus repetitos acquiruntur: sed a Deo repente infunduntur, ut novum esse, & quasi lumen animæ impertiant. Neque etiam sic potentiam adjuvant, ut dent aliquam agendi facilitatem: sed ad agendum absolutè requiruntur ac similes sunt potentiis, quæ, ut loquuntur dant simpliciter posse. Habitus verò naturales ex actibus repetitis gignuntur, ac facilitas illa acquisita non est in solo intellectu, qui abunde ex sua natura instructus est ut intelligat; neque per ipsum fiat quominus id fiat: sed vel defunt phantasmata, vel ea sunt admodum imperfecta. Itaque omnis ferè facilitas in eo posita est, ut Instrumentum animi rectè præparetur, quo is promptè & expeditè agat: domanda est cerebri quædam velut rigiditas, vestigia rerum aptè sunt disponenda, exercitatio adhibenda, ut spiritus cerebri fibrillas velut clavecymbali fides liberè & expeditè pulsent.

Sed, *inquiunt*, habitus intellectuales sunt planè spirituales: ergo non sunt species in organo imaginationis superstites, aut trita in cerebro vestigia.

Resp. habitus esse spirituales, quoad usum. *G.* nam iis mens utitur ad intelligendum: quoad entitatem, *N.* nisi eo quo diximus modo, nempe ut affectiones quasdam aut modificationes animæ intelligentis. Itaque ab iis determinatur, ut percipiat, & intelligat.

Instant. Producentur ii habitus per actus spirituales: ergo sunt itidem spirituales.

Resp. Habitus intellectuales produci per actus intellectus, non primario, & per se sed ex occasione: quatenus mentis cogitationes consequuntur certi spirituum motus, & cerebri impressiones.

Urgent. Nulla in cerebra facta impressio exhibere potest res a materia secretas.

Resp. Has species cerebro impressas per se quidem non exhibere res spirituales; sed tantum per accidens: quatenus præbent occasionem intellectui cogitandi de iis quæ sunt a materia separata: quemadmodum & voces, quæ nullam habent cum rebus ipsius similitudinem.

Q U Æ S T I O I I I .

De causis habituum.

CIrca habituum causas quæstiones aliquot movere solent, quæ in nostra sententia solutu sunt faciliores, quòd habitus acquisitos non esse qualitates a facultatibus distinctas penè a nobis confectum sit, & probatum. Nam ex dictis liquet habituum causas effectrices esse tum objecta, quæ species imprimunt; tum facultates ipsas, quæ per crebras operationes facilitatem illam acquirunt; tum actus ipsos sæpiùs repetitos, ex quibus consimiles habitus generantur. Huc etiam pertinent spirituum vis & mobilitas necnon cerebri temperies. Nam ut imaginis in cupro cælatura ex duobus potissimum pendet, tum
ex

ex materia ipsa quæ docilis quodammodo esse debet, & impressu facilis: tum ex cælo quod firmum & acutum lineas altius imprimit: sic ferè habitus, quatenus sunt rerum vestigia certo ordine disposita, substantiam postulant cerebri docilem, non crassio rem, non molliorem quàm par sit, spiritus uberes & vegetos qui has sculpant imagines. Accedunt etiam ex parte animi attentio, seu studium acre, & magna voluntatis propensio: quæ si desint, vix distincta rerum vestigia cerebro inurentur.

Hæc fortè utilius foret persequi quàm, tot movere quæstiunculas, quæ subtilitatis multum videntur habere, soliditatis parum; eas tamen, ne quid videamur omittere, summatim attingemus.

Querunt 1. An facultas sit effectrix causa & proxima habitus, an potius actus ipse identidem repetitus.

Resp. facultatem per actus suos habitum procreare: nam agere est facultatis: actus verò est modus quidam quo facultas operatur, isque vel *in fieri* spectari potest, tumque non tam est causa, quàm via quædam ad effectum, vel *in facto esse*, atque ut loquuntur, terminativè, tumque ut qualitas, quæ subjectum tale denominat, concipitur. Quamvis una & eadem sit entitas, quæ ut actio, est fluxus quidam, aut motio; ut terminus, actus vocitatur. Sic volitio, ut est *in fieri*, actionis nomen retinet, ut est *in facto esse*, & completa, quasi forma quædam concipitur, aut qualitas, quæ non activè modo, sed etiam formaliter denominat volentem: actus hoc mo-

do spectati sunt causæ effectrices habituum.

Opp. Influxus, vel ut loquuntur, causalitas non est causa ipsa: sed actus est influxus causæ efficientis: ergo non est effectrix causa habitus.

Resp. Dist. min. Cum actus sumitur pro actione & in fieri, C. cum sumitur in facto esse, & vim habet qualitatis, N. Quamvis una & eadem sit entitas quæ actio & actus nominatur.

Querunt 2. An habitus per primum actum acquiratur.

Qui habitum esse qualitatem facultati adventitiam putant, ii satis aptè solent distinguere substantiam, vel essentiam habitus ab illius statu, vel perfectione. Cum enim habitus sit facilitas quædam, hæc primo actu licet admodum remissa & debilis producitur: sed quoad statum, non nisi iteratis actibus acquiritur.

Cum autem habitus ex sententia nostra nihil sit nisi firma quædam facilitas, quæ non uno, nisi fortè admodum intenso, sed multis & repetitis actibus comparatur, palam est constantem illam, & altè infixam affectionem, non primo actui imprimi: ut nec rotæ, aut machinæ recentes statim ea facilitate torquentur, quam usu tandem & longo attritu assequuntur. Ita ferè cum spiritus in cerebro motus iis con-
similes, quos imprimunt objecta, effecer-
re, & certos meatus sibi aptaverunt, manet dispositio quædam & facilitas ad eisdem motus, & similia vestigia iteranda. Nam unus actus ad alium quasi viam mu-
nit,

nit, tumque per apertos meatus, & tritas semitas spiritus longè faciliùs excurrunt. Quod utique non uno, sed multiplici motu, & sæpiùs iterato perficitur.

Ac firma illa & constans facilitas citiùs acquiritur, cum cerebri fibrillæ molles sunt & plicatiles: tum enim quamlibet impressionem aut figuram faciliè excipiunt. Quodd si tamen cerebrum mollius sit, ut in ipsis infantibus accidit, vestigia faciliè impressa citiùs expunguntur. At si crassiores sint fibræ, aut rigidiores, aut alienis humoribus obstructæ, tum ad motum minùs sunt expeditæ. Quare ut habitus faciliè comparentur, fibræ sint tenues, flexibiles, & liberæ. Non ea sit tenuitas quæ citiùs frangatur; tenacitatem quandam habeant, quo impressa vestigia diutiùs conservent: nec tamen tanta sit, quæ motum prohibeat. Quo major erit tenacitas, hoc major adhibenda erit animi contentio, ut rei imago vel imprimatur, vel cum opus est, eruatur: qui enim molles habent cerebri fibræ, citò discunt, sed citiùs oblivisci solent. Contra qui tenacioribus præditi sunt, firmam habent memoriâ, non facilem; si molles sint & tenaces, sed minùs subtiles, tardiorém efficiunt memoriâ, non celerem; nec quæ reposituræ imagines, ea faciliè exhibet: nos autem vix habitus a memoriâ sejungimus.

De subiecto habituum.

Qui habitus acquisitos esse qualitates phyficas putant; ii ferè in voluntate, intellectu, imaginatione, & appetitu sentiente eos constituunt: quòd eas vires juvare possint ad agendum, idque directè & per se, non tantùm per accidens, quatenùs remonentur obices, aut organa rectè disponuntur.

Nos verò qui habitus nihil ferè esse arbitramur nisi affectiones in organo imaginationis superstites, ac velut species rerum impressas, quæ usu & exercitio sunt comparatæ, nullam in appetitu rationali, aut sentiente aliam qualitatem admitti oportere contendimus. Nam voluntas aut a se ipsa, aut ab intellectu satis determinatur. In brutis quoque sentiens appetitus satis aliundè determinatur: adeò ut nihil necesse sit in iis novas qualitates, quæ habitus dicantur, comminisci: tametsi negare non possumus, quin usu & disciplina quadam, ut ita dicam, novam agendi facilitatem acquirant. Quod utique cum de brutis fateantur plerique Philosophi, non video cur in parte hominis bruta, seu in appetitu sentiente novas qualitates præter facilitatem usu & exercitio comparatam agnoscant. Est enim, ut ait Cicero, habitus, animi aut corporis constans & absoluta aliqua in re perfectio.

Illam autem facilitas in eo maximè posita est, ut organum vis imaginatriçis sit aptè dispositum: nempe ut meatus aperti

sint & liberi, quo spiritus in iis facile moveantur : atque ut in iis suorum motuum certa relinquant vestigia, quibus regi possit imaginatio, cum alios consimiles motus exercet. Idque non aliter ferè evenit, atque in ipsa lingua, cum peregrinas voces formare discit. Primùm enim si calculum, aut quid aliud ore gerimus, quod liberum linguæ motum impediat, palam est nos vix posse ullam vocem exprimere. Deinde usu & exercitatione lingua, & aliæ partes quæ locutioni inserviunt, sic aptantur, ut consimiles postea motus & voces promptè facile exprimant : quod utique fieri non posset, nisi eorum qui præcesserunt motuum, quædam remanerent vestigia, quæ nihil sunt vel in lingua, vel in cerebro nisi apta partium secundum situm & figuram dispositio, quam utique motus præcedentes induxerunt.

Undè cum celeres sunt phantasiæ conceptus, sæpè lingua hæret, aut titubat: vel quod aliqui ex musculis, qui ad formandam vocem conspirant, tardiùs moveantur, nec vim concitatam imaginationis sequi possint: vel quòd vis imaginatrix in formandis imaginibus nimium occupata, eos motus negligat, qui ad vocis organa sunt necessarii. Sæpè laxiores sunt pori, aut meatus musculorum, in quos spiritus a concitatione phantasia missi cum impetu sese mutuo impediunt; aut contrà si sint meatus angustiores, spiritus satis copiosos non admittunt: unde vox titubat. Utcunque ea res sit, quo utique modo in organo imaginationis tot diversi motus formari possint,

sint, satis aptè ex lingua ipsa, aut ex manu possumus conjicere. Nam si lingua tam variis motibus agitetur, ut conceptus nostros voce exprimat, uti manus scriptura: multò potiori jure tot diversa, quæ incurrunct objecta, infinitis propè motibus in ipso imaginationis organo exprimentur: id enim est instar linguæ interioris, cujus motus voce, aut sermone explicantur. Atque ut motus & conceptus vis imaginatricis sunt signa rerum objectarum, sic voces ore formatæ, aut exaratae ipsius imaginationis motus exhibent, & in iis organis ea facilitas consimili modo comparatur.

Quanta verò sit hujus facilitatis vis, vel hinc discimus, quòd cum voces ex instituto hominum & arbitrio significant, atque ex natura sua nihil præter sonos menti repræsentent, tantum nihilominus valuit consuetudo, vel exercitatio, ut mens non ad varios syllabarum sonos, non ad characterum figuras, sed magis ad res ipsas soleat attendere. Sic ubi loqui volumus, linguæ, labiorum, & aliarum partium musculos longè majore celeritate contrahimus, ubi ad intellectum vocum, & significationem ipsam mens intenditur, quàm si varietatem sonorum sigillatim expenderet. Quod de lingua diximus, id de cæteris organis, quæ vi motrici inserviunt, intelligendum est: nam in iis non nova qualitas, vel habitus, sed facilitas tantum usu acquiritur: quatenus exercitatione liber & expeditus est spirituum motus, & sic aptantur quoad situm & figuram musculi, ut prioribus consimiles motus facile exerant.

Q U Æ S T I O I V.

Habituum proprietates explicantur.

PRæcipuæ habituum affectiones sunt intensio, remissio, & corruptio : quæ sanè vix explicari possunt, si habitus qualitates physicas ab ipsis facultatibus realiter distinctas statuamus. Cum enim circa augmentum qualitatum duæ sint in Scholis multum jactatæ opiniones: una eorum qui qualitates augeri putant, dum novus gradus priori accedit: ut dum calor novi caloris accessione crescit; altera Thomistarum, qui calorem & qualitatem omnem intendi putant, cum eadem entitas, quæ initio producta fuit, altiùs in subiecto infigitur, atque, ut ajunt, magis radicatur: utraqûe sententia graves patitur difficultates, ut suo loco ostendemus. Neutro autem modo augeri habitus, hoc loco probandum est: tum qua ratione intendi soleant, aut minui, aperiendum. Sit igitur

Prima Conclusio.

Si qui sint habitus acquisiti in intellectu, ii non intenduntur per majorem in subiecto radicationem, aut per graduum additionem, sed per species magis claras & distinctas.

Prob. & simul explic. concl. Qualitatis spirita-

ritalisquæ est omninò indivisibilis, quæque recipitur in subjecto itidem indivisibili & incorporeo, non potest ab eo magis & magis participari, aut in eo radicari, nam secundum id omne quod habet, in subjecto recipitur, cum nullas habeat partes. Atqui si sint habitus acquisiti in ipso intellectu, ii sunt indivisibiles, uti & earum subjectum: ergo habitus non possunt altiùs in eo infigi: ut radices arboris nisi & suam longitudinem, & terra suam quoque habeat profunditatem, non possunt altiùs terram subire, aut magis radicari.

Sed neque habitus intellectualis per additionem gradus ad gradum, seu per novarum specierum additionem intendi potest. Quantumvis enim species, aut rei imagines addantur, si confusæ sint & imperfectæ extendetur quidem habitus, seu cognitio rei acquisita: sed intendi; aut perfici non poterit, donec species aliqua clara & distincta supervenerit: hæc enim omnem secum afferet perfectionem. Illæ autem species erunt perfectiores, & habitum intensiorem simul & magis extensum procreabunt, cum rem ipsam omni ex parte exhibebunt; tum enim ad assentiendum mentem inflectent, cum ea rem omni ex parte conspexerit.

Opp. Habitùs infusos secundum se augeri & intendi: ergo multò potiori jure habitus acquisitos secundum suam entitatem augeri posse: sive per additionem gradus ad gradum.

Resp. Neg. ant. Neque enim ulla mentis

agitatione concipimus , quò fieri possit ut eadem entitas indivisibilis intrinsecè augeri possit . Itaque habitus infusus , ut charitas , augetur ferè ut anima rationalis , quæ eadem manens secundùm entitatem , unà cum corpore perfici & crescere videtur . Nam ubi organa sunt meliùs disposita , actiones suas perfectiùs exerit : ita ferè gratia aut charitas crescit , cum ex actibus repetitis meliùs anima disponitur , & major facilitas acquiritur . Hinc cupiditas plus plusque minuitur & superatur . Verùm ista ad Theologos , quæ in nostra sententia non minùs commodè explicantur , quàm si additionem illam novæ entitatis admittamus . Actus enim voluntatis aut naturales , aut infusi non fiunt citra cognitionem , quæ ex repetitis actibus augetur & roboratur : species divinitùs impressæ sanctas cogitationes efficiunt , quas voluntatis affectus aut propensiones consequuntur : ac voluntas etiam certa quadam ratione divinitùs afficitur , & movetur .

Secunda Conclusio .

Habitus intellectuales augentur cùm phantasmata in ipsa imaginatione , aut impressa ab objectis in cerebro vestigia clario-
ra sunt , distinctiora , meliùs disposita ; cùm spiritus liberè commeant , agiles sunt , & cerebri substantiæ attemperati ; cum denique acrem adhibemus attentionem , & cætera adsunt tum ex parte intellectus , tum ex parte organi , ac potissimum usus & exercitatio .

Hæc

Hæc conclusio cum ex his quæ in hac disputatione de natura habituum diximus, tum etiam ex iis quæ in Logica sunt demonstrata, facile colligitur. Illud enim identidem monuimus, eam esse legem ab Authore naturæ inter corpus & mentem, constitutam, ut certos corporis motus quædam perceptiones consequantur, ac vicissim. Nam omnis ferè perceptionis initium ab affectione in sensus organo impressa ducitur. Est autem sensus cum motu fibrarum, quæ substantiam cerebri pertexunt, ita conjunctus, ut magnus fibrarum motus sensum vegetum, languidior motus sensum debiliorem efficiat. Quæ autem sensus attingit, eadem mens statim cognoscit; quæ confusè & imperfectè sensum afficiunt, eadem mens confusa quoque cognitione percipit: quæ distinctè & validius sensum interiorem commovent, hæc mens distinctè magis & clarè percipit.

Sed tamen inter sensum & mentem hoc videtur esse discriminis, quodd sensus ab ipsa affectione organi, quam alii speciem vocant, affectio verò ab objecto determinetur; nec possit ullo modo sensus ab ipsa affectione organi confusa ad distinctam progredi: mens verò hanc habet prærogativam, ut ex confusa perceptione ad claram & distinctam sese promoveat, tumque distincta in organo imaginationis vestigia, aut phantasmata imprimit. Nam mentis & sensus indivulsæ sunt functiones. Ex quibus efficitur, habitus penè omnes in organo imaginationis potissimum inesse: sed usum eorum ad mentem pertinere. Nam a confuso

sensu mens in confusam primùm , tum in distinctam rei cognitionem ducitur : ex qua major in cerebro motus , & fortior rei imaginatio subindè oritur. Undè & faciliùs ratiocinatur qui plura rerum simulacra , aut phantasmata cerebro habet impressa : citiùs enim invenit quod quærit ; plura confuse cognoscit , ex quibus distinctam adipisci cognitionem faciliùs potest .

Solvuntur objectiones .

Opp. r. Habitus sunt in ea facultate , cui facilitatem præbent , & augentur per actus illius facultatis repetitos : ergo habitus intellectuales intenduntur per actus intellectus, quibus species altiùs in mente ipsa imprimuntur , non per clariora aut distinctiora phantasmata, quæ sunt extra intellectum posita .

Resp. Neg. ant. Nam prudentia quæ voluntatem regit , & artes omnes vulgò in ipso intellectu collocantur : tametsi vires subjectas perficiunt . Itaque cum vires ita sunt inter se connexæ , ut simul eas agere necesse sit , (ut mens cum imaginatrice est conjuncta ,) habitum præcipuè in altera ex iis potentiis inesse satis fuerit . Cùm enim cerebri vestigia sunt distincta , non confusa , si mens ad ea diligentius attendat , distinctas perceptiones formabit, ex quibus & clara judicia efficientur : tum enim rectè judicamus , cum res ipsas distinctè percipimus , & unius rei ad alteram habitudinem perspectam habemus & exploratam : quod utique non per sola phantasmata , sed fortè
per

per lucem ipsius veritatis consequimur eo modo quo suo loco exposuimus. Neque id negamus mentem humanam per habitus intellectuales certa ratione affici: sed eam affectionem esse quandam entitatem ab animo distinctam, non facile concedimus: tamen in hoc quoque nimium pertinaces esse nolumus.

Opp. 2. Multa intelligimus, quæ in imaginationem non cadunt: ergo dum eorum reminiscimur, non vestigia solum cerebro impressa, sed species aut impressas, aut expressas, seu ex iteratis perceptionibus superstitibus consulimus; quæ quod plures fuerint, & altius menti infixæ, hoc utique habitus major, tum extensione, tum intensione futurus est: adeo ut nihil necesse sit ad phantasmata confugere.

Resp. Neg. conf. Nam ita vis imaginatrix cum intellectu cohæret, ut una feriri non possit, dum altera occupatur. Sic alibi diximus vocibus & signis omnibus certas ideas nos alligare, quæ ex lege ab Authore naturæ inter corpus & animam fancita simul cum opus est, sese intellectui sistunt: adeo ut mens ita phantasiæ sit illigata, ut seorsum agere vix possit. Sed tamen ita est sui juris, ut eas reposcat species, quæ ipsi opus sunt, & alias quæ sæpè intercurrent, amoveat, agitationem spirituum & fluxum coerceat; imaginationem aliò excurrentem revocet, & jubeat phantasiam eo ordine, quo opus est, imaginari; species penè oblitteratas, & altè sepultas ratiocinatione quadam, & per eas quibus cohærent, eruit, dum imperat

K 5 phan-

phantasiæ , ut eas sequatur specierum series , quæ cum re quæsitâ connectuntur , & quasi gradatim ad illius recordationem nos ducunt : quod propriè est reminisci . Quare habitus illi aut species ad mentem pertinent ; quamvis fortè in sola phantasia insint superstites ; quod mens iis utatur , cum libuerit , & phantasiâ ad arbitrium regat . Quæ enim sunt in cerebro impressa , ea contuetur .

Tertia Conclusio .

Habitus augentur per actus repetitos , etiamsi ii sint remissiores .

Prob. concl. Habitus est facilitas quædam , quæ usu & exercitatione acquiritur : sed facilitas illa crescit ex actibus repetitis , etiamsi minore contentione fiant : quod fibras cerebri quasi dociliores , & magis plicatiles efficiant ; motum spirituum in certis partes determinent ; vestigia cerebro impressa foveant ; impedimenta & obices in lingua , manu , & in aliis organis tollant . Sic pueri multa discunt , licèt ii nullam ferè attentionem adhibeant .

Quòd si habitus qualitates esse quasdam physicas , quæ facultatibus succrescerent , statueremus , fortè major nos maneret difficultas in explicandis eorum augmentis : sed cum ii nobis non aliud penè videantur esse quàm vestigia cerebro impressa , & spirituum in certas partes fluxus , cum remotione eorum quæ obstatè possunt , non video cur actus identidem repetiti etiam remissiores habitum intensiorem efficere non poss-

possint : uti & rota per crebras revolutiones sic teritur , & lævigatur , ut majore facilitate moveatur .

Sed, *inquiunt* , omne agens fortius esse debet eo in quod agit: ergo actus remissior non potest habitum augere .

Resp. 1. negari posse antecedens . Non enim agens omne resistantiam offendit in subiecto in quod vim suam exerit , uti de lumine manifestum est .

Resp. 2. Minorem esse resistantiam , quod major est habitus : undè actus repetiti licet debiliores, maximè si diu perseverent habitum ipsum foveant , & roborant ; ut experientia liquet in iis qui fidibus sciunt : nam etiamsi non attendant animum , majorem in dies facilitatem acquirunt .

Quarta Conclusio .

Habitus minuuntur & corrumpuntur ob causas iis contrarias quibus augeri , aut procreari solent .

Prob. & explicatur conclusio . Habitus generantur , cum distincta in cerebro vestigia inuruntur ; cum spirituum motus tum in cerebro, tum in nervis & musculis promptè & expeditè perficitur ; cum musculi usu flectuntur, certa ratione modificantur; eaque omnia exercitatione firmanantur : ergo tum corrumpuntur aut minuuntur habitus, cum cerebri vestigia oblitterantur , aut confunduntur , aut eorum series perturbatur: cum spiritus aliò divertunt; iique fiunt aut crassiores, aut hebetiores, aut parciores ; cum peregrini humores cerebri mea-

tus occludunt, cùm exercitationis defectu musculi torpent.

Sed, *inquires*, habitus acquisiti, si qui sint in intellectu, nullo ex iis modo corrumpi possunt. Nam subjectum non corrumpitur; non deest influxus causæ conservantis, cum a Deo solo conservari possint; restat ergo ut a contrariis tantùm habitibus destruantur. Sed quid contrarium esse potest speciei impressæ, aut expressæ? iudicia quidem iudiciis adversantur, error veritati; sed nihil simplici perceptioni opponitur.

Resp. Hoc quidem argumento jam penè a nobis superius esse confectum, habitus acquisitos in mente nostra, ut in subjecto non inesse, eo saltem modo quo vulgò existimant: cùm nulla ratione, nullove experimento probari possit species in mente superesse, quando eæ in parte sentiente, seu in ipsa imaginatione penitus sunt deletæ.

Si quis tamen pertendat rerum saltem intelligibilium imagines & habitus in ipso intellectu remanere: cum actionum nostrarum, affectionum, & cogitationum meminerimus, quarum nulla sunt phantasmata: hic respondere argumento proposito utcunque poterit, manere habitus eorum quæ oblivione penitus sepulta sunt, quoad eorum essentiam, non quoad usum & exercitium. Cùm autem vix animo consequi possimus, qui maneant in mente rerum imagines impressæ, eique semper insint præsentēs, tametsi eas non percipit; ac multæ & penè

penè ineluctabiles difficultates ex iis speciebus emergant, quas suo loco prosequimur, tutius fortè & faciliùs fuerit; rerum sensibilium imagines, aut vestigia in cerebro inusta concipere, cum quibus junctæ sunt mentis perceptiones, eo quo sæpiùs diximus modo. Sequitur ut morales habitus explicemus.

DISPUTATIO IV.

De virtutibus, & vitiis generatim.

DE virtutibus & vitiis cum universum tum sigillatim dicendum. Ac de virtute quidem primùm quid ea sit; tum quæ illius causæ; deinde quæ illius proprietates; postremò quæ illius sint partes, aut species, paulò diligentius inquiremus.

Q U Æ S T I O I.

In quo posita sit virtutis natura.

PLures circumferuntur hujus vocis acceptiones; quas libenter omittimus, quòd ad nostrum non pertineant institutum. Hoc enim loco nec vim naturalem, aut facultatem congenitam, nec bellicam fortitudinem, nec quamlibet perfectionem, sed eam quæ studio & exercitatione comparatur, quæque, ut Aristoteles definit, *bonum facit habentem, & opus ejus bonum reddit*, hoc nomine intelligimus.

I. Tria sunt in animo, ut optimè idem Aristoteles observat: facultates, habitus,

tus, & affectiones. Facultas est a natura insita, ut vis irascendi, affectiones sunt actiones ipsæ, ut irascendi, aut amandi: habitus verò ii dicuntur, quibus circa affectiones benè aut malè sumus comparati. Sic invidi & malevoli, & timidi dicuntur, qui proclives sunt ad eas perturbationes: non quia semper in eas feruntur, sed quia sæpè. Illa igitur facilitas ad bonum, aut proclivitas ad malum, si usu & exercitatione sit acquisita, virtus dicitur, aut virtuositas.

Hinc virtus satis aptè a M. Tullio describitur, *affectio animi constans conveniensque, laudabiles efficiens eos in quibus est. Ex virtute enim, inquit, proficiuntur honestæ voluntates, sententiæ, actiones, omnisque rectitudo: quanquam ipsa virtus brevissimè recta ratio dici potest.*

2. Ex iis liquet aut virtutem omnem prudentia contineri, ut visum est Socrati, aut certè cum prudentia esse conjunctam, ut Aristoteles ipse declarat. Tametsi enim prudentia inter virtutes intellectuales, quæ scilicet rationem perficiunt, & ad verum spectant, numeratur: ea tamen sic ad virtutes morales pertinet, quæ scilicet appetitum perficiunt, & in bonum tendunt, ut prudentia destitutæ virtutes dici non possint. Undè virtus moralis ab Aristotele definitur, *habitus electivus in ea mediocritate, quæ est ad nos, consistens, à ratione definita, prout vir prudens definierit.*

Dicitur habitus, quòd sit constans, & benè agendo confirmetur: nam qui ex virtute agit, non temerè, non desultoriè, non
simu-

simulatè, non casu & fortuitò: sed consilio & constanter, & spontè agit. Est etiam habitus electivus: atque in hoc ab iis qui intellectuales dicuntur, & ab aliis; si qui sint, virtus moralis sejungitur: ad eam enim spectat, ut voluntariè, liberè, & ex electione operemur. Quod addit de mediocritate quoad nos, quæque a prudentia definitur, infrà fusiùs explicabitur. Interim admonemus duplex in materia virtuti subiecta medium ab eodem Philosopho assignari: unum rei, quod ab extremis æqualiter distat, idque vocat Arithmeticum; ut Geometricum illud est, quod a ratione præscribitur: nempè quo tempore, & quibus in rebus oportet; idque maximè in affectionibus animi: ut timere, irasci, cupere, ubi & quantum opus est. Atque hoc præcipuum est virtutis opus, adhibere hanc mediocritatem a ratione definitam.

3. Huc etiam pertinet virtutis definitio, quam Plato effert lib.4. de repub. Quod nimirum *sit animi sanitas, pulchritudo & robur. Ut vitium morbus est animi, turpitudine & imbecillitas.* (Lib.4. Tusc. 9.) Nam id proprium est virtutis moralis, ut hominem reddat bonum, ejus animum exornet, actiones perficiat, atque ad finem idoneum dirigat. Undè ea est sanitas, decor, & robur animi. Nam ut optima est corporis temperatio, cùm ea congruunt inter se, ex quibus constamus; sic, inquit Cicero, sanitas animi dicitur, cùm ejus judicia & opiniones concordant: Et ut corporis est quædam apta figura membrorum cum coloris quædam suavitate, eaque dicitur pulchritudo: sic

fic in anima opinionum judiciorumque æquabilitas & constantia cum firmitate quadam & stabilitate virtutem subsequens, aut virtutis vim ipsam continens, pulchritudo vocatur . Itaque viribus corporis & nervis , & efficacitati similes similibus quoque verbis animi vires nominantur .

Hinc ab Augustino l. de quantitate animæ , virtus describitur *æqualitas quadam vita rationi undique consentientis*. Cujus enim, inquit, *vita per omnia congruit veritati, is est perfectò qui solus, vel certè maximè, qui bonè, atque bonèssè vivit*. Undè & illud Horatii laudat, ubi de sapiente agit,

Fortis & in seipso totus teres, atque rotundus.

Postremò solennis est virtutis definitio, quæ a Sancto Augustino affertur : (*Lib. 2. de lib. arb.*) quanquam ea propriè est infusæ virtutis explicatio . Est , inquit , *bona qualitas mentis, qua rectè vivitur, & qua nullus malè utitur, & quam Deus in nobis sine nobis operatur*. Quòd si hæc ultima verba detraxeris, hæc definitio, ut observat S. Thom. virtutes acquisitas complectetur.

Verùm hîc magna inter S. Thomæ & Scoti discipulos orta est quæstio, an virtute quis abuti possit. Thomistæ enim contendunt virtutem esse habitum essentialiter bonum, qui ex bono fieri malus nunquam potest; adeò ut visio habituum moralium in bonos & malos sit generis in suas species, ut numeri in parem & imparem; animalis in rationale & irrationale: atque ut numerus par fieri impar nequit, ita nec virtus in vitium mutari. Contra Scotus, qui quæ
eum

eum sequuntur, hanc divisionem esse subiecti in accidentia, ut corporis in album & nigrum; atque adeò posse eundem habitum ex bono in malum degenerare putant. Nos distinctionem adhibendam esse arbitramur. Sit itaque

Unica Conclusio.

Virtus est habitus essentialiter bonus, quo nemo per se abuti potest, sed tantum ex accidenti.

Prob. & explicatur prima pars conclusionis. Habitus per se & ex natura sua inclinatur ad actus similes, quibus fuit comparatus: sed virtus per actus bonos & sæpius repetitos fuit acquisita: ergo ex natura sua ad bonos actus tendit: nam & bonum reddit habentem, & actiones ejus bonas efficit.

Confirm. Virtus omnis ex natura sua nititur in honestum, quatenus honestum est: hoc enim illi est essentialiter: ergo virtus omnis est essentialiter bona, nec mala fieri ullo modo potest. Est enim illius obiectum bonum, quod speciem tribuit habitui; finis quoque est bonus, qui per se mutari non potest, aut in finem oppositum degenerare. Nam ut habitus discursivus ex certis principiis ducitur, sic electivus ex certo fine, tanquam ex principio ad media progreditur: ergo ut habitus discursivus non potest nos determinare ad assentiendum conclusioni per principia iis opposita, a quibus genitus fuit: sic habitus electivus per se ad electionem mediorum propter finem

finem ei oppositum, ex quo profluxit, voluntatem ipsam non potest inclinare.

Pars autem secunda conclusionis probatur : virtute enim quis per accidens abuti potest , non solum tanquam objecto , ut Pharisæus in Euangelio , sed etiam tanquam principio . Ea quippè constat ex certa ratione , quæ mediocritatem constituit , quaque nemo abuti potest , & ex facilitate , quæ usu comparatur . Hæc utique in pravum finem potest detorqueri . Nam ut Ethnicus qui habitum temperantiæ cum idolis serviret , acquisivit , si Christianus fiat , potest eam facilitatem in bonum usum convertere ; sic è diverso , si quis dum esset Christianus , virtutes coluit , factus Apostata , facile hos habitus antè laudabiles in vanam superstitionem pervertet . Simili ratione cum quis antè opulentus fuit liberalis , si facultates amittat , & adhuc quod superest largiùs velit effundere , qui prior fuit habitus laudabilis , vitio vertetur , idque per accidens .

Solvuntur objectiones .

Opp. Possumus malè uti iis omnibus quæ subduntur voluntatis imperio , ut organis corporis , disciplinis , artibus : sed virtus est habitus qui subest voluntatis imperio : ergo virtute malè uti possumus , neque ea est habitus essentialiter bonus .

Resp. I. Noseo omni quod subditur voluntati , malè uti posse tanquam occasione vel objecto , C. tanquam principio actus,

actus , N. potest enim quis superbire , aut gloriari de virtute ; sed non ager ex virtute .

Resp. 2. Nos malè uti posse ea facilitate , quæ iteratis actibus comparatur , quæque ab aliis habitus imperatus vulgò nominatur , C. recta ratione , quæ est potior pars virtutis , aut habitus imperans , N. Artes verò & disciplinæ , cum neque nos , neque actiones nostras efficiant bonas simpliciter , sed secundùm quid ; non mirum est , si iis malè uti possimus . At verò ut nemo sic abuti scientia potest , ut scientia ipsa inducat in errorem : sic nec virtus moralis ad actus pravos inclinare potest .

Opp. 2. Finis operantis , imò & circumstantiæ non sunt essentielles actui vel habitui , sed accidentariæ : ergo idem habitus & finem & circumstantias mutare potest ; atque ex bono fieri malus , eoque malè uti possumus .

Resp. dist. ant. Finis & circumstantiæ non sunt essentielles illi habitus parti quæ est facilitas acquisita , C. non sunt essentielles rectæ rationi , quæ circa honestatem versatur , & mediocritatem virtuti essentialem determinat , quæque est virtutis velut anima & pars illius potissima , N. Quare ut habitus virtutis circa objectum bonum essentialiter versatur , ita & circa finem honestum . Utrumque enim ad illius naturam pertinet .

Instant. Finis honestus est aliquid virtuti extrinsecum ; ergo virtus ratione finis non est habitus essentialiter bonus .

Resp.

Resp. Finem honestum ita esse virtuti extrinsecum, ut ordo ad finem honestum, & ad bonum objectum sit illi omnino essentialis.

Opp. 3. Habitus electivus ita voluntatis imperio subest, ut sit indifferens: sed virtus est habitus electivus, & tanquam voluntatis instrumentum, quo utitur, cum libet, & quomodo vult: ergo habitus ille est indifferens ut bonus sit, vel malus: quemadmodum & voluntas ipsa, ad quam ille habitus pertinet, cuique libertatem adimere virtus non potest.

Resp. Dist. maj. Habitus electivus est indifferens ad agendum, vel non agendum, seu indifferentia exercitii, C. indifferentia ad bonum & malum, seu quoad speciem, N. est etiam virtus instrumentum quoddam voluntatis, sed determinatum ad bene agendum, adeo ut ad malum flecti nullo modo possit. Est enim virtus ad bonum determinata, ut scientia ad veritatem: & quamvis ea per actus liberos acquiratur, tamen ubi iam est acquisita; non potest ad pravam usum converti.

Oppon. ultimd. Si aliquis dum Christianus esset, habitum iustitiæ vel temperantiæ acquisierit, adeo ut sit iudex optimus, aut temperans: is factus apostata utrumque habitum & temperantiæ & iustitiæ, imò & fortitudinis retinere potest: ita ut sit vir frugi & iudex factus suum cuique reddat.

Resp. Manere habitum iustitiæ sumptum pro facilitate acquisita, non verò eum manere, quatenus est recti ratio; quæque ad bonum finem semper dirigitur, aut quatenus

nus ex honesta ratione, seu, ut ajunt, motivo operatur.

Sed instant. acriùs. Ut facilitas quædam in appetitu sentiente remaneat, qua facile & expedite actus temperantiæ factus apostata exercere potest: cum jus cuique suum reddit, nulla in appetitu sentiente facilitas, nullus habitus famulans, ut loquuntur, remanet: cum justitia tota sit in parte intellectuâli.

Resp. In intellectu manere scientiam justitiae & æqui, ac nullum ex parte injustitiæ esse obicem, nullum impedimentum: unde nil mirum esse si actum justitiæ exerat, non qui ab habitu justitiæ oriatur, sed qui non sit injustus, & cui nihil desit præter ordinem ad bonum finem.

Q U Æ S T I O I I.

De causis virtutum.

QUæ sit causa formalis, seu definitio virtutis, jam dictum est. Nec illud quidem ignorare possumus, quis sit virtutum finis, actiones nimirum bonæ, quæ nos aptos & habiles præstant. Quare efficientem duntaxat & materialem virtutum causam indagare nobis incumbit. Per actus repetitos virtutem gigni, ut cæteros habitus, satis constat: id tamen meritò inquirimus, an virtutes a natura sint congenitæ, an potius usu & doctrina acquirantur. Sit itaque

Prima Conclusio.

Virtutem Moralem natura inchoat, doctrina & usus perficiunt.

Quodd virtus non sit qualitas nobis insita, multis rationibus probat Aristoteles. Nam iis quæ sunt contra naturam, nunquam assuescimus: sed vitiis plerumque & facilius quàm virtutibus insuescimus. Addit illud quoque quodd artes omnes & disciplinæ studio & exercitatione comparentur: ergo & virtutes.

Fatendum tamen est virtutem a natura inchoari: cum quædam virtutum semina, & velut igniculos Author naturæ nobis inferuerit, quæ doctrina, studio, industria, parentum institutione, exemplis & bonis legibus promoventur, & quasi adolefcunt: sed usu & exercitatione perficiuntur. Nam unius est Dei virtutes in nobis sine nobis operari. Sed Morales quæ sunt virtutes, doctrina potissimum, recto rationis usu, & exercitatione comparantur. Magna quidem est vis naturæ, & temperamenti: sed consuetudine plerumque & doctrina aut corrigitur, aut depravatur. Id etiam sæpè usu venit, ut qui in quosdam affectus sunt a natura proclives, ex habitu & consuetudine in contrarios affectus propendeant. Unde & mores dicuntur propensiones a natura ingentæ, quas habitus ipsi confirmant.

Ac scitè quidem observat Fr. Baco sæpè naturam occultari, interdum vinci, raro extingui. Nam vis naturam efficit majore impetu præcipitem, cum recurrit: doctri-

na motus illius minùs importunos reddit , sed non tollit ; sola consuetudo naturam immutat & subigit . Ubi natura magis præceps & turbulenta est, primùm ad tempus sisti debet ; tum paulatim domanda ; interim in contrariam partem flectenda est , quò recta efficiatur ; dummodo extremum illud alterum vitiosum non sit . Nec continuo nixu , sed intermisso habitus est comparandus : nam intermissio impetum auget .

Id quoque rectè admonet , cujusque hominis cogitationes ferè cum illius naturali inclinatione convenire:ut sermones doctrinam , & opiniones quibus imbutus est , referunt , sed facta antiquum obtinent . Est enim mos velut summus humanæ vitæ moderator : & quidem tum validissima est consuetudo , cum a pueritia incipit , tumque educatio nominatur . Sed ubi consuetudo in collegium , aut in societatem coacta est , illius vires mirum in modum augentur : tum enim exemplum , societas , æmulatio , gloria ipsa stimulos & vires addunt . Spartæ pueri , ut refert Cicero , ad aram sic verberibus excipiebantur , ut multus è visceribus sanguis exiret , nonnunquam etiam ad necem : quorum nemo exclamavit unquam , sed ne ingemuit quidem . Itaque consuetudo , exercitatio , pudor , amor gloriæ & honestatis plurimum possunt ad habitus comparandos & stabilendum rationis imperium .

Hinc tanta est vis pravorum habituum , ut tanquam vincula aut catenæ vix disrumpi possint . *Ligabar* , inquit Aug. l. 8. Conf.

e. 5. non ferro alieno, sed mea ferrea voluntate .
 Et Sapiens Prov. 5. *Iniquitates sue capiunt im-*
pium, & funibus peccatorum suorum constrin-
gitur.

Opp. Virtutes sunt quædam propensiones ad bonum, sed illæ inclinationes multis sunt naturales. Hinc Job. 3. dicitur, *ab infantia mea mecum crevit miseratio*; ergo virtutes sunt nobis insitæ, non adventitiæ qualitates.

Resp. dist. maj. Illæ inclinationes sunt a naturæ inchoatæ, C. absolutæ & perfectæ, N. Nam doctrina & exercitatione perficiuntur.

Nunc de subiecto virtutum dicendum est: de quo magna est inter Philosophos contentio. Plerique tamen omnes fatentur prudentiam esse in intellectu, justitiam in voluntate, cum utriusque objectum non sit quiddam sensibile. S. Thomas fortitudinem in appetitu irascibili, temperantiam in concupiscibili constituit. Nominales in voluntate & sentiente appetitu fortitudinem ex æquo reponunt: Scotus eas potissimum in voluntate, minùs præcipuè in appetitu animali collocat. Nobis qui voluntatem & intellectum neque ab anima, neque inter se sejungimus, inutilis penè videtur controversia: quòd si tamen una ex iis tenenda est, in Scoti sententia acquiescimus. Sit igitur

Secunda Conclusio.

Virtutes in parte animæ rationali præcipuè inhærent, in parte animali aut sentiente minùs propriè dictæ virtutes insunt.

Prob.

Prob. concl. Quod præcipuum est in virtute, est recta ratio, seu prudentia & ordo ad bonum & honestum finem: sed ea est in parte hominis rationali: quamvis facilitas usu comparata ad vim sentientem, imò ad corpus quodammodo pertineat.

Confirm. Proprium & formale virtutis objectum est honestum, quatenus honestum est: sed illud non pertinet ad appetitum sentientem, cum non sit sensibile: ergo virtus ad rationem & voluntatem maximè pertinet, non ad sentientem appetitum.

Confir. iterum ratione qua ipse D. Thomas utitur: cum duæ sunt facultates, quarum movetur una, movet altera; tum habitus princeps ad vim illam quæ movet, potiore jure pertinet. Atqui duo appetitus rationalis & animalis ita se habent, ut rationalis, seu voluntas moveat appetitum sentientem, imperio quidem non despotico, cui obfisti non possit, sed politico: ergo facilitas quædam in sentiente appetitu requiritur, quæ usu comparetur: sed habitus princeps erit in voluntate, seu in mente ipsa, ut recta ratione utitur. Non aliter atque ars equestris in equite, non in ipso equo inest, qui freno quidem indiget ut regi possit, sed habenas tenet eques: sic facilitas quædam & velut docilitas usu & exercitatione in appetitu sentiente acquiritur, sed imperium penes voluntatem manet.

Diluuntur objectiones.

Quæ in contrarium opponunt, faciliùs
Phil. Burg. Tom. II. L sol.

solventur, si id observetur, temperantiam & fortitudinem circa affectus animi, tanquam circa suum objectum versari, sed eas in sentiente appetitu ut in subiecto non esse, nisi fortè famulantem virtuti facilitatem, & quasi habilitatem nomine virtutis aut habitus intelligamus. Cum itaque

Opp. 1. Voluntas quæ est spiritalis, nullam patitur difficultatem circa materiam fortitudinis & temperantiæ, uti nec voluntas Angeli, aut voluntas animæ separatæ: ergo virtus non in ipsa voluntate, sed in appetitu sentiente est collocanda: uti nec frænum æquiti, sed equo imponitur.

Resp. Neg. ant. Non enim voluntas, vel anima, ut a corpore separata, sed cum eo conjuncta spectari debet; tumque ad eam pertinet appetitus sentientis cura & moderatio: Est enim voluntas universalis appetitus: undè non sui quidem sed suppositi in quo est, interitum exhorrescit, ac modum cupiditatibus imponit: & quamvis ea non sit re ipsa, est tamen affectu corporea, eaque bonum corporis naturali quadam propensione affectat. Atqui ut voluntas fræno instar equi non coercetur, saltem habenas tenet quibus ferocientem appetitum regat: neque id citra difficultatem efficit. Quare ut frænum equo, habenæ equiti committuntur, sic appetitus sentiens facilitate quadam acquisita eget. Sed ea est instar fræni, mens regit appetitum sentientem, ac sola agit ex motivo honesto, quod est proprium illius objectum.

Instant. Præcipua difficultas est in appetitu sentiente: ergo is ipse, non voluntas habi-

habitu instrui, & ab eo determinari debet : præsertim cum habitus in ea sit facultate quam regit & perficit.

Resp. Quidquid sit de antecedente, *dist. consequ.* Habitus pro facilitate acquisita sumptus, C. pro recta ratione, aut constanti voluntate illius perficiendi, quod faciendum recta ratio judicavit, N. Nam voluntas illa constans & firma est pars virtutis præcipua, eaque suas habet difficultates circa materiam temperantiæ & fortitudinis; Sic tamen ut bonum rationis, & quoddam homini convenit, seu honestum ubique sectetur. Deinde anima ipsa aut pars illius rationalis suas patitur difficultates etiam circa bonum sensibile, quatenus id bonum ad ipsum hominem pertinet; non sibi quidem metuit, sed homini.

Opp. 2. Facilitas illa, quæ usu acquiritur, quæque est in appetitu sentiente, est virtus ipsa, cum bonum faciat habentem, & opus ejus bonum reddat: ergo virtus est in appetitu sentiente. Præsertim cum hic suos actus exercere possit conformes rectæ rationi, quæ est mediocritas a virtute acquisita, & ipsa honestatis ratio.

Resp. dist. ant. Est virtus ipsa quoad partem illius minus præcipuam & rectæ rationi famulantem, C. quoad partem habitus principem, quæ eligit, & honestatem quærit, N. Hæc enim in suprema animæ parte collocatur.

Quod autem probationis loco afferunt, hanc facilitatem virtutis habere rationem, quoddam bonum faciat, qui ea præditus est, distinguendum est; bonitatem præstat extrin-

secam, C. intrinsecam, quæque ad animam propriè pertinet, N. Nam bonus est homo, cum recta ratione utitur, & constantem habet voluntatem id perficiendi, quod recta ratio præscripserit: cum autem accesserit laudabilis operatio corporis: ut cum ira placata inimico succurrimus, tum exterior bonitas interiori supervenit, & bona cogitatio extrorsum se prodit. Deinde appetitus sentiens actus potest exercere rectæ rationi convenientes: sed illa conformitas cum ratione non est motivum appetitus sentientis.

Opp. 3. Actus temperantiæ & fortitudinis sunt actus appetitus sentientis: ergo temperantia & fortitudo sunt in appetitu sentiente: nam ibi est virtus, ubi illius actiones sese ostendunt.

Resp. dist. ant. Actus imperati a temperantia & fortitudine sunt in appetitu sentiente, C. actus imperantes & elicit, N. Nam ut illi actus liberi sunt & voluntarii, quatenus a voluntate imperantur, ita & actus virtutum dici possunt, quod a virtute proficiantur, quæ immediatè & proximè voluntatem, & ea mediante appetitum regit. Undè nihil necesse est virtutem esse in appetitu sentiente: non enim est in facultate, quam proximè non regit.

Inst. Ibi est virtus, ubi est illius effectus primarius; sed virtutis moralis effectus primarius & immediatus est perturbationum moderatio, quæ est in appetitu sentiente: ergo virtus moralis est in appetitu sentiente. Hic enim agit ex virtute, cum timore periculi, aut mortis non fran-

frangitur : aut cùm voluptatum illecebris non movetur .

Resp. dist. min. Effectus primarius virtutis moralis est perturbationum moderatio , activa , C. passiva , N. est enim partis rationalis regere appetitum ; atque illa moderatio est actus liber , cujus motivum est bonum honestum . Unde virtus moralis ad appetitum irrationalem propriè non pertinet , neque illius effectus primarius est in appetitu sentiente : ut liberalitas non est in manu largientis . Atque ut appetitus inferior agat ex virtute , quatenus a voluntate regitur , non tamen agit ex virtute quæ ipsi insit appetitui : is enim quæ oriuntur difficultates , ex motivo honestatis superare non potest .

Opp. 4. Habitus intellectuales non sunt in ipso intellectu , sed in vi imaginatrice , aut potius in illius organo : ergo habitus morales non in voluntate , vel in anima , sed in organis appetitus sentientis inerunt . Nam ut intellectus nulla indiget acquisita facilitate , quod sit ad agendum comparatus , nec quicquam ei moram injiciat , nisi organum corporeum & phantasmata ; ita nec voluntas facilitate acquisita eget : cum sit spiritalis , & inclinationem ad bonum habeat congenitam : omnis adeò difficultas ex corpore proficiscitur .

Resp. In habitu , ut identidem diximus , duo spectari oportere , facilitatem acquisitam , & usum illius , seu applicationem . Hanc facilitatem in organo imaginationis , & digesta phantasmatum serie positam esse , ut probabiliùs quidam , licet non

penitus exploratum asserimus: sed usum, regimen, applicationem habituum ad mentem pertinere arbitramur. Sic in virtute morali duo sunt, rectum iudicium rationis, & exercitatio, vel usus ex rectæ rationis lege sæpius operandi. Itaque modus ille agendi expeditus a corpore & ab appetitu sentiente multum pendet: sed rectum iudicium menti est proprium, neque voluntatem a mente, seu ab animo sejungimus.

Q U Æ S T I O I I I.

Præcipue virtutum affectiones explicantur.

PRæcipue virtutum affectiones, de quibus controverti solet, sunt virtutum connexio, mediocritas, & certa cum vitiis oppositio: de singulis breviter agendum, ac primum de virtutum connexione.

Illud observari vulgò solet, virtutes quasdam esse certo hominum generi proprias, cujus generis est paupertas evangelica, aut virginitas in religiosis, aut magnificentia in principibus; alias esse communes & omni vitæ generi aptas, cujusmodi sunt prudentia, justitia, fortitudo & temperantia: de quibus potissimum quæritur, utrum ita sint connexæ inter se & conjugatæ, ut omnes habeat, qui unam habeat.

2. Id quoque advertendum, triplicem esse virtutum statum, primus est incipientium, qui ab Aristotele continentiæ dicitur: cum quis affectuum fluctibus adeò concutitur, ut virtus illius vix firma adversus tot procellas stare possit, sed infirma

fit

fit & instabilis . Secundus est proficiens-
tium, qui & temperantiæ dicitur : cum
virtus jam firma est & constans adversus
communes perturbationum æstus . Tertius
dicitur heroicus, cum aut sedatis affecti-
bus , aut ita fractis , ut virtutem commo-
vere non possint : omnia ex virtute fiunt .
Illud penè inter omnes constat , virtutes in
statu continentiae & infirmitatis non esse
omnino inter se devinctas : sed quæstio in
hoc vertitur , utrum virtutes saltem præ-
cipuæ & communes in statu heroico , imò
& in medio temperantiæ statu ita sint col-
ligatæ, ut una sine altera esse non possit , ut
videtur Sancto Thomæ, negante Scoto. Sit
igitur

Prima Conclusio .

**Virtutes in statu temperantiæ & heroi-
co sunt inter se connexæ .**

Prob. Ratione quam affert vetustissimus
Aristotelis Interpres Alexander Aphrodi-
sæus . Fieri non potest ut iustitiam habeat,
cui cæteræ virtutes defunt : nam si intem-
perans fuerit , iuste agere desinet , ubi ali-
qua voluptas eum illexerit : si timidus, cum
periculum imminebit, & ita de reliquis vir-
tutibus , quæ obices & impedimenta amo-
vere debent , quibus animus a bene agendo ,
seu directe, seu indirecte deterretur . Virtus
quippe nulla constans & firma esse potest ,
nisi omnia quæ obstare possunt , impedi-
menta revellantur : sed id fieri nequit citra
aliarum virtutum consortium .

Satisfit objectionibus .

Quò faciliùs quæ contra opponi solent dissolvas, id unum adverte, virtutes alias aliis esse subsidio, ut constantes sint & firmæ, atque obices omnes removeant; idque hinc oriri maximè, quòd circa perturbationes regendas versentur; quòd sese mutuo foveant: cum aliæ ex aliis oriantur. Itaque cum

Opp. 1. Virtutes mentis, scientiam v. gr. & artem non ita esse inter se connexas, quin una sine altera haberi possit.

Resp. Disparem esse rationem, quòd materia virtutis moralis cum alterius virtutis materia sit conjuncta, ut si una virtus desit, altera perfecta esse non possit: scientiæ autem materia, aut objectum ab artis alicujus objecto non pendet. Sed perturbationes animæ nisi intra suos fines coerceantur, virtutis, v. gr. justitiæ functiones impedire possunt; ac judex plerumque præ formidine, aut avaritia, deest officio suo. Quare defectus unius virtutis moralis sæpè in causa est, cur alterius virtutis actiones exeri non possint. Non ita res se habet in iis virtutibus quæ intellectuales dicuntur.

Contra, *inquiunt*, vitia non sunt inter se connexa: ergo nec virtutes.

Resp. neg. conseq. Vitia enim plerumque sese mutuo destruunt, non item virtutes.

Opp. 2. Judex ex solo justitiæ amore, atque ut loquuntur, ex motivo æquitatis omnes difficultates, aut obices amoliri potest:

test : ergo non indiget aliarum virtutum consortio.

Resp. Tum justitiæ amorem aut motivum aliis virtutibus tanquam mediis uti , quo difficultates ex aliena materia ortæ superentur . Qui enim nullo metu ab æquitate dimovetur, huic fortitudo non deest .

Contra, *inquies* , judex ille forsan minas omnes contemnet ob præcipitem audaciam ac temeritatem , aut alium affectum animi qui longè aberit a fortitudine: ergo nihil necesse est ut justitia sit semper cum fortitudine conjuncta.

Resp. neg. conf. Qui enim ex temeritate, aut ex alio affectu a justitiæ præscripto non recedit, is non constanter, ut perfectæ virtutis ratio postulat, & prudenter, & moderatè agit . Atque eadem temeritas, aut alia animi perturbatio interdum efficiet, ut justitiam ipsam deferat .

Opp. 3. Virtutes sunt inter se distinctæ: ergo una potest sine altera consistere, etiam in statu perfecto : nam quæ inter se distinguuntur, possunt a se invicem separari.

Resp. Neg. confeq. Nam in prudentia, seu in recta ratione omnino sunt conjunctæ: licet penes materiam iis subjectam distinguantur : sed hinc non sequitur separatas posse existere, cum a se invicem pendeant, saltem in statu perfecto .

Instant. Qui unam amittit virtutem, non continuò cæteras amittit: ergo non sunt inter se conjunctæ .

Resp. Non amitti virtutes quoad habitus famulantes : sed sublata una virtute , vix prudentiæ locus relinquitur , in qua tan-

quam in radice habitus virtutum principes conjunguntur . Respondere etiam possumus, sublata una virtute reliquas non tolli quoad entitatem , sed quantum ad perfectionis statum .

Sed, *inquies* , in nonnullis quædam virtutes excellunt aliis destitutæ ; ut in Alexandro Magno fortitudo sine temperantia ; in aliis contra temperantia viget cum magna timiditate conjuncta : ergo virtutum non est tanta connexio : quin una sine altera etiam in statu perfecto esse possit .

Resp. Actus fortitudinis heroicis esse posse citra temperantiam , sed tum fortitudo non est perfecta, & stabilis, nisi difficultates omnes , non eæ modò quæ ex propria cujusque virtutis materia, sed etiam quæ ex aliena oriuntur, vinci possint . Unde postquam Alexander voluptatibus se dedit , fortitudinem populariter sumptam non amisit, sed virtus perfecta esse desiit, eamque multum infregit intemperantia. Quare in Alexandro non fuit heroica fortitudo, nisi sub aliquo respectu, non simpliciter & absolute perfecta .

Sequitur præcipua virtutis proprietas , quod nimirum in medio sit posita inter extrema vitia . Quæritur itaque an illud omni virtuti conveniat , ut mediocritatem illam, quæ rationis dicitur, sic attingat, ut in ea nec defectu peccet nec excessu . Cum autem duplex sit medium ; unum ratione actus mediocris, alterum ratione ipsius virtutis, quæ inter vitia opposita medio loco consistit, de utroque controvertitur . Sit itaque

Secunda Conclusio.

Virtus omnis est in medio posita ratione actus ; ac si justitiam strictè sumptam exceperis , reliquæ virtutes sunt in medio constitutæ formaliter : utrum autem justitia excipi debeat , de nomine videtur controversia.

Prima pars conclusionis probatur ex definitione virtutis moralis , quæ est habitus electivus in mediocritate consistens . Nam versatur circa perturbationes & actiones in quibus excessus & defectus , magis & minus quam par sit inveniuntur ; ac proprium est virtutis , modum iis adhibere : ergo omnis virtus est in medio constituta ratione sui actus .

Pars secunda conclusionis inductione probatur ab Aristotele : fortitudo media est inter ignaviam & audaciam ; temperantia inter insensibilitatem , ut loquuntur , seu inter nullius voluptatis sensum , & intemperantiam ; prudentia , inter stultitiam & versutiam , seu calliditatem : de sola justitia dubitari potest , utrum inter extrema vitia sit posita .

Cum autem duplex sit justitia , una quæ vindex & coercitiva nominatur ; altera propriè sumpta : adversus primam excessus & defectu peccari solet : cum nimirum aut plus pœnarum , aut minus æquo exigitur : adeò ut crudelitas , aut sævitia excessu , nimia indulgentia defectu peccet : ergo iudex aut nimium severus aut indulgentior esse potest .

Qui justitiam vindicem negant peccare per excessum, ii quidem statuunt materiam justitiæ propriam esse emolumentum, aut lucrum justitiæ debitum. In justitia autem vindice jus duplex esse, aut emolumentum, alterum auctori, alterum reo debitum. Pœna, inquiunt, est emolumentum auctori debitum: quæ si sit gravior, is conqueri non debet, quod jus suum violetur. Sed reus de pœnarum excessu queri potest, quod jus suum, seu conservatio corporis non servetur. Id enim est ejus emolumentum; ea est materia justitiæ vindicis respectu rei & in ea peccatur defectu, cum jus illud violatur. Sed, ut diximus, magis de nomine, quam de re ipsa controvertitur.

Qui enim censent justitiam vindicem peccare per excessum, ii communem loquendi & sentiendi modum sequuntur; & jus aut æqualitatem actionum & præmii in justitia distributiva, pœnarum & culpæ in vindice justitia, ut propriam materiam agnoscunt. Neque id lucro erit auctori, si pœnæ excedant; æqualitatem enim non physicam, ut talio, sed moralem postulat. Id verò jure merito tum reus, tum respublica exigit, ut pœnæ non sint graviores, quam peccata.

In justitia strictè sumpta videtur etiam Aristoteles medium quoddam ratione objecti agnoscere, jus nimirum, seu jussum quod est inter lucrum & damnum, quodque cum sit in æqualitate positum, inter plus & minus versatur; cumque justitia sit virtus ad alterum, injustitia respectu unius solet excedere, & respectu alterius defi-

deficere : justitiæ verò munus est rem ad æqualitatem reducere.

Aliis tamen placet contra justitiam strictè sumptam defectu peccari posse , non excessu . Nam si plus reddam , quàm debeam , in ipsam justitiam non offendam . Quare nemo supra , sed infra justitiæ modum peccat . Verùm lis nobis videtur de verbo constituta : nemo enim nimium justus esse potest : sed cum objectum justitiæ sit jus , seu æquale , utrinque æqualitas laedi potest excessu & defectu . Itaque justitia , ut virtus omnis , est in medio posita , ratione objecti : virtus enim omnis mediocritatem tuetur ; nec excedit , nec deficit : est enim quædam rectitudo moralis : unde virtus est causa actionum quæ nec excessu , nec defectu peccant . Nec quisquam excedere potest in fortitudine , uti nec in justitia , sed in materia fortitudinis : est enim virtus ex Aristotele summum potentiæ .

Solvuntur objectiones .

Opp. r. Charitas , & virtutes Theologicæ non sunt in medio , sed in extremo positæ : ergo virtus omnis non est in mediocritate constituta , etiam ratione objecti ; nec demum virtutes omnes sunt inter duò extrema vitia constitutæ .

Resp. Nos hîc agere de virtutibus quæ morales & civiles dicuntur , non de Theologicis , & Christianis ; quæque ratione actus & objecti , semper sunt in mediocritate positæ .

Instant. Magnanimitas, quæ circa maximos honores, magnificentia quæ circa sumptus maximos: ut paupertas Evangelica, quæ omnibus divitiis renunciat, & virginitas, inter opposita vitia non sunt constitutæ: ergo virtus omnis non in mediocritate consistit.

Respondet S. Thomas medium & extrema in actibus & affectibus animi spectari secundum diversas circumstantias, quodque est extremum in virtute, si alicujus circumstantiæ ratio habeatur, medium erit, si aliæ circumstantiæ spectentur: eò quippè tendunt virtutes, ut fiant quando, ubi & quomodo oportet, ac regulam ipsam rationis attingant. Hinc Philosophus de magnanimo loquens, eum esse magnitudine extremum docet: medium autem in eo quod oportet. Sic virginitas & paupertas Evangelica, cum sint propter id quod oportet, nimirum propter vitam æternam, atque ut quod oportet, nempe juxta Dei mandatum, aut consilium, in mediocritate versantur: essent verò superfluæ, si illicitam superstitionem, aut inanem gloriam sectarentur: ut è contra qui votum virginitatis, aut paupertatis infringunt, defectu peccant.

Opp 2. Virtus omnis ex Aristotele est summum, seu extremum potentiae: ergo non est in mediocritate posita.

Resp. diff. ant. Virtus est quid summum ratione objecti formalis, nempe honestatis, C. nemo enim aut nimium justus, aut temperans esse potest; ratione materiæ in qua versatur, N. Undè Aristoteles, peccare, inquit, multis modis, at rectè agere, unico contingit.

tingit. Hinc docet *mediocritatem illam invenire, esse negotii non parvi*; ac subindè præcipit, ut qui quasi collineando petit medium, ab illo extremo quod est maximè contrarium, recedat; & attendens in vitium ad quod maximè pronus sit, idem agat, quod qui dirigentes lignum recurvum, sic ipsum in partem contrariam defleunt, ut reducatur tandem in rectitudinis statum. Quod utique verum est; dummodo, ut jam monuimus, illud contrarium nihil habeat vitii. Nulla autem est ratio hujus mediocritatis inveniendæ compendiosior, quàm bonos fines sibi præstituere: tum enim ad omnem virtutem apti erimus & propensi, cum circa fines ipsos rectè erimus dispositi: quod una præstat *charitas quæ est vinculum perfectionis*, & virtutes omnes simul connectit; quæque excessu nunquam peccat.

Opp. 3. Justitiæ sola opponitur injustitia: ergo huic virtuti unum duntaxat, non duo vitia opponuntur.

Resp. dist. antec. Una est injustitia quæ aut suprâ, aut infrâ modum peccat, C. quæ semper infrâ modum, & defectu aberret a mediocritate, N. Et quidem fatemur nullum esse vitium oppositum, quodd excessu peccet, si ratio objecti formalis, seu honestatis habeatur; idque omni virtuti commune est. At si officium justitiæ, aut materia ei subjecta spectetur, non dubium est quin justitia vindex culpæ & pœnæ æqualitatem exigat, quæ æqualitas excessu, aut defectu tolli potest.

Quanquam in justitia strictè sumpta non adeo liquet an æqualitas illa excessu perimatur.

matur. Nam minus suo accipere, potest ad aliud vitium pertinere: sed cum iustitia pugnare non videtur: hæc enim tota in alieni abſtinentia poſita eſt. Tametſi id verum eſt, æqualitatem deſtrui, cum uni parum, alteri nimium datur.

Poſtremò multa opponunt Stoici, quibus probent virtutem in hoc non eſſe poſitam, ut affectibus modum imponat. Modum, inquit Tullius, adhibes vitio; an vitium nullum eſt non parere rationi? nihil intereſt, utrum Peripatetici moderatas perturbationes approbent, an moderatam iniuſtitiam, moderatam ignaviam, moderatam intemperantiam.

His & aliis tum ſatiſfiet, cum de animi affectibus agemus. Atque in hoc Stoici erraverunt, quod Peripateticos in ea eſſe opinione putaverint, ut hi modum vitiis adhibendum ſic decernerent, quaſi virtus ex vitiis oppoſitis & refractis conſtaret: ut tepidum ſit ex calido & frigido, participatione, ut ajunt, non negatione extremorum. Quare id ſemper adſtruit Cicero, quod Peripatetici nunquam dixerunt, virtutem ita eſſe quid medium inter vitia, ut nihil ſit præter vitium temperatum & unum extremum ad mediocritatem redactum. Cum tamen Ariſtoteles diſertè doceat eſſe quædam vitia quæ non admittunt mediocritatem, ut adulterium, & alia hujus generis; nec virtutem ullam in eo eſſe poſitam, ut quo tempore, & quomodo furtum ſit faciendum, præſcribat.

Sed, *inquiunt*, recta ratio in quibuſdam affectibus modum ponit, alios penitus evelit, alios ad ſumma incitat. Hinc La-

tan-

stantius, *non in his moderandis sapientiae ratio versatur, sed in causis eorum: quoniam extrinsecus commoventur: nec ipsis potissimum frænos imponi oportuit; quoniam exigui possunt esse in maximo crimine, & maximi possunt esse sine crimine.* Sic Hugo Grotius putat id omni virtuti non esse proprium, atque perpetuum, ut mediocritatem sequatur. Non enim, inquit, Deum nimium colere possumus: nec superstitio eo peccat, quod Deum nimium colat, sed quod perversè; neque æterna bona nimium possumus appetere, neque æterna mala nimium formidare, vel peccata nimium odisse.

Verùm his jam identidem responsum fuit, nos de virtute morali, aut civili, non de Christiana, aut infusa differere. Virtutem moralem esse habitum medium inter duos vitiosos: excessum verò esse in re, seu in objecto, non item in virtute, cujus perfectio est aliquid summum; sed virtus est ipsa mediocritas, quatenus objectum attingit, quando & quomodo oportet: cum scilicet timemus, cupimus, irascimur, ut recta ratio præscribit. Undè illud Horatii pervulgatum.

— *Virtus est medium vitiorum & utrinque reductum.*

Nec multum refert an virtus ipsos moderetur affectus, aut eorum causas, dum in medium ipsum collimet.

Nunc illud dispiciendum, an una duntaxat virtus inter extrema vitia posita, an tot sint virtutes quot vitia.

Tertia Conclusio.

Tot sunt ferè virtutes, quot vitia.

Probatur & explicatur conclusio. Tot sunt virtutes, quot sunt actus virtutum specie distincti: sed inter duo vitia sunt perpè duo actus virtutum specie diversi, quorum unus tendit in objectum, alter videtur ab eo recedere. Sic inter prodigalitatem & avaritiam duo sunt actus specie distincti, dare & retinere; liberalitatis est dare, ut decet, parcimoniæ retinere, ut oportet. Sed hi actus dare & retinere, ut recta ratio præcipit, tam sunt inter se diversi, quàm dare & retinere præter rationem & modum; ergo liberalitatis & parcimoniæ actus tam sunt inter se distincti, quàm prodigalitatis & avaritiæ.

Confirm. Idem ferè reliquas virtutes percurrenti fiet manifestum. Nam inter prudentiam & calliditatem sunt prudentia & sinceritas; inter ignaviam & temeritatem, fortitudo & cautio: & ita de reliquis, nisi fortè cum vocabula deficiunt. Atque hinc fit ut quædam vitia virtutes mentiantur, & vicissim: ac sæpè evenit ut virtus ad alterum extremorum videatur propiùs accedere. Sic fortitudo audaciæ, quàm ignaviæ est vicinior; parcimonia avaritiæ est propior, quàm liberalitati; temperantia magis ad voluptatis privationem quàm ad intemperantiam accedit: undè & vitia plerumque virtutum specie nos fallunt. Hinc illud Othonis de Galba apud Corn. Tacitum. *Qua aliis scelera, hic remedia vocat, dum falsis*

falsis nominibus severitatem pro severitia, parcimoniam pro avaritia, supplicia & contumelias vestram disciplinam appellat.

Opp. Una est virtus inter duo vitia opposita, ut supra ostendimus, non duæ: sic liberalitas una est inter avaritiam & prodigalitatem: illa enim dat & retinet, ut oportet; nec potest dare ut decet, quin eadem retineat quantum necesse est. Quod si enim quis nihil sibi servet; jam non liberalis, sed prodigus futurus est. Simili ratione non potest sibi retinere quantum decet, nisi largiatur quantum ratio præscribit.

Resp. dist. ant. Una est virtus moraliter, & ex communi loquendi modo, C si rem Physicè & subtilius inspiciamus, N. Confundi enim solent illæ virtutes, quamvis revera sint diversæ. Nam actus earum licet sint inter se maximè cognati, sunt tamen distincti. Siquidem liberalitas dat, parcimonia retinet, idque cum decet: contra prodigalitas dat cum non decet, nec retinet cum oportet: ut avaritia non dat ubi oportet, & retinet cum non decet. Quare avaritia deficit a liberalitate, excedit ubi cum parcimonia comparatur: contra evenit in prodigalitate. Undè & liberalitas & parcimonia inter duo vitia positæ sunt, sed diversa ratione; illa in dando, hæc in retinendo versatur.

Ac licet concedamus liberalitatem a parcimonia non posse divelli, (quod non verum est de eo qui vendit omnia ut Christum sequatur,) id tamen liquet alium esse affectum dandi, cum decet, alium retinendi.

nendi. Quamvis enim non possit quis dare quantum decet, nisi & retineat quod ratio præscribit, hoc est, quin abstineat a dando plusquam decet, quod est retinere, ut negativè, & præter intentionem; tamen liberalitas ex se non includit animum retinendi: id enim pertinet ad parcimoniam.

Q U Æ S T I O V.

De virtutum divisione.

PRoximum est ut de virtutum numero differamus: ac prima quidem & summa virtutum moralium ea est divisio in principes, quæ & cardinales dicuntur, & iis adjunctas, seu comites, ut a Cicero ne vocitantur. Quatuor sunt virtutes præcipuæ omnibus notæ, prudentia, iustitia, fortitudo & temperantia. Has Plato l. 4. de rep. Aristoteles lib. 7. Politic. recensent; & disertissimè Cicero lib. 1. Offic. *Omne, inquit, quod honestum est, id quatuor partium oritur ex aliqua: aut enim in perspicientia veri, solertiaque versatur; aut in hominum societate tûenda, tribuendoque suum cuique, & rerum contractarum fide; aut in animi excelsi, atque invicti magnitudine, ac robore; aut in omnium quæ sunt, quæque dicuntur, ordine & modo, in quo inest modestia & temperantia.*

Hoc ipsum sacræ litteræ confirmant, ubi virtutes sapientia, studia, aut labores nominantur: *temperantiam enim, ait Sapiens, & prudentiam & iustitiam & fortitudinem docet.*

Sic

Sic August. l. de moribus Ecclesiæ, quod, quit, ad beatam vitam nos ducit, nihil omni- esse virtutem affirmarim, nisi summum amorem i: tum quadripartitam virtutem distin- it, & definit. Vt temperantiam dicamus rem Deo sese integrum incorruptumque ser- item: fortitudinem, amorem omnia propter um facile perferentem: justitiam, amorem Deo tum servientem, & ob hoc bene imperantem ca- is quæ homini subiecta sunt: prudentiam, amo- bene discernentem ea quibus adjuvetur in um, ab iis quibus impediri potest.

Quæ autem sit hujus quadripartitę divi- nis ratio, non adeò in promptu est expli- e: ea verò mihi satis probabilis videtur, um nonnulli afferunt. Quod, ut homo uestè vivat, necesse sit ut cognoscat quod u sit optimum; atque hoc est prudentiæ nus: deindè constantem habeat & stabi- i voluntatem ejus faciendi quod opti- m judicaverit; eaque voluntas homi- n perficit, vel simpliciter, ut in se ipso statur, sive præcipientes perturbationes pefcat, quod præstat temperantia; si- ardiores excitet, quod est fortitudinis: demum comparatè, & ratione humanæ etatis; idque efficit justitia, quæ suum que tribuit.

am verò complures sunt aliæ virtutes, ad has quatuor ut partes, vel comites runtur: partes autem illæ sunt, ut san- Thomas identidem explicat, in tripli- fferentia constitutæ. Primò enim sunt es virtuti Cardinali subiectæ, seu il- species. Secundò integrantes dicun- ; quæ totum integrum componunt, quæ-

quæque ad actum perfectum alicujus virtutis conspirant. 3. Potentiales demum vocitantur, quæ instar facultatum animæ, virtutibus adjunguntur, & actus earum secundarios perficiunt, ut nutritivum & sensitivum sunt partes animæ, quæ illius vim omnem non habent: sed de iis mox pluribus.

DISPUTATIO V.

De virtutibus & vitiis sigillatim.

ID unum restat ut de virtutibus seorsum agamus: primum itaque de prudentia, 2. de fortitudine, 3. de temperantia, postremò de justitia sic differemus, ut reliquas his adjunctas virtutes simul attingamus. Res est latè fusa, nec intellectu ardua: de qua non omnia dicemus, id enim foret infinitum, sed quæ maximè necessaria videbuntur.

QUÆSTIO I.

De Prudentia.

CIRCA prudentiam primum quid sit, tum quæ illius munera, tandem quæ sint illius partes, excutiendum nobis est.

ARTICULUS PRIMUS.

Quid sit Prudentia.

PRUDENTIA cum sapientia confundi solet: tametsi unam ab altera sic distinguit

it Aristoteles, quòd sapientia sit scientia rerum altarum, admirabilem, & sublimem; prudentia verò in rebus quæ ad viam sunt utiles, versetur. Hæc ab eo definitur, *Habitus vera cum ratione activus in iis quæ homini sunt bona vel mala.*

1. Est habitus, isque dianoeticus, quòd mente resideat, cum sit ultimum iudicium practicum, aut illud efficiat: est enim ista ratio quæ cæteris virtutibus medietatem præscribit. Undè ad mores maxime pertinet; ratione materiæ in qua versatur.

2. Dicitur habitus vera cum ratione activus, quòd ad verum semper propendeat: nec si vir prudens sæpè ratione utitur falli, & cui eventus non respondeat: nam rationes humanæ quas regit, tam incertæ sunt & variæ, ut prudentia humana constanter tantum nitatur. Atque ille prudens merito iudicatur, qui nihil agit temere & indeliberatè; & quod verisimilius videtur, id ita sequitur, ut paratus sit rem amplecti rationem, si fortè verior occurrerit. Prudentia enim est rerum contingentium, quæ esse hoc vel alio modo possunt: non ut scientia, quæ est de rebus necessariis, quæque in deliberationem non veniunt. Undè prudentia cum arte convenit, quæ circa res contingentes, & in quibus deliberari solet, versatur: in quibus enim differant, jam alio loco diximus. Prudentia tum quippè est artem bonum efficere artem, sed non virum bonum: undè prudentia iis artibus est similior, in quibus artifex præter voluntatem fallitur: cujus generis

neris sunt ars medendi & nautica. His enim vitio vertitur, cum quis sciens erraverit, non item in cæteris fere artibus, in quibus bonus artifex non fallitur nisi volens.

Postremò prudentia in iis versatur, quæ sunt homini bona vel mala, nimirum in iis quæ media dicuntur, quæque sunt consequendo fini idonea: non enim prudentia aliis virtutibus fines præscribit; qui sunt a natura præstituti: sed illius est, quid pro loco, & occasione faciendum sit, quid fugiendum, decernere.

Undè ab Augustino definitur, *rerum expectandarum & fugiendarum scientia*: ea quippè bona a malis, utilia a noxiis discernit atque omnem vitæ rationem moderatur, idque non universim, ut moralis disciplina, sed hîc & nunc, seu hoc in loco & tempore. Est enim scientia opportunitatis & idonei ad agendum temporis. Quanquam in eo maximè prudentia elucescit; cum æqualis & rationi consentaneus vitæ agendæ tenor, aut modus sic instituitur, ut omnes actiones ei concinant, & in eundem finem collineent.

Quæri autem solet an prudentia sit una & simplex qualitas, ut Thomistis videtur, an potius ex multis sit conflata, uti de scientia diximus: & quidem una est genere, quæ vix a recta ratione secernitur: sed est specie multiplex; ut in rebus omninò diversis, quæque varias habent difficultates, versatur: est una velut in radice, aut potius ut in trunco, in ramos variè distincta: nam satis aptè virtutem principem cum trunco, cæte-

s illi adjunctas cum ramis Seneca com-
rat.

A R T I C U L U S : I I.

Prudentia munera explicantur.

¶ Ria sunt prudentiæ munera, vel
actus præcipui: Eubulia, seu bona
onsultatio; synesis, seu recta intelligen-
a, aut potius iudicium, & gnome vel sen-
ntia, seu imperium. Consultatio maxi-
è ad prudentiam pertinet: cum scilicet
edia ad finem utilia excutiuntur, ut iis
pensis intelligi possit, quod ex iis sit opti-
um. Id verò sæpè nos adinonet Sapiens,
t nihil sine consilio, nihil temerè aga-
us: ut Prov. 12. *Via stulti recta in oculis*
us: qui autem sapiens est, audit consilia.
t cap. 13. *Astutus, id est, prudens, omnia*
it cum consilio: qui etiam fatuus est, aperit
ultitiam. Quod utique ad prudentiam
oliticam maximè pertinet, ut nihil si-
e consilio agatur. *Ubi non est gubernator;*
populus corruet. *Salus autem ubi multa con-*
silia. Prov. 11. Populus enim rectore, ut
orpus anima, qua regatur, eget. Multis
iam consiliis opus est. Nam hominem
tantumvis sapientem vel anticipata opi-
o, vel affectus, vel lumen ipsum rationis
test deferere, & transversum agere.
Huic opponitur præcipitatio, cum temerè
aid, & inconsultò agimus. Sed ut bona
consultatio, ea & benè fieri, & in bo-
um finem collineare debet: alioqui astutia,

aut calliditas futura est . *Oculi tui recta videant* Pr. 4.

Synesim Aristoteles appellat intelligentiam expeditam & promptam , cui mentis habetudo , aut stoliditas opponitur : aded ut vir prudens medio quodam loco inter vafrum , seu callidum , & stupidum positus videatur . Nam calliditas est malitia quædam , quæ , ut ait Cicero , *vult prudentiam imitari* : stultus bruto similis est : prudens facile intelligit ac discernit quod medium sit optimum . Quanquam Regum sapientissimus astutos etiam inter stultos numerat : *Prudens* , inquit , *advertit ad gressus suos* , *stultus divertit ad dolos* . Nam prudens ex ratione bene instituta agit , de rebus suis cavet , proborum opera utitur , in occasiones intentus contra improborum conatus & impedimenta omnia se munit . Contra astutus , inquit Verulamius , spem suam ponit in aliis circumveniendis ; in aliis rebus versatur , quæ non sunt in nostra potestate , quæque nulla constanti regula nituntur : aded ut novas semper technas & artes fallendi excogitare cogatur . Præterquam is præcipuum ad res gerendas instrumentum , fidem nimirum amittit , & eventus sæpius eum fallit . Hinc prudenter Tacitus *consilia* , inquit , *callida & audacia expectatione lata , tractatu dura , eventu tristia* . Ac scitè a nobilissimo authore est observatum , nunquam nos facilius decipi , quàm cum alios circumvenire volumus ; tumque maximè in fraudem nos illici , cum aliis callidiores nobis videmur . Neque enim ex alio fonte oriuntur astutiæ , quàm quod a solida subtili-

ilitate , aut dexteritate deficimus : est quippe astutia perangusti ingenii argumentum , ac ferè evenit ut qui ea degenerare & puria prudentia sæpiùs utitur , dum aliquam sui partem tegit , aliam detegat . *Qui ambulat simpliciter* , ait Salomon , Pr. 10. *ambulat confidenter, qui autem depravat vias suas, manifestus erit* . Qui enim prava est intentione , tandem se prodit vel ob dissimilem vitæ tenorem , vel propter inordinatam vitæ rationem .

Tertium prudentiæ munus est rectè præscribere qua ratione mediis , quæ iudicata sunt optimæ , utamur , & ea constanter exequamur . Hic prudentiæ actus gnome vocitatur . Qua voce Aristoteles non tam imperium rationis , quàm rectum iudicium intelligit , quod videlicet in mitiorem partem propendet , aut ex æquo & bono fertur . Ab aliis gnome dicitur virtus benè iudicandi prædictæ communia morum principia : ut si quis apud nos arma deposuerit , & fiat patriæ hostis , tum præter communem regulam , qua depositum reddi oportere præscribitur , naturali lumine iudicamus huic depositum reddendum non esse . Virtus illa mentis , qua ita iudicamus præter communes morum regulas , gnome dicitur : ut virtus in voluntate , qua id constanter exequimur , æquitas vocitatur . Id enim sapientis apprimè tenendum . Eccl. 7. *Noli esse justus multum, neque plus sapias quàm necessesse est, ne obstupescas* . Vera quidem iustitia nimia esse nequit : sed ut vera sit , fugit extrema . Hinc qui nimium justus est , non satis justus videtur : nam æquitatis , cha-

ritatis, & prudentiæ regulas prætergreditur. *Non compatiuntur naturæ*, ait Hier. *nec æstimant possibilitatem*.

Atque hi sunt tres actus prudentiæ, seu ut aliis videtur, tres partes prudentiæ potentiales, & illi affines virtutes: quæ tamen officiis potiùs, quàm re ab ipsa prudentia fecernuntur: cùm eadem iis sit subiecta materies.

ARTICULUS III.

Partes Prudentiæ integrales exponuntur.

HÆ dicuntur certæ animi dotes, quibus prudentiæ actus faciliùs exe-
runtur. Octo a S. Thoma numerantur, intelligentia, memoria, solertia, docilitas; ratio, providentia, circumspectio, & cautio: tot enim animi dispositiones requiruntur ad rectè consultandum, judicandum, & præcipiendum de rebus expetendis, aut fugiendis. Nam ad rectam deliberationem & iudicium optimum, principiorum moralium intelligentia & rerum præteritarum memoria, imò & dexteritas quædam vel solertia, seu facilitas inveniendi & exco-
gitandi media, sunt necessariæ: quibus etiam opus est ad rectè judicandum, tum docilitate, & quodam ratiocinandi usu, qui rationis nomen sibi vindicat: ex variis enim præcognitis quid factu sit optimum, colligit. Ad rectè præcipiendum, aut imperandum primo idoneus finis comparandi modus est adhibendus, & iis quæ prævi-
dentur futura accommodatus: quod uti-
que

ne est providentiæ ; tum quæ negotio ad-
iunctæ sunt circumstantiæ , sunt diligen-
tius inspiciendæ ; quod est circumspectio-
is : tandem cautio est adhibenda , ut quæ
besse possunt impedimenta declinemus ,
ut removeamus .

Ex iis prudentiæ partibus quædam sunt
otes animi a natura congenitæ , ut soler-
ia , seu dexteritas , aut animi celeritas ad
media excogitanda : siue hæ disputationi ,
ve actioni inserviant . Cum autem quæ
tentent , majore circumspectione indaga-
mus , aut in futurum prospicimus , tum
is illa quasi subolfaciendi , sagacitas nomi-
atur . Sic iudicium dicitur , optimè a na-
tura comparata ratio : cum scilicet tanta
sit ingenii vis , ut acutissima quæque per-
adat . Docilitas est facilitas percipiendi ,
umque ad mores transfertur , ea est prona
ad discendum voluntas , qua mens patien-
tem culturæ aurem accommodat . Inge-
nium verò omnes eas dotes complectitur ;
etque illius dos præcipua est animi celeri-
tis , aut solertia ; vis nimirum acris & per-
vicax , actiuosa , habilis , in omnes eventus
expedita , quæ facienda videat , & ad opti-
am finem perducatur . Sic ingeniosum di-
ximus Salomonis in re perplexa iudicium ;
cutè dicta , & ex tempore , ingeniosa ap-
ellamus .

Est itaque ingenium vis illa solers & ef-
cax quocunque animus destinaverit , certò
ervenienti : sic artes omnes ingenio acce-
tas referimus . Ingenium plerumque cum
iudicio confundimus . Undè Aristoteles
ingeniosum vocat , qui rectè iudicat ,

& quod verè bonum est, eligit. Vis autem illa & perspicacitas mentis, qua vel minutissima pervidemus, judicium plerumque appellatur: adeò ut ratio, judicium & ingenium in idem ferè collineent. Sic docilitas & memoria vix possunt separari; atque has omnes animi dotes una conjunctas ingenii nomine complectimur.

Porro dotes animi ad prudentiam requisitæ, memoria rerum præteritarum, intelligentia præsentium, & providentia futurarum continentur. Nam quæ agenda sunt cum iis quæ acta sunt ut plurimum cohærent, & ex similibus causis effectus quoque consimiles nascuntur: adeò ut quid futurum sit, nisi ex præteritis, tanquam ex præcognitis judicare non possimus. Quanquam summa ex circumstantiis oritur in negotiis varietas, quæ magnum usum & acre judicium postulat. Undè Aristoteles docet juvenes Geometria & aliis disciplinis imbui posse, prudentes autem rarè inveniri, quodd prudentia, usu & experientia comparetur.

Quare pernoscendæ sunt negotii, quod est in manibus, omnes circumstantiæ, natura, conditio; quibus rationibus juvari, aut impediri possit; seu consilium ex tempore sit capiendum, seu tempus ad deliberandum suppetat. Nam si cognitu necessaria nos fugiant, imprudenter & temerè agimus. Quod autem multæ expediendi negotii rationes simul occurrant animo, id sæpè non tam ex ingenii fertilitate, quàm ex judicii infirmitate oritur, qua fit ut id statim arripiamus, quod fortiùs vim ima-
gina-

ginatricem percellit; & ad pauca attendentes, ut plerumque evenit in speculabilibus, sic in agendis facile decipiamur: præsertim cum vires nostras non consulimus, nec rerum connexionem satis diligenter perspicimus. In hoc utique summa prudentiæ posita est, ut pretia rerum rectè æstimemus. *Sapientis oculi in capite ejus: stultus in tenebris ambulat.* Prov. 2. Sapiens enim non temerè agit; quò tendat, & quid sibi agendum sit, novit: Stultus cæco perturbationum impetu abripitur.

Postremò ad prudentiam futurorum providentia sic pertinet, ut inde suum nomen invenerit: nam teste Isidoro prudens dicitur, quasi porrò videns. Quanquam illud fatendum est, incertam admodum esse hominis providentiam: cum vix de ullo eventu certi esse possimus, ac nihil sit tam varium, tam multiplex, tam instabile, quàm homo ipse, circa quem omnis prudentia versatur. Sed tamen in eo maximè est elaborandum: quantum res humanæ permittunt, ut media fini aptentur, ne malis eventibus occasionem demus; ut ex præcepto rationis semper agamus: nam prudens ille non habendus est, qui casu quodam & temerè scopum attingit: *Oculi tui recta videant, & palpebræ tuæ præcedant gressus tuos,* Prov. 3. & c. 14. *Sapientia callidi, id est prudentis, est intelligere viam suam: & imprudentia stultorum errans.* Imprudenti nihil incertum videtur: undè quæ præter spem accidunt, ei videntur improvisa. Sed prudens nihil sibi proponit tanquam certum; in omnem se comparat fortunam: unde nihil

ferè ei accidit inopinatum. *Illud verò, ut ait Cicero, ingenii magni est percipere cogitatione futura, & aliquantò antè constituere, quid accidere possit in utramque partem, & quid agendum sit cum quid evenerit; nec committere ut aliquando dicendum sit, non putaram.*

ARTICULUS IV.

Quæ sint Prudentiæ species.

PARTES eæ restant quæ prudentiæ, ut species quædam, subjiciuntur; atque ut *Moralis Philosophiæ*, sic prudentiæ tres vulgò species afferuntur. *Privata*, qua quisque suos mores moderatur, quacunque is sit conditione: sive alios regat, sive sibi ipsi tantùm provideat; *œconomica*, qua quis familiæ curam agit; ac demum *Politica*: sive ea subditis ut subsunt legibus, sive iis insit, qui curam habent civitatis; sive ea sit præcipua, qualis est in legislatore: sive in ipsis rectoribus spectetur, quatenus juxta legum præscripta civitatem moderantur; seu denique togata sit, aut militaris. Nos hoc loco privatam duntaxat prudentiam attingimus, qua quisque mores suos ad rectæ rationis leges debet exigere, seu privatam, seu publicam personam sustineat.

Duo sunt autem maximè in quibus privata prudentia versatur. Primum, ut optimum, & sibi aptum vitæ genus quisque deligat; alterum ut in eo vitæ statu laudabiliter sit moratus, & actiones suas ad præscriptum rationis exigat. In deligendo vitæ gene-

enere plerumque erramus, quod nec indolentia nostra, nec viribus propriis ritè consultis neum vitæ statum nos conjiciamus, cui minimè apti sumus. Quod difficillimam facit deliberationem, est humanarum rerum conditio: ubique enim magna occurrunt incommoda; nec tamen quicquam mirius quàm in incerto semper fluctuare, & totam vitam in deliberando traducere. Difficultatem auget ætatis infirmitas. *In iuvene enim adolescentia*, inquit Cicero, *cum non sit maxima imbecillitas consilii, tum id sibi quisque genus ætatis degendæ constituit, quod maxime adamavit. Itaque antè implicatur aliquo certo genere, cursuque vivendi, quàm potuit quod optimum esset, judicare.*

Illud verò Sapientis in mente habendum, ne innitaris prudentiæ tuæ. Prov. 26 Item Illud, *vidisti hominem sapientem sibi videri, maioris illo spem habebit insipiens.* Quod autem ad eam cuiusque naturam consilium esse omne revocandum putat Cicero, id magna ex parte verum est. Nam, ut ipse prudentissimè præcipit, tenenda sunt sua cuique, non vitiosa, sed propria, quò facilius decorum illud quod quærimus, retineatur. Neque enim attinet naturæ repugnare, nec quicquam sequi, quod assequi nequeas. *Quæ contemplantur*, inquit, *expendere oportebit, quid quisque habeat sui, eaque moderari, nec velle experiri quàm se aliena deceant. Id enim quemque decet, quod est cuiusque suum maxime. Suum igitur quisque noscat ingenium, ac remque se & vitiorum & bonorum suorum judicem præbeat, ne scenici plusquam nos videantur habere prudentiæ: illi enim non*

optimas, sed sibi accommodatissimas fabulas elingunt. Multa in hanc sententiam addit magni utique momenti. Verum ut tantum negotium bene vertat, Deo imprimis est commendandum, & quod ille tribuit fortunæ, cujus in deligendo genere vitæ magnam vult habendam esse rationem, nos divinæ providentiæ tribuendum esse omnino arbitramur.

Illud enim a Sapiente dictum, Prov. 15. *Sortes mittuntur in sinum, sed à Domino temperantur*, latius patet quam vulgò credimus. Quæ enim nobis videntur fortuita, à divina providentia manare certum est. Idque maximè tenendum cum de vitæ genere deligendo, aut connubiis jungendis agitur. Nam, ut docet Sapiens ibid. c. 19. *domus & divitiæ dantur à parentibus, à Domino autem propriè uxor prudens.* Cum autem libido, avaritia, ambitio connubia conciliant, & opes cum opibus, non personæ ipsæ matrimonio junguntur, nulla æternæ salutis habita ratione, non mirum, si tot animi ægritudines ea consequantur connubia. *Fœcunda culpæ secula nuptias primum inquinare, & genus & domos.* Hoc fontè derivata clades in patriam populumque fluxit. Hinc illud apud Ethnicos pervagatum. *Mulier bene monata, dotata est satis.*

Quæ autem quisque sequi debeat maximè in eo vitæ genere quod delegit, quæ ratione vita sit constituenda, ut prudenter & constanter degatur, infiniti esset operis figillatim præscribere: quædam possunt regulæ generales afferri, quas summam perstringemus. 1. Ut finem in agendo bo-

num

um nobis præstituamus: sunt enim in re-
us agendis fines, quòd in disciplinis prin-
cipia. Ita finis quòd remotior, hòc magis
pectari debet: adeò ut in finem ultimum
emper collineare, & omnem vitæ cursum
ò dirigere, id sit prudentiæ caput. Quare
illud principii loco tenendum, nunquam
utile honesto, æquo iniquum anteponere,
quicumque futurus sit negotii eventus: ille
infelix non habendus, aut imprudens; qui
sibi benè conscius est; ac intuta ferè, quæ
indecora.

2. Illud quodque intuendum, ut nihil
temerè aggrediamur, nihil cujus causam
probabilem reddere non possimus. Quare
nihil ex præcipitatione, aut ex perturba-
tione agendum. Hinc Piso apud Tacitum
scelera impetu, bona consilia mora valescere.
Quodque suscipitur negotium, penitus si
fieri possit, est pernosendum. Nam si ali-
qua ex parte nos fugiat, diligentiam no-
stram facilè eludet.

3. Tenendi sunt mores eorum quibuscum
agimus, atque in hoc magna pars civilis
prudentiæ consistit, ut eorum ingenia, fi-
nes, actiones, studia, perspecta habeamus.
*Sicut aqua profunda, inquit Salomon, sic con-
siliium in corde viri; sed vir prudens exhauriet
illud.*

Variis autem modis hominum ingenia
perspici docet Angliæ Cancellarius. 1. Ex
vultu, ore, gestu, oculis, sermonibus. Vix
enim quisquam ita dissimulato est animo,
quin aliquando se ex motibus oculorum,
aut gestu, aut verbis prodat. Nemo occul-
tior fuit Tiberio, id tamen Tacitus notat,

quàm dissimili modo laudaret in Senatu Germanicum & Drusum . De Germanico loquebatur , *ut magis in speciem adornatis verbis , quàm ut penitus sentire videretur* . De Druso , *paucioribus , sed intentior , & fida oratione* . Et certè vix quisquam ita iussus & coactus loquitur , quin aliquando mens ipsa pelluceat : sive sermo sit solito solutior , aut comptior , aut aridior , aut eluctans , ut de eodem Tiberio observat Tacitus . *In aliis , inquit , erat velut eluctantium verborum ; solutius verò loquebatur , quando subveniret* . Ex sermone itaque homines quibuscum agimus , quantumvis se tegant , perspicimus : quod quædam ils excidant verba , aut ex improvviso , aut ex perturbatione animi : perpauci enim sunt ita reconditi , & arcani commissi tenaces , qui illud non prodant , vel ex iracundia , vel ex alio affectu : interdum ex imbecillitate animi , quasi ad se exonerandum cogitationes suas effundunt . Sæpè accidit ut simulatio simulationem excutiat : verùm id magis vafri est & astuti , quam prudentis . Undè hujus generis homines dum in id unum intenti videntur ut aliorum ingenia perspiciant , molles aditus , & tempora norint ; sæpè negotia ipsa superficie tenus , non intimè pernoscent . Atque utiliter adhibentur ad ea quibus jam assueti sunt , & usu contriti . At si hanc regulam adhibeas , qua stultus a sapiente secernitur , *mitte ambos ad ignotos , & videbis* , tum ab arte sua destituti apparebunt : tritas vias , non insolitas facile ingrediuntur .

Imbecilliorum ingenia & propensiones faci-

faciliùs perspiciamus : sed prudentiorum fines & intentiones rimari cogimur . Hinc cor Principis esse inscrutabile docet Scriptura . *Cælum sursum , & terra deorsum , & cor Regum inscrutabile* . Regum arcana venerari debemus , non scrutari . Cum enim ii sint in fastigio constituti , vix ullos habent fines sibi propositos , in quos vehementer & constanter nitantur . Sed privatus ferè nullus est , cui non sit aliquid propositum , quò tendat maximè ; atque hinc licèt con-
 jicere quid facturus sit . Vitia , ait Baco , discimus ab inimicis ; facultates & virtutes ab amicis ; mores & tempora a famulis , opiniones & studia a familiaribus . Fama popularis levis est ; superiorum judicia minùs certa : nam iis coram tectiores incedimus . Sed ut ait Tullius , *verior fama è domesticis emanat* . Huc verò tendit rerum quas aggredimur , & personarum notitia , ut quorum opera utimur , delectum majorem cum judicio faciamus , ac modum quemdam inter confidentiam , & dissidentiam nimiam teneamus . *Non omni homini cor tuum manifestes* . Eccli. 8.

4. Illud imprimis curandum ut nos ipsos , vires , facultates , defectus , & alia quæ ad nos pertinent , omninò perspecta habeamus . *Ad quas igitur res* , ait Tullius , *aptissimi erimus , in iis potissimum elaborabimus* . Sin aliquando necessitas nos ad ea detruserit , quæ nostri ingenii non erant , omnis adhibenda erit cura , meditatio , diligentia , ut ea si non decorè , at quam minimum indecorè facere possimus . Nisi enim vires propriæ expendantur , quid per nos ipsos , quid per ami-
 cos

cos facere valeamus, vix optatum finem consequemur. Nec solum finis nobis debet esse propositus, sed etiam modus progrediendi; circumstantiæ omnes tum ex parte rei agendæ, tum ex parte agentis, quæque aut promovere, aut impedire rei executionem possunt, in promptu habenda sunt; temporum occasiones captandæ, ne aut nimia cunctatio omne consilium pessundet, aut præcipitatio omnia perturbet. *Omni negotio tempus est, & opportunitas*. Eccl. 8. Item illud Prov. 19. *Qui festinus est pedibus offendit*. Hinc celeritas nimia, & affectata, negotia ut plurimum, tanquam præpropera digestio, corrumpit: ut nimia dilatio consilia sæpè facit irrita. *Qui observat ventos non seminat: qui considerat nubes, nunquam metet*. Eccl. 11. Nam qui ubique difficultates nescit in bonis operibus suscipiendis, nihil boni aggreditur: dum timet omnia, ratiocinio nimium tribuit, quod tamen sæpè fallit. Spartani olim, nunc Hispani ob tarditatem notantur. Hinc illud vulgatum, *veniat mors mea ab Hispania*; hoc est, cunctanter & tardè. Multa, ne dicam infinita in hanc rem dici possunt, quæ apud melioris notæ aucthores passim occurrunt: sed usu & experientia melius quàm præceptis discuntur.

ARTICULUS V.

Vitia prudentia opposita perstringuntur.

CUM virtutes omnes sint cum prudentia conjunctæ, nullum est vitium quod prudentiæ non opponatur. Speciatim tamen

tamen contra prudentiam peccatur, vel defectu, vel excessu. Citra modum peccari solet per imprudentiam & negligentiam. Illa ferè ignorance continetur. Atque ut ignoratio est venia aut vituperatione digna, ita & imprudentia. Vitio autem vertitur, cum prudentiæ actus deficiunt. *Sapientia callidi est intelligere viam suam: & imprudentia stultorum errans. Prov. 14.* *Isse in hac vita iustorum labor est, ut semetipsos inveniant. S. Greg. in Job. l. 11. c. 21.* Sic præcipitatio consilium, inconsideratio iudicium, inconstantia præceptum, seu imperium lædit. In præcipitatione deliberatio sufficiens omititur; per inconsiderantiam temerè & rebus non satis diligenter inspectis, ad finem consequendum media minùs apta seliguntur: tum enim animus in contrarias cogitationes distractus,

Æstuat & vitæ disconvenit ordine toto.

Plerosque ait Seneca, nihil certum sequentes vaga & inconstans, & sibi displicens levitas per nova consilia jactavit. Alii, ut eodem loco nempe l. de Brevitate vitæ, paucis verbis exprimit quod magnæ hominum parti accidit; *Operosè nihil agunt.* Quò enim tendant, ne advertunt quidem.

Quamobrem ut pulchrè admonet Tullius, danda est opera ne quid temerè ac fortuito, inconsideratè, negligenterquè agamus. Et quidem mentis celeritas, intelligendi perspicacitas, & ingenii flexibilitas sunt ejusmodi ut quas attulimus imprudentiæ partes, plerumque occultent. Sic tardo gravitatem, ignavo lenitatem præteximus. Nam

Sæpè latet vitium proximitate boni .

Atque in hoc magna pars vulgaris prudentiæ versatur , ut defectus nostros cum opus est , occultemus : sive eam adhibendo cautionem , ut iis rebus abstineamus , quibus pares non sumus ; sive defectus ipsos in bona convertamus . Ex iis quippè , velut ex venenis Theriaca , ita quædam virtutes componuntur , ac prudentia eos aptè permiscet , & temperat. Silentium plerumque prudentiæ videtur argumentum . *Stultus quoque si tacuerit , sapiens reputabitur , & si com- presserit labia sua , intelligens .* Prov. 17. Nihil enim magis stultitiam prodit , quàm linguæ velocitas & intemperantia . *Vidisti hominem velocem ad loquendum , stultitia magis speranda est , quàm illius correctio .* Prov. 29. Et eodem in loco , *Totum spiritum suum profert stultus : sapiens differt , & reservat in posterum .* Stultus , inquit S. Bern. *similis est canali aut aqueductui , qui se omninè evacuat : sapiens lacui , qui cum impletus fuerit , aquam aliis communicat .* Ac Prov. 25. *Sicut urbs patens , & absque murorum ambitu , ita vir qui non potest cohibere spiritum suum .*

Sic præcipitatio facilè in celeritatem , aut strenuitatem principibus viris adeo gratam convertitur. *Vidisti , inquit Sapiens , virum velocem in opere suo : coram Regibus stabit , nec erit inter ignobiles .*

Non dissimili ratione flexibilitas animi , quæ inconstantia proxima videtur , ad prudentiam politicam maxime pertinet. Nihil enim est quod ad res gerendas majori sit impedimento , quàm illud , *idem manebat , neque idem decebat .* Quamobrem ingenium versatile ,

tile, quale in Catone majore fuisse Livius testatur, non imprudentiæ, aut inconstantiæ, sed reconditæ cujusdam prudentiæ plerumque est argumentum.

Negligentia quoque prudentiæ opponitur: negligens quippè, ut placet Isidoro, dicitur, quasi nec eligens, cum scilicet quid faciendum sit, vel fugiendum non ignorat: sed præ socordia id illi curæ non est; rem producit quantum potest: quod utique laborem non minuit, sed auget. Nam ut diligentia munit viam, & faciliorem præbet: sic pigritia efficit, ut quasi per sentes & impedita itinera semper sit ingrediendum. Hinc Sapiens, *iter pigrorum, quasi sepes spinarum*; quod pigritia sit in fine laboriosa. Illud utique in familia regenda videre est. Nam si cura adhibeatur, & providentia, placidè omnia & citra tumultum procedunt; sin hæc defint, ubi quid insolitum supervenerit, simul omnia agenda sunt, servi tumultuantur, cuncta confuse & perturbatè fiunt. *Qui mollis est & dissolutus in opere suo, frater est sua opera dissipantis*. Prov. 18. Et alibi, *Stultus complicat manus suas, & comedit carnes suas, dicens, melior est pugillus cum requie, quàm plena utraque manus cum labore, & afflictione animi*. Eccl. 3. Et Eccl. 18. *Homo sapiens attendit ab inertia*. Atque ut rectè observat Author recens & disertus, ingenium erectum, bona indoles, fortis animus, instar ignis, motu & actione conservantur, otio & inertia extinguuntur.

Quæ prudentiæ modum excedunt, sunt.
1. Prudentia carnis, quæ in bonis corporis

poris ultimum finem constituit. 2. Nimia bonorum temporalium sollicitudo: sive ea instar finis habeantur, sive neglectis bonis spiritualibus, aut nimia anxietate expetantur. *Conturbat domum suam qui sedatur avaritiam.* Prov. 15. Et c. 16. *Qui altam facit domum, suam quarit ruinam.* Item c. 23. *noli laborare ut dixeris, sed prudentiæ tuæ pone modum.* 3. Est astutia, cum i. iis adipiscendi perversæ rationes excogitantur: cumque astutiam dictis exequimur, dolus; cum factis, fraudis nomen obtinet. *Non est sapientia, non est prudentia, non est consilium contra Dominum.* Prov. 21. Et c. 18. *Verba bilinguis quasi simplicia & ipsa perveniunt usque ad interiora ventris: eos enim amare se fingit, quos vult perdere.*

Q U Æ S T I O III.

De fortitudine.

Fortitudo definitur a M. Tullio, *considerata periculorum susceptio, & laborum perperessio*: ab Aristotele, *mediocritas inter timorem & præfidentiam constituta*. Subjecta enim fortitudini materia sunt ea quæ in vita habentur mala, pericula nimirum, labores, adversa fortuna, quibus omnibus fortis animus non frangitur: sed contra se obfirmat, iisque invicto & inflexo animo resistit.

Duo sunt actus fortitudinis, aggressio, & periculorum susceptio, aut malorum perperessio: sed aggressio constans sit & consultata, non temeraria. Nam fortis est qui & periculum novit, neque id amat; ubi
adeun-

adeundum est, nec recusat. Non enim, ut pulchrè Seneca ; fortitudo est inconsulta temeritas, nec periculorum amor, nec formidabilium appetitio: diligentissima in tutela sui fortitudo est, & eadem patientissima eorum quibus falsa species malorum inest. Nec fortitudinem æstimare debemus ex viribus corporis, aut ex inconsulta temeritate, sed ex constantia, & firmitate animi, atque ex fine honesto, in quo justitia ipsa eluceat.

Hinc optimè M. Tullius, *ea animi elatio qua cernitur in periculis & laboribus, si justitia vacat, pugnatque non pro salute communi, sed pro suis commodis, in vitio est: non enim modò id virtutis non est, sed potius immanitatis omnem humanitatem repellentis*. Itaque probè definitur a Stoicis fortitudo, cum eam *virtutem esse dicunt propugnantem pro equitate*. Quòcirca nemo qui fortitudinis gloriam consecutus est, insidiis & malitia laudem est adeptus. Nihil enim honestum esse potest, quod justitia vacat: idque cum ex Platonis testimonio, tum ex communi hominum sensu idem Author confirmat. Itaque *viros fortes, magnanimos, eosdem bonos, simplices, veritatis amicos, minimèque fallaces esse volumus: quæ sunt, ex media laude justitiæ*.

His consentanea Aristoteles tradit, cum docet ferinam esse, non veram fortitudinem, quæ est inconsulta, aut honesto fine non dirigitur. Quamquam idem fatetur nullum esse majus calcar ad pericula subeunda, quàm iram: ab ea tamen cavendum esse maximè, cum plerumque sit inconsiderata, subindè nos admonet.

Par-

Partes fortitudinis vulgò numerant, magnificentiam, magnanimitatem, constantiam & patientiam. Sed non video cur magnificentia, quæ circa sumptuarias actiones, ut liberalitas occupatur, ad fortitudinem referatur. Magnanimitas verò a fortitudine, non re, sed nomine discrepat: cum fortitudo in rebus arduis & difficilibus tum adoriendis, tum perferendis versetur.

Sic constantia, seu longanimitas nihil aliud est quàm fortitudo, quæ ex temporis diuturnitate nomen sortitur. In constantia animus se obfirmat, seu ut constanter velit, quæ sapienter sunt judicata; seu potius ut semper velit, & exequatur, quæ ratio & æquitas postulant. Non autem ea in pertinacia quadam inflexibili posita est. *Vir impius procaciter obfirmat vultum suum; qui autem rectus est, corrigit viam suam, Prov. 21. Et c. 24. Qui mentis est dura, corrumpit in malum, Quæ enim bona sunt, secùs aliquando futura sunt.*

Illud quoque ad constantiam videtur pertinere, nec adversis frangi, nec prosperis corrumpi: sed utramque fortunam equo animo ferre. *Magnæ felicitatis est, à felicitate non vinci. Aug. in ps. 50. Nam prosperitas stultorum perdet illos, Prov. 1.*

Cum in perferendis laboribus, aut petiendis malis fortitudo perseverat, patientia nominatur. *Melior est patiens viro forti, & qui dominatur animo suo, expugnatore urbium, Prov. 15. Fortitudo hostes repellit extraneos, patientia domesticos, affectus nimirum, & perturbationes animi, Non contrista-*

tristabit iustum quidquid ei acciderit : impii autem replebuntur malo . Quidquid enim accidit iusto exterius est; animum ipsum non penetrat. *Quasi tristes*, ait Apost. *semper autem gaudentes*; sed impios tristitia altè pervadit, etiam cum felices videntur, aut ab eo statu excidunt, quem felicem putant. *Aufertur foris*, inquit Aug. *quod nitebat*; non remanet intus, nisi fumus malæ conscientie.

Hoc loco solent quærere an nobilius sit se tueri, quàm aggredi. Ac communis est sententia fortitudinem in sustinendo magis elucere: quòd is qui aggreditur, cum eo pugnet, quem inferiorem existimat, contra atque evenit in eo qui se defendit. Huc accedit quod maxima in martyribus fuit fortitudo, quæ in perferendis & sustinendis suppliciis emicuit.

Quod autem ajunt nobilius esse agere, quàm pati; aggredi, quàm sustinere, id facile solvitur: cùm illa perpeffio non sine magna animi contentione fiat, quatenus is cum malis velut colluctatur, ut ea superet, aut leviùs ferat. Id etiam magni est roboris, sese adversùs mala quæ vitari non possunt, obfirmare. Undè vir fortis est interritus, & impavidus, non insanus tamen: *Quales*, inquit Aristoteles, *dicunt esse Celtas*, seu Gallos, *qui ne ipsos quidem terræ motus, aut procellas timeant*.

Ac de vitiis fortitudini oppositis nihil necesse est dicere, cùm ea sint manifesta, timiditas imprimis, & audacia. Sic magnanimitati, ut docet Aristoteles, opponuntur pusillanimitas, seu dejectio animi; & elatio, seu superbia, qua quis se mereri ma-
jora

jora quàm mereatur, existimat. Fortis ut plurimum est, benè sibi conscius animus; abjectus & timidus, quem mordet conscientia. *Fugit impius nemino persequente: Justus autem quasi leo confidens absque terrore erit.* Prov. 28. Id visum est in martyribus, in quibus heroica fortitudo enituit. Nihil porro magis fortitudini repugnat, quàm vana & thraonica animi elatio. *Nubes & ventus, & pluvia non sequentes, vir gloriosus, & promissa non complens.* Prov. 25. Ac ferè evenit, ut qui se præ aliis extollunt, omnibus sint contemptui. Nam *superbum sequitur humilitas: spiritum humilem suscipiet gloria.* Prov. 29. *Contritionem præcedit superbia, & ante ruinam exaltatur spiritus.* Benè, qui dixit, hoc esse in animo superbiam, quod putredo & foetor est in cadavere; nullo enim modo ferri potest.

Sed nusquam magis fallunt vicia virtutibus finitima, quàm ubi de fortitudine, & robore animi judicamus. Sunt qui in rebus contrariis, ut Cicero animadvertit, *parum sibi consent, voluptatem severissime contemnant, in dolore sint molliores; gloriam negligant, frangantur infamia; atque ea quidem non satis constant.* Quæque dicitur constantia, aut robur animi, plerumque non aliud est quàm ars quædam dissimulandæ ægritudinis, & æstus, quibus mens agitur, intra pectoris septa coercendi, ne exterius se prodant. Et quidem ipsa Philosophia de malis, aut præteritis, aut futuris facilè triumphat, sed præsentibus opprimitur. Sunt qui calamitates non animi, sed ambitionis vi perferunt; ac sæpè heroes a vulgò hominum unius

unius vanitatis studio sejunguntur . Quod utique cernere est in iis quos diuturnæ calamitates frangunt , aut qui reflantis fortunæ ictibus perferendi sunt impares . Summa autem veræ fortitudinis est , idem agere remotis arbitris , quod in omnium conspectu ; in magnis periculis sibi constare , nec mentis tranquillitate , aut libero rationis usu dejici ; quæque magis sunt inopinata , & formidolosa pericula pacatè & imperturbatè excipere . Sed interdum quæ fortitudo vulgò dicitur , pudori , temperamento , vanitati referenda est accepta .

Q U Æ S T I O I V.

De Temperantia .

Temperantiæ nomine eam virtutem intelligimus , quæ corporeas voluptates moderatur , ac potissimum eas quæ gustu & tactu percipiuntur . Quare præcipuum hujus virtutis munus in eo positum videtur , ut præcipites affectus inhibeat , ut fortitudo tardiores excitat .

In hac virtute id quod decorum vocamus elucet maximè : quanquam id cum honesto ita conjunctum est , ut ab eo separari non possit . Nam ut scitè M. Tullius , *& quod decet honestum est ; & quod honestum est , decet . Est enim quiddam , idque intelligitur in omni virtute , quod deceat , quod cogitatione magis à virtute potest , quàm re separari* : Ut enim venustas , aut pulchritudo corporis secerni non potest a valetudine : sic hoc , de quo loquimur , decorum , totum quidem illud est cum

recundiæ nomine non intelligimus eam animi perturbationem, de qua suo loco dicemus, quæque suffusionem creat: sed quæ dedecus fugit, decori, seu honesti ipsius amore. Nam qui id quod decet & honestum est, amat, idem & dedecus fugiat necesse est. Vis autem decori, vel honesti in eo maximè posita est, ut quæ apta sunt illi personæ, quam vel a natura, vel a voluntate nostra, & delectu induti sumus, convenienter agamus. *Ut enim pulchritudo corporis, ait Tullius, apta compositione membrorum movet oculos, & delectat hoc ipso quod inter se omnes partes cum quodam lepore consentiunt: sic hoc decorum, quod elucet in vita, movet approbationem eorum quibuscum vivitur, ordine & constantia, & moderatione dictorum omnium, atque factorum.* Hinc Sapiens, *non decent stultum verba composita.* Prover. 16.

Duæ sunt quoque species temperantiæ, sobrietas & castitas: sobrietas in cibo & potu versatur. Nec illud necesse est ut hoc loco de sobrietate aut castitate fusiùs dicamus: cum illud manifestum sit, in hoc sobrietatem vel abstinentioniam versari, ne modus excedatur, ne quantitate aut qualitate peccetur; ne ultra famem aut sitim, quæ sunt mensuræ a natura constitutæ, cibum, potumve capiamus. Quin enim, si propriè loqui volumus, sobrietas ipsa ferè in eo posita est, ut anxie cibos non expetamus, cum absunt, nec avidè sumamus, si adsint. Uno verbo ut liceat nobis cum Apost. Philip. 4. dicere: *Ego enim didici, in quibus sum, sufficiens esse.* Scio & bu-

humiliari, scio & abundare; ubique, in omnibus institutus sum, & satiari, & esurire; & abundare, & penuriam pati. Hinc discimus; inquit Aug. l. 16. de Civit. Dei cap. 37. in vescendo non cibi genere, sed aviditate immoderata quemque culpandum. Et alibi q. in Evang. l. 2. q. 11. Nihil interest vel quantum alimentorum pro congruentia hominum, atque personæ suæ, & pro suæ valetudinis necessitate quis capiat, sed quanta facilitate, atque serenitate animi careat, cum his vel oportet, vel etiam necesse est carere.

Illud verò Sapientis præceptum in mente habendum. *Noli, inquit, esse in conviviis potatorum; quia vacantes potibus & dantes symbola consumentur, & vestietur pannis dormitatio. Prov. 23. Hoc ipsum eodem in loco fortius inculcat. Cui vae? cuius patri vae? cui sine causa vulnera? nonne his qui commorantur in vino, & student calicibus epotandis? Vinum quippè, ut eadem Sapientia nos docet, ingreditur blandè, sed in novissimo mordebit ut coluber, & sicut regulus venenum diffundet. Item c. 23. Iustus comedit, & replet animam; venter autem impiorum insaturabilis.*

Præcipuum verò castitatis instrumentum & munimen est sobrietas; tum occupatio honesta & sedula, quæ mentem aliò deflectit. Nam in hoc genere certaminis fugiendo vincimus, nec quicquam animum magis ad resistendum facit imbecillem, quàm otium illiberale. Illud non prætereundum puto, quod a Tacito breviter & nervosè dicit, cum causas affert cur Germanæ mulieres adèd sint pudicæ, quod nullis, inquit, spectaculorum illecebris, nullis conviviis irritationibus sint corruptæ. Nemo
enim

enim illic vitia ridet, nec corrumpere & corrumpi seculum vocatur. Verum ista leviter attingimus, quod passim occurrant. Id verò Sapiens sæpè juvenes admonet, ut hos laqueos effugiant: ut Eccl. c. 7. Et inveni amariorem morte mulierem, quæ laqueus venatorum est, & sagena cor ejus: vincula sunt manus illius. Qui placet Deo effugiet eam: Qui autem peccator est, capietur ab illa, Salomon ipse in sapientia sua. Sampson in fortitudine, David in sanctitate hos laqueos non effugerunt. Sit ergo lapsus majorum, tremor minorum. Aug. in Psal. 50.

Addit Ecclesiastes eodem in loco. *Virum de mille unum reperi, mulierem ex omnibus non inveni; hoc est, unum ex mille virum inveni, cujus consuetudo mihi esset utilis: Sed nullam ex mulieribus: nam periculosa est earum familiaritas. Ubi advertit Hieronymus, personam cum persona non comparari: sed periculum cum periculo. Nam ut Salomon, Prov. 6. pulchrè nos admonet, nunquid potest homo abscondere ignem in sinu suo, ut vestimenta illius non ardeant, aut ambulare super prunas, ut non comburantur plantæ ejus? Optimè Aug. perversa familiaritas hæc, & falsa securitas. Hinc Sapiens, averte faciem tuam à muliere compta. Idem c. 25. ne respicias in mulieribus speciem, & non concupiscas mulierem in specie. Quod etiam eò pertinet, ut qui matrimonio jungi volunt, mores potius quam formam mulieris quærant. Nihil est enim copulatus, ait Cicero, quàm morum similitudo bonorum. At sæpè evenit, ut superbus animus cum egregia forma conjungatur; species transit, manet superbia.*

Sed ne longiores simus in colligendis

Scripturæ locis, quæ continentiam perluadent, id unum altè est menti infigendum. Donum Dei esse, idque a Deo indefinenter postulandum; *Et ut scivi quoniam aliter non possem esse continens, nisi Deus det; & hoc ipsum erat sapientiæ, scire cujus esset hoc donum, adii Dominum & deprecatus sum illum, & dixi ex totis præcordiis meis.* Sap. 8.

Reliquæ partes temperantiæ quas *potentiales* vocant, sunt mansuetudo & modestia, de quibus hoc loco, ut par esset, differere non possumus. Mansuetudo ad fortitudinem, & temperantiam æquè revocari potest, quatenus iram moderatur; eamque compescit, non excitat: undè & defectui quàm excessui vicinior est, & ad ignoscendum, quàm ad ulciscendum propensior: nec ferè alia est virtus quæ hominem magis deceat: ut nihil est quod homines magis oderint quàm animum implacabilem, & ultionis cupidum.

Mansuetudinis species sunt clementia & misericordia: illa definitur a Seneca *lenitas superioris erga inferiorem constituendis pœnis*: huic opponuntur indulgentia & atrocitas: sic tamen ut clementia sit indulgentiæ propior. Atque ea virtus cum omnes homines decet, tum principes viros maxime amabiles efficit: præsertim cum venia sine periculo concedi potest, nec quicquam est quod timeatur. Nihil, inquit Cicero, *laudabilius, nihil magno & præclaro viro dignius placabilitate, atque clementia. Et tamen, ut ipse ait, ita probanda est mansuetudo, aut clementia, ut adhibeatur reipublicæ causa severitas, sine qua administrari civitas non potest.*

Om-

Omnis autem animadversio & castigatio contumelia vacare debet, neque ad ejus qui puniunt aliquem, aut verbis castigat, sed ad reipublicæ utilitatem referri. Paucioribus verbis Sapiens: sed magis nervosis id ipsum exprimit: Misericordia & veritas custodiunt Regem, & roboratur clementia thronus ejus. Prov. 20. Superiori capite illius providentiam insinuat, Rex qui sedet in solio judicii, dissipat omne malum intuitu suo. Justitiam cum clementia conjunctam exhibet c. 16. Abominabiles regi qui agunt impie: quoniam justitia firmabitur solium.

Misericordia est clementiæ affinis, & sæpè cum ea confunditur. Duo tamen intellectu suo complectitur, animi ægritudinem ob alienas miseras, & miseriarum levamen. Stoici ægritudinem illam in sapientem cadere, aut eum aliena miseria affici negabant. Undè & misericordiam; quatenus est animi affectus, pusilli animi vitium appellabant: quod nihil misero profuit angere animo, sed ille potius sine ægritudine vel anxietate sit sublevandus. Verùm ii omnem videbantur humanitatem ea ratione repellere; nec ferè quisquam alteri præstaret auxilium, nisi misericordiæ motu afficeretur. Atque hæc humanitatis affectio sic animum movet, ut eum non discruciet, sed grata & homini maxime propria motionem percellat. Hinc Sapiens, justus, inquit, miseretur animæ jumenti sui, sed misericordiæ impiorum crudeliter. Cum scilicet, inquit Baco, scelertis & facinorosis parcitur: tum enim misericordia universum facinorosorum exer-

citum concessa impunitate armat in homines innocentes.

Hanc virtutem passim commendat Sapiens. *Benefacit animæ suæ vir misericors ; qui autem crudelis est, etiam propinquos abjicit.* Prov. 11. Et c. 21. *Qui obturat aurem suam ad clamorem pauperis , & ipse clamabit , & non exaudietur* - Item cap. 19. *Fœneratur Domino , qui miseretur pauperis , & vicissitudinem reddet ei.*

Modestia , quæ pars est altera temperantiæ , in neglectu honoris, aut immeriti, aut affectati consistit . Non enim solum ille modestus dicendus est , qui cum parva mereatur , non multum sibi tribuit , uti Aristoteles definit : sed etiam is qui magna meritis, honorem tamen non exigit . Sic magnanimus non is est , qui magna meritis, de se magnifice sentit : id enim est vanitatis cujusdam , & quasi exquisitus ambitionis sensus : sed qui magis ad magna facienda nititur, quàm se multum mereri existimet ; & delatos honores aut recusat , aut verecundè admittit ; nec merita ostentat , & quos meretur honores non affectat . Nec pusillanimitas in eo posita est , ut quis se minora quàm mereatur, mereri putet : id enim est modestiæ & humilitatis : sed cum quis magna aggredi reformidat . Et sanè ut vana meritorum ostentatio omnibus est exosa , sic modestia probatur omnibus . Neque is modestus habendus est , qui nihil interesse putat an aliquid probro, vel honore dignum sit : id enim est impudentis, non modesti hominis & verecundi . Nam his & præclare agit , & bonorum judicium
non

non negligit . Quòd si in dignitate est constitutus, dignitati suæ debitum honorem tuetur ; ac demum externum honorem non penitus negligit , sed insolenter non ambit . *Finis modestiæ timor Domini , divitiæ , & gloria & vita .* Hæc enim si virtus erit , non exterior tantummodo futura est , sed ex timore Dei profluet . Hæc linguam , actiones , incessum moderatur . Linguam imprimis regit . *Nam sapiens in verbis , se ipsum amabilem facit .* Eccli. 20. *Ac responsio mollis frangit iram : sermo durus , suscitatur furor .* Prov. 15. Ubi enim in animo tumet superbia , in ore statim se prodit . *Lingua placabilis .* Hebraicè , *lingua sana , lignum vitæ .* Hæc enim iram extinguit , tristitiam pellit , & animæ tranquillitatem affert .

Verùm ipsa humilitas , quæ ad religionem pertinet , quæque omnium virtutum est fundamentum , cùm vera est & sincera , non fucata , non e mentita , hæc utique propria est Christianorum virtus , quam a Salvatore nostro accepimus ; *discite à me ,* inquit , *quia mitis sum & humilis corde .* Hanc virtutem ut aliarum custodem Sapiens passim commendat : ut in eo quem mox citavimus loco ; *timor Domini disciplina sapientiæ ; & gloriam præcedit humilitas .* Nisi enim gloria in humilitate fundetur , ruinæ erit occasio . *Ne sis sapiens apud te ipsum .* c. 3. Atque hæc virtutes , quæ veræ sapientiæ sunt foetus , etiam foris se produnt . *In facie prudentis lucet sapientia : oculi stultorum in finibus terræ .* Gravitas enim illa modesta quam passim Apost. commendat , *in integritate , in gravitate .* Tit. 2. est instar corporis ,

N 4 cujus

cujus anima est ipsa sapientia, & humilitas: hæc si desit, gravitas illa est velut larva virtutis. *Sapientia hominis lucet in vultu ejus*. Eccli. 8. Gravitas illa & modestia quæ ab anima in corpus, à corde in faciem se effundit, magnum est virtutis ornamentum. Cum dignitas oris, frons ferena, æquabilis modestia sint fœtus solidæ virtutis.

QUÆSTIO ULTIMA.

De Justitia.

Nunc de justitia paulò strictiore stylo dicendum, quòd multa quæ ad hunc locum pertinent, cum de regulis actionum humanarum agemus, diligenter à nobis sint explicanda. Quid sit justitia, quæ illius partes, quæ ei sint virtutes annexæ, quàm brevissimè exponemus.

ARTICULUS PRIMUS.

Quid sit justitia.

Iustitia latiore significatu virtutes omnes complectitur. Hoc verò loco usurpatur pro virtute quæ hominem perficit, quatenus ad alterum spectat, ut loquitur Aristoteles. (5. *Eth.* 3.) Nam cæteræ virtutes id quidem præstant, ut homo erga seipsum benè sit affectus. Justitiæ autem munus est, ut quis aliorum comparatione benè sit dispositus, cum in hominum societate tuenda, tum in tribuendo cuique suum. Unde

ut

ut Tullius docet, (1. *Offic.*) *in hac virtute est splendor maximus, ex qua viri boni nominantur*. Nihil est enim quod homines magis ament & venerentur : atque ejus est tanta vis, quemadmodum alibi docet, *ut ne illi quidem qui maleficio & scelere pascentur, possint sine ulla particula justitiæ vivere*.

Definiri solet *constans & perpetua voluntas jus suum cuique tribuendi*. Quod dicitur voluntas constans & perpetua, id non solam voluntatis actionem, nec facultatem quæ hoc nomine solet appellari, sed affectum ipsum, aut habitum designat. Non enim ille est justus qui justa, sed qui justè, hoc est, qui ex affectu justitiæ agit, ut identidem innuit Aristoteles.

Quod additur; *jus suum cuique tribuendi* : juris nomine propriè intelligitur æqualitas illa, quæ justitiæ propria est, quæque est illius mediocritas inter plus & minùs constituta. Undè & æquitatis nomen fortè ductum est, quòd jus æqualitatem inter res inæquales ponat : de qua æqualitate postea. Hinc qui ambigunt de re aliqua, ad judicem confugiunt, quòd judex, ut pulchrè Aristoteles, sit jus quoddam animatum; ac ipsum quærunt, quasi medium, aut potiùs mediatorem : *judex enim*, inquit, *exæquat, dum velut linea in duas partes inæquales secta, quo major pars dimidium excedit, illud detrahit, & ad partem minorem addit*.

Ex quo intelligitur talionem, seu perpeffionem reciprocam non esse jus simpliciter dictum. Neque enim fit æqualitas, si

majori parti detrahas, & minori nihil adjicias; nec damnum refarcitur, cui dens avulsus est, si dentem ei qui hanc intulit injuriam, avellendum jusseris: sed damnum, quantum fieri poterit, aut pecunia, aut alia refarciendum; præterquam si quis in Magistratu constitutus aliquem ex plebe percusserit, non propterea est referendus. *Nō dicas quomodo fecit mihi, sic faciam ei.* Prov. 24. Dictum fuit Judæis *oculum pro oculo, &c.* Sed ut ait Aug. in psal. 108. *Hæc si dici potest, injustorum justitia est.* Ultioni præscripti sunt fines, sed ea radicitus evulsa non fuit. Justum erat ut homo idem perferret supplicium, morali, ut diximus, talione: sed lex ipsa præscribere debebat, non homo læsus expetere: nedum seipsum ulcisci.

Jus porro non uno modo accipitur, 1. enim sumitur pro lege quæ cuique suum præscribit. 2. Jus dicitur scientia Juris, quàm Celsus definit, *artem boni & æqui.* Ille enim verè est peritus juris, qui non solum leges memoria complectitur, sed qui vim legum sic tenet, ut eas ex æquo & bono possit interpretari. Nam, ut ait idem Celsus, *leges interpretandæ sunt benignius quòd eorum voluntas conservetur.* Hinc judex sæpè id jus constituit, non quod lex generatim, sed quod æquitas ipsa præscribit. Neque enim lex generalis casus omnes potest & circumstantias prævidere.

Hinc Aristoteles loco citato docet legem plerumque habendam, velut Lesbiam, aut plumbeam regulam, quæ sese lapidibus secandis accommodat: sic legem interdum

ad res ipsas inflecti, atque ex æquo & bono corrigi oportere.

3. Pro facultate agendi, aut possidendi, aut fruendi re aliqua jus propriè usurpatur: quo quidem sensu dicimus jus nostrum persequi, aut retinere, aut remittere; ac nihil est aliud quàm facultas aut potestas, aut dominium quoddam.

Quo utique modo jus acceptum variè dividi solet: aliud enim est jus naturale, aliud positivum, quod divinum est, vel humanum: ac de iis satis copiosè tractatu tertio disseremus. Item aliud est scriptum, idque aut Civile, aut Canonicum, aliud non scriptum, sed tacito populi consensu probatum: quod iterum vel communi gentium consensione, vel inveterata consuetudine receptum est. Atque hi sunt velut fontes, ex quibus jus, aut dominium, aut facultas de re aliqua disponendi profluit.

Verùm his omissis quæ nostri non sunt instituti; illud liquet, jus cuique proprium, seu a natura sit constitutum, seu pacto, aut lege firmatum sit, ante omnem justitiam existere; cumque id violatur, tum fit injuria. Voluntas illa suum cuique tribuendi, justitia dicitur, quatenus jus restituit, & injuriam emendat: opus justitiæ jus quoque dicitur, sed restitutum, & quasi secundarium. Itaque illud ad juris prudentiam pertinet, jus illud quod cuique competit, quodque in juris violati compensatione sit reponendum, pervidere. Id æquum, quasi æquale nominatur. Hinc Cicero. *jus semper quæsitum est æquabile, neque enim aliter esset jus.*

ARTICULUS II.

Partes justitiæ subjectivæ afferuntur.

PRima & summa justitiæ divisio est in generalem, seu legitimam, & specialem. Illa omnium virtutum functiones videtur præscribere, quatenus eæ ad alterum spectant. Specialis erit justitia, quæ ita est ad alterum, ut ad alias virtutes referri non possit.

Alii justitiam legalem eam esse volunt, quæ ad bonum publicum, & communitatis spectat, ut particularis uniuscujusque bonum promovet. Illa cum in omnibus civibus viget, tum in iis maximè qui præsunt, ut in legislatore, tanquam in architecto, & in magistratibus, qui personam publicam civitatis sustinent. Est enim, inquit Cicero, *proprium munus Magistratus intelligere se gerere personam civitatis, debereque ejus dignitatem & decus sustinere, servare leges, jura describere, ea fidei suæ commissa meminisse. Privatum autem oportet æquo & pari cum civibus jure vivere, neque summissum & abjectum, neque se efferentem; tum in rep. ea velle, quæ tranquilla & honesta sunt.* Paulò superiùs Magistratus admonet, ut duo Platonis teneant præcepta; unum, utilitatem civium sic tueantur, ut quidquid agunt, ad eam referant, obliti commodorum; alterum, ut totum corpus reip. curent, ne dum partem aliquam tuentur, reliquas deserant.

Justitia specialis duplex est, distributiva & com-

& commutativa; illa in præmii, ut honoris, aut pecuniæ distributione, pro meritis & conditione personarum, quæ ejusdem reipub. aut societatis sunt participes, hæc in contractibus & conventis, ut in emptione & venditione consistit. In utraque fit exæquatio quædam, sed in justitia distributiva servatur analogia, seu proportio Geometrica. Nam & homines & eorum merita penes virtutem, aut nobilitatem, vel censum, munera & dignitates spectantur: aded ut hæc proportio ita instituat; ut se habet unius meritum ad alterius, sic illius præmium ad istius præmium itidem se habeat. Undè Aristoteles innuit, *exinde prælia, querelasque existere, dum aut æquales non æqualia, aut non æquales æqualia sortiuntur.*

In justitia commutativa non homines, aut merita pensantur, sed commutationes ipsæ, aut lucrum, vel damnum. Undè in ea medium, seu æquum inter majus & minus in proportionem Arithmetica consistit: ut excessus majoris suprâ medium sit equalis excessui medij suprâ minus, extremum. Ut si dixerimus, quemadmodum novem se habent ad sex, ita sex ad tria. Est enim idem utrimque excessus: Non dissimili ratione in justitia commutativa tantum ex lucro uni adimitur, quousque ad medium perveniatur, quo damnum alterius refarciri possit. Undè qui ambigunt de hoc medio, ad Judicem, tanquam ad jus animatum confugiunt.

De hoc justitiæ aut injustitiæ genere intelligi debent illa Sapientis oracula. *Sta-*

*tera dolosa abominatio est apud Dominum : & pondus equum voluntas ejus. Prov. 11. & c. 20. Pondus & pondus, mensura & mensura : utrumque est abominabile coram Deo . Quod utique ad omnem vitæ rationem pertinet. Nam ubi res nostra agitur, tum amor nostri bilancem sæpè deprimit : contra accidit, cum Dei aut proximi habetur ratio . Sic in ementibus, & vendentibus plerumque multum avaritiæ, mendacii, dissimulationis & injustitiæ admiscetur . *Malum est, malum est, dicit omnis emptor ; & cum recesserit, tunc gloriabitur . Ibid.* Illud verò animo altè infigendum quod Sapiens c. 11. admonet . *Alii dividunt propria, & ditiores fiunt : alii rapiunt non sua, & semper in egestate sunt .**

Justitia autem distributiva jus respicit quod meritum cuique tribuit : estque aut communitatis, aut ejus qui præest, ad privatos habitudo quædam. Sed commutativa privatis conventis, aut pactis nititur; eaque est privati ad privatum .

Justitia vindex ad utramque videtur pertinere : ad distributivam, quæ ut præmia, sic pœnas pro meritorum, aut criminum ratione præscribit; ad commutativam quoque pertinet, quatenus quæ in contractibus, aut in commerciis peccata sunt, emendat, & supplicia pro criminum ratione præscribit . Per eam quippè civis cum cive, privatus cum privato pacatè & tranquillè vivit, atque omnis arcetur injuria.

Id verò est boni judicis non personæ, sed causæ rationem habere . Nam *cognoscere personam in judicio non est bonum. Prov. 27. Mul-*

tò minùs is muneribus aut donis se corrumpi finet : nam specie liberalitatis, quæ spontanea videtur , licèt coacta sit , expletur avaritia : Nec phantasma honoris , quod sibi vanitas fingit, omninò obstat quominùs justitiæ vis quædam inferatur . *Victoriam & honorem acquirit qui dat munera : animum autem aufert accipientium* . Prov. 22. Hac enim ratione specie honesti venditur justitia : & citra vanitatis pudorem expletur cupiditas . Nec tamen aut pietas , aut honestas hoc genus commercii probant .

Verùm hoc loco duo quæri solent, unum an volenti fieri possint injuria , alterum an Judex cui justitia vindex credita est , teneatur juxta allegata & probata , etiam contra propriam scientiam judicare . Sit itaque

Prima Conclusio .

Volenti propriè non fit injuria .

Prob. Ex Aristotele : aliud est facere rem injustam, aut damno aliquem afficere; aliud facere injuriam . Nam injustum quid possum facere, quod justum putem ; injuria verò non fit nisi animo nocendi . Undè quis potest spontè pati injustitiam, injuriam verò perpeti nisi invitus nemo possit: fit enim alicui injuria , cum agitur contra jus illius & legitimam potestatem : sed legitima cuiusque potestas aut jus est illius voluntas : ergo actu & de facto, seu, ut loquuntur , formalis injuria nemini nisi invito fieri potest : ex quo fit etiam ut nemo a seipso injuriam patitur .

Sed , *inquies* , cum quis pollicitationibus
lacta-

lactatur & blanditiis, aut metu compellitur, aut si ignorans decipitur, aut pūpillus, vel qui infirmo est ingenio in fraudem illicitur, huic licet volenti fit injuria : ergo volens injuriam pati potest.

Resp. Tum imperfectam esse voluntatem ejus qui aut præ ætate, aut præ ignorantia, aut præ ingenii imbecillitate decipitur ; quique damnum infert, dolo malo tenetur : tametsi damnum potiùs quàm injuriam alter pati videtur, quatenus sciens ac volens eam accipit.

Quærit etiam Aristoteles utrum graviùs sit pati injuriam, an facere.

Responsio facilis est, graviùs esse malum injuriam facere : id enim est cum injustitia conjunctum ; qui verò accipit injuriam, is vitio & injustitia vacat.

Qui verò alterum injuria afficit, illud a Sapiente dictum mente revolvat. *Qui calumniatur pauperem ut augeat divitias, dabit ipse ditiori & egebit.* Prov. 22.

Verùm circa justitiam vindicem major nos manet difficultas, an judex etiam in capitali sententia contra propriam scientiam ex allegatis & probatis judicare teneatur. Quæ quidem quæstio ut dirimi faciliùs possit, res est paulò ab altiori principio deducenda. Cum societas secura esse non possit nisi conventionibus & pactis mutuis firmetur, ea pacta, jura propriè dicuntur, nec citra injuriam violantur. Ac leges ab ejusmodi pactis initium duxere, cum scilicet id utile hominibus visum est, ut ait Plato, (2. de Rep.) pacisci mutuo ne facerent, paterenturque injuriam.

Pri-

Prima autem conventio ea videtur fuisse , qua suum cuique distribueretur ; deinde ne imbecilliores præda essent validioribus . Quam quisque habuit vindicandi facultatem , in multitudinem aut potius in eum qui præesset , transtulit , ut ille provideret , ne cuiusque jus violaretur . Hinc docet Aristoteles (*Lib. 5. Etb.*) nihil esse aliud principem , quam custodem juris . Judex verò aut magistratus in judicando principis locum tenet , & publicam personam gerit . His intellectis , fit

Secunda Conclusio.

Judex tenetur contra propriam scientiam in causa capitali juxta probata & allegata judicare , ex hypothese quod sententiam ferat .

Prob. concl. Judex publicam personam gerit , & publica potestate in judicando fungitur , tanquam instrumentum reipub. ut loquitur sanctus Thomas : ergo non ex propria , sed ex publica scientia , per testes nimirum , & probationes , non aliter ac si resp. adesset , debet judicare .

Confirm. Hoc est judicis officium jus dicere , non jus dare ; legem interpretari , non condere : ergo eodem modo judicare debet ac si adesset resp. ex publicis nimirum probationibus , instrumentis , ac testibus juxta illud Deuteron. 19. *In ore duorum aut trium testium stabit omne verbum* .

Tertia Conclusio.

Judex tenetur a ferenda sententia, si possit, abstinere, aut magistratum potius deponere, quàm in causa capitali innocentem contra propriam scientiam condemnare.

Prob. Conclusio Scripturæ autoritate, Exod. 23. Non audies vocem mendacii, nec sequeris turbam ad faciendum malum, nec in judicio plurimorum acquiesces sententia, ut à recto devias: Ergo si judex abstinere possit a ferendo judicio, tenetur id facere potius, quàm a recto præter conscientiam deviare. In eam quoque sententiam illud Prov. 17. adduci posset. Qui justificat impium, & qui condemnat justum, abominabilis est uterque apud Deum.

Confirm. Unum est quod judicem potest ad condemnandum innocentem compellere, publicæ nimirum tranquillitatis ratio: sed vix moraliter loquendo id usu venit, ut in discrimen veniat bonum publicum, si innocens absolvatur: ergo ubi judici liquet de accusati innocentia, omni quidem ratione is eniti debet, ut reum eximat, aut judicium non ferat, ac potius abdicare magistratum debet, quàm in fontem morti addicere. Id enim ad judicis officium maxime pertinet ut vim & dolum prohibeat; ne judicium, ut ait Scriptura, vertat in absinthium; ne leges præsertim pœnales durius interpretetur: sunt enim laqueorum imبری non dissimiles, quibus illud Psal- tis Regis aptari potest, Pluet super eos la- queos:

quos : ac demum ne sit sui juris aded ignarus ; ut nesciat sanum & prudentem legum usum & applicationem ad se pertinere .

Diluuntur objectiones .

Oppon. 1. Viam sceleribus apertum iri , si liceat judici a ferenda sententia abstinere ; ac corruptus judex id obtendet se contra propriam scientiam non posse infontem condemnare .

Resp. Undique esse incommoda , & angustias , sed minima de malis esse eligenda : præcipuè cum publici boni ratio non urget . Nam ut ait Sapiens, (*Prov. c. 25.*) *fons turbatus pede, & vena corrupta est, justus cadens coram impio* . Injurix inter privatos velut rivulos inficiunt , sed iniqua judicia , quibus infontes condemnantur , velut fontes justitiæ corrumpunt . Quare judex potius officium aut magistratum abdicabit , quàm jus naturale violet , & infontem condemnnet .

Opp. 2. Sacerdos tenetur Eucharistiam administrare vel iis quos indignos noverit : ergo a pari qui personam gerit publicam , potest & debet interdum contra propriam scientiam agere .

Resp. dist. conf. Dummodò nulli ferat injuriam , C. secus , N. in administratione autem Eucharistiæ nulli fit injuria . Nam volentibus præbetur sacramentum ; idque exemplo Christi Domini qui suum corpus proditori in extrema Cœna præbuit manducandum . Quare illud Modestini in Digestis

gestis (*L. 25. ff. de leg.*) tenendum videtur ,
*nulla, inquit, juris ratio, aut æquitatis benigni-
 tas patitur, ut quæ salubriter pro utilitate homi-
 num introducuntur, ea nos duriorè interpretatio-
 ne contra ipsorum commodum producamus ad se-
 veritatem.* Ac demum æqui & boni ratio
 interdum impedire debet ne summum jus
 in summam injuriam convertatur, & natu-
 ralis æquitatis ratio maximè habenda est,
 ne nimis callida, ut loquitur Cicero, & ma-
 litiosa juris interpretatio eam destruat.

Inst. Judex sequi debet scientiam publi-
 cam, non privatam.

R. dist. ant. Sequi debet scientiam publi-
 cam, ut judicet, C. ut abstineat à judi-
 cando, N.

Contra, inquiunt, dux non debet abstinere
 ab expugnanda urbe, in qua innocentes
 occiduntur: ergo nec Judex tenetur à ju-
 dicando abstinere.

Resp. Disparem esse rationem: id enim
 ad officium Judicis pertinet ut servet in-
 fontem. Sed ducis officium est, ut ur-
 bem expugnet: etiamsi multi in ea sint in-
 fontes, qui in oppugnatione, imò &
 fortè in direptione occiduntur. Quod uti-
 que est accidens, & præter intentionem
 ducis, qui injuriam publicam ulciscitur,
 aut repellit.

A R T I C U L U S III.

Partes justitiæ integrales perstringuntur.

DUæ sunt partes justitiæ vulgò integra-
 les dictæ, quæque ad exercendos ju-
 stitiæ

justitiæ actus sunt necessariæ: eæ autem sunt bonum facere, & à malo deflectere. Idque non absolutè intelligendum videtur: hoc enim virtuti omni commune est, sed comparatè ad eos quibuscum societate conjungimur, ne cui damnum inferamus, & illatum resarciamus. Nam singularis justitia in eo maximè versatur, ut unusquisque alium suo jure frui patiatur: quemadmodum suo ipse jure frui vult; nec publica justitia ob aliam rationem fuit instituta, quam ut ii coerceantur qui singularem justitiam non tuentur. Hinc Apostolus docet *justo legem non esse positam*. Nam justus colit justitiam ob ipsius justitiæ reverentiam. Hinc illud Aristotelis responsum tanto Philosopho dignum refert Laertius qui cum rogaretur, quid ex studio sapientiæ emolumenti retulisset, *hoc*, inquit, *ut injussus agam, quæ alii non nisi metu legum agunt*. Itaque hoc cuique debet esse propositum, ut tam velit alteri jus ipsius, quàm suum sibi integrum esse; ut nihil agat præter societatis humanæ finem; in ea quippè societate aut nascitur, aut toleratur hac conditione, ut non quærat suam ex juris alieni detrimento utilitatem; ut communi reip. utilitate suam contineri intelligat.

A R T I C U L U S IV.

Partes justitiæ potentiales.

HÆ sunt justitiæ virtutes annexæ, quarum quædam sint æqualitati constituen-

stituendæ impares: ut religio erga Deum, pietas in parentes, observantia in eos qui aut dignitate, aut virtute sunt conspicui. Quædam non tam jure, quàm honestate continentur: quarum nonnullæ ad honestatem tuendam sunt omninò necessariæ, ut gratitudo animi, sinceritas, cum scilicet homo talem factis & dictis se exhibet, qualis est. Aliæ ad majorem honestatem exiguntur, ut liberalitas in divitiarum usu, affabilitas in rebus seriis, urbanitas in jocosis: quibus accedit mutua benevolentia, seu amicitia. De singulis, pro rei dignitate agere non possumus, cum de iis virtutibus Doctores sacri & profani multa scitu quidem præclara, sed intellectu facilia traderint: nos igitur perpauca ex infinitis propè attingemus.

De Amicitia.

Atque ut cæteras omittam virtutes, amicitia videtur propiùs ad justitiam accedere, quòd æqualitatem inveniat aut faciat. Est enim, ut ait Cicero, *voluntatum, studiorum, sententiarum summa consensus*. Atque ut ii qui sunt in amicitia, conjunctionisque necessitudine superiores, exæquare se cum inferioribus debent, sic inferiores dolere non debent a suis amicis, aut ingenio aut fortuna superari.

Vera autem amicitia est quam virtus vel morum honestas conciliat. Hæc enim sola constans est & perpetua; ac viri boni se invicem diligunt, reliqui non tam se mutuo, quàm suam quisque utilitatem aut volupta-

ptatem amant. *Nemo potest veraciter esse amicus hominis, nisi fuerit amicus veritatis.* Aug. Epist. 50. Hinc illud Prov. 13. *Qui cum sapientibus graditur, sapiens erit: amicus stultorum, similis efficietur.* Nihil enim altius in animos hominum penetrat, quam exempla amicorum. Sapientum exempla sunt instar vivi & spirantis libri.

Has autem amicitiae leges affert Cicero. Prima, inquit, lex amicitiae fanciatur, ut neque rogemus res turpes, neque faciamus rogati. 2. Ut amicorum causa honesta faciamus, ne expectemus quidem dum rogemur. *Ne dicas amico tuo, vade & revertere, cras dabo tibi: cum statim possis dare.* Prov. 4. Id quoque tenendum, *perde pecuniam propter fratrem, & amicum tuum: & non abscondas eam sub lapide in perditionem.* Eccli. 29. illius præclare dicti memineris, *hoc habeo, quodcumque dederò.* Noli, inquit Sapiens, *prævaricari in amicum pecuniam differentem.* Eccli. 7. 3. Ut ne criminibus aut inferendis delectetur amicus, aut credat illatis. *Occasiones querit, qui vult recedere ab amico: omni tempore erit exprobrandis.* Prov. 18. 4. Ne quid fictum sit aut simulatum; sed ne ipse quidem esse suspiciosus debet, semper aliquid existimans ab amico esse violatum. *Est amicus ad inimicitiam,* ait Sapiens. Sunt enim qui semper de amicis conqueruntur; ii morosi sunt, & facile se læsos putant. *Et est amicus, qui odium, & rixam & convitia denudabit.* Atque hoc amicorum genus est pessimum. *Quæ viderunt oculi tui, ne proferas in iuratio citò: ne postea emendare non possit.*

Postremò monendi sunt sæpè amici & objur-

objurgandi, & hæc accipienda amicè cum benevolè fiunt. Molesta, inquit Cicero, veritas est, si quidem ex ea nascitur odium, quod est venenum amicitiae: sed obsequium multò molestius; quod peccatis indulgens præcipitem amicum ferri finit. Omnis igitur hac in re adhibenda ratio & diligentia est, primum ut monitio acerbitate, deinde objurgatio contumelia careat: sed amicus blandè corripiat. *Meliora enim sunt vulnera diligentis, quàm fraudulentæ oscula odientis.* Prov. 7. Nam inimicus adulatur ut perdat, amicus vulnerat ut sanet. *Homo qui blandis fictisque sermonibus loquitur amico suo, rete expandit gressibus suis.* Prov. 29. Item. *Quomodo probatur in conflatorio argentum, & in fornace aurum: sic probatur homo ore laudantis.* Nam ut aurum purum igni resistit, & palea consumitur: Sic verè humilis & modestus laudibus obsistit, infirmus sibi blanditur, & manifestum facit, se auri quidem splendorem, non pondus & soliditatem habuisse. Illud itaque Sapientis consilium imprimis servandum. Eccles. 7. *Melior est à sapiente corripì, quàm stultorum adulatione decipi.* Nam ut scitè Aug. Columba amat, & quando rixatur; lupo odit, & quando blanditur: Et alibi plus persequitur lingua adulatoris, quàm manus intersectoris. in Psal. 50.

Hinc mollem amicum Salomon his verbis redarguit. *Melior est, inquit, correptio manifesta, quàm amor occultus.* Atque omnino fugienda sunt extrema vel adulationis, vel morositatis. *Qui laudat amicum surgendo manè voce alta, ait idem Sapiens,*

in do

erit

erit illi loca maledictionis . Nam laudes immodicæ , aut affectatæ , aut importunæ effusæ multum nocent . Parcæ & modestæ invitant præsentēs ut iis aliquid adjiciant : sed laudes nimix & profusæ ei qui laudatur conflant invidiam , & aliis qui non minus laude sunt digni , contumeliosæ videntur . Hinc illud Taciti, *peffimum inimicorum genus laudantes* .

Ex iis liquet quàm difficile fit verum & fidelem amicum invenire . *Amicus fidelis protectio fortis : qui autem invenit illum , invenit thesaurum* . Eccl. 6. Et eodem in loco *Amicus fidelis medicamentum vitæ , & immortalitatis : qui metuit Dominum , inveniet eum* . Nam est amicus secundum tempus , & non permanebit in die tribulationis . Hujus generis sunt qui potentum amicitiam ambiunt . Multi enim colunt personam potentis , & amici sunt dona tribuentis , Pr. 19. Et est amicus socius mensæ , & non permanebit in die necessitatis . Eccl. 6. Nam convivia plerumque fraudulentis & ingratis alendis serviunt . Uno verbo hæc duo Sapientis consilia ex animo nunquam excidant . 1. *Ne derelinquas amicum antiquum : novus enim non erit similis ei* . Recentes enim amicitix offendunt animum ; ut nova vestis , novi calcei semper molesti sunt , 2. *Non omni homini cor tuum manifestes* . Eccl. 8. Nam ut optimè animadvertit Scriptor Gallicus & elegans ; cum temerè amici arcana tibi credita detegis , simul amicitia , honor , justitia ex ore tuo excidunt : atque hoc tantum a bellua distas , quòd ea loqui non possit , tu tacere . Verba temerè emissa negotii exitum

sæpè inhibent. Tempus destruit quod factum est, lingua quod faciendum.

De observantia.

Ea est virtus qua homines dignitate, ætate, sapientia antecedentes reveremur, ac colimus, ut Cicero ipse definit. *Est igitur inquit, adolescentis majores natu vereri ex iisque deligere optimos & probatissimos, quorum consilio, atque auctoritate nitatur. Ineuntis enim ætatis inscitia senum constituenda & regenda prudentia est.*

Illud Principis Apostolorum præceptum tenendum. *Omnes honorate, fraternitatem diligite; Deum timete. Regem honorificate.* 1. Petr. 2. Item illud Pauli Apost. *reddite omnibus debita, cui tributum, tributum; cui honorem, honorem.* Rom. 13. Idque planius explicat eodem in loco Petrus Apost. *Subiecti igitur estote omni creatura propter Deum;* nempe ut cui honorem debemus, vel ob dignitatem, vel ob potestatem aut meritum, hunc observemus, & colamus. Quod si nihil eorum habeat, quæ observantiam nostram, aut honorem exigunt, tum illud Prophetæ obtinebit, qui inter viri boni dotes, hanc etiam adnumerat, quod impios nihili ducat. *Ad nihilum deductus est in conspectu ejus malignus.* Id ipsum disertè explicat S. Th. 2. 2. q. 63. art. 3. nempe honorem reddi ut quoddam virtutis testimonium, cui soli propriè debetur honos. Sed homo colitur non modò ob virtutem propriam, verum etiam ob alterius, cujus vicem gerit, excellentiam. Sic Principes,

pes, Magistratus, & Prælatos colere debemus, etiam si essent improbi; quod aut Dei ipsius aut civitatis personam gerant. *Sive Regi, aut inquit Apost. quasi præcellenti, sive ducitur tanquam ab eo missis ad vindictam malefactorum, laudem verò benefactorum.* Sic parentes coluntur, imo & senes, quod senectus sit virtutis indicium, licet id fallat plerumque. *Corona dignitatis senectas, quæ in viis justitiæ reperietur.* Nam ea senectus coli debet, quæ sibi ipsi non est dedecori.

De Liberalitate.

De beneficentia, liberalitate, gratitudine tot præcepta ab antiquis & recentioribus Philosophis conscripta sunt, ut in iis referendis frustra a nobis tempus tereretur. Id unum adverto, has condiciones ad liberalitatem à Cicerone afferri. Videntum est enim primum ne obsit benignitas, & iis ipsis quibus benignè videbitur fieri, & cæteris. *Deinde ne major sit benignitas quàm facultas: nam benignitatis fons exhauritur; & qui benigniores volunt esse, quàm res patitur, primum in eo peccant, quod injuriosi sunt in proximos: quas enim copias his & suppeditari æquius est, & relinquere, eas transferunt ad alienos. Hinc quoque nascitur cupiditas rapiendi plerumque & auferendi per injuriam, ut ad largiendum suppetant copias. Hinc pulchrè Tacitus loquens de Vitellio. inerat tamen simplicitas & liberalitas: quæ nisi adsit modus, in exitium vertuntur.* Tertium est propositum, ut non sine delectu beneficium tribuatur; ac debeat esse benignitas

in calamitosos propensior. *Hæc maxime inquit M. Tullius, officii est, ut quisque maxime opis indigeat, ita potissimum ei opitulari.*

Benignitas igitur apud Tullium has virtutes complecti videtur, comitatem, humanitatem, liberalitatem, beneficentiam. *Benignitas*, inquit Hieronymus in cap. 5. Epist. ad Galatas *virtus est lenis, blanda, tranquilla, & omnium bonorum apta consortio, invitans ad familiaritatem sui dulci alloquio, moribus temperata*. Denique hanc Stoici definiunt: *Benignitas est virtus, sponte ad bene faciendum exposita*. Benignum Apost. Tit. 1. φιλόθεον appellat, cui φιλόξεον seu hospitalem conjungit: hic amor enim peregrinos; ille in bonos significat. Huc pertinet illud præceptum Sapientis. *Noli prohibere bene facere eum qui potest: si vales, & ipse bene fac.* Prov. 3.

Hæ virtutes leniores, & in communi vita positæ maxime hominem conciliant homini. *Vir amabilis ad societatem magis amicus erit, quam frater*. Prov. 17. Hinc Apost. *Omnes per omnia placeo*. Quod utique faciebat, ut omnes lucrifaceret, non ut ipse sed ut Deus amaretur. Cavendum quippe est ab adulatione ingeniosa, quæ hanc virtutem perversè imitatur. *Ne laætes quemquam labiis tuis*. Prov. 24.

Sed in contrarium peccant morosi & difficiles. *Noli esse amicus homini iracundo, neque ambules cum viro furioso*. Et cap. 15. *Honor est homini, qui separat se a contentionibus: omnes autem stulti miscentur contumeliis*.

Sic derisores, detractores, rixosi, dolosi, susurriones ab hac virtute quæ societatem

tem humanam maximè continet, seu benignitas, seu humanitas dicatur, maximè recedunt. *Ejice derisorem, & exibat cum eo jurgium, cessabuntque causæ & contumeliæ.* [Pr. 22. Sales enim vel ingeniosi magna quandoq; jurgia & odia excitant: Hinc sapientes hujus sæculi libenter audire solent scommata, non jacere, aut temerè emittere. *Remove à te os pravum, & detrahentia labia sint procul à te.* Nihil enim magis vitæ tranquillitatem & pacem interturbat, quàm detractores, & susurrone, qui fovent jurgia. *Cum defecerint ligna, extinguetur ignis; & susurrone substracto, jurgia conquiescent.* Prov. 26. Et cap. 18. *Labia stulti miscent sese rixis, & os ejus jurgia provocat.* Et c. 16. *Qui celat delictum, querit amicitias, qui altero sermone repetit, separat fœderatos.*

Quisquis ad ea quæ, quotidie in vita geruntur, animum intenderit, is facile perspiciet ex eo fonte tot jurgia, lites, temeraria judicia, contentiones manare. Neque huic malo aptius est remedium, quàm illud quod a Sapiente præcipitur, *Ventus Aquilo dissipat pluvias, & facies tristis linguam detrahentem.* Prov. 25.

Quid autè mali non efficit ipsa detractio? *Si mordeat serpens in silentio, nihil eo minus habet, qui occulte detrahit.* Eccl. 10. *Serpens & detractor æquales sunt,* ait Hieronymus, in hunc locum, *Ille occulte mordens, venenum inserit: Iste clam detrahens, virus pectoris sui infundit in fratrem.*

Hinc temerariis judiciis plena sunt omnia: & Psalter Regius inter viri boni virtutes hanc non omisit, Ps. 14. *Qui opprobrium*

non accepit adversus proximos suos : Id est, ut explicat Aug. qui non libenter aut temere credidit criminatori. Ac Deus ipse antequam ultatricibus flammis Sodomam & Gomorrhiam deleteret, Descendam, inquit, & videbo. Hinc optimè Gregorius Mor. l. 10. c. 14. Deus gravitatis nobis exemplum proponit ne mala hominum antè præsumamus credere, quàm probare. Iam id nos admonuerat Siracides, c. 11. Priusquam interroges, ne vituperes quemquam : & cum interrogaveris, corripe iustè. Charitas quidem omnia credit, ait Apost. sed Deo ; cum scilicet Deus loquitur, non homines, ut explicat Aug. Nam qui cito credit, levis est corde. Eccl. 19. Hinc Propheta Regius, Detrahentem proximo suo hunc persequabar. Ista paulò fusius collegimus, quòd hoc vitium latissimè pateat. Quinetiam qui procul ab aliis vitiis recesserunt, in istud tamen quasi in extremum diaboli laqueum incidunt. Paulinus Ep. 50.

De Gratitude.

Gratitudo verò, si M. Tullio credimus, omnes penes virtutes complectitur. *Quid est enim, inquit pietas, nisi voluntas grata in parentes? qui sunt boni cives, qui belli, qui domi de patria bene merentes, nisi qui patriæ beneficia meminerunt? Si reliquas virtutes persequitur: & alio loco. Etenim, inquit, si in eos quos speramus nobis profuturos, non dubitamus officia conferre: quales in eos esse debemus qui jã profuerunt? Nam cum duo genera liberalitatis sint, unū dan-*

dandi beneficii, alterum reddendi; demus necne in nostra potestate est; non reddere viro bono non licet. Multa minus id licet, malò pro benefactis rependere. Qui reddit mala pro bonis, non recedit malum de domo ejus Prov. 19.

Sed *inquires*, quomodo reddet qui solvendo non est? Respondet optimè idem Auctor, *inops*, inquit, *si bonus est vir, etiam si referre gratiam non potest, habere certe potest*. Nam multum interest inter materiam beneficii, ut aurum, vel argentum, & beneficium ipsum, quod animo & voluntate tribuentis æstimatur. Est enim, inquit Seneca, *ad liberandam fidem, non facultatibus, sed animo opus: neque accipiens est dante inferior, si sciat se debere, si referre velit, si quod rebus non potest, animo aquet.*

Quod autem in ratione dati & accepti plerumque homines non conveniant, in causa utriusque est, dantis scilicet & accipientis ambitio; qua fit ut de beneficii pretio non uno modo judicetur. Qui beneficio affectus est, præ superbia interdum non libenter debet; ac de minoribus quidem beneficiis complures gratiam referunt, majorum plerumque immemores.

Illud quoque verum est, a Tacito observatum, *multo proclivius esse injuria, quam beneficio vicem exolvere: quia gratia oneri, ultio in questu habetur.*

Multi licet ingrati, tamen memorem animum præ se ferunt; & gratitudine fere ut mercatores bona fide utuntur, ne commercium eorum periclitetur: ut qui nomen exsolvent, quò faciliùs ab aliis mutuentur.

Sic è contra plures ingratos facimus, quia gratiam omnem, ut ait Seneca, corrumpimus: non tantum postquam dedimus beneficium, sed dum damus.

ARTICULUS V.

De Religione.

AC de Religione quidem nihil necesse est multa dicere, cum ea sacra lectione, Ecclesiæ institutis, divina demum gratia operante discatur. Quanquam ea quæ naturalis ratio ostendit, SS. PP. adversus Ethnicos adhibuerunt. (Nec immerito quidem Lactantius. (*Lib. 3. & 4. Inst.*) Ethnicos reprehendit, quod sapientiam a religione sejunxerint: cum utraque seorsum esse non possit. *Homines*, inquit, *ideo fallantur, quod aut religionem suscipiunt, omissa sapientia; aut sapientia soli student, omissa religione: cum alterum sine altero non possit esse verum. Cadunt ergo ad multiplices religiones, sed ideo falsas, quia sapientiam reliquerunt, quæ illos docere poterat Deos multos esse non posse; aut student sapientiæ, sed ideo falsæ, quia religionem summæ Dei omiserunt, qui eos ad veri scientiam potuit erudire.*

Quare in vera religione, ait idem Author, iidem sunt Doctores sapientiæ, qui & Dei Sacerdotes: quia ibi sapientia cum religione conjungitur, ubi Deus colitur unus. Apud Ethnicos philosophia, & religio disjunctæ erant. Siquidem alii sunt, inquit, professores sapientiæ, per quos utique ad Deos non aditur; alii religionis antistites, per quos sapere non discitur. Ex quo apparet nec illam esse veram sapientiam, nec banc religionem.

Sic

Sic tamen religio sapientiam, aut veram philosophandi rationem adhibet, ut hæc subsequatur, non præeat. Nam is perversus est philosophiæ in rebus sacris usus, cum sola credendi ratio in humana sapientia constituitur. Hæc sapientia carnalis & animalis ab Apostolo vocitatur: cum scilicet nulli assētiri authoritati libet, nisi humana ratione capi & probari possit: *In homine carnali*, inquit Augustinus ser. 147. de Tempore, *tota regula intelligendi est consuetudo cernendi: Quod solent videre, credunt; quod non solent, nō credunt.*

Religio autem id præscribit, ut vir doctiss. (Petavius in Prolegomenis dogm.) disertè pluribus explicat, ut credendarum rerum rationem fideles non ab intelligentiæ luce repetant, nec argumentorum subtilitate, aut demonstrationum necessitate moveantur ad assensum: sed authoritate sola testificantis Dei: quæ quidem idoneis ad sui significationem notis, ac documentis illuxerit. Tum ex frequenti creditarum rerum meditatione ac tractatione existit illa cognitio, que robur ac firmitatem addit fidei, & ad eam tuendam, illustrandamque lumen ingenii & adjumenta suppeditat.

Hoc ergo ordine res agitur, ut fides antecedit, quemadmodum scientiam præcedit cognitio principiorum. Bonum enim est, inquit Ambrosius, ut rationem præveniat fides: ne tanquam ab homine, ita a Domino Deo rationem videamur exigere: etenim quàm indignum est ut humanis testimoniis de alio credamus, Dei oraculis de se non credamus. Quapropter generale principium veræ religionis est fides. Nam ut pulchrè Hi-

larius, à Deo discendum est, quid de Deo intelligendum sit: quia non nisi se autore cognoscitur. Hinc Aug. Epist. ad Volusianum, *Auctoritati credere magnum compendium est, & nullus labor.*

Hoc quidem loco non possumus de Christianæ religionis veritate, ut par esset, differere: sed cum Moralis Philosophiæ summa religione contineatur, illud neque ab instituto opere, neque a persona nostra alienum futurum est, si paulò uberius ostendamus Christianam religionem unam esse ex omnibus quæ cum recta ratione, & vera sapientia consentiat. Quare iis omissis quæ ad Theologiam magis, quàm ad Philosophiam pertinent, ea duntaxat quæ rectæ rationi non præjudiciis, aut pravis affectibus depravatæ quasi sua sponte occurrunt, breviter antingemus. Id utique vir excellenti ingenio & doctrina (D. Dyrois.) accuratè demonstrandum suscepit in opere nuper edito: eo itaque opere perpauca delibare in animo est.

Ac primò ut rem omnem ab ipso fonte repetamus, illud principii loco statuendum, non satis esse in humana ratione præsidii aut ad bene justèque vivendum, aut ad ea pernoscentia quæ homini in Deum consent officia; quid Authori suo & conservatori debeat, qua eum ratione colat: hoc quippe rationis lumen tam purgatum, tam vegetum non perpaucorum, sed nullius hominis est. Ac nemo fere est qui suo quidem iudicio non tantùm sapiat, quantum quisquis alijs; aut se idoneum non putet, qui quod rationi est consentaneum, non percipiat.

Qua-

Quare una est communis, & omnibus accommodata Dei cognoscendi, & vitæ ad ejus præcepta exigendæ ratio, fides nimirum aut revelatio. Nam major animis hominum offusa caligo est, quàm ut sola ratione duce, aut unde orti sint, aut quò redituri; principium nempe suum & finem agnoscant: aut si agnoverint, quo itinere suum finem assequi, aut vitam instituere possint, pervideant. Atque in eo sumus statu, ut sola fides Deo nos conciliet, & jungat. Nemo denique ita sibi blanditur, ut ad Deum solius humanæ rationis præsidio se pervenire posse confidat.

Unde qui novam religionem volunt inducere, aut constitutam immutare, ii fere omnes novas revelationes obtendunt: id utique veri & falsi Prophetæ æque profitentur: quòd omnibus persuasum sit, nos ex Deo discere oportere quomodo colendus sit. In hoc prudentiæ summa cõsistit ut veræ a falsis revelationes secernantur.

Illud quidem negare non possumus, insignes quasdam esse velut notas aut characteres, quibus falsi a veris Prophetis discerni possint. Primum enim qui eum se esse prædicat, cui Deus voluntatem suam aperire dignatus sit, prudentiæ, probitatis, veritatis, candoris, integritatis denique, & ab omni cupiditate alieni animi magna præ se ferat argumenta necesse est. Quæ tamen sola non sufficiunt: nam plerique his dotibus destituti eas probè simulant & effingunt; quique bona fide agunt, decipi possunt; quia imaginatricis ludibria specie revelationum iis solent illudere.

Quò igitur iis fidem adhibere teneamur, id requiritur ut veris & indubitatis suæ missionis argumentis muniantur. Unde ex quo hoc universum conditum est, neminem misit Deus, qui novas revelationes prædicaret, quin eum manifestis potentiæ suæ signis armaverit; sive ea fuerint miracula, sive Prophetiæ quibus aut res futuræ, aut longissimè remotæ prænuntiantur. Nec ulla penè religio ejusmodi revelationes non jactavit quæ veras, quæ falsas, quibus auctoritatem sibi conciliare voluit.

Et quidem revelationes uni vel alteri homini factæ vix solæ sufficiunt, ut fidem faciant eas a Deo esse profectas. Morbi enim aut corporis, aut animi, violenti quidam affectus, aut fortis imaginatio qualis in mulieribus plerumque viget; spiritus aut jejuno, aut vigiliis, aut nimia animi contentione exhausti plerumque solent illudere: ut nihil dicam de astu dæmonis qui ejusmodi homines in fraudem sæpe illicit.

Quamobrem hujus generis aut visa, aut prædictiones, aut miracula ad rectæ rationis normam sunt exigenda, ut liquere possit, a Deo, an a cacodæmone dimanent, Intuendum est quid recta ratio nos doceat de præcipuis veræ religionis fundamentis, de existentia Dei, de providentia, de immortalitate animæ, de libertate; utrum hæc miracula aut revelationes eò tendant, ut vitam ad leges naturæ, & virtutem lumina nobis congenita exigamus.

2. Id etiam requiritur ut posteriores revelationes cum prioribus consentiant: neque

quæ enim Deus sibi ipsi repugnat, aut pugnantia loquitur.

3. Qui prænuntiantur eventus, si cum experientia ipsa conveniant necesse est.

Has quidem veritatis notas in prima omnium revelatione, quæ mundi creationem complectitur, omnino perspicui constat.

Atque eam mundi originem sic describit Moses, ut ex ipsa narrandi ratione Dei unitas, sapientia, providentia, & omnipotentia mentis oculis subiciantur.

Quid dicam de aliis revelationibus quæ Mosis historia continentur? an non omnes veritatis characteres in iis conspiciuntur? Vetustissimum est omnium quæ ad nos usque pervenerunt, monumentum: stylus simplex, apertus, modestus Authoris ipsius candorem, & veracitatem exprimit. Non in convitia, aut in laudes immodicas effunditur. Nihil erat causæ cur falleret, aut mentiretur: cum rerum ante actarum historiam conscriberet; multæ contra erant, & graves rationes, quæ eum ab omni fallendi studio deterrent. Nam de rebus præteritis ea narrabat quæ multis perspecta esse poterant; quæque suo tempore acta sunt, ita erant testata, & publica, tot portentis & miraculis clara, ut extremæ dementiæ fuisset ea scribere, quæ tam facile refelli potuissent. Quid quod finitimarum gentium refert origines, populum ipsum cui præest, cuius scribit historiam, ut pervicacem, tot beneficiorum immemorem, ad seditiones promptum, & vitiis penè omnibus contaminatum exhibet. Ne stirpis quidem Sacer-

dotalis

totalis & suæ parcit} Authori. Non ea sunt hominis qui fucum facere, & falsam historiam perscribere meditatur.

Callidus fuerit, quantum volueris, & astutus Moses; populum Israeliticum stupor ingens oppresserit: nemo sanæ mentis illud in animum inducet, hominibus persuaderi posse tot facta esse miracula & prodigia ipsis cernentibus, quæ reverà nulla extiterint. Quique Mosem fingant ea solertia fuisse ut vel æstus reciproci. (qui tamen in sinu Arabico ferè nullus est,) tempus observaverit; aut tempestatem, quæ manna in iis regionibus Arabiæ plueri solet, astutè captaverit: ii videntur non satis animum attendere ad prodigiorum multitudinem quæ coram tot hominibus exhibuit. An res adeò stupendas potuit efficere, aut tot leges adeo difficiles imponere, aut denique huic populo persuadere eas leges à Deo ipso sancitas fuisse, si nullis miraculis sibi & suis legibus auctoritatem conciliavit?

Sed quid Sacerdotes, qui de religione, & doctrina decernebant, movere potuit, ut ipsius Aaron ignaviam, illius & Mariæ sororis Moysis in fratrem invidiam, totius populi seditiones, & crimina memoriæ posteris mandari paterentur, nisi Moysis auctoritas, & vis ipsius veritatis?

Mitto per consequentes ætates, per mille, & amplius annos Josue, Judicum, & Regum temporibus consimilia prodigia, & facta fuisse, & auctoritate publica in sacros libros relata. Mitto denique Prophetarum vaticinia, quæ & facta antè miracula con-

la confirmant, & ipso rerum eventu sunt comprobata. In iis vaticiniis Chaldaeorum, Persarum, Græcorum, & Romanorum futura leguntur imperia. In iis quæ postea Judæis, & cæteris nationibus acciderunt, continentur.

Ac librorum qui has prophetias complectuntur catalogus Regum Persarum temporibus fuit absolutus. Ne forte quis eos longo post tempore conscriptos cavilletur. Et certè Mosis libros semper Judæi tanto in honore habuerunt, ut religioni iis fuerit, vel u num apicem commutare: adeò ut nullius libri autoritas magis constet. Quod de aliis quoque sacris codicibus dici potest: quæ enim genuinum esse alicujus Authoris librum probant, hæc multò maxime cum de sacris libris agitur, valere debent.

Nam ut pulchrè demonstrat Illustris Author Huetius. Is genuinus habendus est liber quem proximè subsequentes ætates ut genuinum agnoverunt. Unde enim ut ait August. l. 31. cap. 6. contra Faustum, noverunt homines libros esse Platonis, Aristotelis, Ciceronis, *nisi eadem temporum scilicet succedentium contestatione continua.* Itaque genuinos esse eos, de quibus diximus, Mosis libros, ex eo liquet vel maxime, quòd eos continua serie ætates Mosis adscripserint; ut alias rationes omittam ab externis testimoniis desumptas quas vir Clariss. in demonstratione Evangelica fusè, & doctè persequitur: Atque eadem rationes ad reliquos veteris, & novi Testamenti libros æquè pertinent: verum ex apud extremum

Autho-

Authorem legi possunt. Id unum nequeo prætermittere, de libris novi Testamenti, si præcos exceperis, de quibus olim dubitatum fuit, nullam controversiam moveri posse: cum æquales temporum Apostolicorum, & iis temporibus proximi testimonia ex iis plurima afferant: ut Clemens Romanus in Epistola ad Corinthios, Ignatius passim, Polycarpus in Epist. ad Smyrnenfes, Papias, Justinus Martyr, Irenæus, Athenagoras, Clemens Alexandrinus, Tertullianus: qui passim citant quatuor Evangelia, Acta Apostolorum, Epistolas Pauli; & alios Canonicos libros.

Iam Patrum, tum vetustiorum, tum recentiorum in repetendis novi Testamenti verbis consensio certissimum est probandæ illius integritatis argumentum. Verum id nunc non agimus ut Christianæ religionis veritatem aut ex sacrorum librorum auctoritate, & veracitate, aut ex Judæorum, & Ethnicorum testimoniis; aut ex factis demum ipsis demonstramus. Id utique ab aliis cum veteribus, tum recentioribus actum novimus. Ac meo quidem iudicio nihil nostra quidem ætate utilius fidei alendæ, & confirmandæ scribi potest. Sed nos ut Philosophi id unum suscepimus, ut Christianam religionem rectæ rationi esse maxime consentaneam, & cum vera sapientia conjunctam ostenderemus.

Quò autem id ipsum certo ordine, & ratione efficeretur, illud tanquam omniumquæ dicturi essemus fundamentum jecimus, citra fidem ac revelationem Deum à nobis aut cognosci, aut coli ut patet, non posse.

posse. Deinde quibus notis aut argumentis veræ à falsis revelationibus dignoscantur, explicare conati sumus: cum omnes penè religiones suas obtendant revelationes qua veras, qua falsas. 3. Veræ, & divinæ revelationis notas in libros tum veteris, tum novi Testamenti convenire ostendimus: ex quo licet colligere veraces esse historias, quæ iis libris continentur. Quæ quidem postrema conclusio fusè demonstratur à D. Huetio propositione tertia, eamque testimoniis Ethnicorum, & Judæorum confirmat: verùm ea longiùs nos abducerent: sed tota ea ratio sic breviter ab eo concluditur.

Quòd si tot miracula patravit Jesus, si tot prophetias edidit, quæ deinde sunt eventu comprobata: si in cœlum receptus vim illam portentificam, sanctumque adeò Spiritum, ut erat pollicitus, in discipulos immisit; ita ut gentium omnium linguis loquerentur, ægros sanarent, mortuos revocarent ad vitam: fatendum est divinum hominem fuisse Jesum, pium, ac sanctum, Deo afflatum, Deoq; plenum. Atqui se ipse Messiam professus est: igitur Messias ipse fuit.

Atque ut multa paucis contraham; quisquis intento animo perpenderit rationes quæ permoverunt tot sapientissimos viros & maximis ingeniis præditos ut Christianam religionem colerent; divinas, & heroicas dotes eorum qui à Deo selecti sunt ut hanc religionem prædicarent; miracula quibus eam confirmarunt, Christi, & Apostolorum prophetias quæ toto orbe iis temporibus promulgatae, & eventu sunt confirma-

firmatæ, quo denique modo ea doctrina in totum orbem diffusa, & proseminata fuerit ab hominibus omni humano auxilio destitutis : is profectò fateatur necesse est eam religionem non aliunde quàm à Deo esse profectam, qui *infirmam hujus mundi elegit, ut confunderet fortia*. Extirpandi fuerunt errores per tot ætates omnium populorum animis infixi ; pugnandum fuit adversus Philosophos, & hujus sæculi Sapientes ; adversus Reges & Principes, qui omni tormentorum genere eos affecerunt. Hinc Cæcilius apud Minutium Felicem de Christianis loquens, *Spernunt, inquit, tormenta præsentia, dum incerta metuunt, & futura ; & dum mori post mortem timent, interim mori non timent*. Unde & eorum constantiam in perferendis tormentis vel ipsi Gentiles prædicant. Sic Galenus l. 3. de Differentia pulsum, cum medicorum quorundam pertinaciam notare vellet, *Citius, inquit, Christiani religionem suam ejuratos, quàm illi meliorem sententiam induant*. Unde & Christiani desperati & parabolani, ut observat Huetius, dicti sunt : quo nomine signabantur quidam projectæ audaciæ homines, qui spontè ad bestias pugnabant.

Ac mirum illud quoque videri possit, quanta intra paucos annos Christiana religio incrementa cæperit, ut ex Epistola Plinii 97. lib. 10. ad Trajanum Imperatorem colligitur, in qua & multitudinem Christianorum in Bithynia, & pietatem, & fidem inexpugnabilem, assiduas denique ad Deum conciliandum preces commemorat. Hinc Dio. l. 37. *Est etiam, inquit, apud Romanos*

*manos genus istud imminutum sapè numero ,
adeo tamen auctum ut vim legum pervicerit .
Unde Reipublicæ metuentes Magistratus novi
dogmatis defensores coercendos consuerunt .
Eos Claudius exiliis , Nero exquisitis tor-
mentis affecit . Hinc Tacitus l. 15. Ann.
Pereuntibus, inquit, addit a ludibria, ut fera-
rum tergis coniecti laniatu canthi interirent, au-
crucibus affixi, aut flammandi, atque ubi defe-
cisset dies, in usum nocturni luminis urerentur .*

Sed adhibeat oratio nostra modum, & re-
deat illuc unde deflexit. Hoc enim jam de-
monstrare incepimus, veram & Christianam
religionem cum vera sapientia esse conjun-
ctam. Quod utique vel ex eo liquet, quod
ea ferè nihil præscribat, nisi quæ naturalis
& æterna lex præcipit, aut consulit: adeo
ut lex ipsa naturalis, immutabilis & æter-
na à Christo Domino sit renovata. Nam
Christus ut Verbum æternum naturalem
legem mentibus nostris inseruit; ut homo,
exemplo & verbis eam prædicavit. Unde
cum Patres adversus Infideles scribunt, id
constanter docent, legem Christi non aliud
præcipere, quàm id ipsum quod lex natu-
ræ, aut recta ratio jubet; quod nemo igno-
rat, nisi præ iniquitate. Ea lex primorum
parentum mentibus insculpta Dei imagi-
nem & similitudinem, ad quam creati fue-
re, potissimum effecit; neque ita peccato
detrita est, quin multa illius velut linea-
menta remanserint. Hinc justitiæ, & alia-
rum virtutum, imò & Christianæ religio-
nis, ubi proponitur, approbatio, & in viros
pios certa & naturalis propensio, ut fuse
prosequitur vir pereruditus D. Diroys.

Itaque

Itaque ut lex naturalis, sic Christiana religio, quæ cum vera sapientia conjuncta est, non aliud præcipit, nisi virtutes omnes, & præcipuè amorem Dei, ut summi boni; ut quæcunque sancta, quæcunque pudica, quæcunque sunt bonæ famæ sectemur; his contraria fugiamus.

Hinc Sancti Patres Christianæ religionis dignitatem semper ex eo commendarunt, quòd ea sola legis naturalis & immutabilis observationem induceret: neque unquam Philosophi qui eam oppugnarunt, documenta illius aut præcepta refellere conati sunt. Imò qui ex illis erant sapientiores, iidem fatebantur officia vitæ humanæ ex electione summi boni, ad quod omnia referri oporteret, & cujus indagatione sumus sapientes, omninò pendere; omne honestum & justum lege naturali, aut recta ratione contineri; id propter se colendum esse & expetendum; justum ab injusto, honestum à turpi naturali norma dividi; non hominum institutis. In eo verò defecerunt, quod summam illam justitiam & veritatem, Deum nimirum casto amore colendum esse non agnoverint; umbram illius, honestatem nimirum, aut virtutes; splendorem potius quàm justitiam ipsam quæsiere: cum ex innatis seminibus ipsius veritatis quæ tantopere commendant, animadvertere potuissent, multò magis Deum diligere & colere oportere, quàm ea quorum in se ingenitum amorem sentiebant: cum tot obsequii divini impetus & testimonia animæ naturaliter Christianæ experirentur.

Quocirca qui religionem Christianam
adver-

adversus Ethnicos defenderunt, præter innumera argumenta ex factis ipsis, ex vaticiniis Prophetarum, & miraculis desumpta, hoc semper adhibuerunt ex Morali Christiana, dogmatum sanctitate & præceptorum gravitate depromptum. Quæ enim alia religio cum Christiana est comparanda, si præceptorum sanctitas spectetur, tum in his quæ ad Dei cultum, tum in iis quæ ad mores ipsos pertinent? Ubique ferè terrarum humano sanguine diis litabatur, & Paganorum mysteria plena erant obscœnitatis. Hinc Seneca in libro quem contra superstitiones edidit, quem citat Aug. l. 6. de civit. Dei, de ritibus crudeliter turpibus loquens; *Se ipsi, inquit, in templis contrucidant, vulneribus suis ac sanguine supplicant: si cui intueri vacet quæ faciunt, quæque patiuntur, inveniet tam indecora, tam dissimilia sacris, ut nemo fuerit dubitaturus furere eos, si cum paucioribus furerent: nam sanitatis patrociniū insanientium turba est.*

At Christiana religio Deum pura mente colendum præcipit, & iis operibus quæ ex se sunt honestissima. Hæc utique non carnem, ut Judæi, aut Mahumetani, sed cupiditates illicitas circumcidi præcipit: hæc misericordiam in egenos, mansuetudinem, modestiam, temperantiam, fortitudinem in malis perpetiendis, & justitiam præscribit.

Quodd si alias religiones oculis & animo lustres, tum manifestè comperies quantum & divini cultus sanctitate, & morum documentis & officiis erga proximum eæ omnes Christiana religione sint inferiores.

Primum quidem id liquet ex cultu Ethnicorum, qui bonam, honestam, & sanam mentem non decebat: cum per sanguinem humanum, per ludos, & saltationes spurcitiae plenas diis litarent. *Qua quidem*, inquit Seneca in eodem libro, *sapiens servabit tanquam legibus jussa, non tanquam diis grata*. Tum de formis deorum indecoris loquens: *Habitus*, inquit, *illis bonum, ferarumque & piscium*. *Quidam mixto sexu diversis corporibus indunt; numina vocant quae si accepto spiritu occurrerent, monstra haberentur*. Postremò de ritibus eorum hæc subjicit. *Ille*, inquit, *viriles partes sibi amputat, ille lacertos secat: ubi iratos timent, qui sic propitios merentur? Dii autem nullo debent coli genere, si & hoc volunt. Tantus est perturbata mentis & sedibus suis pulsa furor, ut sic dii placentur*.

Quod autem non fuerint bonæ mentes quibus Ethnicorum cultus impendebatur, hinc identidem probat August. quod sui cultores à summi Dei cultu deterruerint, Dei veri cultores magnis pœnis affecerint, populos demum & Magistratus in eos sævire compulerint: cum tamen impunè liceret & Epicureis deorum providentiam tollere, & Poetis deorum adulteria aut parricidia canere. Hinc Seneca eodem in loco, *quid*, inquit, *quod & matrimonia deorum jungimus, & ne pie quidem, fratrum scilicet & sororum*.

Omitto eos homines quibus divinum cultum impenderunt, pessimos fuisse & magnis vitiis insignes. *Qua igitur causa est*, ait August. (*L. 6. de Civit. Dei c. 17.*)

nisi stultitia errorque miserabilis, ut ei te facias venerando humilem, cui te cupias obvenire esse dissimilem; & religione colas quem imitari nolis, cum religionis summa sit imitari quem colas.

Quare non mirandum si ex perverso religionis cultu tam prava morum documenta fluxerint. Sic Aristoteles ipse bellum in barbaros naturale esse docet; sic Lacedæmonii, quorum instituta vel Apollinis oraculo tantopere laudata sunt, Romani quoque laudem omnem & virtutem bellis plerumque manifestè injustis contineri persuasum habuerunt: cum nihil sit iniquius, ut pulchrè Hugo Grotius, quàm singulas cædes puniri, occisarum gentium velut gloriosum facinus triumphis ostentari. Sic publica latrocinia olim apud Græcos permissa, dum intra proprios fines non fierent.

Quid memorem liberorum expositionem, gladiatorum laniatus inter oblectamenta publica? Quid quod Aristoteles ultionem in virtute ponit; ut lib. 4. Ethic. *Videtur, inquit, talis & sensu & dolore carere; & cum non irascatur, vindicta esse negligens; servile, si contumeliosè traheris, id tolerare.* Et Cicero l. 2. de invent. inter ea quæ ad jus naturale pertinent, vindicationem ponit, *per quam, inquit, vim aut contumeliam defendendo, aut ulciscendo propulsamus.* Nihil magis ii neglexerunt, quàm matrimonii sanctitatem, cum Deos colerent quorum stupra & adulteria prædicabant.

Sed in Christiana religione omnis prohibetur injuria; ac ne licet quidem verbis aut factis illatam reponere. Quod utique in-

ter

ter Philosophos sapientissimi, ut Plato in Critone docuerunt. Hinc illud Menandri.

O Gorgia, ille virorum est optimus

Qui melius aliis callet ferre iniurias.

Sic religio Christiana non vitiorum tantum ramos præscindit, sed & radices ipsas evellit: reum habet qui mulieris pudicitiam attentavit, aut oculis libavit: nec perjurium modò vetat, sed & quantum potest, ab omni juramento abstinendum præcipit; ac demum cuivis bene facere, & egentibus præsertim: quæque omnium officiorum summa est, aliis id ipsum cupere, & præstare quod nobis metipsis; & alia innumera naturæ legi planè consentanea, atque ab optimis etiam Philosophis naturæ ipsius voce coactis præcepta ita præscribit, ut omnes ferè vel Christiana religione non imbuti ea comprobent.

Ac si quis nobis fortè opponat Mahumetis religionem, quæ magnam orbis partem invasit: is primum seria æstimatione perpendat, eam religionem nihil spirare nisi arma; armis propagari; ad effundendum sanguinem omnino factam videri, nullis ratiociniis, nullis miraculis firmatam; credi sibi vult, nulla inquirendi libertate relicta. Quæ vera sunt & sacris litteris commendata de Mose, de Christo, infinitis mendaciis obducit. JESUM quidem a Deo missum agnoscit Mahumetes in Alcorano; sed eum in cælum clam subductum fuisse, & quoddam ejus simulacrum cruci affixum mentitur; neque eum mortuum, sed Judæorum oculis illusisse fingit.

Quod si utriusque religionis authorem intuea-

intueatur : JESUS , ipso Mahumete fatente , est Messias in Lege , & Prophetis promissus , Verbum Dei , Sapientia , & vitæ demum immaculatæ . Ipse verò Mahumetes usitato naturæ ordine genitus , diu prædo , semper mulierum amori deditus a suis etiam prædicatur . Iesus , ut idem fatetur Mahumetes , mortuos ad vitam revocavit : is verò se missum cum armis , non cum miraculis profitetur : adeo ut nulla habeat divinæ approbationis argumenta .

Qui religionem Christianam prædicant ; viri erant vitæ simplicis , Dei timentes . At qui Mahumetismum primi susceperunt , prædones erant , & ab omni humanitate alieni ; ac religio illa armorum tantum ut diximus , accessio est , nec alio nititur argumento quàm armorum successu . Quæ utique ratione , si quid habeat roboris , uti potuere Persæ , Macedones , Romani .

Postremò si utriusque religionis præcepta inter se conferantur , Christiana religio legi naturali mentibus nostris incisæ omnino est consentanea , amore Dei & proximi continetur , benignitatem in omnes , mansuetudinem & patientiam commendat ; in animi cultura maximè versatur unde fructus manant uberrimi . Mahumetis religio nihil æquè ac ultionem præcipit , interneciva cum vicinis gentibus odia ac bella exercet ; tota in vanis ritibus , ut in circumcissione , in vini abstinencia occupata , interioris & solidæ pietatis expers . Nec matrimonii fidem perpetuam servat , nec quod mariti ab uxoribus exigunt , præstant ipsi , sed in libidinem effusi alias aliis uxores inducunt .

Quòd sanè vel Ethnicis moratioribus placuit; cum diversæ matres discordias inter liberos alant, nec sibi constet domesticum regimen in tot mulieres divisum nec liberorum educationi ea ratione prospiciatur. Hinc satis aptè Claudianus de quibusdam populis.

Connubia mille :

*Non illis generis nexus, non pignora cura :
Sed numero languet pietas .*

Quid dicam de magnitudine & excellentia præmii quod post hanc vitam nos manet quodque in conspectu Dei & summo illius amore positum ostendimus : cum Mahometus quasi quiddam Deo & humanâ mente dignum promiscuos concubitus polliceatur.

Quid in eo dignum, non dicam Prophetâ, sed homine? ille omni libidine inflammatus & furens, omnia rabidè appetens cum inexplebili cupiditate, omnia in se colligit, quæ in falsis Prophetis dispersa eos ad fallendum impulerunt : adeo ignarus rerum omnium, ut anilibus fabulis, tanquam divinis revelationibus fidem præbeat; nullis miraculis legem suam confirmat. Neque id mirum, cum ea religio Mosis & Christi doctrinæ omnino repugnet; cum legem ipsam naturalem extinguat, ac Iudæica religione longè sit inferior: seu vitæ præcepta, seu divinum cultum consideres. Infinitis ea erroribus admista eos tantum potest decipere, qui religionem potius ad luxum, voluntatem, & hujus mundi prosperos eventus, quàm ad virtutem & rectam rationem exigunt, quos utique falli
&

& in errorem induci æquissimum est.

In religione Christiana contra sunt omnia, ut vir doctissimus quem identidem laudavimus, fusè prosequitur. Nam in Mose & Christo omnes animi dotes, quæ fidem apud sapientes merentur excellenti quadam ratione fulgent; nihil eorum concupiscunt quæ homines ad fallendum solent inducere, opes, divitias, honores, & alia quorum splendore capiuntur homines, contemnunt, revelationes suas quæ ex divino fonte manant, publicis & autoritate plenius tum vaticiniis, tum portentis confirmant, inter eas summa consensus est. Utraque religio non vi, non armis, non eloquentia, aut sapientiæ humanæ persuasione, sed prodigiis & miraculis, incredibili pietate in Deum, amore in proximum, invicta animi fortitudine cum summa mansuetudine conjuncta, Martyrum sanguine, non humana denique ratione aut industria, sed divina prorsus & cælesti virtute ut originem suam, sic incrementa cepit. *Sermo meus, inquit Doctor gentium 1. Corinth. 2. & prædicatio mea, non in persuasibilibus humanæ sapientiæ verbis, sed in ostensione spiritus & virtutis, ut fides vestra non sit in sapientia hominum, sed in virtute Dei. Et ad eosdem scribens in secunda Epist. c. 12. Signa autem Apostolatus mei facta sunt super vos in omni patientia, in signis & prodigiis & virtutibus.*

Qui hæc & alia in eam rem plurima attentius consideraverit, si modo aut præjudicatæ opiniones, aut pravi affectus eum non transversum egerint, intelliget profecto eam religionem tot Prophetarum ora-

culis & portentis confirmari, tam citò adolefcere, & ad extremos ufque mundi fines propagari non potuiffe, omni humana ope aut induftria deftitutam, nifi a Deo ipfo profecta, illius duntaxat auxilio & providentia muniretur. Idque maximè cum idololatriam toto penè orbe everterit, cœlefti fapientia hominum mentes irradiarit, mores perditos correxerit, & admirabiles prorfus effectus ubique terrarum ediderit.

Illud quoque perfpiciet, non modò Chriftianam religionem veram effe folam quæ Deo probetur, fed ex ea quoque validiffima quæque argumenta duci, quibus Dei exiftentia, providentia, & immortalitas animæ perfuadeantur; & alia quæ religioni præmuniri debent, omnino demonftrat.

Quotus enim quifque ex iis qui Sapientes & Philofophi vulgò habiti funt, quique ingenio excelluere; ex hujus univerfi contemplatione de exiftentia Dei, de illius unitate, perfectione, providentia, mundi origine, animi incorruptione, fummo hominis bono, de vera virtute, quæ fide, fpe, & charitate continetur, de lege naturali moribus noftris incifa, ea collegerit, fine quibus nulla religio conftare poteft, ea fenferit quæ Chriftiana religio innumera- biles nationes edocuit, & perfuafit. Ac fi quando fumma quædam ingenia longo ftudio & labore nonnulla ex iis naturæ principiis delibarint, tot errorum & dubitationū nebulis ea obduxerunt, ut manifefturn fecerint nihil debilius aut fragilius effe, quàm

mentem humanam sibi soli permissam.

Itaque illud Apostoli inconcussum manet & experientia ipsa confirmatum. *Quod infirmum est Dei, fortius est hominibus.* Et illud quoque. *Quæ stulta sunt mundi elegit Deus ut confundat Sapientes, & infirma mundi elegit Deus, ut confundat fortia; & ignobilia mundi, & contemptibilia elegit Deus & ea quæ non sunt, ut ea quæ sunt, destrueret.* Nihil infirmius, nihil contemptibilius mundi Sapientes judicant, quàm Crucem Christi, & tamen nihil fortius, nihil efficacius ea fuit, iis persuadendis quæ Christus nobis tradidit, quæ vera sapientia nos docet. Nam quia, ait idem Apost. *in Dei sapientia, non cognovit mundus per sapientiam Deum: placuit Deo per stultitiam prædicationis salvos facere credentes.* Perpauci enim ex hujus universi constituto ordine, ex naturæ contemplatione illius Authorem cognoverunt, aut providentiam, aut alia religionis fundamenta: eadem verò, ut diximus, religio Christiana omnibus populis citra ullius erroris admisionem, citra ullum dubium persuasit: verùm id non alia ratione efficitur, quàm cum Deus mentes nostras luce sua perfundit, ut in res adeo mirabiles quæ in mentem undique incurrunt, aciem intendat, cum errorum nubes disjicit, ne falsa & ementita luce decipiamur.

Neque id nobis faciendum, ut iis respondeamus, quæ adversus Christianam religionem ab infidelibus obijciuntur. Id enim non est hujus loci, aut temporis; cum a sanctis Patribus primum, tum a Theologis penè omnibus, & tandem à doctis-

simis viris nostra hac ætate hoc argumentum sit tractatum uberrimè. Id unum, quod statim occurrit nobis diluendum videtur, idem nobis objici posse quod Mahumetanis opposuimus, quod religio Christiana credi sibi velit, nulla inquirendi libertate relicta. Respondeo rem ita non esse. Primum enim sibi fidem religio Christiana innumeris miraculis, & Prophetarum oraculis, morum sanctitate, tot Martyrum sanguine, totius orbis consensione sibi conciliavit. Hinc S. Petrus 1. Epist. cap. 3. *Iubet nos esse paratos ad reddendam rationem de ea quæ in nobis est spe*. Neque enim principia fidei sunt ejusmodi quæ per se innotescant, nec prudenter iis assentiri possumus, nisi sint antè explicatæ rationes quibus ad credendum inducimur, quæque credibilitatis motiva dici solent: Atque ut optimè observat Melchior Canus l. 12. c. 4. hujusmodi rationes jubet Petrus a Doctoribus fidelium reddi, quæ cum fidem antecedunt, infideles ipsos non trahant, sed inducant; cum sequuntur, non fidelibus vim afferant, sed adjiciant robur: nisi enim lux fidei affulserit, non persuadebunt. *Fides quippe, ut ait Aug. est prima quæ subjugat hominē Deo, tum lucere incipit, quod antea tantummodo credebatur*. Nam ut identidem inculcat, *prius credendum est ut perveniatur ad intellectum; & intelligentia est fidei merces*.

Nec temerè & citra rationem credimus, ut ex iis quæ attulimus satis liquet. Neque enim ut scitè idem Canus animadvertit, Religio, disciplinaque Christiana omni ex parte similis est Pythagoricæ, cujus alumni
nulla

nulla ratione accepta informatione, nulla-
que omnino reddita causa auctoritatem
præceptis arctè & mordicus tenebant. In-
doctorum est ista consuetudo, eaque Sarra-
cenorum, Paganorum, Hæreticorum,
ut cæca & temeraria suæ sectæ dogmata
sine iudicio amplectantur, & quæ disqui-
sitione egent maximè, sine disquisitione
recipiant.

Nos verò cæco impetu non rapi, exem-
plo probatur Luciani Martyris apud Euse-
bium l. 9. c. 6. Is enim rogatus à Præside
cur cum vir rationalis & prudens esset, se-
queretur sectam cuius, non posset reddere
rationem, in hæc verba respondit. Nos
Christiani non sicut vos putatis, humanæ
alicujus persuasionis errore constringimur,
nec indiscussa, ut alii, Patrum traditione
decipimur. Auctor nobis de Deo Deus est.
Fateor, erravimus nos etiam aliquando &
simulacra quæ ipsi finximus, Deos cœli &
terræ putavimus auctores. Sed arguebat
eos fragilis substantiæ suæ a nobis præstita
consecratio: in quibus tantum veneratio-
nis inerat, quantum decoris mens contulif-
set artificum. Verùm omnipotens Deus il-
le quem non nostris manibus fictum, sed
cujus nos decebat esse figmentum, errores
miseratus humanos Sapientiam misit in
hunc mundum carne vestitam, quæ nos
doceret Deum qui cœlum fecisset & ter-
ram, non in manufactis, sed in invisibili-
bus esse requirendum. Vitæ ac disciplinæ
præcepta constituit, servare parcimoniam,
paupertate gaudere, mansuetudinem ale-
re, &c. Sed & omnia hæc quæ adversum

nos geritis , ventura esse prædixit . Inde enim qui erat immortalis, ipse, morti se præbuit , quò nobis patientiæ præberet exemplum , Sed nos nec sua morte decepit , quibus post tertium diem resurrexit , ut mortem vinceret resurgendo . Quæ autem dico , non sunt in obscuro gesta loco , nec testibus indigent . Pars penè mundi jam major huic veritati adstipulatur . Requirit in annalibus vestris , invenietis temporibus Pilati Christo patiente , fugato sole interruptum tenebris diem , &c. His & aliis argumentis suadebatur Christiana religio . Atque eæ rationes plerumque ex factis ducebantur , quæ in contentionem venire non poterant . Quod impossibile videatur ut tot homines in rebus quæ sub sensus veniunt , omnino fallantur .

Sic humanæ probationes eæque validissimæ fidei fundamenta confirmant , ut de Mosis libris & miraculis supra ostendimus . Neque enim fieri potuit ut ingens populus religionem suam omnem huic libro illigaret , qui fabulis esset conspersus , cum populus ipse ut rerum quæ se coram factæ sunt , & prodigiorum testis appelletur : neque ii ignorare potuere an vera essent , aut falsa quæ eo libro continentur ; aut tot legibus , ac præceptis adeò duris & molestis ultrò se subjecissent , unius libri quem falsum non dubitarent autoritate compulsi .

Non dissimili ratione Christi resurrectio novæ legis fundamentum testimonio Apostolorum & discipulorum ita confirmata fuit , ut de ejus facti veritate nullus esset dubitandi locus . Neque aut fallere po-
tue-

tuerunt, aut falli. Quid enim, an omnes inter se convenire potuerunt ut generi humano illuderent? Candor, simplicitas, sinceritas quæ in eorum actionibus & literis elucet, id credere nos non sinunt: emolumentum nullum ex eo commento sperare poterant, cum ea doctrina humanæ prudentiæ esset penitus adversa. Quæ igitur ratione indocti homines toti orbi illudere, & mortem ipsam subire constituerunt, ut consilium tam insulsum, & temerarium, ad exitum perducerent? Qui fieri potuit ut nemo ex iis, aut tormentis, aut ærumnis & laboribus, a proposito destiterit, ac nullus mortem non oppetierit? Si prudentes ii fuerunt, & callidi, quomodo consilium tam perditum inire potuerunt? Si insipientes & stulti, quæ ratione id ipsum effecerunt, quod mente conceperant? Neque id dici potest tot homines, quingentos & amplius, qui viderunt, palparunt, manibus contrectarunt, loquentem audierunt; idque non semel, sed sæpius, falsos fuisse & deceptos.

Infinita in hanc rem dici possunt, verum ista non pro argumenti dignitate, sed pro instituti nostri ratione sufficiant, ut palam sit omnibus quantum Christianæ religionis præcepta rectæ rationi sint consona. His autem rationibus quæ ex factis ipsis, ut ex Christi, & Apostolorum miraculis, ex mirabili divinæ religionis propagatione ex tot Martyrum invicta fortitudine, & quod maximum est, ex Prophetarum ducuntur oraculis, præter cæteros consuli possunt Illustrissimus Meldensis Epi-

scopus in Historia Universali, Hugo Grotius, Clariss. Huetius, & D. Diroys: nos ad nostrum referamus institutum.

TRACTATUS TERTIUS.

De moribus, seu de humanis actibus.

MOres hoc loco dicimus actus humanos qui scilicet a ratione & voluntate, seu a libero arbitrio proficiscuntur, & ad Moralem Philosophiam maximè pertinent. Quanquam & mores etiam dici solent propensiones quædam, vel inclinationes à natura congenitæ, aut studio & industria comparatæ; sive ex natura ipsius animi, ut sciendi cupiditas, & amor summi boni; sive ex corporis complexione profluant, ut iracundia: seu bonæ sint, & ad virtutem inclinent; seu malæ, seu denique indifferentes habeantur: de quibus cum se dabit occasio, verba faciemus. Nunc actiones humanas, quæ scilicet hominis sunt propriæ, quæque ab intellectu & a voluntate manant, & voluntariæ appellantur, explicare nobis in animo est.

Hæ porro actiones sunt in duplici differentia constitutæ. Aliæ a voluntate ipsa eliciuntur, quæ idcirco elicitæ nominantur; aliæ a voluntate quidem imperantur, sed a subjectis viribus perficiuntur. Illæ sunt essentialiter voluntariæ; hæ tantum per participationem, & quasi extrinsecus: ut actiones omnes, quas vis motrix exerit, & voluntas imperat. De actibus elicitis priori loco dicendum: cumque inter imperatas

ratas eæ solæ ad Moralem scientiam pertineant, quæ ab appetitu sentiente dimanant, quæq; animi passiones, aut affectus dici solent, de his posteriori loco agendum erit.

DISPUTATIO PRIOR.

De actibus humanis qui a voluntate eliciuntur.

Circa voluntatis actiones, quæ propriè humanæ dicuntur, primum quæ sint earum species, quove ordine inter se digerantur; 2. Quæ regulæ ad quas exigi debeant; 3. Utrum sint actus quidam indifferentes, quàm poterimus diligenter & dilucidè explicare conabimur.

QUÆSTIO PRIMA.

De actibus voluntatis.

Actus voluntatis alii circa finem, alii circa media versantur. De utrisque agendum.

ARTICULUS PRIMUS.

De actibus voluntatis qui circa finem versantur.

Tres vulgò numerantur, voluntas, intentio, & fruitio. Voluntas ut varias exerit functiones, diversis quoq; exprimitur nominibus: sed ubi in finem suum simplici motu nititur, voluntatis nomen retinet. *Sanitatem*, inquit Aristoteles, *volumus; eligimus ea quæ ad finem conducunt*. Veteres Latini voluntatem sunt interpretati, fun-

ctionem appetitus, quæ Græcis est βελητης, Scholastici facultatem ipsam seu appetitum rationalem voluntatis nomine signarunt; functionem verò appetitus volitionem dixere, ne homonymia nos in errorem induceret: quem tamen vix effugimus: cum voluntatis ipsius, quatenus est functio appetitus, nomen non uno modo Arist. ipse usurpet. Nam interdum pro simplici appetitione finis, voluntatis nomen accipit: sæpius pro consensu aut approbatione eorum quæ sunt deliberata. Unde hanc definit I. Rhetor. c. I. *Boni cum ratione appetitionem*: quod scilicet ea præviam semper habeat deliberationem. Quo quidem modo Stoici apud Tullium Tuscul. 4. eam sic definiunt. *Voluntas*, inquit, *est quæ quid cum ratione desiderat; quæ autem adversa ratione incitata est veherentius, ea libido est, vel cupiditas effrænata, quæ in omnibus stultis invenitur.*

Actus autem ille quem voluntatis nomine designamus, amor dici potest; ad quem cæteri omnes referuntur: isque est duplex, non re, sed ratione distinctus. Amor personæ qui & dilectionis; & amor commodi quod personæ ipsi volumus, sive id utile sit, sive jucundum. Hinc sanctus Thomas, *actus*, inquit, *amoris semper tendit in duo, scilicet in bonum, quod quis vult alicui, & in eum cui vult bonum.* Hoc enim est propriè amare aliquem, velle ei bonum. Cæteri voluntatis actus ex amore velut ex suo fonte profluunt, aut potius nihil sunt præter amorem qui diversos induit vultus. Nā & desideramus bonum amatum, eoq; gaudemus, & si quid nobis displicet, non alia

id ratione fit, quàm quòd bono quod amamus, adverfetur. Itaque simplex voluntas, aut amor non tam est actus a cæteris diftinctus, quàm radix & fons omnium actuum, atque ex eo diftinctionem omnem fuam ii defumunt. Amor autem est alicujus boni, quod animus ut nobis conveniens judicat. In illa quidem convenientia primùm acquiefcit voluntas; tum amore quodam velut pondere in eam rem fertur, quæ nobis commoda, aut bona judicatur.

Cum amor ille in fimplici complacentia, ut ajunt, circa perfonam aliquam fiftit, tum fterilis quædam est benevolentia, quæ ad commodum ufque non excurrit: fed ubi amor est efficax, & in commodum perfonæ dilectæ promovendum nîtitur, tum dilectio nominatur & electionem plerumque confequitur. Non diffimili ratione amor finis, ut beatitudinis, plerumque in fimplici voluntate, aut in complacentia hæret, tumque actio illa voluntas propriè nominatur: ut cognitio principiorum intelligentia dici folet: utraque enim nomen fuæ facultatis retinet, cum reliquis actionibus prior fit & fimplicior. Est igitur voluntas fimplex amor finis, nulla mediorum habita ratione.

Cum autem actus ille voluntatis non est abfolutus, fed ex conditione fufpenfus, tum velleitas dicitur, eaque non tam circa objectum verfatur, quàm circa actum, qui certa conditione pofita fieret: cujufmodi funt difcordes illi volûtatis motus, quos fanctus Auguftinus libro 8. Confefs. egregiè de-

describit. Ego autem, inquit, *ad huc terra obligatus militare tibi recusabam, & impedimenti omnibus sic timebam expediri, quemadmodum impediri timendum est. Ita sarcina seculi, velut in somno asolet, dulciter premebar, & cogitationes quibus meditabar in te, similes erant conatibus expergisci volentium, qui tamen soporis altitudine remerguntur. Quo quidem modo dicitur Prov. 13. vult & non vult piger: virtutem enim amat, sed fugit laborem. Plenè enim & perfectè velle oportet, non semi-sau-
ciam versare & jactare voluntatem, parte assurgente, cum alia parte cadentem. August. ibid. c. 18.*

Sed ubi voluntas ad finem suum quodam velut itinere contendit, hoc est, cum amor finis est efficax, atque in eum nititur, & per certa media vult eum assequi (tametsi ea media nondum sint determinata, quousque electio accesserit) tum intentio dicitur. Est igitur intentio voluntatis motus, quo fertur in finem per aliqua media consequendum.

Jam ut intentio finem absentem & adipiscendum spectat, sic fruitio est finis præsentis, & tanquam fructus jucunda perceptio. Atque ea re fruimur, in qua tanquam ultima acquiescimus, quæque omne desiderium explet. Undè propriè fruitio est summi boni: quatenus tamen ea delectationem habet adjunctam, frui dicimur bono omni quod per se expeditur. Nam frui ex Sancto Augustino: *Est amore inherere alicui rei propter se ipsam. Et alibi docet, quod omnis humana perversitas est frui utendis, & uti fruendis. Quare utendum est creatura, non fru-*

fruendum . Nam iis fruimur quæ nos beatos efficere posse arbitramur : quod ab uno Deo est expectandum : fruitio autem est amor efficax , qui voluntatem cum bono possessio ita conjungit , ut sublata omni inconstantia & fastidio, in sui boni possessione tranquillè & pacatè quiescite .

Ex iis utique & aliis quæ suprà attulimus, licet colligere animam esse ex naturæ suæ conditione determinatam ad actus sibi quodammodo essentielles, ad suæ videlicet naturæ conservationem; ad suæ tranquillitatis & delectationis desiderium, & fugam eorum quæ pacem illam, & jucundam delectationem impedire, aut perturbare possunt . Sed cum in se non habeat, quo frui, & beata & tranquilla esse possit, varios fines particulares præstituit , aut divitias , aut honores, aut voluptates, aut Deum ipsum , qui solus naturale illud desiderium expellere potest .

Itaque prima hominis aut voluntas, aut electio, aut sensus , aut quocunque alio nomine donetur amor ille finis ultimi & particularis, cujus fruitione nos beatos esse posse credimus, quem primum eligimus, est primus actus ad quem voluntas sese determinat , independenter ab omni alia determinatione . Hujus vi quidquid ei adversatur, omnino refugimus . Sic amor gloriæ infamiam, libertatis amor omnem fugit servitutem ; amor Dei cupiditatem pellit . Ubicunque bonum illud, cujus desiderio flagramus, occurrit, eo impellimur ; media hujus consecutioni utilia vi illius amoris, & eò magis, quò nobis videntur magis

gis idonea, prosequimur : ad hæc utique amor ille finis quem eligimus, nos inflectit ; cum is a nullo sit determinatus. Nam amor essentialis quo natura intelligens & esse, & vivere, & cognoscere quæ delectant, & pacata esse exoptat, ad unum potius, quam ad alium finem particularem nos determinare nequit. Secus omnes homines eisdem sibi fines præstituerent : cum in omnibus eadem sint innatæ propensiones, iidem amores essentialis. Hæc utique paulò accuratiùs ex viri doctissimi dissertatione decerpere volumus, quòd hinc actionum humanarum œconomia non mediocriter illustrari possit.

A R T I C U L U S I I.

De Actibus voluntatis qui circa media occupantur.

ATque hæc de actibus voluntatis qui circa finem occupantur. Tres itidem sunt, nimirum consensus, electio, & usus, qui circa media, seu bona utilia versantur. Primus est voluntatis consensus, quem, ut initio diximus, voluntatis nomine veteres interdum designarunt. Est enim simplex & minimè efficax boni utilis affectus, aut complacentia ; vel est actus voluntatis, quo media ab intellectu proposita comprobant. Nullus porro est voluntatis consensus, quem finis intentio non præcedat. Quod enim utile est, omnem boni rationem a fine mutuatur : idque medium dicitur, quòd inter intentionem & fruitionem,

nem , seu finis ipsius possessionem medio velut loco positum sit . Cum unicum est , non utile modò , sed etiam necessarium habetur . Sed cum multa ad finem utilia proponuntur , singula voluntatem afficiunt quòdam modo : quamvis ea unum aliis non anteponat . Itaque per consensum voluntas in rei bonitate , ut ab intellectu proponitur , acquiescit : tametsi in illam efficaci appetitu nondum fertur , eaque circa rei propositæ imaginem potius , & bonitatem ut præsentem versatur , quàm motu efficaci in rem ipsam propendeat : ac sæpè bonum illud sub una ratione placet voluntati , sub alia displicet .

Sed ubi ex multis quæ ad eundem finem conspirant mediis , unum alteri præponitur , tum electio dici solet , non re , sed ratione a consensu sæpè diversa : cum unum dummodo est ad finis adeptiōnem utile , cum nullus est deliberationi locus . Electio plerumque latiori significatu sumitur pro appetitione omni quæ consultationem consequitur , quæque circa ea versatur , quæ sunt in nostra potestate , tumque est actus libertatis : cujus objectum est id omne quòd in deliberationem venit . At si ea strictiore & magis proprio significatu accipitur , est actio voluntatis qua ex multis mediis ab intellectu propositi unum alteri antefertur , estque , ut diximus , syllogismi operativi , seu practici velut conclusio .

Quanquam ex finis ipsius amore , voluntatis electio , aut unius præ altero acceptatio oriatur : tamen amor ille finis non is est qui

qui voluntatem infallibiliter, ut ajunt, determinet : secus enim cum aliquid in voluntate nostra dominatur, nulla id unquam ratione amoveri posset, & semper id regnaret. Nullus itaque amor non est mutabilis, nullus ab alio fortiori non vinci potest. Manet ille quidem, quandiu ab alio vehementiore non expellitur. Sic amorem voluptatis plerumque gloriæ cupiditas frangit : sæpè mutata corporis temperie, quæ antè nobis videbantur jucunda, jam fastidio adhærescunt. Imò sæpè accidit, ut diversi & contrarii amores simul in voluntate vigeant : hinc pugna carnis & spiritus : neque enim inter oppositas affectiones ea esset luctatio, si eæ actu non adessent : tumque vim suam quæque exerit, sive ut sese mutuò perimant, sive ut voluntatem ad actiones ipsis convenientes impellant, ubi adsunt conditiones ad agendum requisitæ. Cum scilicet objectum ut bonum amabile cognoscitur; cum mediolorum ad finem utilium ratio perspicitur : secus enim eligi ea non possunt, aut aliis anteponi; cum denique objecta ipsa adsunt, & ad ea animus attendit : tum enim ea vehementer voluntatem commovent : præsertim si magna sint; si ex omni velut parte menti se ostendant, si magnus injiciatur metus tot bona amittendi; si dolores sint acerrimi, si magnum vitæ immineat periculum : tum enim nisi contrarius virtutis amor altas radices in animo egerit, omnino cedit, & pedem refert.

Ultimus voluntatis actus est usus, qui universim sumptus est applicatio rei ad ope.

operationem : sic usus linguæ est locutio ; usus navis est navigatio. Cum autem voluntas subjectas sibi vires ad agendum applicet, ut causa effectrix instrumenta, usus propriè ad eam pertinet, quæ aliàs potentias ad sui finis consecutionem movet. Imò & se ipsam quoque voluntas ad eligendum, aut ad consentiendum, & intellectum ad deliberandum applicat : Actus quippè voluntatis in se ipsos reflecti solent : nam consentit se eligere, & se consentire.

Itaque in usu, ut in electione, voluntatis dominium elucet maxime : atque ut deliberatio electionem, sic rationis imperium, seu ordinatio usum voluntatis antecedit. Sed quod primum eligimus; id ultimum est in usu, seu in executione : quod enim primum eligimus, id fini est proximum.

Hoc etiam non prætereundum videtur, a nonnullis jam observatum, id esse discriminis inter electionem & usum, quòd electio sit determinatio voluntatis affectiva : bonum enim respicit ut sibi conveniens, quo utique afficitur : sed usus voluntatem effectivè determinat : nam bonum ut faciendum respicit.

Hi sunt utique præcipui voluntatis actus qui in humanis negotiis, dum prudenter & consultò, non temerè & impetu agimus, observari possunt. Quanquam non dubito quin iidem motus quos appetitui sentienti tribuimus, quosque passionum nomine designamus, ut amor, odium, desiderium, fuga, læticia & tristitia, in voluntate etiam reperiantur : cum eo tamen discrimine, quòd in ea benigniores sint & minus

tur-

turbulenti, quàm in appetitu sentiente, & circa objecta magis spiritalia plerumque versentur. Neque enim voluptas qua ex rerum contemplatione perfundimur, aut pœnitentia, vel ægritudo animi ex odio peccati & iustitiæ amore profecta, ad partem sentientem pertinet.

Ac ne illud quidem necesse est, ut actiones intellectus quæ singulos actus voluntatis antevertunt, minutius exequamur: cum ex iis quæ diximus, colligi facîle possint. Illud universim adnotare sufficiat, voluntatem esse facultatem rationalem, quam intellectus ubique, ut vulgò loquuntur, dirigit, & quodammodo illuminat.

Primum itaque res ut bona ab intellectu percipitur, & voluntati proponitur. Hanc perceptionem simplex voluntas, aut complacentia statim consequitur: tum voluntas intellectum excitat, ut diligentius examinet illius rei condiciones, an consequi eam possimus, utrum nobis expediat. Iudicium intellectus intentio voluntatis subsequitur, quæ definitum habet finem, sed media aut instrumenta quæ ad eum perducunt, nondum sunt evoluta. Hæc inquit intellectus, diligentius examinat, & deliberat; iis voluntas consentit, & ea quodammodo approbat, quæ intellectus solertia excogitavit: tum mens diligentius quod ex omnibus sit utilissimum, inquit, intellectus iudicium sequitur voluntatis electio. Quare consultatio media inquit, comparat, quodque ex iis sit utilissimum, iudicat. Illud Sapientis Prov. 15. semper manet inconcussum. *Dispersantur cogitationes, ubi non est*

est consilium. Cum ad certum finem actiones nostræ non diriguntur, vaga sunt & incerta consilia, Eodem spectat illud Prov. 20. *Cogitationes consiliis roborantur.*

Objectum consultationis non est finis, qui in quæstionem non venit, sed quæ ad finem perducunt: quæque ut possibilia & in nostra potestate sita concipi debent. Hinc belluæ non deliberant, quod libertatis sint expertes, nec quicquam propriè habent in sua potestate: electionem sequitur imperium, seu ordinatio intellectus, tum usus voluntatis, tandem fruitio.

Q U Æ S T I O II.

*De prima actionum humanarum regula,
seu de lege aeterna.*

Proximum est ut de bonitate & malitia actionum humanarum dicamus: id enim maxime huic scientiæ est propositum, ut quid rectum sit, quid perversum dijudicet. Sed quæ sint præcipuæ morum regulæ ad quas sint exigendi, antè est definiendum: his enim ignoratis, unde actiones nostræ bonitatem, aut pravitatem desumant, constitui nullo modo potest.

Ac primum id liquet actiones nostras tum Morales dici, cum ad suam regulam referuntur; cumque huic conveniunt, bonæ; ubi ab ea defleunt, malæ judicantur: adeo ut moralitas nihil sit præter illam coaptationem, aut commensurationem actuum humanorum cum regula; ad quam exigi debent. Non enim Moralitas aliud.

aliud quiddam est quàm ordo , quem ratio in liberis actionibus efficit,isque desumitur ab objecto ipso , quatenus ad regulam suam refertur .

Cum autem , ut docet S. Thomas I. 2. qu. 71. art. 6. regula voluntatis humanæ sit duplex ; una propinqua , & homogenea , scilicet humana ratio ; alia verò sit prima & remotior , scilicet lex æterna , quæ est quasi ratio Dei : de utraque nobis sic agendum , ut priùs de æterna lege , quæ omnis rectitudinis principium est & radix , differamus .

Legem universim nonnulli definiunt *regulam actuum Moralium obligantem ad id quod rectum est* . Undè non ad justitiæ modò , sed ad aliarum quoque virtutum materiam , & ad id omne quod rectum est , omninò pertinet . Consilia verò , quæque honesta quidem , sed non obligantia præcipiunt , legis nomine aut notione non continentur .

Legis æternæ nomine non aliud intelligitur , quàm summa ratio , quæ in Deo tanquam in summo omnium opifice viget , quæ cuncta rectè disponuntur . Hinc S. Aug. lib. 1. de liber. arbitr. *Ut igitur , inquit , breviter æternæ legis notionem , quæ nostræ mentis impressa est , quantum valeo , verbis explicem , ea est , quæ justum est ut omnia sint ordinatissima* .

Quod sit primum hujus legis præceptum nobis insitum l. 3. paucis explicat : *jubez , inquit , æterna lex avertere amorem à temporalibus , & cum mundatum convertere ad æterna* . Ordinem verò illum ab Authore naturæ constitutum invertimus , cum fruimur creatura ; cum ei nos subicimus per amorem ,

rem, cui præesse ex naturæ institutione debemus; quæ nec potest nos beatos efficere, nec desiderium voluntatis explere, neque irrequieta in ejus motionem sistere.

Itaque eò pertinet lex æterna ut finem ultimum non alibi quàm in possessione summi boni quod satiare appetitum potest, omnino constituamus. Neque aliud injustos nos, aut insipientes efficit, quàm cum ea, ut summum bonum expetimus, quæ voluntatem explere nullo modo possunt. Hæc justitia & sapientia est, illud bonum exquirere, huic adhærescere, adeò ut omnis legis naturalis & æternæ nobis impressæ summa huc pertineat, ut Deum tanquam summum bonum diligamus. Hoc utique est præceptum ab Authore naturæ mentibus nostris insculptum, & a Christo renovatum, & toties inculcatum. Hoc æterna & immutabilis ratio præscribit; id præcipuum munus est naturæ rationalis, huc actiones omnes nostræ referri debent. Nam æternam felicitatem omni studio expetere & inquirere debemus, simul & ea eligere quæ ad illam nos perducunt. Hic summi boni amor ad omnes alios actus voluntatem determinat. Atque in eo consistit legis æternæ ratio, ut quæque sic diligamus, ut bona sunt & amabilia: quod bonum est ex se, & summum bonum, propter se & maximè diligamus, cætera ea ratione diligamus, ut ad bonum illud per essentiam referuntur. Non quòd alii homines non sint diligendi, sed eo modo quo Apost. Philemonem diligebat. *Ita, frater, ego te fruor in Domino*. Quocirca ut rivuli in flumine,
& no-

& nomen amittunt, & aquas confundunt: Sic quicquid diligimus, in Dei amore colligendum, ut quidquid aliud diligendum venerit, eò rapiatur, quò totus dilectionis impetus currit, ut ait Aug. *Nulum enim rivulum extra se duci patitur, cujus derivatione minuat.*

Quod autem ex lege æterna regulas & præcepta vivendi hauriamus, atque hinc leges omnes justæ describantur, hinc probat Sanctus Thomas, quòd in rebus omnibus inter se connexis & ordinatis, atque in omni serie regiminis aut gubernationis, nulla res moveat, nisi vi primi moventis. Nam ratio, sive ordo, v. g. administrandæ reipublicæ, a Principe tanquam a capite, ad Magistratus ut ad membra inferiora derivatur: ii quippè nihil agunt nisi ex ordine Principis. Sic ab architecto ad inferiores artifices ratio omnis construendi ædificii descendit. Cum igitur lex nihil sit nisi ratio quædam administrationis, nulla lex justa non oritur ab æterna lege, quæ est in summo omnium Principe: est enim prima regula, aut mensura actionum humanarum, quæ bonæ sunt, cum ei concinunt; malæ, si secus: hinc adedò omnis ordo, omnis ratio profluit.

Sed, *inquies*, non possumus ad eam regulam, quæ nobis est incognita, actus nostros exigere: sed lex æterna a nobis non percipitur: ergo eam non possumus inter agendum consulere, aut velut regulam sequi.

Resp. Nos eam legem mentis acie, utcunque attingere, uti in Logica de primis prin-

principiis cognitionis nostræ fuit demonstratum. Quod multò maxime verum est de principiis rerum agendarum, quæque naturali lege continentur. Hinc S. Augustinus lib. 2. de Ordine. *Hæc autem, inquit, disciplina, ipsa Dei lux est, quæ apud eum fixa & inconcussa semper manens in sapientes animas quasi transcribitur; ut tantò se sciant vivere melius, quantò & perfectius eam contemplantur intelligendo, & vivendo custodiunt diligentius.*

Itaque lex æterna mentibus nostris affulget quodammodo, & a nobis conspicitur. Unde S. Augustinus, cum multis in locis, tum maxime lib. 2. de libero arbitrio docet, neminem fieri prudentem, aut justum prudentia, aut justitia alterius, sed cooptando, inquit, animum illis incommutabilibus regulis luminibusque virtutum, quæ incorruptibiliter vivunt in ipsa veritate, sapientiaque communi: tum ostendit voluntatem bonam fieri & beatam, cum adhæret communi atque incommutabili bono.

Eandem fuisse & Platoniorum & Stoicorum sententiam facile esset, si res exigeret, demonstrare. Hinc pulchrè Cicero l. 2. de Legibus, Hanc igitur video sapientissimorum fuisse sententiam, legem neque hominum ingenii excogitatam, nec factum esse aliquod populorum, sed æternum quiddam, quod universum mundum regeret, imperandi prohibendique sapientiam. Itaque principum legem illam & ultimam, mentem esse dicebant, omnia ratione aut cogentis, aut vetantis Dei; & in eodem loco apertius. Quamobrem, inquit, lex vera atque princeps, apta ad jubendum &

ad vitandum, ratio est recta summi Jovis.

Ex quibus efficitur, legem naturalem nihil esse præter impressionem quandam legis æternæ mentem nostram irradiantis. Sed de hac lege mox pluribus.

Q U Æ S T I O IV.

De recta ratione, & conscientia.

Nunc proximæ regulæ, nempe recta ratio, quam Deus mentibus nostris inferuit, ut nosmetipsos regere valeamus; & conscientia, quæ est rectæ rationis applicatio quædam, sunt paulò uberius explicandæ.

ARTICULUS PRIMUS.

De recta ratione.

Quæ sunt rationis expertia, in se non habent suorum motuum principia, & progressus, sed in suos quæque fines ab Authore naturæ diriguntur. At quæ mente prædita sunt; & sui & suorum actuum facultatem habent ac dominium; judicium quoque iis datum, quo utilia a noxiis, bona a malis sejungant. Ordo autem omnis, aut judicium secundum aliquas regulas perficitur: quæ quidem regulæ sunt in mente illius, ad quem ordo aut judicium pertinet. Sic ordo administrandæ reipublicæ fit secundum certas regulas, quæ in mente Principis vigent: ordo artificialis ad certas quoque regulas, quas mente concipit artifex,

fex, exigitur. Has autem regulas menti nostræ impressit Deus, quas recta ratio complectitur, quæ quid naturæ humanæ conveniat, quid secus, examinat. Quod huic iudicio repugnat, contra jus naturæ humanæ esse intelligitur. Nec rectum illud iudicium, quod sequi omnino debemus, voluntate corrumpitur; nec præcipiti perturbationum impetu abripitur, sed integrum manet & incorruptum; Cum autem mens directrices illas regulas non consulit, nihil quod illam deceat, nihil ferè humani aggreditur.

Quamobrem primitivæ illæ regulæ quibus iudicium & actiones nostras aptare debemus, ab æterna lege profectæ, & in animas nostras velut transcriptæ, legis naturalis nomine designantur. Est enim lex naturalis *Dictatum rectæ rationis, quo actus quosdam ab Authore naturæ per se aut præcipi, aut vetari intelligimus, quod naturæ rationali conveniant aut disconveniant*. Itaque actus illi qui ad legem naturalem pertinent, per se boni sunt, ac jus illud omnino est immutabile. Contra quæ a lege voluntaria, seu divina, seu humana præcipiuntur, non sunt suaptè natura, aut debita, aut illicita: sed vetando lex facit illicita, præcipiendo debita & necessaria.

Jus autem illud naturale est primum, quodq; ita justum est, ut nullus sit exceptioni aut dispensationi locus: idque, ut diximus, ad amorem Dei & proximi revocatur. Huc etiam pertinent omnes boni voluntatis affectus, ut modestia, temperantia, humilitas. Neque enim fieri potest ut bonus

fit actus, qui ex invidia, superbia, avaritia, aut ex aliis affectibus pravis oritur.

Jus porro illud naturale decalogo continetur, qui his versibus exprimi solet.

Unum crede Deum, nec jures vana per ipsum.

Sabbata sanctifices; habeas in honore parentes.

Non interfector sis, mœchus, fur, neque mendax.

Alterius sponsam, nec rem cupias alienam.

Atque hæc præcepta in duabus tabulis descripta a Deo accepit Moses, ut lex naturalis penè ex animis hominum deleta, his renovata præceptis primùm Judæis, tum gentibus innotesceret. Quæ ad cultum Dei spectant, priori tabulæ incisa erant, ut in posteriori leges justitiæ inter homines servandæ.

Deo autem, ut vir doctiss. in libro Anthropologiæ nuper edito scitè explicat, obligamur & hominibus; 1. Fidem, imò & fidelitatem debemus Deo *Unum crede Deum*
2. Reverentiam: *Nec jures vana per ipsum.*
3. Obsequium: *Sabbata sanctifices.*

Hominibus verò aliquid debemus, aut peculiari titulo, nempe parentibus: *Habeas in honore parentes*; aut generali, omnibus nempe hominibus, quibus nocere prohibemur, opere, verbo, aut cogitatione. Illud enim est commune erga alios officium, ut alteri non faciamus, quod nobis fieri nolumus. Ne igitur alteri noceatur opere vel in seipso; *Non interfector sis*; vel in suis, *Non mœchus*; vel in bonis aut quovis alio jure: *Non fur*. Ne ulli noceatur verbo, *Ne mendax*; cogitatione denique: *Alterius sponsam, nec rem cupias alienam.*

Aliud

Aliud est jus naturale secundarium, quod scilicet cum juris naturalis præcipuo fundamento non ita conjunctum est, quin ab eo, Deo ita volente, aut permittente divelli possit: ut plures uxores ducere, filios ejicere, & alia ejusmodi quæ juri naturali secundario videntur contraria, non primario.

Quod autem jus naturale dicimus, id ex appetitu homini insito tranquillæ & ordinatæ societatis magna ex parte profluxit. Unde & custodiendæ illius societatis sermo præcipuum est instrumentum a natura concessum. Hinc facultas homini data est sciendi & agendi quæ huic societati tuendæ, & humanæ naturæ maximè conveniunt. Hinc pulchrè Seneca, *fac nos singulos, quid sumus? præda animalium, & victimæ, ac vilissimus & facillimus sanguis: quoniam cæteris animalibus in tutelam facti satis virium est: quæcunque vaga nascuntur, & actura vitam segregem, armata sunt; hominem imbecillitas cingit; non unguium vis, non dentium terribilem cæteris fecit. Duas res dedit, quæ illum obnoxium cæteris, validissimum facerent, rationem & societatem. Itaque qui par nulli esse potest, si diduceretur, rerum potitur. Societas illi dominium omnium animalium dedit.*

Illa itaque societatis humanæ custodia fons est juris illius quod naturale dicimus: cujus generis sunt promissorum implendorum obligatio, & alieni abstinentia. Juris illius principia per se lucent, & sunt manifesta, cum animum advertimus; ea quippe velut oculis mentis omnino subjiciuntur.

Quæ omnium nationum consensu, saltem earum quæ magis sunt moratæ, & quæ omnem humanitatem non exuerunt, re-

cepta sunt, ad legem, seu ad jus naturale videntur pertinere. Nulla quippè hujus publicæ existimationis causa, quàm naturalis & communis afferri potest: cum omnis effectus universalis ad causam itidem universalem referatur. Hinc pulchrè M. Tul. *Consensio*, inquit, *omnium lex naturæ putanda est*: id verò de iis saltem quæ sunt morationes intelligendum. Nam ut a vetere quodam Philosopho notatum est, *apud homines recta sanaque mente præditos immutabile est jus illud naturæ. Quod si bis qui morbo, distortoque sunt animo, aliter videtur, nihil ad rem pertinet; nam nec mentitur qui mel dulce esse dicit, idèd quod ægrotis aliter videatur.*

Ad hanc morum regulam pertinet ipsa conscientia, de qua perpauca dicamus.

ARTICULUS II.

De Conscientia.

Proxima actionum humanarum regula est conscientia, quæ definitur a S. Thoma, *judicium intellectus, quo quis applicat suam scientiam practicam ad actum particularem*. Hincque, ut putat, nomen suum deduxit: est enim velut applicatio legis naturalis, & insita quædam cognitio ejus quod hic & nunc est agendum. Lex naturalis est instar habitus, conscientia instar actionis, illa generatim, hæc particulatim quid faciendum sit, præscribit.

In mente enim sunt prima rerum principia, quæ ad intelligentiam, cum sunt speculabilia; ad synderesim verò spectant, cum
de

de moribus agitur . Ea porro sic dicta est quasi *curiositas* seu observatio quædam . Est enim instar censoris actiones nostras notantis, aut observantis . Hæc à nonnullis portio virginalis animæ dicitur : nulla enim prævaricationis nota violari potest ; estque lex naturalis scripta in cordibus nostris . Ea rerum agendarum principia, ac divinæ imaginis animis nostris incisæ extrema velut lineamenta complectitur , quæ August. virtutum lumina identidem appellat .

Hinc pulchrè observat P. Thomassinus , præceptis naturalibus , quæ Mosis ministerio sunt renovata , nullam causam subjici , cùm aliis plerumque præceptis subjici soleant , quod nihil opus esset illa aliqua muniri ratione : cùm nostris mentibus sint inscripta . Elegantem in hanc rem Remigii locum affert l. de tribus Epist. c. 27. *Lux , inquit , lucet in tenebris , & tenebræ eam non comprehenderunt . Lux illa præsentia majestatis suæ in tenebris lucens , id est , in infidelium cordibus majestate Conditoris suam præsentiam exhibens , operatur aliquid in eis , & sic ut non videant ipsam , tamen ut videant aliquid per ipsam , id est , intelligant inter justa & injusta ; inter bonum & malum ; inter agendum & non agendum , ut sint inexcusabiles in die quo judicabit Deus occulta hominum . Quæ tamen lux non à facie illis resplendet , quia non ad eam attendunt , sed velut à tergo illis relucet .* Nunc ad conscientiam & varias illius appellationes redeamus .

Conscientia dicitur antecedens , ubi cum actione futura comparatur : sive ad bonum nos instigare & impellere , sive à malo re-

trahere videatur: consequens verò dici solet, cum quæ acta sunt, ad rationis trutinam exigit; seu approbet: seu quod sæpius evenit, improbet.

Tum excusat conscientia, cum factum rectæ rationi consonum sensu quodam interiore judicamus. Si factum rationis luminis, aut legi naturali adversum videatur, tum ea dicitur accusare. Hinc bene facta securitatem afferunt conscientiæ; malè acta eos laniatus, & angores procreant, qui experientia magis, & sensu, quàm verbis explicantur. Unde & conscientia testis & judicis munere fungitur; cum nos de pravis actionibus reprehendit, atque ut ait Juvenalis.

Nocte dieque tuum gestas in pectore testem.

Hinc Sapiens Prov. 12. *Cogitationes justorum judicia; & consilia impiorum fraudulenta. Nam conscientia accusat, ratio judicat, timor ligat, dolor excruciat.* Gregor. in Iob. lib. 25. cap. 6.

Hinc definitur à Lipsio in Polit. *bonorum, malorumque facinorum Judex, & index.* Illa est vermis, de quo loquitur Isaias c. ultim. *Vermis eorum non extinguetur: vermis enim qui non moritur.* ut ait Hieronymus, à plerisque conscientia accipitur peccatorum, quæ torquet in suppliciis constitutos.

Conscientiæ autem varii sunt status: nam aut vera est, aut falsa, aut dubia. Tum vera est, cum mens attentione adhibita, & præjudiciis depositis evidenter quod faciendum est cognoscit: atque hæc conscientia est legitima morum regula. Falsa au-

fa autem futura est, si mens aut præjudiciis, aut æstu libidinum abrepta temerè judicet, obscurè duntaxat & confusè re ut bona percepta, quam tamen attentione facta malam judicasset. Itaque cum error ille ex negligentia, aut malitia, aut ex pravo affectu oritur, tum actio ipsa in vitio est, & excusari non potest. Dubia autem est conscientia, cum paribus utrinque momentis animus suspensus manet; seu de facultate ipsa aut jure; seu de facto, aut actione sit dubitatio. Quidquid ex hac conscientia fluctuante & dubia operamur, non ab omni vitio abest: cum deliberatè & consultò peccandi periculum adeamus: nec bona fide agere, aut sincerè bonus videtur, qui ab actione periculi plena non abstinet: tametsi interim aliquis illi videtur excusationi locus. Unde illa Apostoli tenenda est regula, *omnia probate*, hoc est expendite, *quod bonum est tenete*, *ab omni specie mala abstinete*.

Cum autem in moribus non id semper quod certum est & evidens occurrat, id utique agendum est, quod probabilius rectæ rationi, & æternæ legi magis consentaneum videtur: quanquam sæpè accidit, ut perturbationum æstus, aut voluptatum illecebræ nos transversos agant. Hinc rationem plerumque exoramus ut conticescat, aut de jure suo nonnihil decedat, & ad nutum voluntatis, aut potius libidinis paulatim se inflecti patiatur.

Ac ne pugna appetitum inter & rationem diutiùs perseveret, aut nobis sit molestior, id demum à ratione jam corrupta impetramus, ut quod libitum est, approbet.

Q 5 Ita-

Itaque id persæpe evenit , ut animus aut sensuum voluptate delinitus , aut objectorum impressione impulsus , ad ea non attendat quæ rationis & conscientiæ lumen ostendit ; nec diutius tamen tam molestum velut præceptorem ferre possit . Nam si grave nobis est in aliorum , quibuscum vivimus , judicia offendere , & ab iis reprehendi , id multò nobis est molestissimum , vel proprium iudicium & conscientiæ testimonium contemnere , vel à ratione nostra condemnari , aut circumferre actuum nostrorum tam severum Judicem .

Ex iis soluta manet illa inter veteres tamdiu agitata quæstio , an sit aliquid natura sua iustum aut iniustum , honestum aut turpe ; an illud omne ex opinione hominum , ut ex sancitis legibus , aut ex utilitate ipsa profluxerit , ut quidam Academici , & alii plerique disputarunt . Sit itaque

Unica Conclusio .

Lex bona à mala , jus item ab injuria , & omnino honesta ab iis quæ turpia sunt , non opinione hominum , sed natura ipsa dividuntur .

Hanc conclusionem Cicero multis demonstrat argumentis . I. de Leg. est enim totius Philosophiæ Moralis velut fundamentum . I. ex communi intelligentia quàm animis nostris impressit natura , efficitque ut honesta in virtute ponantur , in vitiis turpia . *Hæc autem , inquit , in opinione existimare , non in natura posita , verè demeritis est . Nam nec arboris , nec equi virtus quæ*

quæ dicitur (in quo abutimur nomine) in opinione sita est, sed in natura; Ergo honesta & turpia natura, non opinionem sunt dijudicanda.

Confirm. 1. Si utilitate omnia metienda sunt, & si natura jus ipsum non facit & confirmat, is negliget leges & perumpet, qui sibi eam rem fructuosam putabit fore. Itaque fiet ut nulla sit justitia, si ea nihil sit nisi obtemperatio scriptis legibus, institutisque populorum. Nam quæ opinione, non natura, quæ propter utilitatem constituuntur, utilitate alia convelluntur. Quod si ita sit, virtutes omnes tollentur. Ubi enim liberalitas, ubi patriæ charitas, ubi pietas, aut bene merendi de altero, aut referendæ gratiæ voluntas poterit existere? Nam hæc nascuntur ex eo quod natura propensi sumus ad diligendos homines: quod fundamentum juris est.

Prob. 2. Non opinione, sed natura constitutum esse jus, ex hominum inter se societate & conjunctione. Nam & ad justitiam nati sumus, & sicut, ut Cicero fuse explicat, *depravatio consuetudinum, sicut opinio- num varietas, imbecillitas animorum eos non torqueret, & si ceteris quocunque cæpiisset, sui nemo tam similis esset, quam omnes sunt omnium.* Id utique fuse hinc demonstrat, quod in omnibus sit ratio communis, iisdem sensibus omnia comprehendantur, quæque in animis imprimuntur inchoatæ intelligentiæ, similiter in omnibus imprimantur; eadem sit interpretis mentis oratio, verbis discrepans, sententiis congruens. Quod deum magis ad institutum facit, nulla fore ratio comitatem, benignitatem, gratum

animum, & beneficii memorem non diligat; nulla non superbos, maleficos, crudeles, ingratos non aspernetur, non oderit. Ex quo quidem id concludit, nos ad justitiam esse natos; ac si ut natura, sic iudicio homines humani nihil à se alienum putarent, coleretur jus æquè ab omnibus. Quibus enim ratio natura data est: iisdem etiam recta ratio data est; ergo & lex quæ est recta ratio in iubendo & verando; & si lex, jus quoque: at omnibus ratio: jus igitur datum est omnibus.

Confirm. Nemo, inquit idem author, tam audax unquam fuit, quin aut abnueret à se commissum esse facinus; aut iusti sui doloris causam aliquam fingeret, defensionemque facinoris à naturæ jure aliquo quareret: ex quo optimè concludit, esse unum jus, quo devincta est hominum societas, & quod lex constituit una, quæ lex est recta ratio imperandi atque prohibendi; vel ut ab eo superius est definita, lex est ratio summa insita à natura, quæ jubet ea quæ facienda sunt, prohibetque contraria.

Diluuntur objectiones.

Opp. I. Jus naturale nullum esse: omnes homines & animantes ad utilitates suas ducere natura ferri: illud adeò verum esse quod ait Poeta, nec natura potest justo sacernere iniquum.

Resp. Negando antec. Nam bonum & malum, turpe & honestum, æquum & iniquum natura ipsa judicari & sua spontè expeti jam ostendimus. Hinc, ut optimè Tullius, omnes viri boni ipsam æquitatem & jus
ipsum

ipsum amant; nec est viri boni errare, & diligere quod per se non est diligendum. Atque etiam si emolumentis, non suapte sponte virtus expetitur; una erit virtus quæ malitia rectissime dicetur: ut enim quisque maximè ad suum commodum refert quæcunque agit, ita minimè est vir bonus: ut qui virtutem præmio metiuntur, nullam virtutem nisi malitiam putent. Nam ubi amicitia (ut alias virtutes omittam) si non ipse amicus per se amatur? qui etiam deferendus & abjiciendus est, desperatis emolumentis & fructibus: quo quid potest dici immanius? Quodd si amicitia per se colenda est, societas quoque hominum & justitia per se est expetenda.

Neque eadem est ratio hominis quæ animalium: nam est in homine naturalis quædam societatis appetitio, quæ citra justitiam esse non potest. Hinc optimè M. Antonius Imperator, *homo*, inquit, *in id natus, ut aliis bene faciat*.

Sed ne illud quidem verum est, nihil animales agere, nisi utilitatis suæ causa: nam vel foetuum suorum, vel congenerum causa sæpè utilitates suas negligunt. Atque in ipsis infantibus ante omnem disciplinam elucet quædam ad bene faciendum propensio: sic & misericordia in ea ætate se ostendit. Quanquam fatemur igniculos illos naturæ, aut consuetudine, aut pravis opinionibus, ut præcipuam omittam malorum causam, peccati originalis labem, penè extinguere aut obrui, Nam animis nostris omnes tenduntur insidiæ, vel ab iis qui teneros & rudes inficiunt, & flectunt, ut volunt;

volunt; vel ab ea, quæ penitus in omni sensu implicata infidet imitatrix boni voluptas; malorum autem mater omnium. Nos utique eam concupiscentiam dicimus, quæ est inordinata & effrænata rerum sensibilibus appetitio, primi peccati soboles, & plaga, malorum omnium radix: *Cujus blanditiis corrupti*, ut hæc verba Ciceronis usurpem, *quæ natura bona sunt, quia dulcedine hæc & scabie carent, non cernimus satis*. Hinc perturbat nos opinionum varietas, hominumque dissensio; ac leges, aut jura non natura, sed utilitate esse constituta & fixa falso credimus.

Sed, *inquiunt*, summæ id videtur stultitiæ, sibi nocere, dum alienis commodis consulimus: quò quidem tendit lex illa quæ naturalis dicitur: ergo nulla est lex naturæ, neque aliæ sunt leges, aut jura, quàm quæ homines utilitate sua ducti sanxerunt.

Resp. Falsum illud & perniciosum videri, nullum juse esse, nisi id quod utilitas induxerit: nam etsi nulla re indigeremus, ad societatem mutuam natura ipsa nos impelleret. Neque id negamus utilitatem summam esse in hominum societate. Quo enim singuli infirmiores sumus, hoc magis ad custodiam humanæ societatis ducimur. Quamobrem ut stultus haberi non debet civis, qui legibus constitutis obsequitur, etiamsi quædam legum reverentia sibi utilia omittat: sic nec civitati, nec homini tribuenda stultitia est, cum jus naturale omnibus emolumentis anteponit.

Opp. 2. Author quidam inter recentiores celebris, falsum esse illud axioma, hominem

nem natura esse aptū ad societatem civilem: id verò fieri ex accidenti contendit, ut homo hominem amet, non natura dūce: secus, inquit, omnes æquē homines diligeret. Negat congregatos esse homines impellente natura, sed unius utilitatis causa, aut potius ex metu: adeò ut congressus omnis vel egestate mutua, vel captanda gloria concilietur, hoc est, sui ipsius, non amore sociorum contrahatur.

Nam in omni, inquit, societate, quod bonum putat quisque, id quærit. Illud verò non aliud est quàm jucundum, sive animi, sive corporis: voluptas autem omnis animi aut gloria est, aut ad gloriam refertur. Quæ ad corpus pertinent, commoda vocantur. Gloriæ studio nulla iniri societas, neque multorum hominum, neque multi temporis potest. Nam honor aut gloriatio si omnibus adsit, nulli adest, comparatione quippè & præcellentia constat. Commoda autem hujus vitæ mutua quidem ope augentur, sed multò magis dominatione, in quam avidius natura sua homines ferrentur, si metus abesset.

Itaque concludit originem magnarum & diuturnarum societatum non à mutua hominum benevolentia, sed à mutuo metu extitisse. Fatetur tamen infantes ad vivendum, adultos ad bene vivendum aliorum ope indigere. Verùm in ea est sententia, ut hominem non natura, sed disciplina ad societatem factum esse existimet.

Multa addit quæ vix in Philosopho, nedum in Christiano ferri possunt. Voluntatem lædendi omnibus inesse in statu naturæ;

ræ ; sed alius secundum æqualitatem permittit cæteris eadem quæ sibi, quod est modesti hominis : alius superiorem se aliis existimans, omnia licere sibi soli vult, quod ingenii ferocis est. Huic igitur voluntas lædendi est ab inani gloria, & falsa virium æstimatione, illi ex necessitate res suas, & libertatem defendendi. Accedit etiam certamen ingeniorum. Unde nulla acrius geruntur bella, quàm inter ejusdem religionis sectas, & ejusdem reip. factiones, ubi certamen est vel de doctrina, vel de prudentia politica. Sed frequentius hinc oriuntur discordiæ, quòd multi eandem rem simul appetant, quam tamen neque possidere communiter, nec possunt dividere : unde sequitur fortiori dandam esse, quis autem fortior sit, pugna judicari.

Hinc verè colligit 1. Non esse contra rectam rationem, si quis det operam, ut à morte, & doloribus proprium corpus defendat. 2. Ut jus habeat quisque in naturæ statu utendi omnibus mediis quæ ad hunc finem sunt necessaria. 3. Unumquemque esse natura Judicem, an media quibus usus est, sint necessaria ad vitæ suæ conservationem. Neque enim, inquit, est contra rationem, ut de proprio periculo judicem : nam si alius judicet, cum ambo æquales natura simus, eodem jure ego judicabo de iis quæ ad ipsum spectant. 4. Hinc sequitur in statu naturæ mensuram juris esse utilitatem : adeo ut natura dederit unicuique jus in omnia, & frui omnibus quæ vult, & potest. 5. Cum ex jure omnium in omnia, quæ alter jure invadit, alter resi-

resistit, bellum necessario oriatur: status ille naturæ est status belli, & omnium in omnes. Bellum verò illud sempiternum non res est idonea ad conservationem humani generis. Quare ex mutuo metu evenit, ut ex eo statu exeundum, & quærendos socios putemus: ut si habendum sit bellum, non sit contra omnes; nec sine auxiliis. 6. Quærentur socii, aut vi, aut consensu. Sic verò concludit in statu naturali potentiam certam, & irresistibilem jus conferre regendi, imperandique iis qui resistere non possunt.

Lex autem naturalis ab eo definitur, Dictamen rectæ rationis circa ea quæ agenda, vel omittenda sunt ad vitæ membrorumque conservationem, quantum fieri potest diuturnam; tum præcipuas naturæ leges refert, de quibus fortè alibi. Sed neque hoc loco cuncta, quæ ut certa, constituit, non probat, diligentius vacat expendere. Itaque uno verbo.

Resp. Illud esse certissimum, hominem ad societatem esse natum, atque hujus conjunctionis instrumentum à natura illi datum esse sermonem, ut supra ostendimus. Nulla verò est societas quæ sine jure diu conservari possit. Nam illud verissimum est, quod ait Cicero, *Omnia incerta esse, cum à jure discessum est.* Idque exemplo latronum probat Aristot. Hinc S. Chrylostomus scribens in 4. cap. ad Ephes. rationem affert cur in pace vivant latrones, nempe; inquit, *cum non ut latrones agunt.* Nam si in dividendis rebus præscripta justitiæ non servant, neque partitionem ex equo faciant, videbis, & ipsos

ipſos inter ſe bellis ac præliis implicari .

Quod autem congregatos eſſe homines
olius utilitatis, aut metus cauſa identi-
dem objicit, id falſum eſſe jam oſtendimus:
quanquam juri naturali acceſſit utilitas, ac
juri civili occaſionem dedit : nam ſubjectio,
& confociatio utilitatis alicujus cauſa in-
ſtituitur . Itaque illud non omni ex parte
verum eſt ;

Jura inventa metu injuſti fateare neceſſe eſt :

Quaſi vi quadam homines ad juſtitiam
colendam adigantur . Id verò dici poteſt de
iis legibus quæ juris naturalis executionem
adjuvant, quæque ſunt inſtitutæ ne infir-
mi à validioribus opprimantur . Nam ſi jus
omne naturale utilitate metiendum eſt ,
nec quicquam præter commoda noſtra ſpe-
ctamus ; ſi pœna tantum aut metus ſuppli-
cii , non ipſa turpitudine deterret ab injurio-
ſa, facinoroſaque vita ; nemo, ut ait Cice-
ro, eſt injuſtus : at incauti potius habendi
ſunt improbi : nam quid faciet is homo in
tenebris, qui nihil timet niſi teſtem , & ju-
dicem ? Quid in deſerto loco naſtus, quem
multo auro ſpoliare poſſit, imbecillem, at-
que ſolum ?

Quòd autem ait jus omne naturale vitæ
conſervatione contineri , & unumquem-
que eſſe natura judicem idoneum de me-
diis, quibus ad vitæ conſervationem uſu-
rus eſt ; ac demum in naturæ ſtatu menſu-
ram juris ſolam eſſe utilitatem ; ferinum
quiddam & inſociabile , non jus naturæ,
non humanum quid cogitatione depingit :
ac demum jus naturæ is appellat effrænes,
& illicitos concupiſcentiæ motus, non le-
ges

ges ab Authore naturæ animis incisas: hominem denique ut belluam ad quam animi virtus, aut honestas & decus nihil pertinent, nobis exhibet. Quin & prima naturæ, ut loquebantur Stoici, quæ simul ac natum est animal, appetit ad sui conservationem, ut quæ interitum afferunt, refugit; malè ab eo confunduntur cum lege naturali, qua præcipiuntur honesta, turpia, & injusta prohibentur. Honestæ verò dicimus quæ naturæ rationali conveniunt, quæque nos rectæ rationi commendant: hæcque cariora nobis esse debent, quam ipsa naturæ initia. Recta autem ratio & natura societatis eo tendit, ut vim omnem prohibeat, quæ jus alienum tollit.

Quocirca qui eam esse præcipuam naturæ legem statuit, ut homo cuncta ad sui conservationem referat, ut jus habeat in omnia, is sanè jus omne naturale pervertit, divinas & humanas leges omnino convellit, ac Philosophiæ moralis, imò & veræ religionis fundamenta pessundat. Neque enim leges à Deo sanctitæ rationem humanam, aut jus naturale perficerent, sed omnino destruerent.

Quare abjicienda est illa sapientia terrena, animalis, diabolica, ut cum Apostolo loquar, quæ humanam societatem, religionem omnem, imò jus ipsum naturæ evertit. Quas vocamus virtutes, in statu naturæ, si huic Authori credimus, essent vitia. Nec crimini verteretur patrem occidere, & sui commodi causa alium spoliare; sicque præcepta & cōsilia Salvatoris omnino repugnarent legibus ab Authore naturæ sanctiti.

Quod

Quod autem ait nullum in lege naturæ esse introductum dominium, falsum id omnino est : sunt enim quædam cuique propria, quæ sine injuria invadi non possunt, ut vita, & libertas. Sic in rebus ipsis in medio positis, in statu naturæ jus esset occupantis; & si quis id juris alteri eriperet, injustè ageret: adeò ut id falsum omninò sit, jus naturale sola utilitate esse ponderandum, aut in statu naturæ jus cuique esse in omnia. Verum ista ex mox dicendis fient apertiora.

Sunt & aliæ quædam morum regulæ, nempe lex cum divina, tum humana. Quanquam ad legem æternam, & rectam rationem eæ possunt revocari: ne quid tamen ad morum cognitionem necessarium omisisse videamur, de iis perpauca dicemus.

Q U Æ S T I O IV.

De lege, tum divina, tum humana.

HOc discrimine jus naturale, & voluntarium, seu positivum inter se dividuntur, quod illud circa actus per se aut debitos, aut illicitos versetur: sed jus voluntarium, tum divinum, tum humanum præcipiendo actus facit debitos, vetando illicitos: illud, ut diximus, est omninò immutabile, & perpetuum; jus voluntarium pro personarum, & temporum varietate mutari solet, atque id agit potissimum, ut quod per se laudabile tantum erat, jam debitum fiat.

Jus

Jus positivum duplex vulgò statuitur, divinum, & humanum, de utroque agendum.

ARTICULUS PRIMUS.

De Jure divino.

IUS itaque voluntarium aut divinum est, aut humanum. Illud ex divina voluntate ortum habet: Lex divina humano generi, aut uni populo, nempe Judaico data est. Jus à Deo ter datum fuit humano generi, primùm post conditum hominem; 2. Post diluvium; 3. In reparatione generis humani per Christum: idque omnes obligat, cum ad eorum cognitionem pervenit.

Quod impositum fuit Judæis, eos tantum obligat, non alienigenas, quibus lex data non est. Unde nunquam Prophetæ, aut iis ad quos scribunt, aut ad quos mittuntur, (ut cum Jonas ad Ninivitas missus est,) tanquam rem necessariam præscripserunt, ut Mosis legem susciperent. Hinc Apostolus Roman. 2. *Cum enim, inquit, gentes quæ legem non habent; naturaliter ea quæ legis sunt, faciunt; ejusmodi legem non habentes ipsi sibi sunt lex, qui ostendunt opus legis scriptum in cordibus suis, testimonium illis reddente conscientia ipsorum.* Itaque lex antiqua non est jus naturæ: tametsi cum eo nunquam pugnat: dummodò aptè distinguamus jus Dei ipsius, quodque per homines exsequitur, à jure ipso quo homines inter se devinciuntur: sic distinguere debemus ea quæ præcipiuntur,

ab

ab iis quæ sunt tantummodo permiffa.

Lex nova quid Christianis liceat, quid faciendum fit, præfcribit, eaque hoc majorem nobis fanctitatem præcipit, quàm lex Mofaica, quò majus præmium nos manet. Verùm de difcrimine utriusque legis veteris, & novæ nihil neceffe eft dicere. Quod illa nimirum terrena duntaxat promitteret, manum tantum cohiberet, non animum, hoc eft, exteriores actus potius quam interiores formaret; ac timore pœnæ homines ad bonum induceret: nova autem lex non terrena, fed æterna bona polliceatur, & præftet; omne malum prohibeat, juftitiæ amore potiùs illicitiat, quàm timore pœnæ terreat. Quod vetus occideret, & prævaricatores ex occasione faceret, dum prohibendo augebat defiderium malum, feu concupifcentiam; lex nova vivificet, cum per gratiam sanat vitium, quod lex vetus demonftrat. Sciri, ut ait S. Auguftinus, (*De Spir. & litte. cap. 6.*) *peccatum facit, non caveri, & idem magis augeri quàm minui, quia mala concupifcentiæ etiam prævaricatio legis accedit. Unde ex Apoftolo lex iram operatur, ex occasione videlicet, non per fe.*

Veteris legis præcepta partim ad ritus; & cæremonias, partim ad mores pertinent. Illa in delectu ciborum, facrificiorum varietate, in Sacerdotum, & Templi ornamenti, & aliis quæ Judæos ab idololatria deterrebant, & unius Dei cultui addicebant, quæque figuræ erant eorum quæ in lege nova peracta funt, omninò pofita videntur. Erant enim velut prophetiæ imagines myfteriorum: quæ à Christianis cele-

celebrantur . Nam (*Aug. in Exod. q. 733.*)
in veteri testamento novum latet , in novo vetus
pater .

Præcepta veteris legis quæ ad ritus , &
 cæremonias attingebant , quæque signa
 erant tantummodò rerum quæ in novo te-
 stamento geruntur , veritatis ipsius accessu
 omninò desierunt . Erant enim , ut ait Apo-
 stol. *umbra futurorum* . Sed præcepta mo-
 ralia quæ moribus informandis : & legi na-
 turali instaurandæ data sunt , ea manent
 integra , & inconcussa . *Legis veteris præcep-
 ta* , ait Aug. contra Faustum lib. 10. *vite*
*agenda servantur & nunc à Christianis , præce-
 pta verd vite significanda & illi tunc tempore*
intelligenda congruunt . Eadem igitur Ju-
 dæis & Christianis morum præcepta sunt ,
 eadem leges descriptæ , sed diversa ratione .

Lex vetus exterior fuit , & tabulis lapi-
 deis incisa , lex nova intus , & in cordibus
 fidelium insculpta fuit . (*Aug. de sp. & lit.*
cap. 14.) *Ibi in tabulis lapideis digitus Dei*
operatus est , hîc in cordibus humanis . Ibi lex
 extrinsecus posita est , qua iniusti terrentur ;
 hîc intrinsecus data est , qua iustificarentur .
 Unde lex vetus ab Apostolo . *Lex operum* ,
 identidem appellatur : *Litera occidens* , qua
 nihil ad perfectum adduceres . *Lex data est* ,
ut gratia quæreretur : gratia data est , ut lex
impleretur . Et eodem in loco : *Quod operum*
lex minando imperat , hoc fidei lex credendo im-
petrat : Et alibi : *Homines temeraria sua pra-*
sumptione ceciderunt : Facti rei sub lege implo-
raverunt Liberatoris auxilium . *Agritudo su-*
perborum facta est confessio humilium : *Iam con-*
sitentur agroti , quia agrotant ; Veniat medi-
cus

eus, & sanat egrotos. (August. ib. c. 9.) Veram ista cum ad Theologos pertineant, leviter attigisse sufficit.

Id unum annotamus, quod naturalis legis præcepta Deus datis legibus apertiora iis fecerit, quibus imbecillior est vis animi ad ratiocinandum; aut quos perturbationum impetus ad diversa trahunt: ne scilicet fluctuent & vagentur; quove ii certo fine, ac modo coerceantur. Unde & naturæ leges falsis opinionibus, aut pravis moribus penè obliteratæ divina lege renovantur.

Id quoque sapienter à viro doctissimo adnotatum video, nihil legi naturali à Deo post primi hominis peccatum additum fuisse, quod illius legis observationi non utile fuerit. Sic iussit Deus ut animalia, & fruges terræ sibi in sacrificium offerretur, quo eum bonorum omnium fontem homines agnoscerent. Iussit quoque post diluvium ut homines à sanguine abstinerent, quo homicidii horrorem iis incuteret. Secuta est lex circumcisionis quæ populum Dei à falsorum deorum cultoribus secerneret, ne fortè eorum societate in idololatriam deflueret. Lex Moysis legem naturalem penè exoletam, & in iis maxime quæ ad Dei cultum pertinent, omnino deletam promulgavit. Sed lex Christi eandem naturæ legem planè restituit, quæque ad perfectam illius observationem non erant necessaria, summovit.

Illud quoque non prætereundum videtur, posteriores leges prioribus utiliores fuisse, & ad plures pertinuisse. Ac prima quidem lex adeò neglecta fuit, ut tempore diluvii unus ex omnibus coram Deo iustus inveni-

inveniretur . Quam hic Patriarcha post diluvium legem accepit , ut fortè diutius vim suam obtinuerit , tamen temporibus Abrahami perpauci fuere qui verum Deum colerent . Abraham ipse , Loth , Melchisedech . Quæ Abraham data est lex , id effecit ut illius familia , & posterì , saltem qui ex Isaac , & Jacob nati sunt , in unius , & veri Dei cultu permanerent . Lex Moysis eandem familiam , cum in gentem magnam , & numerosam abiit , ab idolorum cultu prohibuit . Lex Christi cultum Dei purum , & perfectum toto orbe constituit , quæque ad legis naturalis observationem pertinent , sancivit . Priores quidem leges Dei cultum & naturæ jura quoad externas tantummodò actiones , & præsentis vitæ statum præscribunt , ac perfectius quiddam pollicentur ; lex Mosaiica imprimis , quæ infinitis penè figuris , & cæremoniis & vaticiniis ad novam , & perfectiorem legem præparat . Sed Christiana religio vim legis naturalis ad cogitationes , & intimos mentis affectus applicat , vetatque in hujus vitæ bonis fœlicitatem nostram constituere , neve alibi quàm in cognitione & amore Dei eam reponamus .

A R T I C U L U S II.

De lege humana .

EX naturali humana lex profluxit . Nam ad jus naturale pertinet stare pactis , ac fidem servare , (neque alius obligan-

di modus naturalis fingi potest,) atque illud principium est lumine naturali notum, cum omni homine vel non esse paciscendum, vel servandam esse fidem: unde & pacti violatio injuria dici solet, quod sine jure fiat, & actio ipsa vel omissio injusta dicitur.

Hinc igitur jus civile, aut lex humana initium duxit, cui occasionem dedit utilitas. Itaque legum humanarum, aut juris civilis fons est ipsa ex consensu obligatio, quæ ex jure naturali vim suam repetit. Nam qui se ad societatem aliquam adjunxerunt, aut se homini subjecere, hi utique aut promissere, aut tacite promississe intelliguntur, se his qui præsumt huic societati, obtemperaturos, aut quod pars illius cætus major constituerit, secuturos.

Quamobrem illa consociatio, aut subje-ctio utilitatis causa fuit instituta, tum ut homines tranquillè, & securam vitam agerent, tum ut alii alios juvarent, & sibi mutuas conferrent operas: adeo ut quod dictum est ab Horatio

Utilitas justæ præp. mater & equi.

Ad legum humanarum originem propriè pertinere videatur. Nam qui præscribunt aliis jura, utilitatem eorum, quibus præsumt, spectare debent. Hinc M. Tul. l. 2. de Legib. *Constat profectò ad salutem civium, civitatumque incolumitatem, vitamque hominum, & quietam, & beatam inventas esse leges.* Atque hinc legis nomen ductum putat, ut perspicuum esse possit in ipso nomine legis inter-
pre-

*pretando inesse vim & sententiam justæ, & juris legendi. Alii hoc nomen à ligando deducunt: quia lex nos ligat, aut obligat; si-
ve cum inducit ad bonum; si-ve cum retrahit à malo. Unde & definiri solet ordinatio rationis ad bonum commune, ab eo qui curam habet communitatis promulgata. Lex etiam à Cicerone loco citato describitur, Lex est justorum, injustorumque distinctio, ad illam antiquissimam & rerum omnium principem expressa naturam, ad quam leges hominum diriguntur, quæ supplicio improbos afficiunt, defendunt ac tuentur bonos. Lex enim omnis est quædam æternæ legis participatio hinc paulò superius dixerat, Illa divina mens summa lex est.*

Jam ut uniuscujusque civitatis, aut imperii jura civium utilitatem spectant, sic inter civitates quædam aut ex consensu, aut sæpè ex lege naturali orta sunt jura, quæ non ad unius, sed ad omnium utilitatem pertinent Jus illud gentium, imò & jus naturale dici solet. Vix enim jus ullum præter naturale reperitur, quod omnibus gentibus sit commune. Nam quod in una parte orbis terrarum est jus gentium, alibi non usurpatur. Itaque jus gentium aut est naturale, aut est voluntarium, quod multarum nationum consensu, & usu receptum est. De jure naturali intelligi debet Livius, cum ait, *jure gentium ita comparatum esse, ut arma armis propulsentur. Hoc est, non obstat jus naturale, quominus vim, atque injuriam propulsemus, ut corpus nostrum tutemur, ut ipsæ loquuntur*

R 2 leges.

leges. Sed quæ ad bellum solemnes usurpantur formulæ, ad jus multarum gentium eæ ferè pertinent. Hoc autem jus, & testimonio peritorum probari solet, uti & jus civile scriptum. Eo quidem jure gentium humanum genus continetur, quod scilicet aut natura, aut consensus gentium constituit. Hinc Demosthenes bellum esse dixit in eos qui judiciis non possunt coerceri, nec minori tamen ea religione, quàm judicia exerceri oportere.

QUÆSTIO V.

An sint actiones quædam humane indifferentes.

HActenus in rebus confessis, ex quibus tamen magnæ solvi possunt quæstiones, versati sumus: nunc ad ea quæ sunt magis controversa veniendum, ac discutiendum nobis est, an actio omnis sit bona vel mala. Quæ utique disceptatio soluta, facilius futura est, si quæ ad bonitatem, aut malitiam actionis pertinent, quæque fusiùs sunt explicata, in memoriam redigamus.

Illud itaque manifestum est, actionem humanam, de qua hoc loco quæstio est, quæ scilicet homini est propria, & sit deliberatè, bonitatem suam, & perfectionem ex objecto desumere. Id enim formam, & speciem actioni imprimit: non ratione sui, atque ut secundum se spectatur: nullum quippè ex se est malum, cum objectum omne sit creator, aut creatura: sed

sed objectum, ut ajunt, moraliter, non physicè considerari debet, hoc est, ut rationi convenit, vel ab ea desciscit. Nam bonitas cujusque rei, aut perfectio in eo posita est, quod illius naturæ est consentaneum. Itaque bonum objectum id erit, quod rationi hominis conveniens futurum est. Atque universim res unaquæque, seu in rerum natura, seu in rebus artefactis, seu in moribus bona est, & perfecta, cum propriæ regulæ aut mensuræ quadrat. Hinc bona est actio, cum rectæ rationi, & æternæ legi concinit: id verò tum evenit, cum benè sit bonum: cum scilicet corpus, ut ita dicam, actionis ex bono affectu dimanet, ut ex justitiæ, aut temperantiæ affectu, qui est quasi forma actionis; ut affectus ipse ex amore ultimi finis, seu ex recta intentione, quæ oculus simplex à Christo Domino appellatur, bonitatem suam, & perfectionem repetit.

Hinc illud Sapientis, *Oculi tui recta videant, & palpebræ tuæ precedant gressus tuos*. Proverb. 4. Et ibidem. *Dirige semitam pedibus tuis, atque omnes viæ tuæ stabilientur*.

Actionem quoque humanam in duplici esse differentia superiùs diximus. Quædam est imperata, & plerumque exterior, ut erogatio eleemosynæ; alia interior quæ à voluntate ipsa elicitur, quæque specie suam à fine fortitur: cum objectum voluntatis sit finis. Nam omnis actio specie suam habet à principio unde profiscitur, ut visio à visu naturam suam repetit.

Finis verò , ut diximus , est principium actionum quas voluntas exerit.

Actio autem exterior bonitatem suam mutuatur à fine , & objecto, vel potius à fine, quatenus in eum per tale objectum nitimur. Bonitas quæ ab objecto profluit est quasi naturalis : sic honor parentum , & erogatio eleemosynæ sunt actus ex specie sua , & natura boni. Ambulatio est actus ex natura sua , aut specie indifferens.

Sic amor naturæ omni essentialis , ut amor felicitatis, vitæ , tranquillitatis bonus est , sed nec bonos , nec justos nos efficit. Qua quidem ratione nulli dubium est quin dentur actus ex specie sua indifferentes. Sed quæ à fine oritur bonitas, ea moralis dicitur. Cum igitur objectum refertur ad finem, tum objecti ipsius bonitas continetur sub bonitate finis, quæ est ratio omnis perfectionis moralis.

Illud quoque in memoriam redigendum, alium esse finem intrinsecum, quique finis operis dici solet : ut sublevatio pauperis est finis intrinsecus erogationis eleemosynæ , isque cum objecto confundi solet : nam in practicis idem est objectum , & finis intrinsecus : ut sanitas est objectum & finis medicinæ.

Alius est finis extrinsecus, & operantis, sive is sit intermedius, sive ultimus. His itaque explicatis, sit

Unica Conclusio .

Nulla est actio humana propriè dicta, quæ non sit bona aut mala. Hæc conclusio est Divi Thomæ, & à majori parte Philosophorum defenditur.

Prob. Contra Scotum 1. omnis actus qui fit cum deliberatione, vel est rectæ rationi consentaneus, vel non: si rationi convenit, bonus est; secus, malus erit. Nam ut in artefactis, sic in moribus, quod suæ regulæ non quadrat malum est: regula autem actionum humanarum est recta ratio.

Prob. 2. Omnis actio humana in finem aliquem tendit, qui si sit legitimus, actio cum eo fine comparata, bona futura est; mala, si secus: tum enim deficient ab ordine rationis. Nam omnis actio deliberata est actio rationalis, cui debetur rationis ordo: ac si is desit, actio erit mala, & imperfecta.

Respondent Actionem referri posse ad finem indifferentem.

Contra. Finis omnis habet rationem boni, quod aut verum est, & honestum, tumque actionem efficit bonam; aut falsum est, & speciem tantum habet boni; tumque actio quæ in eum finem nititur, mala futura est.

Prob. 3. Actio spectata, ut aiunt, in individuo, est actio cum fine ultimo comparata: sed nulla ejusmodi est actio indifferens. Tum enim vel sistit in Deo, &

R. 4. est bo-

est bona, vel in creatura, sicque est mala: cum homo in creatura tanquam in fine ultimo hærere non possit, quin & legem charitatis violet quodammodo. Nam primum & maximum præceptum charitatis id est, ut Deum ex toto corde diligamus. Imò & justitiæ, & gratitudinis legem infringit qui non reddit Deo quod Dei est, & actiones suas ad rerum omnium dominum, & principium non refert, ac demum tot beneficiorum immemor, hæc Deo, ut par est, non refert accepta.

Confirm. Authoritate Christi Domini Matth. 12. *Quoniam*, inquit, *omne verbum otiosum quod locuti fuerint homines, reddent rationem ei in die judicii*: otiosum verò est ut Sanctus Thomas explicat, quod utilitate re-
editudinis, aut ratione justæ necessitatis, aut
piæ utilitatis caret. Sed nihil magis videtur indifferens quàm otiosum verbum. Nulla igitur actio est indifferens.

Idque maximè tenendum est, si omnis actio sit in Deum referenda. Hinc Apostolus 1. Corinth. 10. *Sive manducatis, sive bibitis, sive aliud quid facitis, omnia in gloriam Dei facite*. Quod utique S. Thomas præceptum esse, non consilium putat: non enim sub conditione, ut pleraque consilia, sed absolutè proponitur. Cum Deus sit primum principium, ex quo manant universa, finis quoque est ultimus in quem cuncta referri debent. Nam finis ultimus hominis ut homo est, Deus est: ut finis ultimus medici est sanitas: cumque eam efficit, tum bonus medicus nominatur: ita
& ho-

& homo cum actiones suas refert in Deum, bonus homo simpliciter nominatur : cum hæret in creatura, tum aberrat à fine ultimo . Verùm ea res ad Theologos pertinet, quam hoc loco, ut par esset, expendere non possumus .

Prob. 4. Ut omne iudicium intellectus verum est aut falsum ; sic omnis actio voluntatis bona est aut mala : bona, si fiat bono fine ; mala, si secus : nulla enim actio humana aut deliberata concipi potest, quæ ad finem aliquem non ordinetur, bonum aut malum .

Respondent Actionem fieri posse propter naturæ commodum, aut etiam propter aliquam voluptatem, quæ ex se est indifferens .

Contra . Utilitas illa, aut delectatio vel intra honesti & rectæ rationis fines continetur, ut si ad corporis sustentationem, vel ad moderatam animi remissionem referatur, tumque est bona ; vel nihil aliud quam voluptas quæritur, tumque actio est mala . Non enim voluptas sensibilis ut pecudum, sic hominis est finis . Non quod non sint quædam voluptates licitæ : sed omnis voluptas expeti debet alicujus finis honesti gratia, vel salutis corporeæ causa, vel ut molestiæ tædium frangamus . Non solo cibo, inquit S. August. sed etiam cibi sapore indiget infirmitas corporis nostri, non propter exsaturandam libidinem, sed propter tuendam salutem . Cum ergo natura quodammodo poscit supplementa quæ desunt, non vocatur libido, sed fames aut sitis : cum verò suppleta

necessitate amor edendi animum sollicitat, jam libido est, jam malum.

Solvuntur objectiones.

Opp. I. Auctoritatem tum Aristotelis, qui quosdam habitus indifferentes, nec malos esse docet; tum sancti Hieronymi qui in epist. ad sanctum Augustinum. *Bonum est, inquit, continentia, malum luxuria: inter utrumque est indifferens, ambulare.*

Resp. Dist. ant. Sunt actus quidam indifferentes ex objecto, seu ex specie sua, quatenus, ut loqui solent, abstrahunt à bono vel malo fine, C. in individuo, & cum adjunctis circumstantiis, atque ut ita dicam, in actu exercito, N.

Urgent, Nulla est species, cui non sublit aliquod individuum: ergo si actiones sint in specie sua indifferentes, erunt quoque in individuo.

Resp. Dist. conf. actiones quædam sunt in specie Physica, quam scilicet habent ab objecto, indifferentes, C. in specie Morali, N. Sic in individuo actiones quædam sunt indifferentes Physicè, seu comparatè cum objecto Physico, aut cum fiunt sine advertentia rationis, non autem moraliter. Quare ut datur actio humana secundum speciem, seu ratione objecti indifferens: ita & in individuo datur hic actus Physicè indifferens. Sed neque in specie morali, neque in individuo huiusmodi actus indifferentes agnoscimus, si conferantur cum fine ultimo aut objecto morali.

Inst.

Inff. Omissio actus qui non imperatur, est indifferens: ergo & actus potest dari qui neque sit bonus, neque malus.

R. N. conf. & paritatem. Qui enim actum omittit non imperatum, nulli facit injuriam, sed qui agit, & actionem suam ad Deum non refert, is quodammodo justitiam naturalem violat. Nam amor finis ultimi est id quod primum actus nostros determinat, omnium affectuum radix.

Contra, *inquiunt*, quod si actus illi aut indifferentes, aut boni ex genere non referantur in Deum, non hoc ipso mali futuri sunt, quod generali præcepto charitatis quo tenemur omnes actiones in Deum referre, sint contrarii: id enim omnino durum & præter rationem videtur. Neque ullum præceptum afferri potest, aut naturale, aut positivum, quo teneamur omnes actus nostros ad Deum referre.

Resp. Præceptum illud esse naturale, ut ostendimus, & ab Apostolo, imò à Christo Domino quasi promulgatum, aut renovatum.

Urgent, præceptum illud referendi actiones omnes in Deum est affirmans: ergo id quidem semper obligat: sed non *pro semper*, ut loquuntur. Id enim proprium est præcepti negativi, quale illud est, non furaberis. Non igitur tenemur actiones omnes ad Deum referre, vel actu, vel virtute.

Resp. Illud præceptum esse virtualiter & implicite negativum: prohibet enim ne fruamur creatura, neque ei ut fini ultimo adhæreamus, atque ex hypothesi

quod agamus, ad Deum actiones nostras referamus. Neque id dubium videri debet: cum actu & explicitè non teneamur actiones omnes ad Deum referre, sed intentio virtualis implicita sufficiat. Nam sæpè accidit ut homines etiam iusti bonas actiones exerant, suum cuique tribuant, tamen si de Deo ne cogitent quidem: ac si rogentur cur ita agant, nihil fortè respondeant, quàm id iustum esse & rationi conveniens. Quin etiam cum de Deo vel iusti in agendo interdum non cogitant; idque fit sæpè ex inadvertentia, quæ omni culpa vacat, quòd ea non sit libera: tum actus ille privatur quidem ea perfectione quam habere debet, sed defectus ille privationis moralis, aut culpæ rationem non habet, vel quod ignoranter, vel quod inconsideratè fiat. Quo quidem modo fatemur plures actus etiam in individuo esse indifferentes. Verum id fit per accidens, & ex infirmitate, aut inconsideratione. Quanquam omnis actio in individuo per se & ex natura sit bona vel mala.

Opp. 2. Si teneretur homo omnes actiones suas ad Deum referre, omnia infidelium opera essent peccata: sed falsum est consequens: ergo ne implicitè quidem & virtualiter tenemur actiones ad Deum referre.

Resp. dist. major. Opera infidelium, quæ ex infidelitate procedunt, essent peccata, C. quæ ex bono & honesto fine fiunt, N. Cum infideles Deum ut
 autho-

authorem naturæ cognoverint , potuerunt etiam propter Deum sic cognitum , saltem implicite , & ex motivo honestatis , aut justitiæ agere citra peccatum .

Contra , *inquit* , motivum justitiæ minimè sufficit . Unde Aug. l. 4. contra Julianum omnes infidelium actus peccata esse decernit , hoc ipso quod ad Deum non referantur . *Quidquid autem boni fit ab homine & non propter quod fieri debere vera sapientia præcipit , etsi officio videatur bonum , ipso non recto fine peccatum est .* Cumque objecisset Julianus , *si Gentilis nudum operuerit , periclitantem liberaverit , ægri vulnera foverit , ad testimonium falsum nec tormentis potuerit impelli , nunquid quod non est ex fide peccatum est ?* Respondet S. August. prorsus in quantum non ex fide , peccatum est , non quia per seipsum factum , quod est nudum operire , peccatum est ; sed de tali opere non in Domino gloriari , solus impius negat esse peccatum .

Quod etiam hac ratione probat . *Quaro , inquit , abs te utrum hæc opera bona bene faciat , an male : si enim quamvis bona , male tamen facit , negare non potes eum peccare , qui malè quodlibet facit : sed quia non vis , cum facit ista , peccare , profe- dè dicturus es , & bona facit & bene : fructus ergo bonos facit arbor mala ; quod fieri non posse Veritas dicit .* Multa in hanc sententiam ex S. Augustino & S. Prospero afferri solent , quibus.

Resp. I. Actus ex genere suo bonos , ut
mise-

misericiordiæ, justitiæ & castitatis ad malum finem inflecti posse, & ea ratione in peccata sæpissimè, ac potissimum in ipsis in-delibus degenerare.

Hinc S. Aug. eodem in loco, *Possunt*, inquit, *alia bona fieri, non bene facientibus à quibus fiunt: bonum est enim ut subveniatur homini periclitanti, præsertim innocenti: sed ille qui hoc facit, si amando gloriam hominum magis, quàm Dei, facit, non bene bonum facit, quia non bene facit, quod non bona voluntate facit.*

Itaque actio potest esse bona, licèt non bene, nec à bona voluntate, aut bono affectu fiat; ac sæpè defectus aut malitia non tam est in actione ipsa, quam in voluntate, quæ charitate ipsa, aut Dei amore destituitur: actus autem virtutis potest carere bonitate actus alterius virtutis, nec tamen idcirco malus erit: quia ejus bonitatis non est capax. Actus fidei potest esse sine actu charitatis, neque is continuò malus dici potest: secus qui credere incipiunt, semper malè agerent. Quamobrem infidelium virtutes, & virtutum actus si ad bonos fines referantur, & veræ quidem erunt virtutes, & boni actus, sed informes tamen: quod non referantur ad principale hominis bonum, cum iis desit forma virtutum charitas, ut docet sanctus Thomas 2. 2. q. 23.

Cum enim virtus non sit summum, sed medium quoddam bonum, non ea propter se, sed propter summum bonum amari debet, atque ut perfecta sit, ex recta
finis.

finis intentione proficisci . Quod si illius obiectum sit bonum fucatum & falsum , tum falsa erit virtus . At si obiectum est verè bonum , & desit tantum melioris finis intentio , tum actus virtutis erit informis , licet ex se laudabilis . Ac si quæ sit deformitas , ea non tam est in actu virtutis , quam in ipsa voluntate . Hinc S. Aug. l. de spirit. & lit. c. 27. fatetur nos in impiis , qui Deum veraciter justoque non coluerunt , quadam facta legere & audire , quæ secundum iustitiæ regulam non solum vituperare non possumus , verum etiam meritò recteque laudamus . Quanquam si discutiatur quo fine fiant , vix inveniri quæ iustitiæ debitam laudem , defensionemque mereantur .

Quo quidem modo oppositas opiniones ad justum temperamentum redigi posse arbitramur . Responderi itaque potest in forma , actiones infidelium ex genere suo bonas , peccata esse , cum ad malum finem referuntur , C. si ad bonum finem referantur , N. Quod autem in Deum non refundantur , defectus est in voluntate , seu in operante , non in ipsis actionibus ; easque hac ratione informes esse concedimus , quod iis desit charitas , tum perfecta , quæ est forma & perfectio virtutum , tum imperfecta : nec deformes sunt & peccata , cum intrinseca sua donentur perfectione .

Quin etiam aliqua actio infidelis bona esse potest moraliter , ex obiecto , seu ex officio , tum ex fine honesto , & laudabili , licet non sit meritoria . Sic actus fidei
infor-

informis, bonus est, cum imperatur a voluntate bene & honestè operante.

Quamvis actiones infidelium non sint meritoriae, non idcirco tamen omnes sunt malae: sed interdum sunt bonae: Meriti enim nomine intelligimus eam proportionem, aut habitudinem, quæ est inter justitiam nostram, & felicitatem; idque sive secundum rationem legis æternæ, qua anima ea proportionem est felix, qua bona est, & justa; sive ex Dei decreto, aut promissione, qua Deus felicitatem iis qui iusti moriuntur, non aliis promisit: adeo ut felicitas ipsa justitiæ respondeat. Jus autem illud ad felicitatem, sive ex æterna Dei lege, qua voluntas summæ justitiæ conjuncta, summo itidem bono tum cognoscendo, tum amando adhærescit; sive ex promissione divina, ad eos tantum pertinet, in quibus Deus per gratiam inhabitat: secus nulla est proportio inter eorum justitiam & summum bonum, quo uno felices esse possumus. Verum id minimè obstat, quominus multæ infidelium actiones ex bonis affectibus, ut ex justitiæ, veritatis, sapientiæ, misericordiæ amore profectæ, quæque ad legem naturalem non penitus in iis deletam pertinent, non solum peccata dici non possint, sed etiam bonæ & laudabiles meritò habeantur. Quamquam sint steriles, non meritoriae; iisque desit forma & perfectio, quæ a charitate dimanat: sed tamen sunt ejusmodi.

modi , ut ad Dei amorem , aut proximi dilectionem , quæ sunt præcipua legis naturalis capita , ex natura sua referri possint .

Responderi potest. 2. Ut actionem ex se bonam , tum esse laudabilem , cum bene fit , sic malam nos reos efficere , cum male fit , hoc est malo animo , aut affectu . Cum nempe aut scimus quodammodo eam esse malam ; vel certè ignorantia in se , aut in sua causa est voluntaria : ut est ignorantia juris naturalis , & primarii , quæque adeo non excusat , cum ea sit vincibilis . Sed qui bonum non bene facit , ac defectum illum non modò non cognoscit , sed eum nec potest , nec tenetur cognoscere , sive ad jus naturæ secundarium , sive ad positivum pertineat , sive sit facti ignorantia , non videtur peccare : dummodo actus non aliunde vitietur : ut si det eleemosynam , quo inopiam pauperis sublevet , non vanæ gloriæ ostentatione .

Unde actiones multæ sunt indifferentes per accidens , & practicè , quòd vel desit advertentia rationis , eaque non culpabilis ; vel quòd is qui agit , laboret ignorantia aliqua invincibili .

Inst. Ex Apost. ad Hebræos 11. *Sine fide impossibile est placere Deo* , & ad Rom. 14. *Omne quod non est ex fide , peccatum est* , & alibi in epist. ad Titum. *Omnia sunt munda mundis , coinquinatis autem & infidelibus nihil est mundum .*

Resp. Sine fide esse impossibile placere Deo , in ordine ad vitā æternam . C. propter mercedem aliquam temporalem , ut loquitur S.

Chry-

Chrysostomus, vel ut mitius puniantur, ut ipse ait S. Augustinus. N.

Simili ratione, omne quod non est ex fide, peccatum est, quod non est ex fide agendi, ut loquuntur, hoc est contra conscientiam, de qua eo loco agit Apostolus, C. quod non est ex fide credendi, peccatum est, N.

Quo quidem modo intelligendus est S. Prosper, cum ait in carmine de ingratitis.

*Omne etenim probitatis opus, nisi semine vera
Exoritur fidei, peccatum est, inque reatum
Vertitur, & sterilis cumulat sibi gloria penam.*

Id quippe verum est cum infidelis hæc opera ad se; ut ad ultimum finem refert, eaque omnino sibi vindicat: tum enim ea pravo affectu corrumpit: non utique cum id maximè cogitat, ut pauperum, verbi gratia, egestati succurrat, aut quod justum est, & rationi consentaneum operetur: atque ut ait S. Prosper, cum ex felicibus naturæ principiis non omnino corruptis, & ex primo naturæ honore agit. Sed quando vana sui persuasione tumet, tum vitiosa est illa sapientia, qua in se gloriatur, ut eodem loco disertè explicat,

*Quam speciosa sibi est, & quam vanescit in
ipsis:*

*Qua licet ex primo natura habeantur honore.
Non tamen ad veram possunt perducere vitam.*

Responderi etiam potest Deum saltem implicite & confuse ab infidelibus cognosci per legem naturalem, quæ est legis æternæ quædam participatio, & lumen divini vultus signatum in mentibus nostris; unde

& im-

& implicite agere possunt propter Deum, cum agunt propter honestatem moralem, veritatem, sapientiam; seu quia id justum est, & rectæ rationi conveniens. Amor iste justitiæ naturalis sic infidelibus & injustis inesse potest, ut justos non faciat. Nam eum amorem cupiditati plerumque subijciunt, & sæpius justitiam amant magis in aliis quàm in seipsis. Sed id non obstat quominus aliquando justis & honestis amore quasdam actiones exerant, quæ bonæ sunt, non meritoriae.

Opp. 4. Præceptum illud referendi omnes actiones in Deum, naturale non esse, neque omnes homines adstringere, cum præcepta naturalia sint nota omnibus, ac de illo præcepto ne doctores quidem inter se consentiant. Ergo actio bona non male fit, etiamsi in Deum non referatur; & actus ex specie sua indifferens, ut amor scientiæ, erit in individuo indifferens, etiamsi in Deum non referatur. Præsertim cum multæ sint actiones quæ in Deum referri non possunt: ut quando consilium aliquod facere nolumus, ut alias omittam plurimas, & præsertim eas quæ ex amore naturali vitæ, aut sanitatis, aut tranquillitatis nascuntur, quæque nec bonos efficiunt, nec malos.

Resp. Præceptum illud generale charitatis, *Diliges Dominum Deum tuum*, &c. omnibus non modo Theologis, sed & Fidelibus notum esse quantum ad substantiam præcepti: tametsi de modo & illius explicatione inter se dissentiant. Ac licet ad legem naturalem omnino pertineat,

neat, cum ad illud reliqua legis naturalis, imo & Christianæ præcepta referantur, atque hinc lex pendeat, & Prophetæ: non idcirco tamen omnibus æque notum est, ob peccati labem, & prævios affectus, aut concupiscentiæ pondus, quod ad terrena & amorem nostri nos deprimit.

Quamquam divinæ imaginis mentibus nostris impressæ extrema velut lineamenta non usque adeo per peccatum sunt detrita, ut homini attendenti, & libero a præjudiciis, non sit manifestum Conditori nostro nos nostraque omnia debere; cuncta ad eum seu mediatè, seu immediatè esse referenda; omnia propter summum bonum agenda, idque non alibi quàm in Deo esse constitutum. Itaque præcepta naturæ sunt nota omnibus: sed quæ ex iis per ratiocinium etiam necessariò eruuntur, non omnibus æquè sunt perspecta. Ac sæpe de iis inter Doctores magna est contentio. Sic nemo negaverit Deum super omnia diligere oportere: sed cum hinc colligimus omnes actus nostros ad eum esse referendos, multi in hoc a nobis dissentiant. Verùm illud semper inconcussum manet, hanc esse legis naturalis, & æternæ summam, quam Christus Dominus pene extinctam renovavit, quam Apostoli prædicarunt, ex qua omnes aliæ leges fluxere. Nam hac Dei lege omnia præcepta continentur, *Dilige Dominum tuum, &c. Et proximum sicut teipsum. Deum diligamus in proximo, & proximum in Deo.* S. Paulin. Ep. 10. Ad hujus legis notitiam, inquit PP, Deo cognito sponte
ani-

animus emergit ; hanc Spiritus Sanctus mentibus nostris inserit , quam recta ratio per se intuetur , quæque non multum est perversa , propositam ultrò amplectitur . Hæc enim , ut loquitur Aug. *est lex æterna , & ipsa ratio , quæ ordinem naturalem violari vetat , conservari jubet ;* est illud lumen quo illuminatur omnis homo veniens in hunc mundum ; hoc præceptum est vetus , & idem novum quod in Scripturis adeo commendatur , ut vera sapientia , eaque cœlestis , non animalis , lex in cordibus scripta identidem appelletur . Lex enim naturalis a Christo renovata non aliud præcipit , quàm virtutes omnes , quæ amore Dei , ut summi boni continentur . Hinc legis Christianæ , cum proponitur , approbatio ; hinc illa in viros pios propensio , & testimonia illa animæ naturaliter Christianæ ; hinc sapientiæ cœlestis & carnalis discrimina ; quæ Jacobus Apostolus enumerat ; hinc illa Christi Domini , *Diliges Dominum Deum tuum ex toto corde tuo , &c. Qui diligit me , diligetur à Patre meo ; & si quis diligit me , sermonem meum servabit .* Hinc Apost. *Plenitudo legis charitas .* Et Aug. *Non implet legem nisi charitas .* Quare totius legis summa hoc præcepto continetur . Neque id , ut puto , in controversiam venire potest : cum nihil sit apertius in Scripturis , Hinc duo prima præcepta , ut advertit vir doctiss. quibus tota lex naturæ innixa est , suo Deus ore ad popu-

populum universum promulgavit, reliqua per Moſem ad populum tranſmiſit: Quò innueret duo illa capitalia mandata ſic ab ipſo Deo mentibus eſſe inſcripta, ut præceptoris ope vix indigerent.

DISPUTATIO II.

De affectibus animi.

QUOD Græci *πάθη*, Cicero perturbationes, Quintilianus affectus nominat, paſſiones vulgò vocitamus: de quibus cum univerſim, tum ſigillatim diſceremus.

QUÆSTIO PRIMA.

De natura affectuum.

Affectus variè definiri ſolent, ut variæ eorum cauſæ, aut diverſi ſpectantur effectus. Id tamen advertenti erit manifeſtum i. affectum omnem non ſolùm in quadam animi commotione eſſe poſitum, ſed etiam cum aliquo motu corporis eſſe conjunctum. In hoc quippe affectus, aut paſſio ab actione voluntatis dividitur, quod hæc ſit lenis, placida & tranquilla, ille concitatioꝝ & turbidior, unde & perturbationis nomen accepit, & a Stoicis definitur, *aversa a ratione contra naturam animi commotio*: aut brevius a Cicerone, *appetitus vehementior*.

Quare ut intellectus purus iſ dicitur, qui
per

per se, aut ex lumine naturali res potissimum a materia secreta contemplatur: sensum autem vel imaginationem vocitamus, cum ex corporis occasione aliquid percipimus: sic voluntatis nomine intelligimus vim incorpoream, quæ ex impressione summi boni ab authore naturæ indita, & ex libertate ingenita actiones illas exerit quas superius exposuimus. Sed quatenus anima sic pendet a corpore ut sanguinis aut spirituum agitationem sequatur, tum appetitus sentiens nominatur; illiusque motus, qui cum sanguinis & spirituum commotione sunt conjuncti, perturbationes animi, aut affectus appellamus.

2. Definiri affectus possunt, *commotiones animi a sanguinis aut spirituum agitatione excitata: vel ut aliis placet, motus appetitus ex affectione, seu impressione sensibili ortus*. Nam omnis sensus cum appetitu quodam & vi motrice conjunctus videtur: quæ enim sensum deliniunt; gratam; quæ offendunt, molestant commotionem efficiunt. Hinc voluptas & dolor quasi naturales affectus toto corpore diffunduntur. Tum vero voluptate quadam pars affecta perfunditur, cum facile & perfecte operatur: hic enim est omnis appetitus finis: ubi illa operatio impeditur, tum affectio molesta est, & doloris nomine plerumque donatur. Sic omnis continuitatis interruptio dolorem, ut restitutio in integrum, voluptatem creat: nam hæc dolorem consequitur: sic transitus a sono asperiore in leniorem jucundus est, quo sensorium, seu organum demul-

demulceat & molestiam auferat. Cum autem gustus & tactus sit necessitas major, horum est acerrima voluptas, Fames & sitis eam quæ percipitur gustu voluptatem prævertunt. Quin etiam importuna illa stomachi vellicatio irritamentis quæri solet, ut molestiam pariant, quæ sine delectatione non expellitur.

Qui ad corpus pertinent affectus, quique ex solo sensu oriuntur, à dolore ut plurimum per cupiditatem quandam, in voluptatem desinunt: ac cupiditas quæ doloris detractionem molitur & expetit, hoc est vehementior, quò magis naturæ interest, ut se aut suum genus tueatur. Sic defectus alimenti famem, aut sitim procreat: doloris autem amotio aliqua voluptate conditur, ut animal se ad ipsius doloris causam eximendam comparet.

4. Cum autem hi affectus, dolor, cupiditas, cæca & indomita, ac voluptas, diffusi toto corpore ad appetitum naturalem pertineant, iique citra ullum iudicium vel opinionem excitentur, de iis hoc loco potissimum non agimus: sed de affectibus qui ab appetitu animali, aut sentiente manant, quique commoventur, cum objectorum impressiones per externos sensus ad interiorum traductæ notam aliquam boni aut mali, commodi aut incommodi secum habent adjunctam: unde hos affectus ipsa imaginatio, seu interior sensus procera. Ubi anima est omnis affectus expers, tum sedata est & tranquilla instar aque stagnantis. Sed cum spirituum affluxu & rei jucun-

dæ incurſu commóvetur , tum ferè ut aqua lapidis inſectũ motuum recurrentium velut undulatione quadam agitur. Quocirca in illa animæ commotione , quæ ex boni aut mali opinione oritur , quamque ſanguinis & ſpirituum agitatio comitatur , paſſionis natura potiſſimũ conſiſtit .

5. Hinc ſatis aptè a Cartefio deſcribuntur paſſiones , *motus animæ qui ad ipſam referuntur , quique à ſpirituum commotione procreantur , ſorcentur , & roborantur* . Hos quidem motus perceptiones quasdam eſſe confuſas putat : cum omnem animi functionem in perceptione poſitam eſſe arbitretur : quod enim volumus , id percipimus . Paſſiones verò non ſunt claræ & diſtinctæ , ſed confuſæ quædam & obſcuræ perceptiones : cujuſ generis ſunt omnes ſenſationes . Sed utcunque ea res ſit , de qua alibi ; affectus ut motiones quædam potiùs , quàm ut ſenſus , aut perceptiones à nobis concipiuntur . His enim commovetur animus & vehementer concutitur ; atque in hac commotione paſſionis natura conſiſtit .

6. Sunt autem , ut ipſe exiſtimat Cartefius , perceptiones noſtræ in triplici differentia conſtitutæ . Quædam ad objecta ipſa referuntur , eæq; dicuntur ſenſationes ; aliæ ad corpus ipſum , ſuntq; naturales affectiones , ut fames & ſitis ; aliæ demum ad ipſam referuntur animam , ut amor & voluptas , & alii motus ſentientis appetitus , de quibus nunc agimus . Circa perceptiones

quæ ab objectis manant, sæpè decipimur : ut cum inter dormiendum aliquid videre, vel audire nobis videmur ; quòd spirituum agitatio eodem modo animum afficiat, ac cum vigilamus. Imò non tam objecti impressionem, aut motum ipsum qui fit in organo vel cerebro, quàm illius causam, ut facem accensam, aut tubam nos percipere arbitramur : cum aliud tamen anima non sentiat, quàm motum organo aut cerebro impressum : tametsi, ut diximus, sensationes nostras ad objecta, ex quibus manavit impressio, referimus. Sed nunquam circa affectiones ipsas, aut passiones anima decipitur. Fieri enim potest ut sibi videre vel audire videatur, quæ nec videt, nec audit : sed nunquam voluptate aut tristitia, aut ira se affectum sentit animus, quin iisdem affectibus commoveatur.

7. Spirituum & sanguinis agitatio cum passionibus conjuncta hos motus turbulentos tum ab ipsis voluntatis actionibus, tum à sensuum perceptione discriminat. Quamquam mens nihil percipit, neque ullum ferè voluntas actum elicit, citra aliquam spirituum in cerebro agitationem. Ea quippè est lex ab Authore naturæ tum sancita, cum animum unà cum corpore conjunxit, ut animi motus etiam qui ad corpus non referuntur, quædam spirituum commotio comitetur ; adeò ut nulla sit inclinatio pura voluntatis quæ alicui passioni non sit admixta. Sic amorem justitiæ, aut virtutis certa spirituum commotio sensibilem effi-

efficit : ut rerum intellectualium perceptionem impressa cerebro vestigia comitantur, & roborant. Sed illa, ut dictum est, spirituum agitatio quæ actiones voluntatis consequitur, placida est & tranquilla: verum ubi appetitus sentiens vehementius concutitur, statim & sanguinis æstus oritur & spiritus adeo tumultuantur, ut vix animus possit eos componere. Nam agitati spiritus non statim subsidunt, neque æstus, aut commotio sanguinis facile sedatur.

Q U Æ S T I O I I.

De causis affectuum.

UT affectuum naturam & causas velut oculis subjiciamus, in duo genera eos partiamur. Primum eos complectitur, qui obscuram imaginationis perceptionem, aut sensum confusum consequuntur: cum scilicet animus causam ex qua oriuntur, distinctè non percipit, tumque spiritus qui prius toto corpore æquabiliter erant fusi, ex objecti insoliti conspectu perturbantur, & in eas præcipuè corporis partes diriguntur, quæ aut boni infecutioni, aut mali fugæ serviunt, tum etiam in cor & alia viscera quæ novos spiritus suppeditant, amandantur.

2. Anima ipsa spirituum velut inundatione commovetur: nam quæ corpus afficiunt, ad se pertinere putat: & utriusque motus sunt omninò reciproci.

S 2 3. Ex

3. Ex variis impressionibus quas spiritus in cerebro inurunt, varios, ut ita dicam, sensus, seu affectus, aut amoris, aut alterius passionis, induit animus. Ac demum intima quadam voluptate perfunditur, cum se in eo statu esse percipit, quem passio ipsa, aut objecti quod eam concitavit natura & conditio postulat.

Alterum affectuum genus eos completitur, qui intellectus ipsius perceptionem, aut iudicium consequuntur. In iis itaque hæc considerari possunt, quæ a viro acerrimi ingenii sunt observata.

1. Objecti ipsius distincta vel confusa perceptio, aut opinio quam de objecto ut ad nos relato concipimus.

2. Si id bonum, aut commodum nobis iudicamus, sequitur quædam voluntatis in illud objectum propensio. Nam ante ejus rei conspectum voluntas aut boni ipsius communis & indefiniti, aut alterius amore erat occupata: hujus objecti novitate perculsa, si bonum est, amore quodam, & velut sensu intimo in id impellitur. Ac bonum quidem esse mens jam ratione persuasa judicaverat; nunc sensu ipso & quodam velut gustu delibatum multò vehementiùs amat. Quod si mali habeat rationem, voluntas id refugit.

3. In unoquoque affectu sensum ipsi proprium, aut amoris aut voluptatis, aut tristitiæ distinguimus, qui varius est in diversis affectibus, licet idem sit voluntatis motus.

4. Hunc sensum nova sequitur, tum spirituum

tuum animalium & sanguinis in certas corporis partes impulsio & determinatio; tum animæ ipsius commotio ex illa spirituum agitatione orta.

Præcipuas affectuum causas effectrices tum externas, tum internas attigimus, nempe objectorum impressiones, ideas cum iis impressionibus conjunctas; motum & agitationem spirituum; nunc pauca de causa eorum finali dicamus.

Affectus animi ad salutem & conservationem hominis, ut sensus ipsos à natura tributos esse fugit neminem. Cum enim corpus ad rerum utilium prosecutionem, & noxiarum fugam comparant, simul & animam in eodem motu inflectunt, & ducunt. Nam, ut identidem diximus, anima cum corpore tam arcto nexu devincta est, ut voluntatis nutum statim motus corporis consequatur; ut vicissim qui ex objectorum impressionibus in corporis machina oriuntur motus, eas in anima excitant passionibus, quibus ad corporis ipsius utilitatem aut custodiam incitetur.

Ea quippè est Conditoris nostri voluntas, & lex naturæ, ut res omnes inter se confertæ sint & devinctæ: sic animus corpori, & per corpus rebus omnibus quæ sensus movent, aut quæ ad hominum societatem pertinent, illigatur; ac tam arctus est illæ animæ & corporis nexus, ut motus ipsius voluntatis vel a corpore longius sejuncti, quandam habeant spirituum & sanguinis sibi adjunctam motionem: ut cognitio omnis intellectualis cum vestigiis

quibusdam in cerebro impressis semper conjungitur.

Est etiam in natura nostra infixus amor societatis & aliorum hominum quibuscum vivimus : cui amori plures affectus serviunt. Nam ita sumus a natura comparati, ut aliorum bona aut mala penè ut nostra nos afficiant ; ac propinquorum maximè & eorum quibus arctiore vinculo conjungimur , fortuna aut prospera , aut adversa moveamur, atque eorum conservationi studeamus . Nam ut anima toto corpore per sensum diffunditur , nec tam ratione , quàm sensu ipso cum singulis corporis partibus se intimè conjunctam esse percipit : sic per affectus , aut passiones velut extra se prorumpit , quæque circumstant omnia ad se pertinere existimat . Undè motus corporis, & animorum affectus sic natura temperavit, ut afflicti alicujus voce excitati ultro illi auxilium demus .

Atque hæc de causis affectuum summatim attigimus : præcipua autem propensionum & affectuum diversitas ex temperamento, ex cerebri ipsius textura, & spirituum animalium natura ducitur . Itaque ut cerebri fibræ sunt aut molliores, aut solidiores ; tenuès, aut crassæ ; atque ut spiritus sunt commotiores, aut placidiores , varii quoque concitantur affectus . In pueris mollior est cerebri substantia , fibræ tenuiores sunt & spiritus mobiliores : hinc magna est in iis imaginationis mobilitas , & inconstantia ; objecta faciliè in eorum cerebro imprimuntur, ac delentur . *Puer*, inquit

quit Poeta, *mutatur in boras*. Sic in mulieribus cum fibræ cerebri sint tenuēs, & minus solidæ, rerum sensibilibus impressiones facile excipiunt, ac de objectis, quæ sensus movent, aptius judicant: non tam res ipsæ, quàm rerum species, aut earum splendor eas afficit: citò commoventur, & varios subeunt affectus. In his enim vis imaginatrix viget, ac rerum imagines in ea vividiores depinguntur.

In hominibus cerebrum cum ætate fit solidius: hinc major in agendis constantia; ac nihil est dissimilius ubi, quàm homo in se. Nam ut varias subit ætates, varios quoque affectus induit. Hinc pulchrè ab Horatio Juvenis exprimitur.

Utilium tardus provisor, prodigus æris.

Nec minùs aptè de maturiori ætate;

Quærit opes, inservit bonori:

Ac postremò senex,

Quærit, & inventis miser abstinet, ac timet uti.

Quare ut quæ ad causas affectuum pertinent, colligamus, partim ab externis objectis excitantur, quæ in cerebro vestigia imprimunt, cum quibus certæ perceptiones sunt conjunctæ: ex iis oritur boni aut mali opinio, tum quædam spirituum commotio, quam motus animi vel affectus comitatur; partim impetu quodam, vel a naturali inclinatione excitantur, ut fusè exposuimus.

Q U Æ S T I O III.

De subiecto & numero affectuum.

His explicatis, quæ minùs habent controversiæ, quod sensu & experientia confirmentur, nunc quæ in disceptationem veniunt, aggrediamur. Quandiu enim ea dicimus quæ quisque in seipso experiri potest, vix ullus est contentioni locus. Sed ubi nos experientia, aut sensus deserit, & omnia rationi permittuntur, tum sæpè animus fluctuat, & in diversas partes distractus id sequitur, quod probabiliùs sibi videtur, neque in iis non falli possumus, nisi ex certis ad ea quæ magis sunt dubia, paulatim & ex ordine progrediamur. Primùm itaque de subiecto, tum de numero affectuum dicamus.

A R T I C U L U S P R I M U S.

De subiecto affectuum.

Affectus animi non alibi inesse quàm in appetitu sentiente, contra Stoicos, qui affectus non aliud esse quàm opiniones, easque ad partem animæ cognoscentem pertinere crediderunt, omnino arbitramur. Hi singulas passiones per opinionem definiabant. *Letitia*, inquiebant, *est opinio recens boni presentis, in quo efferrì rectum esse videatur*. *Metus* opinio impendentis mali, quod intolerabile.

terabilis esse videatur, & ita de reliquis, ut Cicero fusè explicat l. 3. Tusc.

Verùm hæc sententia ex iis quæ diximus, facilè refellitur. Affectus enim sunt quædam commotiones animæ, quæ circa bonum, aut malum sensibile versantur: sed motus omnis, uti & bonum vel malum sensibile ad appetitum sentientem, quique nobis cum belluis communis est, omninò pertinet: ergo affectus animæ insunt, quatenus appetit, aut nititur in bonum, non quatenus cognoscit tantùm, aut opinatur, aut intelligit.

Undè Cicero ipse diligentius ex Zenone Principe Stoicorum definit perturbationes per commotionem animi, non per solam opinionem. *Ægritudo*, inquit, *est animi ad-versante ratione contractio: lætitia, animi sine ratione elatio.*

Fatemur tamen affectus ex opinione boni, aut mali, ut a causa excitari, sed negamus eorum naturam in opinione esse constitutam.

Neque illud necesse est, ut longa oratione demonstramus appetitum sentientem esse facultatem non re, sed cogitatione tantùm a sensu & imaginatione distinctam. Id enim probari potest iisdem rationibus, quas attulimus, cum ostensum a nobis fuit intellectum & voluntatem neque ab anima, neque inter se plusquam cogitatione distinguui: est enim eadem ratio intellectus ad voluntatem, quæ sensus vel imaginationis ad appetitum sentientem.

Deinde omnis sensus, ut suprà diximus,

S 5 cum

cum appetitu quodam & vi motrice conjunctus est. Undè ut sensum duplicem internum & externum, si minus re, saltem ratione & officio distinguimus: sic duplex est appetitus, naturalis, qui exteriorem, & animalis, qui interiorem sensum consequitur. Sed appetitus naturalis, quo sensus exterior jucunda aut molesta commotione afficitur, a sensu ipso non distinguitur: ergo nec appetitus animalis affectuum sedes ab ipsa imaginatione plusquam officio & cogitatione discernitur.

Postremò frustrà videretur sensus a natura nobis concessus, nisi vi motrice & appetitu donaretur, quo posset quæ sibi apta sunt consequi, aut incongrua refugere. Undè cum in ovo pullus formatur, si altero aut tertio incubationis die corculum ejus, quod jam moveri incipit, acupugneris, statim id se contrahet, quod vis motrix cum sensu obscuro juncta sit: adeò ut vix negari possit, quin eadem sit vis sentiens, appetens & motrix. Nam sensus inutilis foret omni appetitu & vi motrice destitutus.

Opp. Nonnulli appetitum ab imaginatione, non cogitatione sola, sed re ipsa distinguunt: quod diversa sit utriusque actio, diversum objectum, & distincta utriusque organa. Imago quippè cognoscit, appetitus motu quodam velut pondere in rem propositam ruit; illius objectum est verum sensibile, hujus bonum ab imaginatione perceptum. Accedit etiam, quod
ima-

imaginationis sedes in ea sit parte cerebri, quæ est principium nervorum, in quam scilicet nervi, aut fibræ quæ sunt sensuum organa desinunt; appetitus vero insit in pectore, ac potissimum in corde, quod juxta diversitatem affectuum variè agitur.

Resp. His & aliis rationibus, quæ in unum colliguntur, non aliud effici, quàm vim imaginatricem & appetitum officiis, aut functionibus inter se differre, non re, aut natura: ut de voluntate & intellectu diximus. Neque enim hæ facultates sunt accidentia quædam Physica ab anima discreta: sed anima ipsa, quæ ut ex occasione corporum percipit, imaginatio ipsa dicitur, ut in rem ab imaginatione perceptam nititur, appetitus nominatur. Cum autem rei gratæ, aut molestæ species phantasie imprimatur, quam statim sequitur appetitus, id verisimillimum videtur, neque appetitum, neque vim motricem ab imaginatione esse aut re ipsa, aut organis disjunctam. Nam appetitus aut vis motrix ibi residet, undè primum incipit motus: quod utique in cerebro statuendum est, non in pectore.

Instant. Vis motrix & appetitus toto corpore diffunduntur, non item imaginatio: ergo hæ facultates & natura & organis disjunguntur.

Resp. Appetitum & vim motricem per spiritus animales sese latius diffundere: sunt enim spiritus appetitus sentientis instrumenta, qui illius impetus primum exci-

piunt; eosque in cor ipsum & in partes corporis diffitas perferunt: hos imaginatio determinat, & in nervos emittit, unde ad cor & reliquum corpus deferuntur. Id quidem fit incredibili celeritate: nam in momento ferè, aut in ictu oculi impressio ab objecto per sensuum organa ad phantasiam traducitur; species boni, seu commodi, aut noxii exprimitur; appetitus commoveatur, spiritus cum certo delectu quosdam nervorum funiculos subeunt. Nervi quippe, ut suo loco dicemus, ex infinitis propè funiculis constant, qui in ipsa origine, tanquam in radice divisi, in unum nervum, ut in truncum, plures coguntur; tum rursus in ipso itinere sparguntur, & in suas quique partes abeunt. Tota itidem cerebri substantia ex fibrillis constat, quæ in nervos colliguntur, citra ullam, ut probabile est, confusionem. Quare spiritus ab imaginatione directi nervorum fibrillas subeunt, & in varias corporis partes propelluntur, atque in eas tendunt, quarum maximè interest. Sic viso suavi cibo statim spiritus in nervos gustatorios profluunt, tumque lingua glandulas palati premit, & salivam exprimit.

Ista utique suo loco diligentius excutientur. Interim illud admonemus, cerebri, nervorum & musculorum fibras ita esse a natura coagmentatas, ut certa corporis motio perceptionem ipsam boni, aut noxii statim consequatur: quod quidem summo artificio disposita corporis fabrica, nervorum tensio, spirituum tenuis, actiuosa,
& mo-

& mobilis substantia efficiunt. Ut omit-
tam leges motuum mechanicas, de qui-
bus alibi, & ordinem ab Authore naturæ
præscriptum. Nam ut in rep. bene consti-
tuta, sic in corpore pars quæque, quod sui
est muneris, ritè exequitur.

Ex iis itaque colligitur affectus animi in
fede ipsius imaginationis excitari. Affectus
enim sunt in appetitu, sed appetitus ab
ipsa imaginatione nec re, nec loco dividi-
tur. Nam sensus vel imaginatio appetitum
& vim motricem omnino determinat, &
utraq; vis, tum appetens, tum motrix
ibi residet, unde motus primum incipit :
ergo quodcunque sit imaginationis, seu
phantasiæ subjectum, idem est appetitus &
motricis facultatis organum. Quanquam
vis motrix latius se diffundit, ut motus
inceptos perficiat : unde spiritus animales
ab appetitu & imaginatione primos impe-
tus excipiunt, & in partes corporis
disitas perferunt. Sunt enim præci-
pua animæ sentientis organa : hos imagi-
natio in nervos emittit & certis motibus
destinat.

Opp. 2. Affectus in pectore, non in cere-
bro excitari. Nam cor variè contrahitur,
aut dilatatur, ut diversi exurgunt affectus :
& quandiu cor ipsum non commovetur,
passio, vel affectus dici non potest. Quare
ut lingua non vocis modò explanationi, sed
saporibus etiam dijudicandis est destina-
ta, sic cordis ea est textura & fabrica ;
ut non solùm vitæ & omnium motuum
sit principium, sed etiam ut bonorum
&

& malorum opinione à vi imaginatrice concepta ita afficiatur, ut ad boni complexum, & mali fugam nos instiget: ita enim est conformatum ut diversis affectuum motibus ex simplici boni opinione moveatur.

Resp. Affectum in animæ & spirituum commotione maximè esse positum, eumque in cerebro formari, tum ad cor ipsum quasi ad rotam hujus machinæ primariam diffundi, ut in sanguinem, & alias corporis partes pervadat, ac corpus ipsum in eo situ & partium dispositione, quam affectus natura postulat, collocetur. Quare in omni ferè appetitus commotione spiritus in nervos cordis mittuntur, qui illius motum certa ratione & juxta passionis ipsius instinctum moderantur. Nam id contrahi solet, aut dilatari, ut passio, vel appetitus motio exegerit. Illius enim est sanguinem vel cum impetu propellere, vel retinere.

Cum itaque omnes appetitus sentientis motus in pectus redundare, & cor ipsum agitare videantur, hinc fit ut complures Philosophi appetitus sedem in corde ipso collocaverint, quod ibi vim suam potissimum exerat. Sed et ab ipsa phantasia opinio boni, sic affectus omnis exoritur, ac diversi sunt affectus, ut imaginatio rei perceptæ aliquid addit aut detrahit, quod ad nos ipsos pertineat. Ut quod illud commodum diu sit duraturum, aut secus: quod permagni nostra intersit illud prosequi aut fugere: tum verò statim spiritus in

cor

cor immittit, qui sanguinis motum accelerent, aut inhibeant, ut suo loco explicabimus. Hinc vasa cordis fibrillis nerveis illigantur, quæ ut affectus quisque exigit, sanguinis motum vel accelerant, vel retardant. Ex quibus efficitur nullam esse distinctionem inter appetitum concupiscibilem & irascibilem. Appetitus enim a sensu, vel imaginatione non re, nec subiecto tantum & cogitatione distinguitur: ergo unus est, non multiplex appetitus, uti & vis motrix, quæ cum appetitu juncta est & indiscreta, una & eadem est, organo, non natura diversa.

Confr. Utriusque appetitus concupiscibilis & irascibilis distincta organa afferri non possunt. Quod enim Plato, unde hæc distinctio appetituum, & affectuum profecta est, irascibilem in corde, concupiscibilem sub diaphragmate, seu septo transverso, quod truncum corporis in duas partes secat, in jecore, liene, aut aliis visceribus videtur collocasse, id nullo nititur fundamento. Nam voluptas non minus cor exagitat, quam spes, aut metus, & affectus, qui ad concupiscibilem pertinent, tam intensi & animosi esse possunt, quam affectus, qui irascibili tribuuntur, molles interdum sunt & remissi. Quare distinctio appetitus & affectuum ad arbitrium videtur efficta.

Adde nos duplicem vim cognoscentem non solere distinguere, unam qua res faciles, alteram qua res arduas percipiamus. Quæ igitur ratio nos cogit duplicem appetitum

titum concupiscibilem & irascibilem discernere, adeo ut irascibilis circa ardua versetur? diversi sunt utriusque motus, non vires distinctæ. Ad utrumque appetitum illud Senecæ pertinet, *omnia tanquam mortales timetis, omnia tanquam mortales concupiscitis.*

ARTICULUS II.

De numero affectuum.

ET si affectuum species vix enumerari possunt, ad certa tamen capita satis commodè revocantur. Tanta enim est in objectis, quæ affectus excitare possunt, varietas; tanta in nostris corporibus mutabilitas, ut affectus, qui objectorum impressiones, spirituum agitationem & cerebri temperiem consequuntur, ad certum numerum redigi vix possint.

Accedit etiam quod ea sit inter impressa cerebro vestigia connexio, ut quando spirituum motu unum ex his excitatur, statim plures fibræ cerebri in eandem societatem veniant. Hinc multæ oriuntur perceptiones, quæ præcipuam velut ideam comitantur: ex iis affectus multiplices sobolescunt. Nam ut vestigium cerebro inustum perceptionem excitat, sic perceptionem affectus animi statim consequitur, & ex affectu spiritus commoventur.

Primitivi tamen & simplices affectus ad certum numerum reduci possunt, quem alii aliter, ut libitum est, inire solent. Stoici quatuor affectus, velut primarios statu-

tuere, voluptatem, dolorem, cupiditatem & metum.

Gaudeat an doleat, metuat, cupiatve, quid ad rem?

Aristoteles nullum iniit certum affectuum numerum, eosque ut occasio tulit, variè recensuit. Peripatetici sex in concupiscibili, quinque in appetitu irascibili constituunt. Primi generis sunt amor, odium, desiderium seu cupiditas, & fuga, voluptas & tristitia. Qui in appetitu irascibili insunt, quinque numerantur, spes, desperatio, audacia, timor, & ira.

Primarii affectus, ad quos cæteri referuntur, videntur esse voluptas & molestia: nam illam propter se expetimus, hanc defugimus; cæteri affectus videntur comparatæ boni aut mali, ut voluptatem aut molestiam creant. Unde cum omnes affectus ex boni, aut mali opinione nascantur, ii omnes ad voluptatem, & molestiam referuntur, & circumstantiis ab iis differunt: cum circa eadem bona vel mala versentur, ac temporum duntaxat differentiis inter se discrepent. Voluptas quidem & molestia ex objecti boni, aut mali præsentia oriuntur: sed objectum etiam futurum, aut præteritum mens sibi ut præsens potest exhibere.

Duo sunt maximè generales affectus, qui omnes temporum differentias complectuntur, amor scilicet & odium. Hi quippe affectus non voluptatem, modò & molestiam, sed etiam res ipsas, quæ delectationem & voluptatem creant, ita respiciunt, ut
ad

ad omnes temporum differentias pertinent. Cum bonum adest, tum dicitur amor fruitionis: unde & bonum amatur ob voluptatem quam efficit. Ubi bonum futurum est, tum in id motu quodam fertur appetitus, qui cupiditas aut spes dicitur. Spes nil ferè addit cupiditati, nisi opinionem, quod res expetita sit ad futura.

Sic ex odio mali præsentis molestia: si futurum sit, fuga & metus: fuga cupiditati, metus spei opponitur, & opinionem, quod malum futurum sit, habet adjunctam. Non enim desperatio spei, sed fidentia opponitur. Fidentia ex spe, desperatio ex metu oritur: fidentiam consequitur audacia, desperationem sequitur pusillanimitas. Ira denique superest, quam solam & sine pari esse volunt, quod ex aliis ferè omnibus constet: tamen fortè huic lenitas adversatur.

Hic itaque affectuum numerus iniri potest: amor & odium; voluptas & molestia; cupiditas & fuga; spes & metus; fidentia & desperatio, audacia & pusillanimitas; ira & lenitas.

Commodior tamen videtur & ad doctrinæ rationem aptior affectuum in simplices & compositos divisio; omniumque simplicissimi sunt admiratio, amor & aversatio: ex quibus cupiditas, & delectatio & tristitia oriuntur. Affectuum quippe distinctio ut certis finibus terminetur, neque ex objectis tantum quæ infinita esse possunt, neque ex diversa corporis affectione, aut spirituum agitatione, quæ & mille modis

varia-

variari possunt, pro cuiusque complexione, ætate, consuetudine, fibrarum cerebri textura, & spirituum natura; sed ex sola potius obiectorum ad nos ipsos comparatione est repetenda. Rem porro ipsam diligentius attendenti palam fiet, omnium passionum velut matrices esse amorem, & averfationem, seu alienationem, quibus ex Cartesio adjungi potest admiratio omnium prima, licet improprie passio nominetur. Ex iis verò cupiditas, delectatio & tristitia ducuntur: ergo sex illi affectus quasi reliquorum fontes statui possunt.

Assumptionem quæ sola probatione eget, fusè demonstrat vir doctissimus: nos in pauca conferemus, quæ copiosè & diligenter est persecutus. Cum res aliqua ante non visa percellit animum, tum altius cerebrum subit illius rei imago, aut vestigium; spiritus eò confluunt uberiores; anima non nihil commovetur, & fortius ad rem ipsam, quæ aut nova est, aut novis circumstantiis induta, sese applicat; tumque omnium primus affectus, admiratio exoritur.

Admirationem excipit amor, vel averfatio: cum rem ipsam non modò secundum se, quod est admirationis, sed etiam ut ad nos pertinet, contemplamur; eaque ut nobis commoda, aut noxia, vel certo iudicio, vel voluptatis allucijus, aut doloris sensu percipitur: tum enim fit nova animæ & spirituum commotio, quæ amor, aut odium nominatur: hique sunt affectus omnium principes, ex quibus reliqui,

liqui, ut ex fontibus manant.

Quocirca affectus non ex objectis secundum se consideratis ducuntur, cum idem objectum plures affectus excitet: ut innumerable objecta eundem sæpè affectum procreant. Nam res eadem ut dignitas, aut magistratus, verb. grat. alio modo nos movet, ubi promittitur; alio ubi conceditur; alio cum nobis eripitur. Itaque objecta sic ad nos referri debent, ut ad diversas ideas, quæ primariam boni ideam comitantur, animum attendamus. Sic idea boni generalis & indefinita amorem indeterminatum efficit, qui ferè nihil est, nisi extensio quædam illius amoris, quo quisque se amat, & omnia quæ ad se pertinent, quique post primi hominis peccatum unus ferè in nobis dominatur. Illius boni possessio voluptatem, seu fruitionis amorem procreat: at si abest, ac spes quædam illius possidendi affulgeat, amor ille erit desiderii; si bonum illud nec adsit, nec adfuturum speremus, aut id conservari a nobis non possit, tum illius idea tristitiam efficiet. Atque hi tres affectus circa bonum ut objectum versantur.

Quòd si mali nomine, ut plerumque fit, dolorem intelligimus, tum motus prioribus oppositos, aversionis scilicet, non amoris; fugæ, non prosecutionis; tristitiæ, non voluptatis affectus creat. Sensus præsentis doloris tristitiam; si dolor imminet, cupiditatem illius fugiendi: quod si omnis abest metus delectationem affert.

Tres

Tres igitur sunt affectus qui circa dolorem, aut illius causam versantur : neque necesse est plures affectus simplices in animo comminisci . Atque hi impressam animis nostris ad bonum propensionem omnino determinant . Cum bonum adest , aut malum jam præterit , tum quadam voluptate perfundimur . Contra , si malum adest , aut bonum jam præterierit , tristitia vel ægritudo cor ipsum contrahit ; desiderium verò , aut potius cupiditas nos exagitat , cum bonum , aut malum est futurum .

Opp. Admiratio malè inter affectus numeratur : neque enim ea est cum cordis commotione conjuncta , neque circa rem ut nobis bonam , vel malam versatur . Atqui appetitus objectum non secundum se , sed ut ad nos refertur , spectandum est . Quod autem admiramur ut novum , aut magnum , si ad nostrum commodum vel incommodum non referatur , affectus dici non ipotest : sed quædam facultatis cognoscentis , quasi suspensio , qua fit ut objecto suo cum majore attentione inhæreat .

Resp. Admirationem nudè spectatam inter affectus vix censerì posse , si eos tantum affectus habeamus quæ sanguinem , cor , imò & totum corpus commovent . At si affectuum natura in spirituum & animæ commotione posita sit ; cum in admiratione spiritus turmatim in cerebrum irruant , ut animam in objecti insoliti , aut magni contemplatione

tione defigant, non video cur admirationem è numero affectuum expungamus, præsertim cum multorum affectuum principium sit, ut mox dicturi sumus.

Q U Æ S T I O IV.

Affectus primitivi.

Admiratio, amor, & aversatio sigillatim explicantur.

Proximum est ut affectus primigenios, ex quibus cæteri nascuntur, non quidem pro rei dignitate, id enim, infinitum foret: sed ut aliqua saltem nostri ipsius cognitione imbuamur, quàm poterimus brevissimè decurramus.

ARTICULUS PRIMUS.

De admiratione.

UT cæteri affectus, sic admiratio ex naturali & omnibus insita propensione oritur. Nam ut quisque magis a natura ad cognoscendum & rerum novarum studium propendet, eò magis admirari solet. Unde si quid novi, si quid magni, si quod futurum est, nobis narratur, id utique cum aviditate quadam & admiratione excipimus. Hinc voluptas ex admiratione, & contemplatione rerum oritur: quod inquietudo naturalis, & rerum novarum fames hoc velut pabulo identidem expleatur, atque

que illa fames aut sitis eò major est, quò quisque ad hæc, aut illa cognoscenda est propensior, vel ex natura sua, vel ex certo instituto, aut studio.

2. Cum rei novæ idea altiùs in cerebro imprimitur, hæc statim animum commovet, & acriorem efficit attentionem. Nam quæ novo & insolito modo animum percellunt, ea majori cum attentione is excipit: quòd in iis novam delectationem, & quandam felicitatis umbram aucupetur, quam in rebus perceptis non invenit. Nec tamen tanta est in admiratione, quanta in cæteris affectibus animæ commotio: quòd in nuda & simplici admiratione res in seipsis spectentur, non ut ad nos referuntur. Hinc nulla in corde, nulla in sanguine agitatio, nec ulla ferè in ipso corporis habitu fit mutatio.

3. Quod si animus ad ea quæ sibi sunt conjuncta cum admiratione quadam attendat, tum fit quædam in pectore agitatio, sed quæ exterius vix se prodat, cum nihil extra se positum animus quærat, quòd prosequatur aut fugiat. Unde nihil necesse est ut spirituum vel sanguinis in musculos appulsu corpus ad novum motum se comparet.

4. Idea excellentiæ alicujus quam in seipso quis demiratur, arrogantem sui persuasionem efficit, & aliorum contemptum: ut idea quam de propriis viribus effingit, audaciam procreat. Contra evenit cum propriæ infirmitatis conscii defectus nostros acriùs contemplamur, hinc enim demis-

missus & humilis animus & erga alios oritur reverentia.

5. Atque hi motus sentientis appetitus nondum sunt virtutes, aut vitia, cum voluntarii non sint, donec usus libertatis nostræ accesserit. Cum modum excedunt & consensus voluntatis adest, tum in vitia degenerant. Nam qui seipsum intuetur ex ea parte qua excellit maximè, is plerumque dum se alijs comparat, inani sui persuasione tumet, & quam de seipso, aut potius de viribus suis, aut famulitio aut nobilitate, & aliis vel fortunæ vel naturæ bonis concepit imaginem, ubique circumfert, & præsertim sibi sistit: idque præsertim cum vi Imaginatrice, & vegeta & celeri præditus est. Hæc enim rerum imagines sic depingit & auget, ut nullum ferè iudicio & rationi locum relinquat. Persuasionem augent tum assentatores, tum qui iudicio sunt infirmo, aut pravo, quique celeri & vividæ imaginationi, ut ferè accidit, ultrò se subjiunt. Hinc enim fit, ut qui alios in fraudem illiciunt, ipsi vicissim ab iis, qui fucum inani verborum sonitu fecere, decipiantur, & sibi de alieno iudicio licet corrupto & futili perperam blandiantur.

6. Hæc itaque, ut diximus, iis præsertim accidunt, qui imaginatione pollent, quibus fervet sanguis, & copiosi insunt spiritus. Contra qui demisso & humili sunt animo, tenuiores plerumque, aut parciore habent spiritus, neque ii fibras cerebri duriores commovere queunt. Hinc vis ima-
gina-

ginatrix in iis languidior est, iique adeo suæ infirmitatis conscii ultro aliis se subjiciunt, & quasi authoritatis pondere premuntur, nihil acri & intento animo moliuntur; vir illa formatrix imaginum in iis torpescit, nec rerum imagines ad vivum exprimit. Hinc segnities, pusillanimitas, & hebetudo quædam consequuntur.

7. Nec dubium est quin magni sit usus admiratio, tum ut res acriore animo intueamur, tum ut distinctiores rerum imagines effingamus objectum quippè: sua novitate majorem in cerebro plagam, aut vestigium imprimit; spiritus eò confluentes animam fortius applicant. Neque ut cæteri affectus sic admiratio iudicium nostrum adeò corrumpit: quod circa res magnas, & insolitas, ut sunt in se ipsis, non ut ad nos pertinent versetur; ac difficillimum sit diutius acrem animi intentionem adhibere, nisi admiratio ipsa spiritus cerebro ubiores suppeditet. Voluntas quidem spiritus regit, & quo libuerit, eos inflectit: sed imperium illius in spiritus, & in appetitum sentientem politicum est, non despoticum & plenum: ac nisi illud certis affectibus muniatur imperium, vix spiritus morem voluntati gerunt. Tanta etiam est inter spiritus & affectus cognatio, ut si qui sint, vel occulti appetitus sentientis motus, ii spiritus statim ad se rapiant; & in suas partes trahant.

8. Cæteri affectus in se quidem convertunt animi aciem, & attentionem augment: sed cum ad res sensibiles, quæque corpo-

ri blandiuntur, vim animi applicent, omnem penè veritatis lucem obscurant. Sola ferè admiratio veritatis indagacioni utilis, nec iudicium rationis ita videtur pervertere, dummodò in stuporem ea non degeneret. Cum enim rem quæ nobis est admirationi, non ex omni parte contuemur, sed ex ea tantum facie aspicimus, quæ nobis magis placet, verum, & solidum de ea iudicium ferre non possumus. Veriduntaxat similitudo nos capit, & suavi illa spirituum motione, quæ admirationem creat, omnino contenti, nulla curiositate, quæ admirationis est proles, nullo veritatis inveniendæ amore flagramus. Quæ enim fortius nos afficiunt, & movent, eadem nos magis delectant. Hinc gratiora sunt spectacula, quæ tristiora. Sic præstigiatores cum voluptate quadam admiramur. Hinc poësis nos adeò delectat: nam Poetæ rara semper dicunt, & admirabilia; obscuris vera involvunt, quæ dum indoctus quis non intelligit, sublimia facile arbitratur, & divina. Cum itaque inexpectata, & miraculis plena loquantur, pulchris rerum imaginibus pascunt animos; phantasiam semper alacrem, & intentam tenent. Eadem ferè est ratio omnium artium, quarum finis est imitatio: ut in arte pingendi, aut fingendi cernere est. Nam ut pictura extimam hominis faciem, sic poësis actiones, sermonem, animi sensa, motus, cogitationes exprimit, & ubique quod est admirabile consecratur. Atque idem ferè Poetæ accidit, quod iis qui melan-

lancholiæ morbo laborant , ab externis sensibus animum subducit , secessum , & solitudinem quærit : res suas omninò negligit ; rerum imagines in hac velut mentis nocte ingentes sibi exhibet : easdem sæpius volvit cogitationes , & miram ex suo opere capit voluptatem .

Admirationem sequitur curiositas , quæ cum nimia est , & rerum inutilium , tum in vitio est . Hanc passim Ecclesiastes damnat : ut cap. 1. *Et proposui in animo meo querere , & investigare sapienter de omnibus quæ sunt sub sole . Hanc occupationem pessimam dedit Deus filiis hominum ut occuparentur in ea .* Laboriosa est enim , & inquieta illa sciendi libido cum est inutilium , quæ hominem sæpiùs excæcat , quam illuminet ; distrahit animum , & tumorem fovet . *Quid necesse est , inquit cap. 7. homini majora se querere : cum ignoret quid conducat sibi in vita sua , número dierum peregrinationis sue , & tempore quod velut umbra præterit .* Hic aded modus tenendus qui Eccli. 3. præcipitur . *Altiora te ne quaeris , & fortiora te ne scrutatus fueris : Sed quæ præcipit Deus , illa cogita semper , & in pluribus operibus eius ne fueris curiosus .* Quæ enim divina providentia tegere voluit , curiosè scrutari non debemus .

ARTICULUS II.

De amore, & averfatione.

I. **A**d mirationem, amor, aut averfatio statim confequuntur, cum rem ad nos pertinere, vel ratione duce, vel præeunte quodam voluptatis fenfu intelligimus. Motus itaque animæ cum fpirituum, & fanguinis agitatione conjunctus, quo in rem ut nobis bonam vel commodam nitimur, amor dicitur: ut averfatio eft motus quo animus à re ut nobis noxia, aut molefta alienatur. Itaque per amorem appetitus in rem opinione bonam & voluptatis effectricem propendet; eamque complectitur. Ac nihil aliud videtur effe quàm illius amoris, qui ad nos reflectitur, quique proprius nominatur, velut extenfio quædam, aut effufio. Ex quo enim homo Deum per peccatum deferuit, amor noftri in nobis ita dominatur, ut is omnia penè ad fe referat: ac licèt quidam fit in nobis aut veritatis, aut juftitiæ amor, qui ad nos ipfos non reflectitur, nifi tamen gratia divina muniamur, amor fui femper rerum fumma potitur: ac veritatem ferè aut juftitiam deferimus, cum de re nofta, aut utilitate agitur; aut fi fortè, & vitam, & facultates noftas honefti caufa profundimus, verendum ne id vanæ oftentationis potius, quàm juftitiæ caufa faciamus. Hic enim amor affectuum princeps, quique concupifcentiæ nomine designatur, in omnibus penè affe-

affectibus dominatur; ex eo cæteri motus, & affectus manant, & varia potius nomina, quàm diversam induit naturam. Idea quippè aut perceptio boni, aut voluptatis præcipua est, quæ amor dicitur, quatenus illius boni causam complectitur: quæ accedunt velut pedissequæ affectiones: motum animæ variè inflectunt, ut bonum illud aut præsens, aut absens judicatur.

2. Cum res infra nos positas amamus, ut hortos, equos & alia hujus generis, tum amoris nomen retinet: cum alios juxta positos diligimus, qui redamando vices rependunt, tum amicitia dicitur: ut pietas nominatur, qua parentes, patriam, Principem, Deum ipsum complectimur. Sunt qui amoris gradus ita distinguant. Tria sunt quæ in aliorum animos transmittere volumus. 1. Cognitionem nostram, tumque dicitur familiaritatis; 2. Secretas animi cogitationes, quod est amicitix munus. *Beatus qui invenit amicum verum, & qui narrat justitias auri audienti. Eccli. 25.* 3. Cum nos ipsos in aliorum animos transferre quodammodo volumus; isque est amor propriè dictus. Benevolentia tum amicitiam, tum amorem consequitur; cum benè alicui ut nobis ipsis volumus.

3. Objectum amoris est bonum, non in se spectatum, sed ut ad nos refertur, & delectationis causa effectrix judicatur. Idem quoque est pulchrum, quod amoris objectum vulgò constituitur, & bonum; utrumque Græci eadem voce designant. Quamquam Plato in Hippiâ majore, pulchrum ita

definit, ut ad visum, vel auditum propriè pertineat: neque enim pulchrum odorem, aut saporem dicimus. Nam in aliis rebus percipiendis anima velut obruitur nimia objectorum vicinia; neque in iis concinnitatem aut proportionem, ut in sonis, & coloribus potest animadvertere.

4. Hinc satis aptè pulchrum definit sanctus Thomas, *cujus cognitio placet*: neque enim pulchra admodum judicamus, nisi quæ distincta, & dilucida cognitione percipimus. Unde intellectus qui intimas rerum naturas penetrat, pulchritudinis est judex incorruptus, quæque acri, & attentata cogitatione non excipimus, minus formosa nobis videntur, & in unaquaque arte soli artifices de operum forma aut pulchritudine perfectè dijudicant.

5. Unde autem sit in nobis pulchritudinis judicium, & quas illius leges sequamur, explicatu est difficile. An fortè in mente nostra, ut videtur Platonice, insidet species quædam pulchritudinis, ad quam ea quæ cernimus, comparata referuntur? Itaque, ut ait Cicero; *Phidie simulacris quibus in illo genere nihil perfectius videmus, cogitare tamen possumus pulchriora. Nec verò ille artifex cum ea faceret, Jovis formam, aut Minervæ, contemplabatur aliquam, à qua similitudinem duceret: sed ipse in mente insidebat species pulchritudinis eximia quædam, quam intuens, in eaque defixus, ad illius similitudinem artem, & manum dirigebat*. Cum autem idea pulchritudinis, quæ in mentibus nostris hæret, non
fit

sit omninò evoluta , neque ex eadem velut parte ab omnibus conspiciatur ; cumque passionum æstu non mediocriter obscuratur : non mirum est si tam diversa sint hominum de pulchritudine judicia . Illud tamen non abhorret à verisimili , quod S. August. docet lib. 2. de lib. arbitr. *Quidquid*, inquit, *te delectat in corpore, & per corporeos illicite sensus, videas esse numerosum, & quæras unde sit, & in te ipsum redeas, atque intelligas, te id quod attingis sensibus corporis, probare, aut improbare non posse, nisi in te habeas quasdam pulchritudinis leges, ad quas referas, quæ sentis interior.*

6. Quare videtur animus quandam in se continere colorum , vocum omnium , & sonorum mensuram . Notat quidem ars, qui verborum, qui sonorum modi efficiant voluptatem : sed eos tamen numeros , ut Tullius docet, *auris ipse tacito cum sensu sine arte definiunt : perfecto completoque verborum ambitu gaudent, curta sentiunt, nec amant redundantia.* Hinc Musica , & Poësis animum certis numeris titillant & delectant ; ac solus penè homo numerorum modulationem sentit, & percipit, dum spiritus animales blanda commotione & quasi ad numeros agitantur : sed animus ipse illam pulchritudinem ordinem , venustatem percipit : ea velut sibi cognita fruitur . Nihil est enim authore Tullio , *tam cognatum mentibus nostris, quàm numeri, atque voces, quibus, & excitamur, & incendimur, & lenimur, & languescimus, & ad hilaritatem, & ad tristitiam sæpe deducimur.*

Quod de amore diximus , id facile de odio , & averfatione , fed oppofito fenfu intelligitur . Illud verò quotidie experimur , minùs eſſe formidandum , qui apertè odium proferit , quàm qui illud ſpecie amicitiae tegit : Nam qui apertè odit , ſi vera exprobrat , ea ſunt corrigenda ; ſi falſa , contemnenda . Hinc illud Sapientis . Proverb. 10. *Abscondunt odium labia mendacia : qui profert contumelias , inſipiens eſt .* Neque neceſſe eſt ut utriuſque hujus affectus ſignà , characteres & affectus deſcribamus : id enim longiorem tractationem , & noſtro inſtituto minimè neceſſariam poſtulat .

Q U Æ S T I O V.

De reliquis affectibus .

A Mor , & verſatio ſunt generales quidam affectus , ex quibus tum ſimplices , tum compoſiti naſcuntur , de iis qui ſunt ſimpliciores priùs dicendum , qui ad voluptatem , moleſtiam ſeu triftitiam , & cupiditatem ſatis commodè revocantur .

Cum enim in unoquoque affectu multa occurrant . 1. Opinio boni aut mali ; 2. Animæ commotio , quam ſequitur certa ſpirituum agitatio ; 3. Senſus quidam , quo ex illa ſpirituum motione anima afficitur ; 4. Tandem voluptas affectuum individua comes . Quod maximè ad naturam affectus pertinet , eſt certa animæ commotio , ex qua primitivi affectus deſumuntur . Nam
tanta

tanta perceptionum aut opinionum est varietas, ut res abeat in infinitum, si ex perceptionum diversitate, aut ex temporum, & personarum differentiis affectuum distinctionem repetamus. Itaque illud ad rectam docendi rationem, & distinctam affectuum cognitionem magis est accommodatum, si eos qui sunt simplices, & primigenii, ex varia animæ commotione potius, quàm ex diversis perceptionibus incertum numerum redigamus. Iique sunt, ut superius ostendimus, voluptas, molestia, & cupiditas; reliqui autem ex variis percipiendi modis, aut ex varia simplicium affectuum permissione oriuntur: de singulis ex ordine agendum.

I. Voluptas, & molestia eodem ferè modo in appetitu, atque in toto corpore excitantur. Nam ut objecta benè aut malè corpus afficiunt, ita & opiniones in imaginatione, & passionες in appetitu aut jucundæ, aut molestæ oriuntur. In ea quippè propendet animus, quæ corpori apta, & convenientia judicantur; ab iis refugit, quæ noxia corpori videntur. Hinc tanta in studiis, & moribus est varietas, quod diversa sint hominum temperamenta, diversæ propensiones; & quod uni aptum est, aut conveniens, alteri noxium videatur. Voluptas penè omnis, ut diximus, molestiam aliquam consequitur. Et in hoc maxime posita est, ut eam tollat. Est enim ut in corpore, sic in animo fames quædam; aut sitis, quæ non sine voluptate expletur; tumque cor effunditur, & delectatur, ut in

T 5 mole-

molestia contrahitur . Atque illa cordis , aut spirituum , imò & animæ commotio est velut materia voluptatis aut molestiæ : sed forma illius in boni possessione , aut fruitione est posita . Est enim tanquam finis actioni superveniens , quique actionem perficit , ait Aristoteles , ut decor florentes ætate commendat . Unde cordis dilatationi suavitas adjuncta est , ut contractioni seu compressioni cordis in molestia , amaror quidam superfunditur . Cum itaque voluptas ex restitutione in statum naturalem oriatur , tandiu ea permanet , quandiu causæ illius quæ molestiam affert , detractio perseverat . Unde fit ut voluptas sensu percepta adeò sit fluxa & penè momentanea , contra atque delectationes quæ animi sunt propriæ , quæque sunt puræ & constantes . *Animus gaudens , ætatem floridam facit : spiritus tristis exsiccat ossa* . Pr. 17. Sed illud nos quotidiana docet experientia , quod Ecclesiastes de hujus sæculi voluptatibus toties inculcat . *Ece universa vanitas , & afflictio spiritus* . Qui enim fallaces voluptates consecratur , idem facit homini qui præterfluentem aquam ulnis complecti vult , & fugientem retinere . *Periculosior est mundus iste blandus , quàm molestus ; & magis cavendus cum se illicite diligi , quàm cum admonet cogitque contemni* . Aug. Ep. 144.

2. Atque hinc voluptatum differentiæ ducuntur , quòd aliæ sint veræ & solidæ , aliæ fucatæ & spuria : aliæ ad corpus , aliæ ad animum referantur , ut quæ ex veritatis

con-

contemplatione nascuntur . Illas gaudii , has lætitiæ , aut voluptatis nomine Stoici complectuntur . Cum animus , inquit Tullius , movetur placide atque constanter , tum illud gaudium dicitur : cum autem inaniter , atque effusè animus exultat , tum illa lætitia gessiens , vel nimia dici potest , quam ita definiunt , *fineratioe animi elationem* . At delectatio aut oblectatio est voluptas quietior ; exultatio mobilior , quæ ut hilaritas , vultu aut gestu se prodit .

3. Non dissimili ratione molestia corporis est , vel animi : hæc tristitia , vel ægritudo animi vocitatur , quæ definitur à Stoicis *animi adversante ratione contractio* ; vel opinio recens mali præsentis in quo demitti contrabique animo rectum videatur . Huic subjiciunt varias species , quas Cicero numerat , & definit ex mente Stoicorum . Sic *miseriordia est ægritudo ex miseria alterius injuria laborantis* . Nemo , inquit , parricidæ aut proditoris supplicio misericordia commovetur . Angor , seu angustia , sic dicta quod premat , & in arctum deducat , est *ægritudo premens* ; dolor ægritudo *crucians* ; afflictatio est ægritudo cum vexatione corporis ; mæror ægritudo *flebilis* ; lamentatio ægritudo cum ejulatu ; luctus ægritudo ejus qui carus fuerit , *interitu acerbo* . Adde his indignationem , qua quis ægrè fert , quod bonis mala , & malis bona indignè accidunt .

Est quædam tristitia nobis utilis : cujus Sapiens identidem meminit : ut Eccles. 7. *Cor sapientium , ubi tristitia ; & cor stultorum , ubi lætitia* . Sed ut affectus aut animi ægritudo , plus habet mali quàm boni .

Hinc Sapiens prov. 25. *Sicut tinea vestimento; & vermis ligno, ita tristitia viri nocet cordi.* Est enim instar veneni lentī, quod acres dolores non parit: sed mortem sensim arcessit; ut vermis vestem, putredo lignum: utrumque enim prius exeditur, quàm vermis ipse videatur. Hinc quæ animam lætitia solent perfundere, ea dejecto præ tristitia animo sunt molesta. Quo quidem modo illud Salomonis eodem in loco est intelligendum. *Acetum in nitro, qui cantat carmina cordi pessimo*, Hebraicè, *afflicto*. Nitrum enim illud quod in Ægypto plurimum est, & ex quo, ut ait Tacitus, vitrum conficitur, cum aceto mixtum tumultuatur & fermentescit, non item salpetræ, qui vulgò nitrum dici solet. Illud rectè nos admonet Siracides: *Tristitiam ne des animæ tuæ, & non affligas te metipsum in consilio tuo*. Nam tristitia, ut scitè vir doctiss. animadvertit, pœnas exaggerat, & quæ videntur mala, in vera commutat. Itaque in negotiis sic occupatio quærenda, ut ægritudinem animi non afferant: exercendo enim animo data sunt, non ut sint ejus supplicia, *Ad speciosa*, inquit Seneca, *tormenta alligatus sub ingenti titulo*.

4. Restat cupiditas, quæ a Cicerone libido nominatur. *Letitia*, inquit, & *libido in bonorum opinione versantur*: cum libido ad id quod videtur bonum illecta & inflammata rapiatur; lætitia ut adepta jam aliquid concupitum, efferatur, & gestiat. Sic itaque ab eo definitur, *opinio venturi boni*,

ni, quod sit ex usu jam præsens esse. Nec solum in iudiciis & opinionibus perturbationes positas esse docet; sed etiam in ipsa animi commotione: ut ægritudo, inquit, quasi morsum aliquem doloris efficiat; metus recessum quemdam animi & fugam; letitia profusam hilaritatem; libido effrenatam appetentiam. Cupiditatem desiderii nomine solemus designare: quamvis propriè desiderium sit, definiente M. Tullio, libido eius qui nondum adsit, videndi.

Hoc autem cupiditas ab amore differt, quòd amor in bonum, quodcunque illud sit, aut præsens aut futurum; cupiditas in bonum ut absens feratur: amor bonum ut delectationis causam; cupiditas ipsam voluptatis creationem, quæ nondum sit, attendat: amor præcedat, sequatur cupiditas. In utraque affectione spiritus animales versus bonum effunduntur quodammodo; sed in amore id velut brachiis, sic cogitatione mens complectitur: per cupiditatem in bonum ipsum possidendum instar sagittæ vibratur, & velut alis subvecta in id evolat. Vis imaginatrix in amore circa rei imaginem, ut delectationis effectricem occupatur. Cupiditas voluptatem, quæ nondum est, expetit; contentionem adhibet, ut bono fruatur, & indigentiam suam, aut veram, aut opinione præsumptam expleat: unde inquieta est, & sollicita.

5. Hoc autem commune est affectibus, qui in voluptatem definunt, ut sanguinem & spiritus vehementius commoveant.

Sic

Sic in amore qui id ipsum quod efficere voluptatem potest, cogitatione & affectu complectitur, & in cupiditate quæ in id bonum tendit, uberior sanguis e corde in partes corporis impellitur. Quæ diximus de amore & cupiditate, ad odium & fugam, in quibus est averfatio quædam animæ, transferri facillimè possunt.

6. Reliqui affectus ex his derivantur, ac novum iis iudicium, aut opinionem addunt: cum adest opinio venturi boni, tum spes oritur, quæ à cupiditate separari non potest: secus iudicium solum, non affectus erit. Itaque animæ ipsius commotio, quæ ex bono ut possibili iudicato oritur, spes dicitur, & inter affectus numeratur: cum in securitatem abit, tum lætitiæ & cupiditatis permistio alium creat affectum ex certa opinione illius boni, quod ferè ut præsens iudicatur: est enim securitas spes quædam consummata. In iis utique affectibus animus ad agendum erigitur, & ex præfensione quadam voluptatis fit alacrior.

7. Hinc spes ut plurimum audaciam gignit, quæ adversus molestias, labores & pericula insurgit, & contentionem adhibet. Quæ enim spem, eadem audaciam procreant, ætatis, aut temperamenti vigor, ira, opes, conscientia, robur, peritia. Id verò nos fallit maximè, quòd in rebus fluxis spes nostras collocemus. Homines quippè magnas spes præbent, tum se excusant, deinde contemnunt, tandem nos produnt, ait vir doctus. Sic temerè credi-

credimus, stultè speramus, & perversè diligimus. Fides, spes, charitas præcipuæ sunt virtutes, cum ad Deum referuntur: summa animi vitia, ubi in rebus creatis hæremus. *Dens putridus, & perlassus qui sperat super infideli in die angustiae, & amittit pallium in die frigoris.* Prov. 25.

Ut securitas, aut fidentia ex certa opinione venturi boni, ita desperatio ex spei imminutione proficiscitur; neque affectus rationem habet, quatenus est opinio non venturi boni, sed quia ex tristitia & cupiditate conflatur.

8. Non dissimili ratione metus tristitiæ addit opinionem impendentis mali. Cum autem vix anima bonum, aut malum percipiat, quin unà commoveatur; hinc fit ut affectuum nomina iis perceptionibus, aut judiciis plerumque tribuamus. Nam voces quibus utimur, ut affectus compositos, spei, audaciæ, timoris, iræ, pudoris, & alios hujus generis designemus, multas involvunt ideas, quas compendii causa contrahimus & una voce complectimur. Sunt enim hi affectus nobis maximè familiares, & confuse cogniti: contra atque evenit in ideis mentis quæ claræ sunt & distinctæ, sed minus usitatæ & familiares.

Sic numerorum ideas clarè percipimus, sed eæ minùs nos afficiunt, quòd nimirum sint abstractæ, ac minus ad nos pertineant. Unde & quasdam adhibemus notas, quibus ideas mente conceptas designemus.

Con-

Contrà sensuum impressiones , & animi commotiones fortiùs nos afficiunt , nobis adeò sunt magis familiares ; & licèt confusè admodum percipiantur , tamen eas à nobis bene intelligi facilè nobis persuademus : quòd sine magna contentione se sistant animo , & confuso quodam sensu , aut motu eum percellant . Ac voces illæ ex pluribus ideis confusis & obscuris conflatæ ideas itidem confusas , sed vividas excitant , quas dum evolvere & distinctè percipere volumus , multa in eadem voce , timoris v. g. aut pudoris distingui oportere animadvertimus ; iudicium nimirum , aut perceptionem illius rei , ut ad nos refertur ; motum & sensum quemdam animæ ; impressionem quæ fit in cerebro , spirituum agitationem , ex qua rursus nova in anima commotio exoritur ; ac demum suavitas quædam omnibus etiam tristioribus affectibus superfusa .

Ac sæpè fit ut affectus nomine , aut solum animi iudicium , aut solam illius commotionem vel spirituum agitationem designemus ; hinc summa in affectuum vocabus , & maximè eorum qui sunt magis compositi , oritur confusio .

9. Idem porrò affectus ut gradibus , aut objectis , aut variis percipiendi modis differt , diversa plerumque nomina sortitur , quæ sigillatim explicare non possumus . Spes itaque , metus & quædam animi fluctuatio , seu ut loquuntur , irresolutio inter spem & metum interjecta , sunt quædam cupiditatis species . Metui plures subjecti sunt affectus , quos Cicero ex mente Stoicorum

corum definit, *Pigritiam, metum consequentis laboris, terrorem, metum concutientem; timorem, metum mali appropinquantis; pavorem, metum mentem locomoventem; exanimationem, metum subsequenter, & quasi comitem pavoris; conturbationem, metum excutientem cogitata; formidinem, metum permanentem.* Jam verò ut spes non est sola opinio venturi boni, sed est quædam elatio animæ ob opinionem ejus boni, quod concupiscit: sic metus non est simplex opinio venturi mali, sed quædam depressio aut contractio animi ob superadditam opinionem, quòd id malum sit adventurum. Atque illud manifestum est, spem & metum sic inter se opponi, ut simul tamen misceantur. Cum enim nullus est metus, jam non spes, sed fidentia est, aut securitas. Hinc illud Hecatonis apud Senecam, *desines timere, si sperare desieris.*

10. Sunt alii affectus ex simplicibus magis compositi, sive ex cupiditate & electione, ut ira & impudentia; sive ex cupiditate & tristitia. Imò interdum ex pluribus conflantur. Risus ex lætitia, cupiditate & admiratione proficiscitur: cum res aliqua non injucunda ex improvviso accidit, & alium lætitiæ nostræ participem efficere volumus.

11. Ut lætitiā risus, sic tristitiā lacrymæ plerumque consequuntur; de hoc utroque affectu postea: id unum interim observandum, cur lacrymæ in luctu sint suaviores, eam videri rationem, quòd prematur velut iniquo pondere pectus in luctu,

tu,

tu, oppletisque sinibus cordis, & pulmonum vasis teneantur præcordia, non sine angore & difficultate recipiendi spiritus. Itaque in tristitia per lacrymas velut exoneratur dolor, qui inclusus animam præfocat, & intus inæstuans vires suas cogendo multiplicat. Ita ferè vir disertissimus P. Olivarius in Dissert. Academicis. Unde id experientia discimus quod ab Ovidio fuit observatum.

Est quedam flere voluptas,

Expletur lacrymis, egeriturque dolor.

Hinc spectaculum tristius, quanquam doloris causa, ob ipsum tamen dolorem expetitur: quod illud sequatur blanda & suavis doloris acerbi vacuitas, atque omnis delectatio in molestiæ amolitione consistat.

II. Ita verò ex omnibus ferè affectibus videtur conflata: est enim, ut definit Gassendus, *affectus quo anima præ dolore ob injuriam acceptam, & odio in illius auctorem concepto, pectore incalescente, ad ulciscendum concitatur, ut autorem facti pœniteat.* Hinc doloris levandi gratia qui irascitur, vindictam appetit. Unde Aristoteles in Rhetoricis iram definit *cupiditatem cum dolore conjunctam*; eamque esse ultionis apertæ subinde admonet: quod confirmat. libro 7. Eth. iram nempe esse affectum apertum & minimè insidiosum. Iratus enim despici se putat præter id quod decet, ut ipse loquitur. Nisi enim læsio videatur injuria, seu animo lædendi illata, plerumque non irascimur. Lenitas verò
nihil

nihil est nisi sedatio, aut remissio iræ, ut definit Aristoteles : cum scilicet injuria aut videtur nulla, aut leviter fertur.

Tres vulgò species iræ afferuntur, bilis seu excandescencia, quæ est ira subita, aut subito excandescens. Hanc iræ speciem in vita Soceri sui Agricolæ pulchrè adumbrat C. Tacitus. *Ceterum, inquit, ex iracundia nihil supererat : secretum ejus & silentium non timeres ; honestius putabat offendisse, quam odisse* 2. Amaritudo, quæ est ira perseverans : nam instar saporis amari molestè nos afficit, & diu perseverat. Hanc in Domitiano describit idem Tacitus. *Domitiani verè, inquit, natura præceps in iram, & quò obscurior, eò irrevocabilior*. 3. Furor, aut sævitia dicitur, cum iratus non acquiescit, dum ultus fuerit ipse se. Sic lenitatis species sunt mansuetudo erga omnes; clementia erga inferiores. Hi verò affectus, ira, zelus, odium virtutem hominis infringunt, & vitam contrahunt. *Zelus & iracundia minuunt dies ; & ante tempus senectam adducit cogitatus*. Eccli. 30. Ira cum est impatientis animi foetus, tum semper in vitio est, non item cum ex amore justitiæ proficiscitur. *Melior est ira risu : quia per tristitiam vultus corrigitur animus delinquentis*. Eccl. 7. Atque hæc ira adulationi est præferenda. Sed de ira, quæ est impatientis animi motus, eodem in loco dicitur. *Ne sis velox ad irascendum : quia ira in sinu stulti requiescit*. Ira enim ferè semper juncta est superbix.

Fa-

Fatuus statim indicat iram suam: qui autem dissimulat injuriam, callidus est. Pr. 12 Sæpe vox illa, callidus, prudentem significat, qui patienti animo, non odio maligno, & ulciscendi desiderio iram dissimulat, ut Absalon. *Grave est saxum, & onerosa arena sed ira stulti utroque gravior.* Prov. 26.

Nihil hic dicimus de pudore, qui aut est virtus, quæ modestia dicitur, aut passio ex metu justæ reprehensionis, aut potius ex confusione quadam animi, vel ex opinione præsentis infamiae excitata. Atque ii sunt præcipui affectus animi: quos autem illi vel in sanguine, vel in spiritibus & pectore ipso motus procreent, quibus signis se prodant, nunc explicare conabimur.

Q U Æ S T I O VI.

Qui sit sanguinis & spirituum motus in affectibus animi, & unde præcipui eorum characteres ducantur.

HOC argumentum, ut par est, tractare non possumus, nondum explicatis quæ ad motum sanguinis, cordis fabricam, & nervorum origines pertinent. Quare ea tantum dicemus quæ intelligi utcunque poterunt, & quorum non inutilis, nec ingrata contemplatio futura est. Ac primum quidem illud meminisse oportet, affectus nostros spirituum & sanguinis motu contineri. Unde quibus est uberior sanguis

guinis & spirituum copia iidem majore perturbationum æstu agitantur. Sic juvenes plerumque sunt audaciores, quidvis aggrediuntur, magnas spes foveant. Contra, quibus aut sanguis frigidior est, aut pauciores spiritus, ii quidem sunt timidiores, & omnia scrupulosè expendunt. Quanta autem sit vis in spirituum copia, & turbulento eorum motu vel ex ebriis discimus, qui spei & audaciæ pleni nihil sibi arduum putant.

*Quid non ebrietas designat, operta recludit,
Spes jubet esse ratas, in prælia trudit inermē.
Sollicitis animis onus eximit.*

Idem ferè de juvenili etate sentiendum: hæc quippe, ut vir nobilissimus observat, est continua quædam ebrietas & febris quædam rationis, quæ spe, audacia, & jugi ambitione agitur.

2. Cum affectus sint motus quidam naturales, non voluntarii: siquidem nobis inscitiis, & invitis plerumque perficiuntur, ii potissimum ab iis pendent nervis, qui ex cerebello, seu ex parte cerebri posteriore orti in cor, pulmones, & viscera sparguntur. Hi nervi variis in locis cordis & pulmonum vasa complectuntur, & stringunt, ut sanguinem modò promoveant, modò retardent, ut passio quæque exegerit. Multis etiam in locis cum iis nervis qui a cerebro oriuntur, & imaginationis subduntur imperio, ineunt commercia, ut ad diversas imaginationis ideas sese

accommodent. Quare in omni affectu paulò vehementiori sanguis & spiritus non in cerebrum modo, ubi idea objecti depingitur, sed in alias quoque corporis partes diffunduntur, ut corpus in eo situ & habitu quem affectus exigit, constituent. Hinc non vultus tantum, os, frons, oculi, sed etiam vox ipsa, manuum, cervicis, & totius penè corporis motus, animi commotionem produnt, & adjuvant. Sic perturbationes animi, imo vitia ipsa extrinsecus se produnt. Hinc Salomon Pr. 6. *Homo apostata, vir inutilis graditur ore perverso.* Non enim verba actionibus respondent, *Annuat oculis, terit pede, digito loquitur, pravo corde machinatur malum, & omni tempore jurgia seminat.* Quæ omnia levitatem animi & cordis pravitatem indicant.

3. Quo spirituum & sanguinis motus juxta ideam conceptam, & affectum animi certa lege dirigatur, arterias ipsas (seu vasa quibus cor sanguinem cum impetu in omnes partes mittit) nervuli variis in locis stringunt; cumque uberiore sanguinis & spirituum copia cerebrum indiget, tum arteriis quæ in reliquas partes corporis sanguinem mittunt, constrictis, uberior sanguis in caput propellitur. Contra evenit ubi minus sanguinis aut spirituum in cerebro requiritur: tum enim constrictis arteriis quæ in caput feruntur, reliquæ fiunt laxiores: parciior quoque è corde sanguis erumpit, quod vasa cordis, nervorum qui ea circumligant ope, stringantur arctius. Hinc pallet vultus, ac sæpe

sæpe totum corpus spiritibus destitutum tremit.

4. Cum duo sint affectuum genera, alii in voluptatem, alii in tristitiam desinant; prioris generis affectuum hi sunt ferè motus & characteres.

1. Si quid jucundum aut mirabile, & inexpectatum sese vi imaginatrici offerat, statim cordis sinus, seu ventriculi dilatantur, nervorum scilicet beneficio, qui ibi sunt plurimi, & animi justa in momento exequuntur. Sanguis celerius per pulmones trajicitur, exspiratio fit frequentior: cum scilicet diaphragma, seu septum transversum quod indefinenter sursum deorsumve pellitur, & præcipuum est respirationis organum, pulmones velut ictibus repetitis urget; sanguinem è vasis pulmonum protrudit; aerem sæpe cum strepitu elidit: hinc cachinni, in risu maximè qui exsultantis lætitiæ effectus est. Unde varii musculorum in facie motus, quod magna sit inter diaphragmatis, & maxillarum nervos consensio.

2. Itaque in risu, cum res non injucunda & inopinata accidit, præ admiratione tolluntur supercilia, frons relaxatur; quique genas & labium superius movent musculi, per consensum attolluntur; diaphragma movetur celerius, plurimum aeris inspiratur, qui totus & simul exire non potest: unde & subsultim excussus sonum illum in ridentibus usitatum efficit. *Fatuus in risu exultat vocem suam, sapiens autem vix tacite ridebit.* Eccl. 27.

3. Sic

3. Sic in lætitia cor dilatatur, idque uberiorem excipit & emittit sanguinem: hinc rubor in facie, dum arteriæ plus afferunt sanguinis, quàm venæ referre queant. Unde micant oculi, & corpus totum suavi calore perfunditur.

4. Id verò commune est affectibus qui in voluptatem terminantur, ut sanguinem & spiritus vehementius commoveant, atque in partes exteriores propellant: ut in amore, cupiditate, spe, audacia, videre est. Nec cujusque affectus characteres nunc vacat describere, cum id jam viri doctissimi præstiterint: perpauca duntaxat ex infinitis prope attingemus.

5. In amore, si quis sit ab omni alia perturbatione liber, vis imaginatrix circa rei quæ delectationem afferre potest, imaginem tota occupatur: quare *altum* in cerebro imprimitur vestigiū; magna spirituum copia eò confluit; *cerebri* fibræ vehementius concussæ *alias sibi* cohærentes in ejusdem motus societatem vocant: hinc quæ sunt cum re amata conjunctæ, eodem amore complectimur.

6. In cupiditate spiritus & sanguis a corde in totum corpus, & in artus maximo cum impetu feruntur: nam specie objecti anima permota in illius prosecutionem nititur: unde inquieta est cupiditas, atque ex ea motus penè omnes oriuntur.

7. Sic in spe imago aut opinio boni spiritus in cor emittit, quibus anima ad agendum erigitur. Hanc plerumque subsequi-

quitur audacia, in qua est magna pectoris contentio, plenior inspiratio, spiritus vehemens & sonorus, caput sese inflato collo obfirmat, ac demum elatis superciliis, corrugata fronte, defixis oculis, vultu truculento & minaci se prodit. Atque hæc magna ex parte pectoris tensionem consequuntur, ob musculorum & nervorum consensum.

8. Quædam audaciæ species est insolentia & impudentia. Insolens alios depri- mit, sese effert jactantius, impudens excusso omni infamiæ metu nulla decori habita ratione, quidvis aut dicit, aut facit. In iis omnibus vitales functiones cordis, pulmonum, thoracis; & diaphragmatis motus spirituum quoque & sanguinis æstus intentiores fiunt, aut crebriores. Hinc pulsus aut concitator, aut major: vox ipsis affectibus accommodata; calor toto diffusus corpore, rubor in facie ex uberiore sanguine. Atque ut motus sanguinis ipsis affectibus attemperetur, cordis & pulmonum vasa furculis nervorum ita stringuntur, ut juxta passionum impetus vasorum ora aut arctentur, aut referentur, ut variæ animi commotiones exegerint.

9. Sic in pudore quem Aristoteles definit dolorem & confusionem quandam circa quæ facere ad existimationis læsionem videntur, fit rubor in facie, ex perturbata primum phantasia, tum ex spiritibus cerebri in cor tumultuario irruentibus. Hinc enim aut sanguis effervesceat,

Phil. Burg. Tom. II. V. aut

aut tanto impetu ad extremas quæ in vultu sunt, arteriolas impellitur, ut eum venulæ referre in cor non possint: unde in facie restagnans ruborem efficit.

10. Audaciam ira plerumque comitatur. In hac perturbatione cor & sanguis contrariis velut motibus, doloris ex accepta injuria, & voluptatis ex meditata ultione sic agitantur, ut ex ea lucta fervor quidam sanguinis & igneus calor oriatur. Hinc sæpe vultus rubet, ardent oculi, pulsus & crebrior & vehementior. Audacia quoque animum addit, magna vi ultionem aggreditur. Hinc tolluntur supercilia, frons adducitur: labiorum diductio, dentium compressio, defixus obtutus audaciam, indignationem, & furem indicant. Fortes minus irasci solent, quod se contemni tam facile non credant, quàm debiles & propriæ infirmitatis conscii. Hinc mulieres facilius irasci solent. *Non est caput nequius super caput colubri, & non est ira super iram mulieris.* Eccli. 21. Species enim vis imaginatricis facile excutiuntur: quod fibræ cerebri sint tenues, spiritus mobiles, vis imaginatrix fortior. *Melius est habitare in terra deserta, quàm cum muliere rixosa, & iracunda.* Pr. 2. Videant qui se his catenis temerè induunt, quæ magno gravant pondere, & morte tantummodo disrumpuntur. Nunc ad oppositos affectus veniendum.

1. In tristitia, aversatione, metu, desperatione, pusillanimitate, & segnitie sanguis rarior è corde in corpus manat.

Hinc

Hinc pulsus in tristitia tardior, & minor, pallent genæ, pauciores spiritus gignuntur, torpet lingua, pectus contrahitur, diaphragma non succussim ut in risu; sed uno tenore, & lento deprimitur. Sæpè fiunt gemitus & suspiria, cum sanguis nimium in pulmonibus restagnans magna expiratione propellitur. Cum enim rei noxiæ aut præsentis, aut imminentis imago animum percellit, hunc sæpè adeò totum occupat ut ne vitales quidem functiones spirituum inopia ritè obeat. Hinc motus cordis interciscus; partes exteriores sanguine & spiritibus fraudatæ labascunt, artus tremunt, vox ipsa tremula, intercisa plerumque, & debilis respiratio.

2. Ut lætitiā risus, sic tristitiā lacrymæ plerumque consequuntur: cum enim humor qui palpebras & globum oculi proluit, ex tristitia, aut ex alio affectu est uberior, tum lacrymæ dicuntur. Ea verò feri copia è venis exprimitur, cum per fibras, aut nervulos contrahuntur: tum enim constrictis venulis plus feri per glandulas percolatur; in omnibus autem glandulis sunt ductus, seu vasa quæ serum percolatum excipiunt. Cum lacrymas reprimere in nostra ut plurimum potestate situm sit, palam est eam venularum constrictionem quæ fit in glandulis, nervorum, qui sunt in iis partibus copiosi, & spirituum animalium ope effici. In ira quidem & lætitiā sanguis a corde manat uberior, sed præ tristitia medii venarum ductus in facie potissimum & oculis stringuntur. Hinc il-

la muscutorum inter flendum contorsio . Sed neque animi æstus, nec vasorum contractio ad lachrymarum profusionem sufficeret, nisi materia in ipso sanguine his procreandis esset idonea: unde & lacrymæ interdum sistuntur, assumpto potu mox redituræ: magna etiam sanguinis copia in cordis sinum dextrum illapsa serum uberius suppeditat. Hinc crebri gemitus, rubent genæ, & facies intumescit. Pueri, senes, mulieres facilius lacrymantur, quàm mediæ ætatis viri, quod fortè in illis sit sanguis serosior. Atque hi sunt præcipui affectuum characteres, & motus qui ad Physicam & Moralem æquè pertinent, quique a nobis omnino prætermitti non debuerunt. Tametsi multò facilius intelligentur, cum in tertia parte Physices partium corporis structura & usus motus itidem sanguinis & spirituum fuerint explicati.

Q U Æ S T I O U L T I M A .

Utum hi affectus boni sint aut mali.

Magna fuit olim inter Stoicos & Peripateticos de affectuum bonitate aut malitia contentio, quam plerique in vocibus magis, quàm in rebus ipsis positam credidere. Stoici in ea quidem fuerunt opinione omnem animi perturbationem malam esse, & rationi contrariam. Peripatetici contra passiones moderatas, & rationi subjectas bonas esse, ut effrænes in malis, ha-

habendas pertendebant. At quæ hæc sententia cum rationi, tum Christianæ religioni magis videtur consentanea: sit igitur

Unica Conclusio.

Affectus non sunt extirpandi, sed regendi; nec mali dici possunt, cum intra rationis fines continentur.

Prob. concl. 1. Quia passiones sunt motus appetitus sentientis, iique naturales: ergo natura sua malæ esse non possunt.

Prob. 2. Virtutes circa affectus animi versantur, non ut eos stirpitus evellant: id enim fieri non potest, nec debet. *Nihil dolere*, inquit Crantor apud Ciceronem, est immanitatis in animo, stuporis in corpore. Sed in id virtus incumbit ut affectiones animi rationis imperio subdantur, & extra naturæ fines non excurrant. Unde eas Christus Dominus, cum opus fuit, adhibuit. Et quidem in Christo passiones non prævertebant, sed sequebantur rationem: in nobis sæpè præcurrunt. Hinc August. l. 9. de Civit. Dei. *In disciplina nostra non tam queritur utrum pius animus irascatur, sed quare irascatur, nec utrum sit tristis, sed unde sit tristis: nec utrum timeat, sed quid timeat. Irasci enim peccanti: ut corrigatur, contristari pro afflictio ut liberetur, timere periclitanti ne pereat, nescio utrum quisquam sana consideratione reprehendat.*

Confir. Passiones ex natura sua, nec laude

nec vituperatione nos dignos efficiunt, sed virtutum sunt instrumenta: quæ si reguntur a ratione, laudem merentur, si modum exceſſerint, in vitio ſunt. Qui autem eas omnino condemnant, ii nec finem earum, nec uſum, nec naturæ humanæ conditionem ſatis conſiderant: ſunt enim ad corporis conſervationem, & tuendam humani generis ſocietatem datæ. Tolle voluptatem omnem, aut dolorem, nulli erunt ejus quod bonum eſt, aut malum characteres ab Authore naturæ impreſſi, quibus utilia a noxiis ſeparemus: ſpe omni ſublata, quid jucundi ſuperest in vita? Idem liquebit cæteros affectus percurrenti. Sic miſericordia ſine immanitate quadam, metus ſine temeritate non eripitur. Metum enim ſi ſuſtuleris, omnem vitæ diligentiam ſimul tolles: hæc enim ſumma eſt in iis qui leges, qui paupertatem, qui ignorantiam, qui mortem timent. Sic utilis eſt miſericordia ad opem ferendam, & calamitates hominum ſublevandas. Qui autem contra ſentiunt, quique ne dolorem quidem inter mala numerant, hi fruſtra ratiunculas adverſus communem hominum ſenſum, & experientiam colligunt; ii que dolorem, aut ægritudinem alia animi perturbatione, ſuperbia nimirum, & virtutis ſuæ opinione, lenire conantur. Hinc Aug. l. 14. de Civit. Dei, *non quia durum aliquid, ideo rectum; aut quia ſtupidum eſt, ideo ſanum.*

Solvuntur objectiones.

Multa opponunt Stoici quæ M. Tullius l. 3. & 4. Tuscul. fusè persequitur, quæque uno item & altero argumento comprehendì possunt. Affectus, inquiunt, sunt animi perturbationes, sed conturbatus animus non est aptus ad exequendum munus suum, quod est ratione bene uti: quemadmodum oculus conturbatus non est probè affectus ad suum munus fungendum, totumve corpus à statu cum est motum, deest officio suo & muneri, nec manus affecta rectè est, cum in tumore est: sic igitur inflatus & tumens animus in vicio est. At iratus animus velut turgescit; cupita quo læsus videtur, ei quàm maximum dolorem inurere; ex quo fit ut alieno malo gaudeat: quod utique in sapientem non cadit. Cum igitur perturbationes sint motus turbidi & morbi animi; cumque eos sanos dicamus, quorum mens motu quasi improbò perturbata nullo sit: qui contra affecti sunt, hos insanos appellari necesse est. Atque ut corpus etiam si mediocriter ægrum est, sanum non est: sic si in animo est illa mediocritas, caret sanitate.

Resp. diff. maj. Affectus sunt perturbationes, & morbi animi, cum rationis fines prætergrediuntur, & malè iis utimur, C. Cum passiones sunt moderatæ, & rationis dicto audientes, N. Sunt enim virtutum instrumenta, quæ utiliter possunt adhiberi.

Contra, *inquiunt*, nulla libido, nequidem mediocris, bona esse potest: sed passio omnis libido quædam est: sic iracundia definitur ulciscendi libido. Hinc Christus Dominus, Matth. 5. *Omnis qui irascitur fratri suo, reus erit iudicio*. Et Prov. 20. *Nè dicas, reddam malum: expecta Dominum, & liberabit te*. Et Eccli. *Homo homini reservat iram, & à Deo querit medelam*.

Resp. Dist. min. Passio effrænata, quæque excessu peccat, libido quædam est. C. Passio à ratione temperata, N. Unde qui effrænata feruntur libidine, aut iracundia, hos exiisse è potestate mentis dicimus, cui regnum totius hominis a natura tributum est. Hoc igitur modo ira, quatenus ultionem meditatur, aut extra rationis limites excurrit, a Christo Domino prohibetur. Unde in Græco ea vox habetur *ἐκ τῆς φύσεως* sine causa. Eaque in Latinis exemplaribus ante Hieronymi tempora legebatur, & in Syriaca versione quæ vetustissima est, *sine causa*, reperitur, Sic Verba Sapientis intelligi debent de ira quæ ultionem expetit, quæque justitiam Dei non operatur, quæ in proximi nocumentum tendit. Nam ultio ad Deum, patientia ad hominem pertinet.

Opp. 2. Omnis concupiscentia est mala: unde ab Apostolo peccatum appellatur, quod ex peccato nata sit, & ad peccatum inclinet: sed passionēs, seu motus appetitus sentientis nihil sunt nisi motus concupiscentiæ, seu libidines quædam, quæ nos ad terrena deprimunt: unde

unde & ab Apostolo *passiones peccatorum* nominantur : ergo passiones omnes malæ sunt , cum ex iis omne malum oriatur .

Resp. neg. min. Neque enim confundere debemus appetitus sentientis motus , seu passiones , cum concupiscentia ,! seu cum libidine aut effrænato motu appetitus . Per appetitum sentientem animus cum corpore , & iis quæ ad corporis salutem pertinent , conjungitur ; per concupiscentiam animus corpori , & rebus quæ circa nos positæ sunt , quodammodo subjicitur , eamque in baptizatis peccatum non esse , sed malum quoddam , ut corruptionem corporis , ut ignorantiam , ut infirmitatem , & languorem , pluribus argumentis contra Iulianum probat S. Augustinus . Ego inquit l. 6. *tāquam valetudinem malam ex origine vitiatā ingentum dico esse homini vitium , quo caro concupiscit adversus spiritum , & hoc malo bene uti pudica conjugia : sed isto mali usu bono laudari utentem , non ipsum malum .* Et scribens ad summum Pontificem lib. 1. *Sed hæc , inquit , concupiscentia etiam si vocatur peccatum , non utique quia peccatum est : sed quia peccato facta est , sic vocatur : sicut scriptura manus cuiusque dicitur , quod manus eam fecerit .*

Opp. 3. Invidia est passio quædam , sed ea mala est & in virum sapientem non cadit : ergo sunt quædam passiones malæ .

R. Non omnes animi affectus etiam pra-

vos a nobis excusari: sunt enim quidam qui ad concupiscentiam magis, quàm ad naturam appetitus sentientis pertinent, cuius generis est invidia, quæ magis inter vitia quàm inter passiones numeratur. Nec bene meo quidem iudicio concludit Cicerone eandem esse misericordiæ & invidiæ rationem. *Quandoquidem*, inquit, *miser cordia ægritudo est ex alterius rebus secundis. In quem igitur cadit misereri, in eundem etiam invidere. Non cadit autem invidere in sapientem: ergo ne misereri quidem.* Pessima, inquam, conclusio: cum unum sit humanitatis, alterum immanitatis cuiusdam; misericordia naturæ, rationi, & pietati est consentanea; invidia naturæ ipsi adversa. *Vita carnum sanitas cordis: putredo ossium, invidia.* Prov. 14. *Omnis superbus, invidus.* Aug. in Ps. 58. Nam præ superbia vult excellere, & aliorum excellentiam ferre nequit. Et c. 23. *Ne comedas cum homine invido, & ne desideres cibos ejus.* De misericordi autem, *Fæneratur Domino, qui miseretur pauperis, & vicissitudinem reddet ei.*

Sed, *inquiunt*, perturbationes, seu passiones, nihil sunt nisi turbidi animorum, concitatique motus, averſi a ratione & inimicissimi mentis, vitæque tranquillæ: sed vitium est non parere rationi, ac frustra modum vitio quærimus: quæque crescentia pernicioſa sunt, eadem sunt vitioſa nascentia. Quamobrem, *inquiunt*, nihil interest utrum moderatas perturbationes approbent, an moderatam injustitiam aut moderatam ignaviam: qui enim vitiis

mq-

modum apponit, is partem suscipit vitiorum. Quod cum per se odiosum est, tum eò molestius, quod ea sunt in lubrico, incitataque semel in proclive labuntur, sustinerique nullo modo possunt. Ita ferè M. Tullius lib. 2. Tuscul.

Responsio facilis est: affectus concitados & turbidos malos esse, non item moderatos: quos etiam utiliter à natura datos ostendimus. Quod enim Iulianus apud S. Augustinum malè de concupiscentia, hoc de affectibus aptissimè dici potest. *Hujus, inquit, appetitus non in genere suo, non in specie, non in modo culpa est, sed in excessu: quia genus ejus & species ad Conditoris operam pertinent, modus ejus ad arbitrium bonestatis, excessus ad vitium voluntatis.* Id, inquam, de affectibus animi non disertè modò, sed etiam verè dici potest. Quod autem nunc animus perturbatus & incitatus nec cohibere se possit, nec quo loco vult, insistere, ut M. Tullius opponit, ea non est natura instituti hominis, sed pœna damnati: atque ipsa concupiscentia in vitio est. Unde Cicero, ut refert, S. Augustinus, *Hominem dicit, non ut à matre, sed ut à noverca natura editum in vitam, corpore & nudo & fragili, & infirmo: animo autem anxio ad molestias, humili ad timores, prono ad libidines: in qua tamen inesset tanquam obrutus quidam diæmonis ignis ingenii, & mentis.* Sed ut objicit Augustinus, *rem vidit, causam nescivit:* nempe peccati originalis labem. Hinc non disertè modò & nervosè, sed etiam

V. 6 verè

verè Plinius l. 7. in procemio *Facet manibus, pedibus devinctis flens animal ceteris imperaturum, & a suppliciis vitam auspiciatur, unam tantum ob culpam, quia natum est. O demerentiam hominum existimantium à talibus iniuriis ad superbiam se genitos!* Et sanè ipsis affectibus ea labe se prodit. Hinc Cicero apud August. l. 4. contra Iul. cap. 15. *Ex quibus humane vitæ erroribus & ætumnis veteres illi divina mentis interpretes aliquid vidisse videantur, qui nos ob aliqua scelera in vita superiore suscepta, pœnam luendarum causa natos esse dixerunt: sic nostros animos cum corporibus copulatos, ut vivos cum mortuis esse conjunctos. Sic morbi hæreditarii a parentibus in filios transmittuntur. Imo & animi vitia quotidie ex parentibus in filios manant. Quin & vitia regionum, ut superbia, astutia, avaritia, ut de Cretenfibus ait Apost. Tit. 1.*

Hæc adeo est solutio difficultatis, quam Ecclesiastes, c. 7. proposuit, & uno verbe dissolvit. *Solummodo hoc inveni, quodd fecerit Deus hominem rectum, & ipse se infinitis miscuerit questionibus. Quis talis ut sapiens est? & quis cognovit solutionem verbi?* Deus videlicet cum recta voluntate hominem condiderat, hic in mille difficultates se induit, & contrarias in seipso qualitates collegit, ignorantia & intelligentia, stultitia & rationis, exælli & abjecti animi. Quis sapiens ut hoc mysterium adeo reconditum penetraret, quod sapientes evolvere non poterunt?

Instant. Affectus animi concitatiores non sunt in nostra potestate, nec regi a ratione possunt : non enim agitati spiritus subsidunt , neque æstus sanguinis facile sedatur . Hinc lucta carnis & spiritus ; dum anima in contrarias partes distrahitur . Sic timor cor & spiritus contrahit , & partes corporis ad fugam comparat . Mens contra sibi fugæ dedecus proponit , periculum in fuga , victoriæ gloriam . Ergo affectus animi sunt rationis inimici & mali.

Resp. Hæc magna ex parte vera esse de concitatis affectibus , de quibus hoc loco non agimus . Quanquam ratio , si minus despoticum , magnum tamen in appetitum sentientem habet imperium : dummodo experiri vires suas velit . Fateor quidem sanguinis & spirituum agitationem vehementer animam percellere , nec compesci facile posse ; sed cum appetitus commotiones non valet pro imperio regere , artem & industriam adhibet . Atque in hoc vis animi , consistit , ut passionum impetu non abripiatur : Objecta sibi exhibere potest , quæ cum motibus oppositis sint conjuncta . Primum enim animus partes corporis ad arbitrium regit , & quos passionis æstus penè extorquent , is retinet . Verum attentio mentis , solertia , diligentia , cautio , exercitatio sunt adhibendæ , flexu interdum & quodam circuitu opus est ; vis & intentio animi aliò convertenda , alia interim excitanda passio , quæ priorem elidat . Quod si canes quidam institui solent

solent ut ad conspectum perdicis maneant immoti, & audito bombardili sono statim in perdicem involent: an ratio in homine quantumvis infirmo, vel cultura animi, vel industria, ut nihil de divina gratia dicam, id præstare non poterit; ut mens adversus objectorum impressiones, & passionum impetus se confirmet? Id verò fatendum est, plerosque homines perturbationum impetu abripi. *Vade contra virum stultum, & nescit verba prudentiæ.* Prov. 1. Nam affectus effrænes animum turbant, & lumen rationis penè extinguunt: sæpè potius is deferendus, quàm cum illo certandum: non enim capit verba prudentiæ. Et c. 16. *Expediit magis ursæ occurrere raptis fabibus, quàm fatuo confidenti in stultitia sua.* Idcirco enim stultus est, qui non ratione, sed æstu perturbationum adducitur. Nihil justum putat, nisi quod ipse facit. *Si contuderis stultum in pila, quasi prisanas feriente super pilo, non auferetur ab eo stultitia ejus.* Prov. 27. Non enim vi aut minis hominum perturbationes sanantur: sed Deus solus sanare potest.

Opponunt in diversum Epicurei, aut Cyrenaici potius, omnes passionum æstus esse naturæ consentaneos; voluptatem iis, ut boni characterem ab Authore naturæ adhærescere: his adeo impunè & citra culpam nos indulgere posse; undè, inquiunt, & nobis sunt cum belluis communes, nec vitiosæ esse possunt animi affectiones.

Responsum jam alibi fuit, voluptatem, adde & passiones ipsas bonas esse ad corpus
com-

comparatas , non item si ad animum quæ est hominis pars præcipua referantur , ni intra naturæ & rationis fines coerceantur . Quod si enim perturbationes modum excesserint, homini erunt perniciosæ & pestiferæ . Quod autem afferunt eas perturbationes nobis esse cum belluis communes, sic respondet Augustinus Juliano id ipsum objicienti, ut libidinem seu concupiscentiam defenderet . *Hæc autem, inquit, libido ideo malum non est in belluis, quoniam non repugnat rationi, qua carent.* Hocque ex Cicerone confirmat, ait quodam loco Tullius se non putare idem esse arietis & Publii Africani bonum .

F I N I S.



INDEX RERUM ET CAPITUM,

Commentarii in decem Li-
bros Ethicorum Ari-
stotelis .



P <i>Praefatio .</i>	3
Disputatio Proemialis. <i>De natu- ra Philosophiae Moralis .</i>	6
Quaest. I. <i>De objecto Philosophiae Mo- ralis .</i>	ibid.
Quaest. II. <i>Quod sit genus Philosophiae Moralis .</i>	II
Quaest. III. <i>De Philosophiae Moralis di- visione , & idoneo illius auditore .</i>	19

Tra-

ET CAPITUM.

Tractatus I. De summo Bono. 24

Disputatio I. De bono & malo in universum. 25

Quæst. I. Quid sit bonum. ibid.

Quæst. II. De Boni divisione. 28

Quæst. III. In quo posita sit natura mali? 40

Quæst. IV. Utrum malum quod malum appeti possit? 47

Disputatio II. De fine. 53

Quæst. I. Quid sit finis, & quoduplex. ibid.

Quæst. II. Utrum & quomodo omnia agent propter finem. 57

Art. I. Quomodo res & mentis compotes, & quæ omnis sensus sunt expertes agent propter finem. 58

Art. II. Quomodo bestię agent propter finem. 61

Quæst. III. De fine ultimo. 66

Disputatio III. De Beatitudine. 72

Quæst. I. De Beatitudine Philosophica. 73

Quæst. II. Quod sit summum hominis bonum, seu de beatitudine objectiva. 86

Quæst. III. De Beatitudine formali. 98

Tractatus II. De principiis actuum humanorum. 109

Dis-

INDEX RERUM

Disputatio I. De voluntate & voluntario .	110
Quæst. I. De voluntate .	ibid.
Quæst. II. Quomodo Mens & voluntas sese mutuo ad agendum determinēt .	115
Quæst. III. De voluntario .	125
Disputatio II. De libertate , & libero arbitrio .	138
Quæst. I. De nomine , notione & divisione libertatis , ac liberi arbitrii	139
Quæst. II. De existentia libertatis .	142
Quæst. III. De subjecto & radice libertatis .	150
Quæst. IV. Quæ necessitas libertati opponatur .	160
Quæst. V. Quid sit libertas ?	168
Disputatio III. De habitibus .	197
Quæst. I. De notione , existentia & divisione habituum .	ibid.
Quæst. II. Quid sit habitus ?	202
Quæst. III. De causis habituum .	213
Quæst. IV. Habituum proprietates explicantur .	220
Disputatio IV. De virtutibus & vitiis generatim .	229
Quæst. I. In quo posita sit virtutis natura .	ibid.
Quæst. II. De causis virtutum .	237
Quæst.	

ET CAPITUM.

Quæst. III. *Præcipuæ virtutum affectiones explicantur.* 246

Quæst. IV. *De virtutum divisione.* 260

Disputatio V. *De virtutibus & vitiis sigillatim.* 262

Quæst. I. *De prudentia.* *ibid.*

Art. I. *Quid sit prudentia.* 263

Art. II. *Prudentiæ munera explicantur* 265

Art. III. *Partes prudentiæ integrales exponuntur.* 268

Art. IV. *Quæ sint prudentiæ species.* 272

Art. V. *Vitia prudentiæ opposita perstringuntur.* 278

Quæst. II. *De fortitudine.* 282

Quæst. III. *De Temperantia.* 287

Quæst. ult. *De Justitia.* 296

Art. I. *Quid sit justitia.* *ibid.*

Art. II. *Partes justitiæ subjectivæ afferuntur.* 300

Art. III. *Partes justitiæ integrales perstringuntur.* 308

Art. IV. *Partes justitiæ potentiales.* 309

Art. V. *De Religione.* 320

Tractatus III. *De moribus, seu de humanis actibus.* 346

Disputatio prior. *De actibus humanis*

INDEX RERUM

<i>nis qui à voluntate eliciuntur .</i>	347
<i>Quæst. I. De actibus voluntatis .</i>	<i>ibid.</i>
<i>Art. I. De actibus voluntatis qui circa finem versantur .</i>	<i>ibid.</i>
<i>Art. II. De actibus voluntatis qui circa media occupantur .</i>	352
<i>Quæstio II. De prima actionum humanarum regula , seu de lege æterna .</i>	357
<i>Quæst. III. De recta ratione & conscientia .</i>	302
<i>Art. I. De recta ratione .</i>	<i>ibid.</i>
<i>Art. II. De conscientia .</i>	366
<i>Quæst. IV. De lege tum divina , tum humana .</i>	380
<i>Art. I. De jure divino .</i>	381
<i>Art. II. De lege humana .</i>	385
<i>Quæst. V. An sint actiones quædam humane indifferentes .</i>	388
<i>Disput. II. De affectibus animi .</i>	406
<i>Quæst. I. De natura affectuum .</i>	<i>ibid.</i>
<i>Quæst. II. De causis affectuum .</i>	411
<i>Quæst. III. De subjecto & numero affectuum .</i>	416
<i>Art. I. De subjecto affectuum .</i>	<i>ibid.</i>
<i>Art. II. De numero affectuum .</i>	424
<i>Quæst. IV. Admiratio, amor, & averfatio sigillatim explicantur .</i>	430
<i>Art. I. De admiratione .</i>	<i>ibid.</i>
<i>Art. II. De amore & averfatione .</i>	436
<i>Quæst.</i>	

ET CAPITUM.

Quest. V. *De reliquis affectibus.* 440

Quest. VI. *Qui sit sanguinis & spirituum
motus in affectibus animi, & unde
præcipui eorum characteres ducantur.*
452

Quest. ult. *Utrum affectus boni sint aut
mali.*

460

F I N I S.



